

慈善

後晉 劉 眗 等撰

中 華 書 局

卷一丸一至卷二〇〇下(傳)第 一 六 册

舊唐 書卷 一百九十一

列傳第一百四十一

方伎

葉法善 崔善爲 章慈藏 袁天綱 附 僧玄奘 孫思邈 薛頤 尙獻甫 甄權 弟立言 裴知古附 神秀慧能 明崇儼 孟詵 張憬藏 普寂 宋俠 嚴善思 義福附 許胤宗 李嗣眞 金梁鳳 一行 泓師附 乙弗弘禮 張文仲 李虔縱 張果 桑道茂

禝, 精,順非行僞,而庸人不脩德義,妄冀遭逢。如魏豹之納薄姬,孫皓之邀青蓋,王莽隨式而 懸知災異之來;運策揲蓍,預定吉凶之會。 夫術數占相之法,出于陰陽家流。 自劉向演鴻範之言,京房傳焦贛之法,莫不望氣視 固巳詳於魯史, 載彼周官。 其弊者肄業非

五〇八七

傳

第

百

四十一

方

伎

移坐,劉歆聞讖而改名;近者綦連耀之構異端,蘇玄明之犯宮禁,皆因占候,輔此姦兇。 要。舊本錄崔善爲已下,此深於其術者,兼桑門道士方伎等,並附此篇。 王禁星緯之書,良有以也。 國史載袁天綱前知武后,恐匪格言,而李淳風删方伎書,備言其 聖

百人。右僕射楊素爲總監,巡至善爲之所,索簿點人,善爲手持簿暗唱之,五百人一無差 失,素大驚。自是有四方疑獄,多使善爲推按,無不妙盡其理。 好學,兼善天文算曆,明達時務。弱冠州舉,授文林郎。屬隋文帝營仁壽宮,善爲領丁 崔善爲,貝州武城人也。祖顒,後魏員外散騎侍郎。父權會,齊丞相府參軍事。

進,高祖深納之。 所撰戊寅元曆,議者紛然,多有同異,李淳風又駁其短十有八條。 律明月,而高緯愚暗,遂滅其家。 睽雖不德,幸免斯事。」因購流言者,使加其罪。 時傅仁均 髆上全無項,胸前別有頭。」高祖聞之,勞勉之曰:「澆薄之人, 醜正惡直。 昔齊末姦吏歌斛 書左丞,甚得譽。 仁壽中,稍遷樓煩郡司戶書佐。高祖時爲太守,甚禮遇之。善爲以隋政傾頹,乃密勸 義旗建,引爲大將軍府司戶參軍,封淸河縣公。武德中,歷內史舍人、尙 諸曹令史惡其聰祭,因其身短而傴,嘲之曰:「崔子曲如鉤,隨例得封侯。 高祖令善爲考校二家得

失,多有駁正。

謂戶殷,丁壯之人,悉入軍府。 後歷大理、司農二卿,名爲稱職。 坐與少卿不協,出爲秦州刺史,卒,贈刑部尙書。 貞觀初,拜陝州刺史。時朝廷立議,戶殷之處,得徙寬鄉。善爲上表稱「畿內之地,是 若聽移轉,便出關外。 此則虛近實遠,非經通之議」。其事乃

醮。 頤中大夫,行紫府觀主事。又敕於觀中建一淸臺,候玄象,有災祥薄蝕謫見等事,隨狀聞 東封」。會褚遂良亦言其事,於是乃止。頤後上表請爲道士,太宗爲置紫府觀於九變山,拜 奏授太史丞,累遷太史令。貞觀中,太宗將封禪泰山,有彗星見,頤因言「考諸玄象,恐未可 武德初,追直秦府。 前後所奏,與京臺李淳風多相符契。後數歲卒。 |薛頤,滑州人也。 |大業中,爲道士。 解天文律曆,尤曉雜占。 |煬帝引入內道場,亟令章 頤嘗密謂|秦王日:「德星守|秦分,王當有天下,願王自愛。」|秦王乃

甄權,許州扶溝人也。 嘗以母病,與弟立言專醫方,得其旨趣。 隋開皇初,爲秘書省正

垜,一鍼可以射矣。」鍼其肩隅一穴,應時卽射。 權之療疾,多此類也。 貞觀十七年,權年一 字,後稱疾免。隋魯州刺史庫狄嶔苦風患,手不得引弓,諸醫莫能療,權謂曰:「但將弓箭向 鍼方、明堂人形圖各一卷。 百三歲,太宗幸其家,視其飮食,訪以藥性,因授朝散大夫,賜几杖衣服。 其年卒。 撰脈經、

手小指,唯無眼,燒之,猶有髮氣,其疾乃愈。」立言尋卒。 經二年。立言診脈曰:「其腹內有蟲,當是誤食髮爲之耳。」因令服雄黃,須臾吐一蛇,如人 「從今更十一日午時必死。」果如其言。時有尼明律,年六十餘,患心腹鼓脹,身體羸痩,已 弟立言,武德中累遷太常丞。御史大夫杜淹患風毒發腫,太宗令立言視之,旣而奏曰: 撰本草音義七卷、古今錄驗方五

宋俠者,洺州清潭人,北齊東平王文學孝正之子也。 亦以醫術著名。 官至朝散大夫、

藥藏監。 撰經心錄十卷,行於代。

然後 耆防 冀一人偶然逢也。 勢不行,所以 人不能別脈 胤宗每療,無不愈。 藥奉御。 愈 人思慮。 脈益 識 風場數十斛,置於牀下,氣如煙霧,其夜便得語。 許胤宗,常州義興 病。 元而 又脈候幽微,苦其難別,意之所解,口莫能宣。且古之名手,唯是別脈,脈旣精 武德初,累授散騎侍郎。 ,莫識病源,以情臆度,多安藥味,譬之於獵,未知兔所,多發人馬,空地遮圍,或 夫病之於藥,有正相當者,唯須單用一味,直攻彼病,藥力旣純, 難差,諒由於此。 噤。 胤宗 如此 或謂曰:「公醫術若神,何不著書以貽將來?」胤宗曰:「醫者,意 人也。 曰:「口不可下藥,宜以湯氣薰之。 |療疾,不亦疏乎!假令一藥偶然當病,復共他味相和,君臣相制,氣 初事陳爲新蔡王外兵參軍。 脈之深趣,旣不可言,虛設經方,豈加於舊。 時關中多骨蒸病,得之必死,遞相連染,諸醫無能 由是超拜義興太守。 令藥入腠理, 時柳太后病風不言,名醫治皆不 周理即差。」乃造黃 陳亡入隋,歷尚 吾思之久矣,故 病即立愈。 也,在 療者。

乙弗 列 弘 貝州 百 四 高唐 + 人也。 方 伎 隋煬帝居藩,召令相己,弘禮跪而賀曰:「大王骨法非常,必 五〇九一

不能著述耳。」年九十餘卒。

知。 海內漸亂,玄象錯謬,內懷憂恐,嘗謂弘禮曰:「卿昔相殷,其言已驗。 且占相道術, 股頗自 爲萬乘之主,誠願戒之在得。」煬帝卽位,召天下道術人,置坊以居之,仍令弘禮統攝。 曰:「臣本觀相書,凡人之相,有類於陛下者,不得善終。 臣聞聖人不相,故知凡聖不同耳。」 卿更相股,終當何如?」弘禮逡巡不敢答。帝迫曰:「卿言與朕術不同,罪當死。」弘禮

也,欲何所相?」咸曰:「何以知之?」弘禮曰:「觀其頭目,直是賤人,但不知餘處何如耳?」 占相皆此類也。真觀末卒。 大鼎有慚色,乃解衣視之,弘禮曰:「看君面,不異前言。 占君自腰已下,當爲方嶽之任。」其 初,泗州刺史薛大鼎隋時嘗坐事沒爲奴,貞觀初與數人詣之,大鼎次至,弘禮曰:「君奴

自是帝嘗遣使監之,不得與人交言。

授火井令。初,天綱以大業元年至洛陽,時杜淹、王珪、韋挺就之相。天綱謂淹曰:「公蘭臺 年已外,必得五品要職。」謂章曰:「公面似大獸之面,交友極誠,必得士友攜接,初爲武職。」 成就,學堂寬博,必得親糾察之官,以文藻見知。」謂王曰:「公三亭成就,天地相臨,從今十 袁天綱, 益州成都人也。尤工相術。隋大業中, 爲資官令。武德初, 蜀道使**詹**俊赤牒

六年, 復謂 刺 晚途皆 如 ? 杜公日:「 曹、文學館學士。 史。 」天綱 淹 不 韋 俱 等「二十年外, 稱 挺 卽 配 日:「公等骨法, 當得三品要職 愜 流 歷 為州 御 「韋公尤甚。」淹 ·史大夫、太常卿 王 珪爲太子 淹等至益州 終恐三賢同被 年壽 大勝往時 中 至京 貶 非 宂 天綱所知。 象州 見天綱 拜御 ,終當俱受榮貴。」至九年,被召 資黜, 韋挺 刺 史大夫、檢校吏部 史。 暫去卽還。」淹 日:「袁公洛邑之言, 隋 末與隱 王、韋二公, 皆 如如 天綱之言。 太子 i'尚書。 友善 尋遷侍御 在後當得三品官, , 則 後 王 信矣。 入京,共造 太 史, 珪 子 尋授侍中 武德 引以 未 中爲 知 爲 天 兼 今日 率。 綱 有 天策 出 年壽 之後 爲同 天 至 武 府 綱 , 州 然 德 兵 何

武 右 不 益 德 異往 畔 州 光 九 大 大業 澤 年 時 樹 之言。 功業。 末 更有 軌 竇 坐 武 , 執客遊德陽, 嘗問 喜色,至京 事 然目氣 被徵, 德 初,軌 赤脈 將 必承恩 赴 為益州 貫瞳子 京, 天綱 謂 ,還來此任。」其年果重授 行臺僕射 語語 天綱 天綱 則 日:二 赤 氣浮面 引 謂曰:「 更得何官?」曰:「 天綱 , 君 如爲 額 深禮之。 上伏犀 將 益 軍 州 , 天綱 貫 都 面上家 恐多殺人。 (玉枕 又謂 人坐 朝輔 刺 角又成,必於梁、 一仍未 日:「骨法 願 深 見動 自誠 了輔角 成 愼。

然不利 相 之。 則 其 見元 天 (夫。」乳 初 慶、 在 襁 元 褓 母 爽 天綱 時 日:「此二 抱 則 來 医, 至第中 衣男子之服, 子皆保家之主, 謂 其 母曰:「唯夫人骨法,必 天綱曰:「此郎君 官 可至三品。」 字神 見韓 生貴 色 或 爽徹 子。」 夫 人曰:「此 乃召 不 可 諸 易知,試合 子,令 女 亦

列

僔

第

行看。」於是步於牀前,仍令舉目,天綱大驚曰:「此郎君子龍睛鳳頸,貴人之極也。」 更轉側 視之,又驚曰:「必若是女,實不可窺測,後當爲天下之主矣。」

後骨不起,耳無根,只恐非壽者。」周後位至中書令、兼吏部尚書,年四十八卒。謂行成曰: 中書令,尋卒。其年,侍御史張行成、馬周同問天綱,天綱曰:「馬侍御伏犀貫腦,兼有玉枕, 矣。」果至是月而卒。 所中,皆此類也。 申國公高士廉嘗謂曰:「君更作何官?」 天綱曰:「自知相命,今年四月盡 又背如負物,當富貴不可言。近古已來,君臣道合,罕有如公者。公面色赤,命門色暗,耳 成就,眉覆過目,文才振於海內,頭又生骨,猶未大成,若得三品,恐是損壽之徵。」文本官至 「公五嶽四濱成就,下亭豐滿,得官雖晚,終居宰輔之地。」行成後至尙書右僕射。 貞觀八年,太宗聞其名,召至九成宮。時中書舍人岑文本令視之,天綱曰:「舍人學堂 天綱相人

邀以王室多故,乃隱居太白山。隋文帝輔政,徵爲國子博士,稱疾不起。嘗謂所親曰:「過 釋典。洛州總管獨孤信見而歎曰:「此聖童也。但恨其器大,適小難爲用也。」周宣帝時,思 孫思邈,京兆華原人也。七歲就學,日誦千餘言。弱冠,善談莊、老及百家之說,兼好

知 五 有道 十年,當有聖人出,吾方助之以濟人。」及太宗卽位,召詣京師,嗟其容色甚少,謂曰:「故 者誠 可尊重,羨門、廣成,豈虚言哉!」將授以爵位,固辭不受。 顯慶四年, 高宗召

見

, 拜諫議大夫, 又固辭不受。

月薄蝕, 乏,竭而爲燋枯,診發乎面,變動乎形。 精,天人之所同也。及其失也,蒸則生熱,否則生寒,結而爲瘤贅,陷而爲癰疽,奔而爲喘 吐 之儔也。」照鄰有惡疾,醫所不能愈,乃問思邈:「名醫愈疾,其道何如?」思邈曰:「吾聞 則古之蒙莊子; 昔公主未嫁而卒,故其邑廢。』時有孫思邈處士居之。邈道合古今,學殫數術。 雨,怒而爲風,凝而爲霜雪,張而爲虹蜺,此天地之常數也。 天者,必質之於人;善言人者,亦本之於天。天有四時五行,寒暑迭代,其轉運也,和 照鄰爲之賦,其序曰:「癸酉之歲,余臥疾長安光德坊之官舍。 父老云: 『是鄱陽 詵、盧照鄰等,執師資之禮以事焉。 一納,精氣往來,流而爲榮衞,彰而爲氣色,發而 上元元年,辭疾請歸,特賜良馬,及鄱陽公主邑司以居焉。當時知名之士宋令文、 字彗飛流, 此天地之危診也。 深入不二,則今之維摩詰耳。 思邈嘗從幸九成宮,照鄰留在其宅。 推此以及天地亦如之。 寒暑不時,天地之蒸否也;石立 其推步甲乙,度量乾坤, 爲音聲,此人之常數也。 人有四支五藏,一覺一寐,呼吸 故五 **緯盈縮,星辰錯行,** 則洛下閎、安期 陽用其形,陰用 土踊,天地之瘤贅 時庭前 高談正一, 公主邑司。 有病梨樹, 善言 先生 Mi 日 孟

俟終日』,智之圓也(I)。」 也;『赳赳武夫,公侯干城』,謂大膽也。『不爲利回,不爲義疚』,行之方也;『見機而作,不 消之災。」又曰:「膽欲大而心欲小,智欲圓而行欲方。 詩曰:『如臨深淵,如履薄冰』,謂小心 醫導之以藥石,救之以鍼劑,聖人和之以至德,輔之以人事,故形體有可愈之疾,天地有可 也;山崩土陷,天地之癰疽也;奔風暴雨,天地之喘乏也;川瀆竭涸,天地之燋枯也。

歷如眼見,以此參之,不啻百歲人矣。然猶視聽不衰,神采甚茂,可謂古之聰明博達不死者 思邈自云開皇辛酉歲生,至今年九十三矣,詢之鄉里,咸云數百歲人,話周、齊間事,歷

蕭縣丞。思邈初謂齊卿之時,溥猶未生,而預知其事。凡諸異迹,多此類也。 達; 佺最名重,禍在執兵。」後皆如其言。 太子詹事盧齊卿童幼時,請問人倫之事,思邈曰: 「汝後五十年位登方伯,吾孫當爲屬吏,可自保也。」後齊卿爲徐州刺史,思邈孫溥果爲徐州 東臺侍郎孫處約將其五子侹、儆、俊、佑、佺以謁思邈,思邈曰:「俊當先貴,佑當晚 初,魏徵等受詔脩齊、梁、陳、周、隋五代史,恐有遺漏,屢訪之,思邈口以傳授,有如目

空衣,時人異之。自注老子、莊子,撰千金方三十卷,行於代。又撰福祿論三卷,攝生眞錄 永淳元年卒。 遺令薄葬,不藏冥器,祭祀無牲牢。經月餘,顏貌不改,舉屍就木,猶若

子行, 天授中為鳳閣侍郎。及枕中素書、會三教論各一卷。

繼 論者榮之。四年,爲盜所殺。時語以爲崇儼密與天后爲厭勝之法,又私奏章懷太子不堪承 得失,帝深加介納。 府文學。儀鳳二年,累遷正諫大夫,特令入閣供奉。 刺史有女病篤,崇儼致他方殊物以療之,其疾乃愈。 任安喜命,父之小吏有善役召鬼神者,崇嚴盡能傳其術。 一大位,太子密知之,潛使人害之。 1生,開元中仕至懷州刺史。 明崇儼,洛州偃師人。其先平原士族,世仕江左。父恪,豫州刺史。 潤州棲霞寺,是其五代祖梁處士山賓故宅,帝特爲製碑文,親書於石, 優制贈侍中,諡曰莊,仍拜其子]珪爲祕書郞 高宗聞其名,召與語,悅之,擢授冀王 崇嚴每因謁見,輒假以神道,頗陳時政 乾封初,應封嶽舉,授黃安丞。會 崇嚴年少時,隨父

張憬藏,許州長社人。 列 傳 第 百 四 + 少工相術,與袁天綱齊名。 方 伎 太子詹事蔣儼年少時,嘗遇憬藏,因 五〇九七

妙矣。 州刺史,十月三十日午時祿絕。」嚴後皆如其言。嘗奉使高麗,被莫離支囚於地窖中,經六 辭思賢之贈,曰:「公當孤獨客死。」及仁軌爲僕射,思賢尙存,謂人曰:「張憬藏相劉僕射,則 年,然後得歸。 下,又經 問 死於所親園內。 許令致仕。 「公居五品要官,雖暫解黜,終當位極人臣。」仁軌後自給事中坐事,令白衣向海東効力。 、融命、憬藏 吾今已有三子,田宅自如,豈其言亦有不中也?」俄而三子相繼而死,盡貨田宅,寄 六年,據此合是死徵。 左僕射劉仁軌微時,嘗與鄉人婦思賢各齎絹贈憬藏以問官祿。 ·曰:「公從今二年,當得東宮掌兵之官,秩未終而冤職。 及在蒲州,年六十一 憬藏相人之妙,皆此類。 然後當享富貴,名位俱盛,即又不合中夭,年至六十一 矣,至期,召人吏妻子與之告別,自云當死,俄而 竟不仕,以壽終。 **免職之後,厄在三尺土** 憬藏謂仁軌 有敕, 固

敗,謂所親曰:「此非庇身之所也。」因<u>咸</u>亭年京中大饑,乃求出,補養烏令。無何,敏之敗,修 嗣眞 冠明經 與同時學士劉獻臣、徐昭俱稱少俊,館中號爲「三少」。敏之旣恃寵驕盈,嗣眞知其必 李嗣 舉, 眞, 補許州司 滑州匡城人也。父彦琮,趙州長史。 功。 時左侍極賀蘭敏之受詔於東臺修撰,奏嗣眞弘文館參預其事。 嗣眞博學曉音律,兼善陰陽推算之術。

撰官皆連坐流放,嗣眞獨不預焉。 寶慶樂也。」居數日,太子廢爲庶人。 會於太淸觀 奏樂 謂道 士劉槃、輔嚴 調露中,爲始平令,風化大行。 曰:「此曲何哀思不和之甚也?」 檗、儼曰:「此太子所作 繁等以其 、事聞奏,高宗大奇之,徵拜司禮丞,仍掌五禮 時章懷太子居春宮,嗣眞

儀注,

加中散大夫,封常山子。

平事 要、詩品、 嶺 告 憫惜,敕州 伏乞陛下特迴 南。 事紛 漢祖 永昌中, 萬歲 紜 書品、畫品各一卷。 ,謀疏楚君臣,乃用黃金五萬斤,行反間之術。 ,虚多實少 縣遞靈 通天年,徵還,至桂陽,自筮死日,預託桂陽官屬備凶器。 拜右 天慮,祭臣狂瞽,然後退就鼎鑊,實無所恨。」疏奏不納。 興還鄉,贈濟州刺史。 「御史中丞,知大夫事。),焉知必無陳平先謀疏陛下君臣,後謀除國家良善,臣恐爲社稷之禍。 神龍初,又贈御史大夫。 時酷吏來俊臣構陷無罪,嗣眞上書諫曰:「臣聞陳 項王果疑臣下,陳平反間果行。 撰明堂新禮十卷,孝經指 依期暴卒。 **尋被俊臣所陷,配流** 則天深加

初爲 侍御醫。 張 文仲, 洛州洛陽人也。 時特 進蘇良嗣於殿庭因 少與鄉人李虔縱、京兆人章慈藏並以醫術知名。 拜跪便絕倒, 則天令文仲、 慈藏隨至宅候之。 文仲,

列傳

第

百

唯脚氣頭風上氣,常須服藥不絕,自餘則隨其發動,臨時消息之。但有風氣之人,春末夏 久視年終於尙藥奉御。撰隨身備急方三卷,行於代。 初及秋暮,要得通洩,卽不困劇。」於是撰四時常服及輕重大小諸方十八首表上之。 文仲 十四種,氣有八十種。大抵醫藥雖同,人性各異,庸醫不達藥之行使,多夏失節,因此殺人。 文仲集當時名醫共撰療風氣諸方,仍令麟臺監王方慶監其脩撰。文仲奏曰:「風有一百二 日:「若入心,卽不可療。」俄頃心痛,不復下藥,日旰而卒。 文仲尤善療風疾。 其後則天令 曰:「此因憂憤邪氣激也,若痛衝脅,則劇難救。」自朝候之,未及食時,卽苦衝脅絞痛。

虔縱,官至侍御醫。 慈藏,景龍中光祿卿。 自則天、中宗已後,諸醫咸推文仲等三人爲

首

曰:「臣久從放誕,不能屈事官長。」則天乃改太史局爲渾儀監,不隸祕書省,以獻甫爲渾儀 「臣本命納晉在金,今熒惑犯五諸侯太史之位。熒,火也,能尅金,是臣將死之徵。」則天日: 數顧問災異,事皆符驗。又令獻甫於上陽宮集學者撰方域圖。長安二年,獻甫奏曰: 尚獻甫,衞州汲人也。尤善天文。初出家爲道士。則天時召見,起家拜太史令,固辭

秋,獻甫卒,則天甚嗟異惜之。 「朕爲卿禳之。」遽轉獻甫爲水衡都尉,謂曰:「水能生金,今又去太史之位,卿無憂矣。」其 復以渾儀監爲太史局,依舊隸秘書監。

即位,復改國爲唐。 古預其事 時 `又有雍州人裴知古,善於音律。 ,謂萬年令元行沖曰:「金石諧和,當有吉慶之事,其在唐室子孫乎?」其月,中宗 知古又能聽婚夕環珮之聲,知其夫妻終始。 長安中爲太樂丞。 神龍元年正月春享西京太廟,知 後卒於太樂令。

壯 將加任用, 元 刺 聞 **禕之家**, ,嘗謂所親曰:「若能保身養性者,常須善言莫離口,良藥莫離手。」睿宗卽位,召赴京師, 史, 而不悅, 初,河南 孟詵, 加銀 見其敕賜金,謂禕之曰:「此藥金也。 尹畢構以詵有古人之風,改其所居爲子平里。 琴卒,年九十三。 固辭衰老。 因 青光祿大夫。 汝州梁人也。舉進士。 事出爲台州司馬。後累遷春官侍郞。 景雲二年,優韶賜物一百段,又令每歲春秋二時特給羊酒糜粥。 神龍 | 初致仕,歸伊陽之山第,以藥餌爲事。 垂拱初,累遷鳳閣舍人。詵少好方術,嘗於鳳閣侍郎劉 若燒火其上,當有五色氣。」試之果然。 睿宗在藩, 召充侍讀。 長安中, 爲同州 就年雖晚暮, 志力如 則天 開

列

詵所居官,好勾剝爲政,雖繁而理。撰家、祭禮各一卷,喪服要二卷,補養方、必效方各

嚴善思,同州朝邑人也。少以學涉知名,尤善天文曆數及卜相之術。 初應消聲幽藪科

舉擢第。 王及善卒。 。」歲餘,張柬之、敬暉等起兵誅張易之、昌宗。 其占驗皆此類也。 聖曆二年,熒惑入興鬼,則天以問善思,善思對曰:「商姓大臣當之。」其年,文昌左相 則天時爲監察御史,兼右拾遺、內供奉。數上表陳時政得失,多見納用。稍遷太 長安中,熒惑入月,鎭星犯天關,善思奏曰:「法有亂臣伏罪,且有臣下謀上之

神龍初,遷給事中。 則天崩,將合葬乾陵,善思奏議曰:

塞,其石縫隙,鑄鐵以固其中,今若開陵,必須鐫鑿。然以神明之道,體尙幽玄,今乃動 衆加功,誠恐多所驚黷。又若別開門道,以入玄宮,卽往者葬時,神位先定,今更改作, 今欲開乾陵合葬,卽是以卑動尊,事旣不經,恐非安穩。臣又聞乾陵玄闕,其門以石閉 謹按天元房錄葬法云:「尊者先葬,卑者不合於後開入。」則天太后卑於天皇大帝, 又以修築乾陵之後,國頻有難,遂至則天太后權總萬機,二十餘年,其難始

爲害益深。

定。今乃更加營作,伏恐還有難生。

臣伏以合葬者,人緣私情;不合者,前修故事。若以神道有知,幽途自得通會;若以死 勝地,後之胤嗣,用託靈根,或有不安,後嗣亦難長享。伏望依漢朝之故事,改魏、晉之 後,祚皆不長。雖受命應期,有因天假,然以循機享德,亦在天時。 其宜,則神危後損。 者無知,合之復有何益。然以山川精氣,上爲星象,若葬得其所,則神安後昌,若葬失 頹綱,於乾陵之傍,更擇吉地,取生墓之法,別起一陵,旣得從葬之儀,又成固本之業。 見漢時諸陵,皇后多不合葬,魏、晉已降,始有合者。然以兩漢積年,向餘四百,魏、晉之 望少迴天眷,俯覽臣言,行古昔之明規,割私情之愛欲,使社稷長享,天下乂安,凡在懷 生,孰不慶幸。 但合葬非古,著在禮經,緣情爲用,無足依准,況今事有不安,豈可復循斯制。 所以先哲垂範, 具之葬經, 欲使生人之道必安, 死者之神必泰。 伏 但陵墓所安,必資

疏奏不納。

制,除善思爲禮部尙書,知吏部選事。及譙王下獄,景雲元年,大理寺奏:「善思與逆人重福 及踐祚,元之以事聞奏,由是召拜右散騎常侍。唐隆元年,鄭愔謀册譙王重福爲帝,乃草僞 景龍中,遷禮部侍郎,出爲汝州刺史。睿宗在藩,善思嘗謂姚元之曰:「相王必登帝位。」

五

101

命? 直,睿宗納其奏,竟免善思死,配流靜州。 議定奏裁,以符愼獄。」時議者多云「善思合從原宥」,有司仍執前議請誅之,思復又駁奏懇 明,進論聖躬,必登宸極。雖交遊重福,謀陷韋氏,敕追善思,書至便發,向懷逆節,寧卽奔 思往在先朝,屬韋氏擅內,恃寵宮掖,謀危社稷。 通謀,合從極法。」給事中韓思復奏曰:「議獄緩死,列聖明規; 刑疑惟輕,有國恆典。 一面疏網,誠合順生;三驅取禽,來而有宥。唯刑是恤,理合昭詳。請付刑部集羣官 無幾,遇赦還。年八十五,開元十七年卒。 善思此時,乃能先覺,因詣相府,有所發 嚴善

得冤誅。 初,善思爲御史時,中書舍人劉允濟爲酷吏所陷,當死,善思愍其老,密表奏請,允濟乃 善思後見允濟,竟不自言其事。韓思復奏免善思之罪,亦未曾有所言謝。 時人稱

其長者。

年八十五而卒;廣德二年,向卒,又年八十五。向兄前趙郡司馬宙,長向十歲,向卒時,宙 善思子向, 乾元中爲鳳翔尹,寶應中授太常員外卿。始善思父徐州長史延及善思俱

並無恙。

金梁鳳,不知何許人也。天寶十三載,客於河西。 善相人, 又言玄象。 時哥舒翰爲節

有兵 冕會之,勸成策立,改元爲至德元年,

冕果爲中書侍郎、平章事。

冕奏之,肅宗召拜都水使 其言,深謝絕之。 其後安祿山反,南犯洛陽,僭稱僞位。 哥舒翰東守潼關,累月,奏冕爲 言,冕何至此?」梁鳳曰:「有一日向東京,一日入蜀川,一日來向朔方,此時公得相。」 冕懼 度 日 史中丞,追赴京。 亦不能久,此間日何轉分明,不可說。」冕志之。旣潼關失守,玄宗幸圖,肅宗北如靈武, (使, 韶入京師, 裴冕爲祠部郞中, 知河西留後, 在武威。 (起,郞中此時當得中丞,不拜中丞,卽得宰相,不離天子左右,大富貴。」|冕曰:「公乃狂 冕又詰曰:「事驗也。」冕又問三日之兆,梁鳳曰:「東京日卽自磨滅,蜀川 梁鳳謂冕曰:「玄象有變,半年間

京,揆自中書舍人知禮部侍郞事,入爲中書侍郞、平章事,乃以尤爲吏部郞中。 遣二人行,謂揆曰:「公從舍人卽入相,一年內事。」謂介曰:「公好卽是吏部郞中。」及尅復兩 之,俱素服,自稱選人。梁鳳謂之曰:「公等並至淸望官,那得云無官。」揆、尤以實對。 梁鳳,梁鳳曰:「此必入相。」逾年,諲自黃門侍郎知政事。梁鳳在鳳翔,李揆、盧允二人同見 驛長,搒之。驛吏武將,性粗猛,持弓矢突入,射諲,矢兩發,幾中諲面,諲逾牆得免。 爾後佯聾以自晦。 梁鳳在 河隴,謂呂諲曰:「判官骨相,合得宰相。須得一大驚怖,即得。」諲後至驛,實讓 冕爲右僕射、兼御史大夫、成都尹、劍南節度使,有進止,令將梁鳳 其驗多此 梁鳳 以報

列

百四十

方

口。後乃病卒。

往來 對使絕氣 云年數百歲矣。 恆州 張果者,不知何許人也。 則天時,隱於中條山,往來汾、晉間,時人傳其有長年祕術,自 山中。 如死,良久漸蘇,晤不敢逼,馳還奏狀。又遣中書舍人徐嶠齎璽書以邀迎之,果乃 嘗著陰符經玄解,盡其玄理。則天遣使召之,果佯死不赴。後人復見之, 開元二十一年,恆州刺史章濟以狀奏聞。玄宗令通事舍人裴晤往迎之,果

隨嶠至東都,肩興入宮中。

仙 也。」乃寢。 坐,令夜光視之,夜光進日:「果今安在?」夜光對面終莫能見。玄宗謂力士曰:「吾聞飮堇汁 無苦者,眞奇士也。」會天寒,使以堇汁飮果。 而 三藥,微紅,傅墮齒之齗。復寐良久,齒皆出矣,粲然潔白,玄宗方信之。 知夭壽善惡,玄宗令算果,則懵然莫知其甲子。又有師夜光者,善視鬼,玄宗召果與之密 玄宗初即位,親訪理道及神仙方藥之事,及聞變化不測而疑之。有邢和璞者,善算人 頃之,取鏡視齒,則盡燋且黧。命左右取鐵如意擊齒墮,藏於帶。乃懷中出神 果乃引飮三巵,醺然如醉所作,顧曰:「非佳酒

玄宗好神仙,而欲果尙公主,果固未知之,謂祕書少監王迥質、太常少卿蕭華曰:「諺云

道,欲降先生。」果大笑,竟不奉詔。 娶婦得公主,眞可畏也。」迥質與華相顧,未曉其言。即有中使至,宣曰:「玉眞公主早歲好 生。」其年請入恆山,錫以衣服及雜綵等,便放歸山。乃入恆山,不知所之。玄宗爲造棲霞 羲皇上人。 張果先生,遊方外者也。 跡先高尙,深入窈冥。 是渾光塵,應召城闕。 莫詳甲子之數,且謂 問以道樞,盡會宗極。今特行朝禮,爰畀寵命。可銀青光祿大夫,號曰通玄先 迥質等方悟向來之言。後**懇辭歸山,因下制曰:**「恆州

觀

於隱所,在蒲吾縣,後改爲平山縣。

內道場,供待甚厚。時高宗令廣徵諸方道術之士,合鍊黃白。法善上言:「金丹難就,徒費 之而免。法善曰:「此皆魅病,爲吾法所攝耳。」問之果然。法善悉爲禁劾,其病乃愈。 法善又嘗於東都凌空觀設壇醮祭,城中士女競往觀之,俄頃數十人自投火中,觀者大驚,敦 自高宗、則天、中宗歷五十年,常往來名山,數召入禁中,盡禮問道。然排擠佛法,議者或譏 財物,有虧政理,請覈其眞僞。」帝然其言,因令法善試之,由是乃出九十餘人,因一切罷之。 能厭勁鬼神。 道士葉法善,括州括蒼縣人。自曾祖三代爲道士,皆有攝養占卜之術。法善少傳符簽, 顯慶中,高宗聞其名,徵詣京師,將加爵位,固辭不受。求爲道士,因留在 法善

國公,仍依舊爲道士,止於京師之景龍觀,又贈其父爲歐州刺史。當時尊寵,莫與爲比。 以其術高,終莫之測。睿宗卽位,稱法善有冥助之力,先天二年,拜鴻臚卿, 封越

罕測。 道;公以理國之法,數奏昌言。謀參隱諷,事宣弘益。歎徽音之未泯,悲形解之俄留,曾莫 卿 **整遺,殲良奄及。永惟平昔,感愴于懷,宜申禮命,式旌泉壤。 可贈越州都督。」** 絕俗,貞風無塵,金骨外聳,珠光內應。斯乃體應中仙,名升上德。股當聽政之暇,屢詢至 員外置越國公葉法善,天眞精密,妙理玄暢,包括祕要,發揮靈符,固以冥默難源, 法善生於隋大業之丙子,死於開元之庚子,凡一百七歲。八年卒。詔曰:「故道士鴻臚 而情棲蓬閬,迹混朝伍,保黃冠而不杖,加紫綬而非榮,卓爾孤秀,冷然獨往。 希夷 勝氣

撰西域記十二卷。貞觀十九年,歸至京師。太宗見之,大悅,與之談論。於是詔將梵本六 蕃人遠近咸尊伏之。在西域十七年,經百餘國,悉解其國之語,仍採其山川謠俗,土地所有, 域,廣求異本以參驗之。貞觀初,隨商人往遊西域。玄奘旣辯博出羣,所在必爲講釋論難, 百五十七部於弘福寺翻譯,仍敕右僕射房玄齡、太子左庶子許敬宗,廣召碩學沙門五十餘 僧玄奘,姓陳氏,洛州偃師人。大業末出家,博涉經論。嘗謂翻譯者多有訛謬,故就西

人,相助整比。

中許 京城人衆競來禮謁,玄奘乃奏請逐靜翻譯,敕乃移於宜君山故玉華宮。 士范義碩、太子冼馬郭瑜、弘文館學士高若思等,助加翻譯。 凡成七十五部,奏上之。 蓋 `,歸葬於白鹿原,士女送葬者數萬人。 一衆伎,送玄奘及所翻經像、諸高僧等入住慈恩寺。 敬宗 在東宮,爲文德太后追福,造慈恩寺及翻經院,內出大幡,敕九部樂及京城諸寺幡 中書令來濟李 義府杜正倫、黄門侍郎薛元超等, 顯慶元年,高宗又令左僕射于志寧、侍 共潤色玄奘所定之經,國子博 六年卒, 時年五 後以

僧 弘忍 僧神秀, ,以坐禪 姓李氏,汴州尉氏人。 爲業,乃歎伏曰:「此眞吾師也。」便往 少遍覽經史,隋末出家爲僧。後遇蘄州雙峯 事弘忍,專以樵汲自役,以求其道 山東山

說。 傳,有衣缽爲記,世相 衣履而已。 乃之魏,隱於嵩山 昔後魏末, 達摩傅 有僧達摩者,本天竺王子,以護國出家,入南海,得禪宗妙法,云自釋迦 慧可, 付授。 少林寺,遇毒 慧可嘗斷其左臂,以求其法; 慧可傳璨; 璨傳道信,道信傳弘 達摩齎衣鉢航 而卒。 其年,魏使宋雲於葱嶺回,見之,門徒發其墓,但 海而來,至梁,詣武帝,帝問以有爲之事,達摩不 和相

列傳

第

百四四

+

方

伎

五

一〇九

忍

巍,王霸之器也。」 |寺以旌其德。 時王公已下及京都士庶,聞風爭來謁見,望塵拜伏,日以萬數。 中宗卽位,尤 加敬異。中書舍人張說嘗問道,執弟子之禮,退謂人曰:「禪師身長八尺,龐眉秀耳,威德魏 神秀乃往荆州,居於當陽山。則天聞其名,追赴都,肩輿上殿,親加跪禮,敕當陽山置度門 弘忍,弘忍深器異之,謂曰:「吾度人多矣,至於懸解圓照,無先汝者。」弘忍以咸亨五年卒, 弘忍姓周氏,黃梅人。初,弘忍與道信並住東山寺,故謂其法爲東山法門。神秀旣師事

師以吾南中有緣,亦不可違也。」竟不度嶺而死。天下乃散傳其道,謂神秀爲北宗,慧能爲 固辭。|神秀又自作書重邀之,|慧能謂使者曰:「吾形貌矬陋,北土見之,恐不敬吾法。 又先 韶州山中,舊多虎豹,一朝盡去,遠近驚歎,咸歸伏焉。神秀嘗奏則天,請追慧能赴都,慧能 初,神秀同學僧慧能者,新州人也,與神秀行業相埒。弘忍卒後,慧能住韶州廣果寺。

岐王範、張說及徵士盧鴻一皆爲其碑文。神秀卒後,弟子普寂、義福,並爲時人所重 **普寂姓馮氏,蒲州河東人也。年少時徧尋高僧,以學經律。時神秀在荆州玉泉寺,普** 神秀以神龍二年卒,士庶皆來送葬。 有韶賜諡曰大通禪師。 又於相王舊宅置報恩寺,

寂乃往師事,凡六年,神秀奇之,盡以其道授焉。 會謁者,皆制弟子之服。有制賜號爲大照禪師。 難見其和悅之容,遠近尤以此重之。 二十七年,終于都城興唐寺,年八十九。 時都城士庶 統其法衆。開元十三年,敕普寂於都域居止。時王公士庶,競來禮謁,普寂嚴重少言,來者 寂,乃度爲僧。及神秀卒,天下好釋氏者威師事之。中宗聞其高年,特下制令普寂代神秀 徒之次,士庶傾城哭送,閭里爲之空焉。 及葬,河南尹裴寬及其妻子,並衰麻列于門 久視中,則天召神秀至東都,神秀因薦普

外。 幡花迎之,所在途路充塞。以二十年卒,有制賜號大智禪師。 中書侍郎嚴挺之爲製碑文。 後隸京城慈恩寺。 義福姓姜氏,潞州銅鞮人。 開元十一年,從駕往東都,途經蒲、號二州,刺史及官吏士女,皆齎 初止藍田化感寺,處方丈之室,凡二十餘年,未嘗出字之 葬於伊闕之北,送葬者數萬

城傳教,二十餘年,人皆仰之。 神秀,禪門之傑,雖有禪行,得帝王重之,而未嘗聚徒開堂傳法。 至弟子普寂,始於都

僧 一行,姓張氏,先名遂,魏州昌樂人,襄州都督、郯國公公謹之孫也。 列 儜 第 百 四 + 方 伎 父擅,武功令

當陽山,依沙門悟眞以習梵律。 行詣崇,借揚雄太玄經,將歸讀之。數日,復詣崇,還其書。崇曰:「此書意指稍深,吾尋之 事沙門普寂。睿宗卽位,敕東都留守韋安石以禮徵,一行固辭以疾,不應命。後步往荆州 由是大知名。武三思慕其學行,就請與結交,一行逃匿以避之。尋出家爲僧,隱於嵩山,師 **義**決一卷以示崇。 崇大驚,因與一行談其奧賾,甚嗟伏之,謂人曰:「此後生顏子也。」一行 積年,尚不能曉,吾子試更研求,何遽見還也?」<u>一行曰:「究其義矣。」因出所撰大術玄圖及</u> 一行少聰敏,博覽經史,尤精曆象、陰陽、五行之學。時道士尹崇博學先達,素多墳籍。

得罪,不應引以爲例。上納其言,遽追敕不行,但依常禮。其諫諍皆此類也。 發遣,依太平公主故事。 一行以爲高宗末年,唯有一女,所以特加其禮,又太平驕僭,竟以 數就之,訪以安國撫人之道,言皆切直,無有所隱。開元十年,永穆公主出降,敕有司優厚 開元五年,玄宗令其族叔禮部郎中洽齎敕書就荆州強起之。 一行至京,置於光太殿,

之,改撰開元大衍曆經。至十五年卒,年四十五,賜諡曰大慧禪師。 等與工人創造黃道游儀,以考七曜行度,互相證明。於是一行推周易大衍之數,立衍以應 各一卷。時麟德曆經推步漸疏,敕一行考前代諸家曆法,改撰新曆,又令率府長史梁令瓚 一行尤明著述,撰大衍論三卷,攝調伏藏十卷,天一太一經及太一局遁甲經、釋氏系錄

行製碑文,親書於石,出內庫錢五十萬,爲起塔於銅人之原。明年,幸温揚,過其塔前,又駐 初,一行從祖東臺舍人太素,撰後魏書一百卷,其天文志未成,一行續而成之。 上爲一

(徘徊,令品官就塔以告其出豫之意,更賜絹五十匹,以蒔塔前松柏焉。

园造曆,云:『後八百歲當差一日,必有聖人正之。』今年期畢矣,而<u>一行造大</u>衍正其差謬,則 法,盡受其循焉,而門前水果却西流。 道士|邢和璞嘗謂|尹愔曰:「一行其聖人乎?|漢之恪下 人導達也?」卽除一算。又謂曰:「門前水當却西流,弟子亦至。」一行承其言而趨入,稽首請 於門屏間,聞院僧於庭布算聲,而謂其徒曰:「今日當有弟子自遠求吾算法,已合到門,豈無 下閎之言信矣,非聖人而何? 初,一行求訪師資,以窮大衍,至天台山國淸寺,見一院,古松十數,門有流水,一行立

時又有廣州僧泓者,善葬法。 每行視山原,即爲之圖,張說深信重之。

詔 翰林。 ,帝蒼卒出幸,至奉天,方思道茂之言,時道茂已卒,命祭之。 桑道茂者,大曆中遊京師,善太一遁甲五行災異之說,言事無不中。代宗召之禁中,待 建中初, 神策軍脩奉天城,道茂請高其垣牆,大爲制度,德宗不之省。及朱泚之

列傳第一百四十一 方伎 校勘記

贊曰:術數之精,事必前知。 粲如垂象,變告無疑。 怪誕之夫,誣罔蓍龜。 致彼庸妄,

幸時艱危。

校勘記

(1) 不爲利回不爲義疚行之方也見機而作不俟終日智之圓也 <u>左傳昭公三十一年;「見機而作,不俟終日」二句見潤易繫辭下。 冊府卷八三六「不爲利回」上</u> 按「不爲利回,不爲義疚」二句見

有「傳曰」二字,「見機而作」上有「易曰」二字。

舊唐書卷一百九十二

列傳第一百四十二

隱逸

李元愷 劉道合 王績 田遊巖 王守愼 司馬承禎 史德義 徐仁紀 吳筠 王友貞 孔述睿 孫處玄 盧鴻一 子敏行 白履忠 陽城 王希夷 王遠知 崔覲 衛大經 潘 師正

有身在江湖之上,心遊魏闞之下,託薜蘿以射利,假嚴壑以釣名,退無肥遁之貞,進乏濟時 之傳,箕、潁之迹,粲然可觀。 可嘉也。 前代賁丘園,招隱逸,所以重貞退之節,息貪競之風。故蒙叟矯讓王之篇,玄晏立高人 皇甫謐、陶淵明慢世逃名,放情肆志,逍遙泉石,無意於出處之間,又其善也。 而漢二龔之流,乃心王室,不事葬朝,忍渴盜泉,本非絕俗,甚 刨

第一百四十二 隱逸

列

傳

餘,傷其時而晦其用,深識之士也。。高宗天后,訪道山林,飛書巖穴,屢造幽人之宅,堅迴隱 大方,未足與議也。今存其舊說,以備雜篇。 士之車。而遊嚴、德義之徒,所高者獨行;盧鴻一、承禛之比,所重者逃名。至於出處語默之 之具,山移見誚,海鳥興譏,無足多也。阮嗣宗傲世佯狂,王無功嗜酒放蕩,才不足而智有

撰隋書、未就而卒。 揚州六合縣丞,非其所好,棄官還鄉里。。續河渚中先有田數頃,鄰渚有隱士仲長子先,服食 好事者諷詠。貞觀十八年卒。臨終自剋死日,遺命薄葬,兼預自爲墓誌。 多不載。續嘗躬耕於東臯,故時人號東皐子。或經過酒肆,動經數日,往往題壁作詩,多爲 養性,績重其眞素,願與相近,乃結廬河渚,以零酒自樂。嘗遊出山,因爲北山賦以見志,詞 王績字無功,絳州龍門人。少與李播、呂才爲莫逆之交。隋大業中,應孝悌廉潔舉,授 有文集五卷。

兄通,字仲淹,隋大業中名儒,號文中子,自有傳。

疾 赴 出 能 宮 立 而 回 都 庶 等既 拜, 去。 居 ,授崇文館學士, ,黃、綺方來,豈如陛下崇重隱淪,親問巖穴。」帝甚歡,因將遊巖就行宮,并家口給傳乘 田 逢聖代,幸得逍遙。」帝曰:「朕今得卿,何異漢獲四皓乎。」 薛元超曰:「漢高祖 自稱「許由 特令不毁, 帝令左右扶止之, 其母 遊 一拱初 嚴,京兆三原人也。 及妻子 坐與裴炎交結,特放還山。 仍親書題額懸其門,曰「隱士田遊巖宅」。文明中,進授朝散大夫,拜太子 東鄰」。 並有方外之志,與遊嚴同遊山水二十餘年。 令與太子少傅劉仁軌 謂曰:「先生養道山中,比得佳否?」遊巖曰:「臣泉石膏肓,煙霞痼 調露中,高宗幸嵩山,遣中書侍郎薛元超就問其母,遊嚴 初補太學生,後罷歸,遊於太白山,每遇林泉會意, 談論。 帝後將營奉天宮于嵩山,遊嚴舊宅先居 後入箕山,就許由廟東築室 輒留連不 山 心欲廢嫡 衣 田

留贈 土史德義, 號爲逸人。 ,其文甚美。 ?德 志尙 蘇州崑山人也。 高宗聞其名,徵赴洛陽。 天 ?虚玄,業履貞確,謙沖彰於里閈,孝友表於閨庭。 授初,江南道宣勞使、文昌左丞周興表薦之,則天徵赴都 咸亨初,隱居武丘山,以琴書自適,或騎牛帶飘,出入郊郭廛 **蕁稱疾東歸,公卿已下,皆賦詩餞別,德義亦以詩** 固辭徵辟,長往嚴陵之 韶曰:「蘇州

洗

馬。

垂

列

第

百

四

+

臘

逸

瀬; 闕,行藏之理斯得,去就之節無違。 夫(1)。」後周興伏誅,德義坐爲所薦冤官,以朝散大夫放歸丘壑, 建極開階, 多謝簪裾,高蹈愚公之谷。 **寤寐** 星雲,物色林壑。順禎期而捐薜帶, 博聞強識,說禮敦詩,繕性丘園,甘心畎畝。 風操可嘉,啓沃攸佇,特宜優獎,委以諫曹。 應体運而解荷裳, 自此聲譽稍減於隱居之 粤自海隅,來遊魏 朕承天革命, 可朝散大

गृंबि

其家驗問,特加旌表。 好釋典,屏絕羶味,出言未曾負諾,時論以爲眞君子也。 醫言唯啖人肉乃差。 王友貞,懷州河內人也。父知敬,則天時麟臺少監,以工書知名。 友貞素好學,讀九經皆百遍,訓誨子弟,如嚴君焉。 友貞獨念無可求治,乃割股肉以飴親,母病尋差。 友貞弱冠時, 母病 則天聞之,令就 口不言人過,尤

子中舍,仍令所司以禮徵赴,及至,固以疾辭。 長安年,歷任長水令。 後罷歸田里。 中宗在春宮,召爲司議與,不就。 詔曰: 神龍初,又拜太

泉藪,人倫茂異,孝始於事親,信表於行己。 敦夷齊之行,可以激貪;尚質閔之道,用能勸俗。 富有文史,廉於財貨,久歷官政,累聞課 新除太子中舍人王友貞,德義

問,四時送祿至其住所。 誠。 遂雅懷。 靡求於珍饌。 頃加徵命,作護儲闈,固在辭榮,累陳情懇。 有古人之風,保君子之德。 可太子中舍人員外置,給全祿以畢其身,任其在家修道。 **股方崇獎廉退,懲抑澆浮,雖思廊廟之賢,豈違山林之願,宜加優秩,仍** 乃抗志塵外,棲情物表,深歸解脫之門,誓守薰脩之 堅持淨義,不登於車服;味茲禪悅 仍令所在州縣存

生無 特加弔祭。 惟不匱,獨貫於神明; 曰:「貴德尊賢,飾終念遠,此聖人所以治天下、厚風俗也。 大位,雖隔外臣之儀;歿有餘榮,宜贈上卿之服。 玄宗在東宮,又表請禮徵之,以年老,竟辭疾不赴。 道則 《難名,高謝於人代。 言念錫類,方期鎭俗,遽爾凋殂,良深愍悼。 可贈銀青光祿大夫,仍委本縣令長 年九十餘,開元四年卒。 王友貞稟氣元精,遊心大朴。 特下制

盧 八鴻一字浩然,本范陽人,徙家洛陽。 少有學業,頗善籀篆楷隸,隱於嵩山。 開元

遺備禮再徵不至。 五年,下詔曰:

股以寡薄,忝膺大位。 嘗恨玄風久替,淳化未昇,每用翹想遺賢,冀聞上皇之訓。

易節,副股意焉。 臣之義,不可廢也。今城闞密邇,不足爲難,便敕齎束帛之貺,重宣斯旨,想有以翻然 書,佇諧善績,而每輒託辭,拒違不至。使殷虛心引領,于今數年,雖得素履幽人之貞, 以卿黄 而失考父滋恭之命。 、中通理,鉤深詣微,窮太一之道,踐中庸之德,確乎高尙,足侔古人。 豈朝廷之故與生殊趣耶?將縱欲山林不能反乎?禮有大倫, 故比下徵

辟而至,訪之至道,有會淳風,爰舉逸人,用勸天下。特宜授諫議大夫。」鴻一固辭,又制曰: 信之所薄,不足可依。山臣鴻一敢以忠信奉見。」上別召升內殿,賜之酒食。詔曰:「盧鴻一應 鴻一赴徵。六年,至東都,謁見不拜。宰相遣通事舍人問其故,奏曰:「臣聞老君言,禮者,忠 其流 之所。 穴,備禮徵聘,方佇獻替,式弘政理。 以達其道,雲臥林壑,多歷年載。傳不云乎:「舉逸人,天下之人歸心焉。」是乃飛書巖 以病歸。 不友,遯之時義大矣哉!嵩山隱士盧鴻一,抗迹幽遠,凝情篆素,隱居以求其志,行義 ,固辭榮寵,將厚風俗,不降其志,用保厥躬。 昔在帝堯,全許由之節;緬惟大禹,聽伯成之高。則知天子有所不臣,諸侯有所 若知朝廷得失,具以狀聞。 宜以諫議 大夫放還山。 歲給米百石、絹五十匹,充其藥物,仍令府縣送隱居 而矯然不羣,確乎難拔,靜己以鎭其操,洗心以激 會稽嚴陵,未可名屈,太原王霸,終

伏生之年,宜命秩以尊儒,俾全高於尙齒。 謝囂塵,獨往林壑。股爲封巒展禮,側席旌賢,貴然來思,克應嘉召。雖紆為季之跡,已過 秋致東帛酒肉,仍賜衣一副、絹一百匹。」專壽終。 官扶入宮中,與語甚悅。開元十四年,下制曰:「徐州處士王希夷,絕學棄智,抱一居貞,久 之矣。」及玄宗東巡,敕州縣以禮徵,召至駕前,年已九十六。上令中書令脹說訪以道義,宦 史盧齊卿就謁致禮,因訪以字人之術,希夷曰:「孔子稱『己所不欲,勿施於人』,可以終身行 玄博爲棲遁之友。好易及老子,嘗餌松柏葉及雜花散。景龍中,年七十餘,氣力益壯。 ,師道士黃頤,向四十年,盡能傳其閉氣導養之術。頤卒,更居兗州徂來山中,與道士劉 王希夷,徐州滕縣人也。 孤貧好道。父母終,爲人牧羊,收傭以供葬。 可朝散大夫,守國子博士,聽致仕還山。州縣春 葬畢,隱於嵩 刺

自則天、中宗已後,有蒲州人衞大經、邢州人李元愷,皆潔志不仕;蒲州人王守愼、常 傳第 一百四十二 逸 五

州人徐仁紀、潤州人孫處玄,皆退身辭職,爲時所稱。

初,畢構爲刺史,謂解令孔愼言曰:「衞生德厚,宜有旌異。 古人式干木之閭,禮賢故也。」愼 書無能盡意。」遂行。至魏州,會乾童出行,大經造門設席,行弔禮,不訊其家人而還。開元 聞乾童母卒,徒步往弔之,鄉人止之曰:「當夏溽暑,豈可步涉千里,致書可也。」大經曰:「尺 言造門就謁,時大經已年老,辭疾不見。嘗預筮死日,鑿墓自爲誌文,果如筮而終。 衛大經者,篤學善易,口無二言。則天降詔徵之,辭疾不赴。與魏州人夏侯乾童有舊,

妄之財。」先是,定州人崔元鑒明三禮,鄉人張易之寵幸用事,薦之,起家拜朝散大夫,致仕 乃以泥塗汙而與之,不獲已而受。及還,乃以己之所蠶素絲五兩以酬行沖,日:「義不受無 至州,問以經義,因遺衣服,元愷辭曰:「微軀不宜服新麗,但恐不能勝其美以速咎也。」行沖 及璟作相,使人遺元愷束帛,將薦舉之,皆拒而不答。景龍中,元行沖爲洛州刺史,邀元愷 李元愷者,博學善天文律曆,然性恭愼,口未嘗言人之過。鄉人宋璟,年少時師事之,

,在鄉請半祿。 元愷誚之曰:「無功受祿,災也。」元愷年八十餘,壽終。

然從之,賜號法成。 獄,奏守愼同知其事,守愼以疾辭,因請爲僧。 王守愼者, 有美名。 識鑒高雅,爲時賢所重。 垂拱中爲監察御史。 以壽終。 則天初甚怪之,守愼陳情,詞理甚高,則天於 時羅織事起, 守愼舅秋官侍郞張知默推詔

詣執政求出,俄授靈昌令。 移 病 歸鄉里。 徐仁紀者,聖曆中徵拜左拾遺。 神龍初, 宣慰使舉仁紀之行可以激俗,又徵拜左補闕。 妻子不之官,廨舍唯衣履及書疏而已,餘無所蓄。 三上書論得失,不納,謂人曰:「三諫不聽,可去矣。」途 三上書,又不省,乃

範等用事,處玄遺彥範書,論時事得失,彥範竟不用其言,乃去官還鄉里。 孫處玄, 長安中徵爲左拾遺。 頗善屬文,嘗恨天下無書以廣新文。 神龍 以病卒。 初,功臣桓彦

列傳第一百四十二 隱逸

臥,免徭役,豈易得也!」尋壽終。著三玄精辯論一卷,註老子及黃庭內景經,有文集十卷。 家家盡著括排門夫,履忠特以少讀書籍,縣司放免,至今惶愧。今雖不得,且是吾家終身高 藪,實欲獎勸人倫。且遊上京,徐還故里。」乃停留數月而歸。履忠鄉人左庶子吳兢謂履忠曰: 鄉,手詔曰:「孝悌立身,靜退放俗,年過從耄,不雜風塵。盛德予聞,通班是錫,豈惟旌賁山 非貴。几杖云暮,章秩宜加,俾承禮命之優,式副寵賢之美。可朝散大夫。」履忠尋表請還 簡,道實丘園,探蹟以見其微,隱居能達其志。故以汲引洙、泗,物色夷門,素風自高,玄冕 徵赴京師。及至,履忠辭以老病,不任職事。詔曰:「處士前祕書省校書郎白履忠,學優細 徵拜校書郎。尋棄官而歸。開元十年,刑部尚書王志愔表薦履忠隱居讀書,貞苦守操,有 古人之風,堪代褚無量、馬懷素入閣侍讀。十七年,國子祭酒楊瑒又表薦履忠堪爲學官,乃 「吾子家室屢空,竟不霑斗米匹帛,雖得五品,何益於實也?」履忠欣然曰:「往歲契丹入寇, 白履忠,陳留浚儀人也。博涉文史。嘗隱居于古大梁城,時人號爲梁丘子。景雲中,

州,使王子相、柳顧言相次召之,遠知乃來謁見,斯須而鬚髮變白,晉王懼而遣之,少頃又復 師事宗道先生臧兢。 子當爲神仙之宗伯也。」遠知少聰敏,博綜羣書。初入茅山,師事陶弘景,傳其道法。 郎 中丁超女也。 道 煬帝幸涿郡,遣員外郎崔鳳舉就邀之,遠知見於臨朔宮,煬帝親執弟子之禮,敕都城 嘗畫寢,夢靈鳳集其身,因而有娠,又聞腹中啼聲,沙門寶誌謂**曇**選曰:「生 陳主聞其名,召入重陽殿,令講論,甚見嗟賞。及隋煬帝爲晉王,鎭揚 後又

笈者,其孰能與此乎!朕昔在藩朝,早獲問道,眷言風範,無忘寤寐。 妙於三淸之表,返華髮於百齡之外,道邁前烈,聲高自古。 太宗登極,將加重位,固請歸山。 迎謂曰:「此中有聖人,得非秦王乎?」太宗因以實告,遠知曰:「方作太平天子,願自惜也。」 起玉清玄壇以處之。及幸揚州,遠知諫不宜遠去京國,煬帝不從。 已有別敕,不違高志,并許置觀,用表宿心。 佇聞委曲 降璽書曰:「先生操履夷簡,德業沖粹,屛棄塵雜,棲志虚玄,吐故納新,食芝餌朮,念衆 高祖之龍潛也,遠知嘗密傳符命。 副茲引領。 近已令太史薛頤等往詣,令宣朕意。」其年,遠知謂弟子潘師正 至貞觀九年,敕潤州於茅山置太受觀,并度道士二十七 武德中,太宗平王世充,與房玄齡微服以謁之,遠知 未知先生早晚已届江外, 所營棟字, 非夫得秘訣於金壇,受幽文於玉 近覽來奏,請歸舊山 何當就

列

浴,加冠衣,焚香而寢,卒,年一百二十六歲。調露二年,追贈遠知太中大夫,諡曰昇眞先 曰:「吾見仙格,以吾小時誤損一童子吻,不得白日昇天。見署少室伯,將行在卽。」翌日,沐 則天臨朝,追贈金紫光祿大夫。天授二年,改諡曰昇玄先生。

飲水而已。高宗幸東都,因召見與語,問師正:「山中有何所須?」師正對曰:「所須松樹清 泉,山中不乏。」高宗與天后甚尊敬之,留連信宿而還。尋敕所司於師正所居造崇唐觀,嶺 知,盡以道門隱訣及符籙授之。師正淸淨寡欲,居於嵩山之逍遙谷,積二十餘年,但服松葉 後贈詩,凡數十首。師正以永淳元年卒,時年九十八。 高宗及天后追思不已,贈太中大夫, 北面置尋眞門,皆爲師正立名焉。時太常奏新造樂曲,帝又令以脈仙、望仙、翹仙爲名。前 上別起精思觀以處之。初置奉天宮,帝令所司於逍遙谷口特開一門,號曰仙遊門,又於苑 賜諡曰體玄先生。 潘師正,趙州贊皇人也。少喪母,廬於墓側,以至孝聞。大業中,度爲道士,師事王遠

積。 高宗又令道合合還丹,丹成而上之。 咸亨中卒。 及帝營奉天宮,遷道合之殯室,弟子 而霽朗,帝大悅。又令道合馳傳先上太山,以祈福祜。 觀以居之。召入宮中,深尊禮之。及將封太山,屬久雨,帝令道合於儀鸞殿作止雨之術,俄 道士劉道合者,陳州宛丘人。 初與潘師正同隱於嵩山。高宗聞其名,令於隱所置太一 前後賞賜,皆散施貧乏,未嘗有所蓄

開棺將改葬,其尸惟有空皮,而背上開坼,有似蟬蛻,盡失其齒骨,衆謂尸解。

高宗聞之不

悅,曰:「劉師爲我合丹,自服仙去。 其所進者,亦無異焉。」

傳正一之法,至汝四葉矣。」承禛嘗遍遊名山,乃止於天台山。 遂爲道士。 道士司馬承禎,字子微,河內温人。周晉州刺史、琅邪公裔玄孫。 事潘師正,傳其符籙及辟穀導引服餌之術。 師正特賞異之,謂曰:「我自陶隱居 則天聞其名,召至都,降手敕 少好學,薄於爲吏,

豈復攻乎異端,而增其智慮哉!!」帝曰:「理身無爲,則淸高矣。 對曰:「道經之旨:『爲道日損,損之又損,以至於無爲。』且心目所知見者,每損之尙未能已, 景雲二年,睿宗令其兄承禕就天台山追之至京,引入宮中,問以陰陽術數之事。 理國無爲, 如 何?」 對日:

以讚美之。及將還,敕麟臺監李嶠餞之於洛橋之東。

列

者,與天地合其德。』是知天不言而信,不爲而成。無爲之旨,理國之道也。」睿宗歎息曰: 「廣成之言,即斯是也。」承禎固辭還山,仍賜寶琴一張及霞紋帔而遣之,朝中詞人贈詩者百 「國猶身也。老子曰:『遊心於澹,合氣於漠,順物自然而無私焉,而天下理。』易曰:『聖人

爲眞本以奏上之。以承禎王屋所居爲陽臺觀,上自題額,遣使送之。賜絹三百匹,以充藥 以居焉。承禎因上言:「今五嶽神祠,皆是山林之神,非正眞之神也。五嶽皆有洞府,各有 創意爲之。承禛頗善篆隸書,玄宗令以三體寫老子經,因刊正文句,定著五千三百八十言 別立齋祠之所。」玄宗從其言,因敕五嶽各置眞君祠一所,其形象制度,皆令承禛推按道經, 上清眞人降任其職,山川風雨,陰陽氣序,是所理焉。冠冕章服,佐從神仙,皆有名數。請 還天台山,玄宗賦詩以遣之。十五年,又召至都。玄宗令承禛於王屋山自選形勝,置壇室 餌之用。俄又令玉眞公主及光祿卿韋縚至其所居修金籙齋,復加以錫賚。 開元九年,玄宗又遣使迎入京,親受法籙,前後賞賜甚厚。十年,駕還西都,承禛又請

象,而至極則冥。故王屋山道士司馬子微,心依道勝,理會玄遠,遍遊名山,密契仙洞。 出,上連于天,而師容色如生。」玄宗深歎之,乃下制曰:「混成不測,入寥自化。雖獨立有 是歲,卒於王屋山,時年八十九。其弟子表稱:「死之日,有雙鶴遶壇,及白雲從壇中涌

遐霄已曠,言念高烈,有愴于懷,宜贈徽章,用光丹籙。可銀青光祿大夫,號眞一先生。」仍 觀其妙,逍遙得意之場;亡復其根,宴息無何之境。固以名登眞格,位在靈官。林壑未改,

爲親製碑文。

遺使徵之。 旣至,與語甚悅,令待詔翰林。 帝問以道法,對曰:「道法之精,無如五千言,其 潘師正爲道士,傳正一之法,苦心鑽仰,乃盡通其術。開元中,南遊金陵,訪道茅山。久之, 達其誠。玄宗深重之。 人主之所宜適意。」每與緇黃列坐,朝臣啓奏,筠之所陳,但名敎世務而已,間之以諷詠,以 諸枝詞蔓說,徒費紙札耳。」又問神仙脩鍊之事,對曰:「此野人之事,當以歲月功行求之,非 東遊天台。筠尤善著述,在剡與越中文士爲詩酒之會,所著歌篇,傳於京師。玄宗聞其名, 吳筠,魯中之儒士也。少通經,善屬文,舉進士不第。性高潔,不奈流俗,乃入嵩山,依

於天台劇中往來,與詩人李白、孔巢父詩篇酬和,逍遙泉石,人多從之。竟終於越中。文集 於嶽觀別立道院。禄山將亂,求還茅山,許之。旣而中原大亂,江淮多盜,乃東遊會稽。嘗 天寶中,李林甫、楊國忠用事,綱紀日紊。筠知天下將亂,堅求還嵩山,累表不許,乃詔

列

壯麗,能兼之者,其唯筠乎! 氏,亦爲通人所譏。 僧之所嫉。驃騎高力士素奉佛,嘗短筠于上前,筠不悅,乃求還山。故所著文賦,深詆釋 二十卷。其玄綱三篇、神仙可學論等,爲達識之士所稱。 然詞理宏通,文彩煥發,每製一篇,人皆傳寫。雖李白之放蕩,杜甫之 筠在翰林時,特承恩顧,由是爲羣

與兄克符、弟克讓,皆事親以孝聞。旣孤,俱隱於嵩山。 書司勳員外郞、史館修撰。述睿每加恩命,暫至朝廷謝恩,旬日卽辭疾,却歸舊隱。 |晏累表薦述||睿有顏、|閔之行,游、夏之學。|代宗以太常寺協律郞徵之,轉國子博士,歷遷尙 孔述睿,越州人也。曾祖昌寓,膳部郎中。 祖舜、監察御史。父齊參、寶鼎令。述睿少 述睿好學不倦,大曆中,轉運使劉

以峒山問道,渭水求師,亦何必務執勞謙,固求退讓。無違朕旨,且啓乃心。」述睿旣懇辭不 獲,方就職。 前乞還舊山,詔報之曰:「卿懷伊擊匡時之道,有廣成嘉遁之風。養素丘園,屢辭命秩。朕 述睿旣至,召對於別殿,特賜第宅,給以廐馬,兼爲皇太子侍讀。旬日後累表固辭,依 德宗踐祚,以諫議大夫銀章朱綬,命河南尹趙惠伯齎詔書、玄纁束帛,就嵩山以禮徵 久之,改祕書少監, 兼右庶子, 再加史館修撰。 述睿精於地理, 在館乃重修地

理誌,時稱詳究。 時令狐恒亦充修撰,與述睿同職,多以細碎之事侵述睿,述睿皆讓之,竟不與爭,時人 而又性謙和退讓,與物無競,每親朋集會,嘗恂恂然似不能言者,人皆敬

稱爲長者。

故也。 給而遣之。 貞元十六年九月卒,年七十一。 贈工部尚書。子敏行。 仕,放還鄉里,仍賜帛五十匹、衣一襲。 所賴攸深, 未依來請, 想宜悉也。」述睿再三上表, 方獲允許, 乃以太子賓客賜紫金魚袋致 貞元四年,命齎韶幷御饌、衣服數百襲,往平凉盟會處祭陷歿將士骸骨,以述睿性精慤 九年,以疾上表,請罷官。 韶不許,報之曰:「朕以卿德重朝端,行敦風俗,不言之敎, 故事,致仕還鄉者皆不給公乘,德宗優寵儒者,特命

爲友,雖名華爲 闕。 **静之,故叔元得罪,時論稱美。** 大夫。上疏論興元監軍楊叔元陰激募卒爲亂,殺節度使李絳。人不敢發其事,敏行上表極 丁母憂而罷。後元膺爲東都留守,移鎭河中,敏行皆從之。 長慶中,爲起居郎,改左司員外郎,歷司勳郎中,充集賢殿學士,遷吏部郎中,俄 <u>敏行字至之,舉進士,元和五年禮部侍郎崔樞下擢第。</u> 一時冠,而貞規雅操,與父遠矣。一大和九年正月卒,年四十九,贈尙書工部 敏行名臣之子,少而修潔,爲人所稱;及游宦,與當時豪俊 十四年,入爲右拾遺,遷左補 呂元膺廉問岳鄂, 辟爲賓佐。 拜

列

傳

侍 郎。

德宗遣中官持章服衣之而後召,賜帛五十匹。 尋遷諫議大夫。 薦爲著作郎,德宗令長安縣尉楊寧齎束帛詣夏縣所居而召之,城乃衣褐赴京, 者,不詣官府,詣城請決。陝虢觀察使李泌聞其名,親詣其里訪之,與語甚悅。 晝夜不出房,經六年,乃無所不通。 旣而隱於中條山,遠近慕其德行,多從之學。 陽城字亢宗,北平人也。代爲宦族。 家貧不能得書,乃求爲集賢寫書吏,竊官書讀之, 泌爲宰相, 閭 里 相 訟

服用有切急不可闕者,客稱某物佳可愛,城輒喜,舉而授之。 米當幾何,買薪、菜、鹽凡用幾錢,先具之,其餘悉以送酒媪,無留也。」未嘗有所蓄積。 城或時先醉臥客懷中,不能聽客語。 意,引之與坐,輒強以酒。 及客日夜痛飲,人莫能窺其際,皆以虚名譏之。有造城所居,將問其所以者。 職。」人咸畏憚之。及至,諸諫官紛紜言事,細碎無不聞達,天子益厭苦之;而城方與二弟 初未至京,人皆想望風彩,曰:「陽城山人能自刻苦,不樂名利,今為諫官,必能以死奉 客辭,城輒引自飲,客不能已,乃與城酬酢。 約其二弟云:「吾所得月俸,汝可度吾家有幾口,月食 有陳萇者,候其始請月俸,常 客或時先醉仆席上, 城望風知其 雖所

往稱其錢帛之美,月有獲焉。

曰:「脫以延齡爲相,城當取白麻壞之。」竟坐延齡事改國子司業。 平?」已而連呼「太平,太平」。萬福武人,年八十餘,自此名重天下。 獨開解之,城賴之獲免。於是金吾將軍張萬福聞諫官伏閣諫,趨往,至延英門,大言賀曰: 王仲舒共論延齡姦佞,贄等無罪。一德宗大怒,召宰相入議,將加城罪。時順宗在東宮,爲城 姦佞相次進用,誣譖時宰, 毁詆大臣, 陸贄等咸遭枉黜,無敢救者。 城乃伏閣上疏, 與拾遺 「朝廷有直臣,天下必太平矣。」乃造城及王仲舒等曰:「諸諫議能如此言事,天下安得不太 時德宗在位,多不假宰相權,而左右得以因緣用事。於是裴延齡、李齊運、韋渠牟等以 時朝夕欲相延齡,城

| 宗聞之,以| 城黨罪人, 出爲| 道州刺史。 寄無根蒂,臺東以蹤跡求得之於城家。城坐臺東於門,與約飲酒訣別,涕泣送之郊外。 乎?」明日,告城歸養者二十餘人。有薛約者,嘗學於城,性狂躁,以言事得罪,徙連州,客 日,吏遮止之,疏不得上。 城既至國學,乃召諸生,告之曰:「凡學者所以學爲忠與孝也。 太學生王魯卿、季償等二百七十人詣闞乞留,經數 諸生寧有久不省其親者

矮,每年常配鄉戶貢其男,號爲「矮奴」。」城不平其以良爲賤,又憫其編甿歲有離異之苦,乃 在道州,以家人法待吏人,宜罰者罰之,宜賞者賞之,不以簿書介意。 道州土地產民多

謁城於獄,曰:「使君何罪,某奉命來侯安否耳。」留一二日未去,城因不復歸館,門外有故門 抗疏論而免之,自是乃停其貢,民皆賴之,無不泣荷。前刺史有贓罪,觀察使方推鞫之,吏 扇橫地,城畫夜坐臥其上,判官不自安,辭去。其後又遣他判官往按之,他判官義不欲按, |城不出迎,以問州吏,吏曰:「刺史聞判官來,以爲有罪,自囚於獄,不敢出。」判官大驚,馳入 上考功第,城自署其第曰:「撫字心勞,徵科政拙,考下下。」觀察使遣判官督其賦,至州,怪 有幸於前刺史者,拾其不法事以告,自爲功,城立杖殺之。賦稅不登,觀察使數加消讓。州

州縣給遞,以喪歸葬焉。 順宗卽位,韶徵之,而城已卒,士君子惜之。 是歲四月,賜其家錢二百貫文,仍令所在

乃載妻子行,中道而自逸。

令各爲生業。 觀夫妻遂隱於城固南山,家事一不問,約奴婢遞過其舍,至則供給酒食而已。 夫婦林泉相對,以嘯咏自娛。 爲吏無方略,苦不達人事,餘慶以長者優容之。大和八年,左補闕王直方上疏論事,得 崔覲,梁州城固人。爲儒不樂仕進,以耕稼爲業。老而無子,乃以田宅家財分給奴婢, 山南西道節度使鄭餘慶高其行,辟爲節度參謀,累邀方至府

召見,文宗便殿訪以時事。 直方亦興元人,與觀城固山爲鄰,是日因薦觀有高行,韶以起居

鄓徵之,艱辭疾不起。 卒於山。

贊日:高士忘懷,不隱不顯。 依隱釣名, 眞風漸鮮。 結廬泉石, 投紱市朝。 心無出處,

是日逍遙。

校勘記

(1) 朝散大夫 御覽卷五〇六作「諫議大夫」。

列傳第一百四十二 校勘記

舊唐書卷一百九十三

列傳第一百四十三

列女

李湍 鄒保英妻奚氏 楊紹宗妻王氏 鄭義宗妻盧氏 魏衡妻王氏 奉天縣竇氏二女 李德武妻裴氏 妻 董昌齡母楊氏 樊會仁母敬氏 古玄應妻高氏附 于敏直妻張氏 劉寂妻夏侯氏 楊慶妻王氏 盧甫妻李氏 韋雍妻蘭陵縣君蕭氏 獨孤師仁乳母王氏附 宋庭瑜妻魏氏 絳州孝女衛氏 王泛妻裴氏附 冀州女子王氏 楚王靈龜妃上官氏 鄒待徵妻薄氏 崔繪妻盧氏 濮州孝女賈氏 楊三安妻李氏 樊彦琛妻魏氏

五一三七

列傳

第

百四四

十 三

列

女

衡方厚妻武昌縣君程氏 女道士李玄真 孝女王和子 鄭神佐女附

窕之操,不其賢乎!其次梁鴻之妻,無辭偕隱,共姜之誓,不踐二庭,婦道母儀,克彰圖史, 庭,不汚非義,臨白刃而慷慨,誓丹衷而激發,粉身不顧,視死如歸,雖在壯夫,恐難守節,窈 又其長也。末代風靡,貞行寂寥,聊播椒蘭,以貽閨壼,彤管之職,幸無忽焉。 女子稟陰柔之質,有從人之義。前代誌貞婦烈女,蓋善其能以禮自防。至若失身賊

經,不御膏澤。李氏之姊妹在都邑者,歲時朔望,必命左右致敬而省焉。裴又嘗讀烈女傳, 之以死,必無他志。」因操刀欲割耳自誓,保者禁之乃止。。裴與德武別後,容貌毀悴,常讀佛 耳,於此卽事長訣矣!」變泣而對曰:「婦人事夫,無再醮之禮。夫者,天也,何可背乎!守 適德武,經一年而德武坐從父金才事徙嶺表。矩時爲黃門侍郎,奏請德武離婚,煬帝許之。 見稱述不改嫁者,乃謂所親曰:「不踐二庭,婦人常理,何爲以此載於記傳乎?」後十餘年 |億武將與||裴別,謂曰:「燕婉始爾,便事分離,方遠投瘴癘, 恐無還理。 尊君奏留,必欲改嫁 李德武妻裴氏,字淑英,戶部尚書、安邑公矩之女也。性婉順有容德,事父母以孝聞。

絕粒 間,與德武音信斷絕,矩欲奪其志。時有柳直求婚,許之,期有定日,乃以翦刀斷其髮,悲泣 其後妻,重與裴合。 矩 不 可奪,乃 止。 生三男四女。 德武已於嶺表娶爾朱氏爲妻,及遇赦得還,至襄州, 貞觀中,德武終於應城令,裴歲餘亦卒。 開裴守節,乃出

陷於世充,世充以兄女妻之,授管州刺史。 謂侍者曰:「唐兵若勝,我家則滅。 身謀,妾將奈何。若至長安,則公家之婢耳!願送至東都,公之惠也。」慶不聽。 國。 慶旣入朝,官至宜州刺史。 妻謂慶曰:「鄭國以妾奉箕箒於公者,所以結公心耳。 楊慶妻王氏,世充兄之女也。 慶即隋河間王弘之子,大業末,封郇王,爲滎陽太守。 鄭國無危,吾夫又死。 及太宗攻圍洛陽,慶謀背世充,欲與其妻俱來歸 一今旣二三其行,負恩背義,自爲 進退維谷,何以生焉? 」乃飮藥而 何慶出後,

不殺,使禁掌之。 時喪亂年饑,人多餓死,蘭英扶路乞丐捃拾,遇有所得,便歸與師仁,蘭英唯啖土飮水 時又有獨孤 武都,謀叛王世光歸國,事覺誅死。武都子師仁,年始三歲,世充以其年幼 乳母王氏,號廣英,請髠鉗,求入保養,世充許之。 蘭英撫育提攜,備盡筋

而已。 鞠 無倦,提攜遺幼,背逆歸朝。 後詐採拾, 乃竊師仁歸于京師, 高祖嘉其義,下詔曰:「師仁乳母王氏,慈惠有聞,撫 宜有褒隆,以錫其號。 可封永壽郡君。

太宗聞而異之,賜帛二百段,遣州縣所在存恤之。 至貧窶。 楊三安妻李氏,雍州涇陽人也。事舅姑以孝聞。及舅姑亡沒,三安亦死,二子孩童,家 李畫則力田,夜則紡緝,數年間葬舅姑及夫之叔姪兄弟者七喪,深爲遠近所嗟尚。

佩刀斬之,攜其首入城,賊衆乃散。 後企地漸強盛,衡謀以城應賊,企地領衆將趨梁州,未至數十里,飲酒醉臥,王氏取其 魏衡妻王氏,梓州郪人也。武德初,薛仁杲舊將房企地侵掠梁郡,因獲王氏,逼而妻 高祖大悅,封爲崇義夫人,捨衡同賊之罪。

樊會仁母敬氏,字像子,蒲州河東人也。 年十五,適樊氏,生會仁而夫喪,事舅姑姊似

以謹 之,將逼與俱返,像子誓以必死,辭情甚切,其兄感歎而止。後會仁年十八病卒,時像子母 吾覺悟,必加防備,則吾難爲計矣。」會仁便佯睡,像子於是伺隙攜之遁歸,中路,兄使追及 興汝父同穴。所以不死者,徒以我母羸老,汝身幼弱。今汝舅欲奪吾志,將加逼迫,於汝何 **餚饍,像子知爲所欺,佯爲不悟者。其嫂復請像子沐浴,像子私謂會仁曰:「吾不幸孀居,誓** 乃潛許人爲婚,矯稱母患以召之。凡所營具,皆寄之鄰里。像子旣至,省母無疾,鄰家復具 如!」會仁失聲啼泣,像子撫之日:「汝勿啼。吾向僞不覺者,令汝舅不我爲意,聞汝啼,知 已終,旣葬,像子謂其所親曰:「吾老母不幸,又夫死子亡,義無久活。」於是號慟不食,數日 順聞。及服終,母兄以其盛年,將奪其志,微加諷諭,便悲恨嗚咽,如此者數四。 母兄

罪,給傳乘徙於雍州,并給田宅,仍令州縣以禮嫁之。 嫁,無兄弟。及長,常思復讎。 而詣吏,稱父讎旣報,請就刑戮。 絳州孝女衞氏,字無忌,夏縣人也。初,其父爲鄉人衞長則所殺,無忌年六歲,母又改 無忌從伯常設宴爲樂,長則時亦預坐,無忌以磚擊殺之。旣 巡察大使、黃門侍郎褚途良以聞,太宗嘉其孝烈,特令免

育之,誓以不嫁。及強仁成童,思共報復,乃候玄基殺之,取其心肝,以祭父墓。遣強仁自 罪,移其家於洛陽。 列於縣司,斷以極刑。 孝女賈氏,濮州鄄城人也。年始十五,其父爲宗人玄基所害。其弟強仁年幼,賈氏撫 賈氏詣闕自陳己爲,請代強仁死。高宗哀之,特下制賈氏及強仁免

尚相赴救,況在於姑,而可委棄!若萬一危禍,豈宜獨生。」其姑每嘆云:「古人稱歲寒然後 禽獸者,以其仁義也。昔宋伯姬守義赴火,流稱至今。吾雖不敏,安敢忘義。且鄰里有急, 之,幾至於死。 賊去後,家人問曰:「羣凶擾橫,人盡奔逃,何獨不懼?」答曰:「人所以異於 數十人,持杖鼓譟,踰垣而入,家人悉奔竄,唯有姑獨在室。」盧冒白刃往至姑側,爲賊捶擊 知松柏之後凋也,吾今乃知盧新婦之心矣。」貞觀中卒。 鄭義宗妻盧氏,幽州范陽人,盧彥衡之女也。略涉書史,事舅姑甚得婦道。嘗夜有強盜

墳,廬於墓側,每日一食,如此者積年。 失,以終侍養。經十五年,兼事後母,以至孝聞。及父卒,毀瘠殆不勝喪,被髮徒跣,負土成 劉寂妻夏侯氏,滑州胙城人,字碎金。父長雲,爲鹽城縣丞,因疾喪明。 貞觀中,有制表其門閭,賜以粟帛。 碎金乃求離其

薨。及將葬,其前妃閻氏,嫁不踰年而卒,又無近族,衆議欲不舉之,上官氏曰:「必神而靈, 生,改醮異門,禮儀常範,妃可思之。」妃掩泣對曰:「丈夫以義烈標名,婦人以守節爲行。 寧可使孤魂無託!」於是備禮同葬,聞者莫不嘉歎。 服終,諸兄姊謂曰:「妃年尙少,又無所 哀王後。 本生具存,朝夕侍奉,恭謹彌甚,凡有新味,非舅姑噉訖,未曾先嘗。 經數載 志不可奪,歎息而止。 能 即先犬馬,以殉溝壑,寧可復飾粧服,有他志乎!」遽將刀截鼻割耳以自誓,諸兄姊知其 楚王靈龜妃上官氏,秦州上邽人。父懷仁,右金吾將軍。上官年十八,歸于靈龜,繼楚 靈龜

遼而歿。繼母尋亦卒。王乃收所生及繼母屍柩,幷立父形像,招魂遷葬訖,廬於墓側,陪其 築。痛結晨昏,哀感行路。永言志行,嘉尙良深。宜標其門閭,用旌敏德。」賜物三十段、粟 衰謝。以往在隋朝,父歿遼左,招魂遷葬,負土成墳,又葬其祖父母等,竭此老年,親加板 祖父母及父母墳。永徽中,詔曰:「故楊紹宗妻王氏,因心爲孝,率性成道。年追桑楡,筋力 楊紹宗妻王氏,華州華陰人也。初年二歲,所生母亡,爲繼母鞠養。 至年十五,父又征

即號踊自傷,期於必死。檢卒後,凶問至,號哭一慟而絕。高宗下韶,賜物百段,仍令史官 右, 晝夜省侍, 宛若成人。及稍成長, 恭順彌甚。 于敏直妻張氏,營州都督、皖城公儉之女也。數歲時父母微有疾,卽觀察顏色,不離左 適延壽公于欽明子敏直。 初聞儉有疾,便

錄之。

冀州鹿城女子王阿足者,早孤,無兄弟,唯姊一人。阿足初適同縣李氏,未有子而夫

夜便紡績, 節行,競令妻女求與相 時年尙少,人多聘之。 衣食所須,無非阿足出 識。 爲姊年老孤寡,不能捨去,乃誓不嫁,以養其姊。 後數歲,竟終于家。 者, 如此二十餘年。 及姚喪, 葬送以禮。 鄉人莫不稱其 每畫營田 業

道 歿,未能自盡,苟復偷生,今復見逼管絃,豈非禍從手發耶? 侍衣裳,二十餘載。 又欲妻之,魏以必死自固,贼等忿怒,以刃加頸,語云:「若不從我,即當殞命。」乃厲聲駡曰: 卒後,屬 爾等狗盜,乃欲汚辱好人,今得速死,會我本志。」賊乃斬之,聞者莫不傷惜。 ,無所多恨。 樊彥琛妻魏氏,楚州淮陰人。 李敬業之亂,乃爲賊所獲。 君宜勉勵,養諸孤,使其成立。 **豈意釁妨**所招, **彥琛病篤,將卒,魏泣而言曰:「幸以愚陋,託身明德,奉** 賊黨知其素解絲竹,逼令彈箏,魏氏歎曰:「我夫不幸亡 遽見此禍, 若相從而死, 適足貽累, 非吾所取 同入黃泉, 」乃引刀斬指,棄之於地。 是其願也。」彥琛答曰:「死生常 也。」
彦琛 賊黨

鄒保英妻奚氏,不知何許人也。 萬歲通天年,契丹賊李盡忠來寇平州,保英時任刺

列傳第一百四十三 列女

領兵計擊。 旣而城孤援寡,勢將欲陷,奚氏乃率家僮及城內女丁相助固守。 賊退,所司以

聞,優制封爲誠節夫人。

以獎勸。 咸憂陷沒,丈夫固守,猶不能堅,婦人懷忠,不憚流矢,由茲感激,危城重安。 時有古玄應妻高氏,亦能固守飛狐縣城,卒免爲突厥所陷。下詔曰:「頃屬默啜攻城 古玄應妻可封爲徇忠縣君。」 如不褒升,何

數日:「曹大家東征之流也。」庭瑜尋轉廣州都督,道病卒。魏氏旬日亦殞,時人莫不傷之。 重 作南征賦以敍志,詞甚典美。開元中,庭瑜累遷慶州都督。初,中書令張說年少時爲克己所 天時爲天官侍郎。魏氏善屬文。先天中,庭瑜自司農少卿左遷涪州別駕,魏氏隨夫之任,中路 ,魏氏恨其夫爲外職,乃作書與說,敍亡父疇昔之事,并爲<u>庭瑜申理,乃錄兩征賦</u>寄說。說 宋庭瑜妻魏氏,定州鼓城人,隋著作郎彦泉之後也,世爲山東士族。父克己,有詞學,則 列傳第一百四十三 列女

垂淚。 沖當朝美職,諸兄不之拒,將婚之夕,方以告盧,盧又固辭不可,仍令人防其門。 諸兄常欲嫁之,盧輒稱病固辭。 盧亡姊之夫李思沖,神龍初爲工部侍郎,又求續親。 歷鸞臺侍郎、文昌左丞,天授中爲酷吏來俊臣所陷,左遷西鄉令而卒。 曰:「吾自誓久已定矣。」乃夜中出自竇中,奔歸崔氏,髮面盡爲糞穢所汚,宗族見者皆爲之 崔繪妻盧氏,幽州范陽人也,爲山東著姓。祖幼孫,常州刺史。父獻,有美名,則天時 因出家爲尼,諸尼欽其操行,皆尊事之。開元中,以老病而卒。 繪早終, 盧旣年少, 盧謂左右 時思

數千人,持兵刃入其村落行剽劫,聞二女有容色,姊年十九,妹年十六,藏於岩窟間。 受賊汚辱!」乃投之於谷。賊方驚駭,仲娘又投於谷。谷深數百尺,姊尋卒,仲娘脚折面破 擬爲逼辱,乃先曳伯娘出,行數十步,又曳仲娘出,賊相顧自慰。 丁役,二女葬事官給。京兆戶曹陸海著賦以美之。 血流被體,氣絕良久而蘇,賊義之而去。。京兆尹第五琦感其貞烈,奏之,詔旌表門閭,長免 奉天縣寶氏二女伯娘、仲娘,雖長於村野,而幼有志操。住與邠州接界。 行臨深谷,伯娘曰:「我豈 永泰中,草城 賊徒

弟兄爭死。瀾女盧甫妻,又泣請代父死。並爲賊所害。宣慰使、吏部侍郎李季卿以節義聞。 領兵掩襲,賊得脫後,入縣殺瀾。 人,瀾挺身入賊,結以誠信,賊並降附,百姓復業者二百餘家。 原武尉盧甫妻李氏,隴西成紀人也。父瀾,永泰元年春任蘄縣令。界內先有草賊二千餘 瀾將被殺,從父弟渤,詣賊救瀾,請代兄死。 時曹昇任徐州刺史,知賊降, 瀾又請留弟,

怒,乃支解裴氏,至死不屈。 衣冠之子,當死卽死,終不苟全一命,受汚於賊。」賊脅之以兵,逼之以刀,襲堅駡抗之,賊 又有尉氏尉王泛妻裴氏,儀王傅巨卿之女也。 季卿亦以狀迹聞 素有容範,爲賊所俘,賊逼之,裴曰:「吾

飾,俾光休美。 植性,頃因寇難,克彰義烈。或請代父死,表因心之孝;或誓逐夫亡,摽難 韶曰:「鄭州原武縣尉盧甫亡妻李氏、汴州尉氏縣尉王泛亡妻裴氏等,懿範傳家, 李氏可贈孝昌縣君,裴氏可贈河東縣君,仍編入史册。」瀾、渤亦贈官秩。 奪之節。 宜膺贈 柔明

|微官告於懷中,託付村人,使謂||待||微曰:「義不受辱。」乃投江而死。 鄒 待徴 妻薄氏。 待徵,大曆中爲常州江陰縣尉二〕,其妻爲海賊所掠。 賊退潮落,待徵於江岸 薄氏守節, 出待

重胤。 重胤以其事請列史册。十三年,憲宗下韶從之。 李湍妻。湍,吳元濟之軍人也。 其妻遂爲賊束縛在樹,臠而食之,至死,叫其夫曰:「善事烏僕射。」觀者義之。至是, 元和中,淮南未平,湍心懷向順,乃急渡澱河,東降鳥

念。汝爲忠臣,吾雖歿無恨矣。」及王師逼郾城,昌齡乃以城降,且說賊將鄧懷金歸款於李 署爲郾城令。 皆老母之訓。」憲宗嗟歎良久。元濟囚楊氏,欲殺之而止者數矣。蔡平,楊氏幸無恙。 至元濟時,爲吳房令。楊氏潛誠曰:「逆順之理,成敗可知,汝宜圖之。」昌齡志未果,元濟又 十五年,陳許節度使李遜疏楊氏之強明節義以聞,乃封北平郡太君。 董昌齡母楊氏。 憲宗聞之喜,急召昌齡至闕,眞授郾城令、兼監察御史,仍賜緋魚。 楊氏復誠曰:「逆黨欺天,天所不福。汝當速降,無以前敗爲慮,無以老母爲 **昌齡常爲泗州長史,世居于察。少孤,受訓於母。** 累事吳少誠、少陽, 昌齡泣謝曰:「此

列傳

起亂。 **撓,雖凶悍園視,無不嗟嘆。其夕,蕭氏亦卒。** 而告曰:「妾不幸年少,義不苟活,今日之事,願先就死。」執刃者斷其臂而殺瘫,蕭氏詞氣不 追封蘭陵縣君。 廷制置未備,幽州俗本凶悍,尤不樂文儒爲主帥,賓佐習於常態,忿其變通,議論不密,卒然 韋雅妻蕭氏。 雅時家亦從劫,蕭氏聞難號呼,專執夫袂,左右格去,以死不從。及雅臨刃,蕭氏涕 雅,故太子賓客。張弘靖鎭幽州日,奏授觀察判官,攝監祭御史。 大和六年,節度使楊志誠表明其事,因降敕 時屬朝

於右銀臺門,告夫被殺之冤。御史臺鞫之,得實,諫官亦有章疏,故昌齡再受譴逐。程氏, 氏力不能免,乃抑其哀,如非冤者。 昌齡雅不疑慮,聽其歸葬。 血誠旣昭,幽憤果雪,雖古之烈婦,何以加焉。 [成元年降敕曰:「乃者吏爲不道,虐殺爾夫,詣闕申冤,徒行萬里,崎嶇逼畏,濱於危亡。 衡方厚妻程氏。 方厚,大和中任邕州都督府錄事參軍,爲招討使董昌齡誣枉殺之。程 如聞孤孀無依,晝哭待盡,俾榮祿養,仍賜疏 程氏故得以徒行詣闕,截耳

嶺南節度使盧鈞出俸錢接措,哀妾三代旅櫬暴露,各在一方,特與發遣,歸就大塋合祔。 行路猶或嗟稱,朝廷固須恤助。委宗正寺、京兆府與訪越王墳墓報知。如不是陪陵,任附塋 護四喪,已到長樂旅店權下,未委故越王墳所在,伏乞天恩,允妾所奏,許歸大塋。妾年已六 <u>阗祖、父,皆亡歿於嶺外。雖曾經恩赦,而未昭雪。玄眞進狀曰:「去開成三年十二月內得</u> 次卜葬。其葬事仍令京兆府接措,必使備禮。葬畢,玄眞如願住京城,便配咸宜觀安置。」 配流,數代漂零,不還京國。玄眞弱女,孝節卓然,啓護四喪,綿歷萬里,況是近族,必可加恩。 十三,孤露家貧,更無依倚。」詔曰:「越王事跡,國史著明,枉陷非辜,尋已洗雪。其珍子他事 女道士李玄真,越王貞之玄孫。曾祖珍子,越王第六男也,先天中得罪,配流嶺南。

無子,母先亡。 孝女王和子者,徐州人。其父及兄爲防秋卒,戍涇州。 和子時年十七,聞父兄歿於邊上,被髮徒跣縗裳,獨往涇州,行丐取父兄之 元和中,吐蕃寇邊,父兄戰死,

列傳第

百四十三

列女

校勘記

喪,歸徐營葬,手植松柏,剪髮壞形,廬於墓所。 節度使王智興以狀聞,詔旌表之。

以誓心,克彰孝理之仁,足厲貞方之節。」韶旌表門閭。 官健,戍慶州。時党項叛,神佐戰死,其母先亡,無子。 女痛結窮泉,哀深陟岵,投身沙磧,歸父遺骸,遠自邊陲,得還閭里。 不適人。節度使蕭俶以狀奏之曰:「伏以閭里之中,罕知禮敎,女子之性,尤昧義方。 壞形,自往慶州護父喪還,至瑕丘縣進賢鄉馬青村,與母合葬。 又大中五年,兗州瑕丘縣人鄭神佐女,年二十四,先許適聽雄牙官李玄慶。 女以父戰歿邊城,無由得還,乃剪髮 便廬於墳所,手植松檟, 感葱莪以積恨,守丘墓 神佐亦爲 鄭氏

贊曰:政敎隆平,男忠女貞。 禮以自防, 義不苟生。 彤管有煒, 蘭閨振聲。 關雎合雅

校勘記

始號文明。

(一) 爲常州江陰縣尉 「江」字各本原作「山」,據新書卷二〇五列女傳改。

舊唐書卷一百九十四上

列傳第一百四十四上

突厥上

突厥之始,啓民之前,隋書載之備矣,祇以入國之事而述之。

謂之特勤,別部領兵者皆謂之設,其大官屈律啜,次阿波,次頡利發,次吐屯,次俟斤,並代 也,高視陰山,有輕中夏之志。可汗者,獨古之單于,妻號可賀敦,獨古之閼氏也。其子弟 族強盛,東自契丹、室韋,西盡吐谷渾、高昌諸國,皆臣屬焉,控弦百餘萬,北狄之盛,未之有 始畢可汗咄吉者,啓民可汗子也。 隋大業中嗣位,值天下大亂,中國人奔之者衆。

居其官而無員數,父兄死則子弟承襲。

獻馬千匹, 高 祖 起義太原,遣大將軍府司馬劉文靜聘于始畢,引以爲援。始畢遣其特勤康稍利等 會于絳郡,又遣二千騎 助軍,從平京城。 及高祖卽位,前後賞賜,不可勝紀。始畢

列

僔

百四四

十四四

上

突厥

上

直幽州之北,立其弟俟利弗證,是爲處羅可汗。 河至夏州,城帥梁師都出兵會之,謀入抄掠,授馬邑賊帥劉武周兵五百餘騎,遣入句注,又 畢使骨咄祿特勒來朝,宴于太極殿,奏九部樂,賚錦綵布絹各有差。二年二月,始畢帥兵渡 追兵大集,欲侵太原。是月,始畢卒,其子什鉢苾以年幼不堪嗣位,立爲泥步設,使居東偏, 自恃其功,益驕踞,每遣使者至長安,頗多横恣,高祖以中原未定,每優容之。」武德元年,始

并州,總管李仲文出迎勞之,留三日,城中美婦人多爲所掠,仲文不能制。 太宗在藩,受韶討劉武周,師次太原,處羅遣其弟步利設率二千騎與官軍會。六月,處羅至 隋王。 隋末中國人在虜庭者,悉隸于政道,行隋正朔,置百官,居于定襄城,有徒一萬。 時 是,隋煬帝蕭后及齊王暕之子政道陷于竇建德,三年二月,處羅迎之,至于牙所,立政道爲 成公主以其子奧射設醜弱,廢不立之,遂立處羅之弟咄苾,是爲頡利可汗。 官就館弔其使者,又遣內史舍人鄭德挺往弔處羅,賻物三萬段。處羅此後頻遣使朝貢。先 處羅可汗嗣位,又以隋義成公主爲妻,遺使入朝告喪。高祖爲之舉哀,廢朝三日,詔百 俄而處羅卒,義

宗軍所。 頡利 又說頡利 據 隴 右 頡 利 歌說之,令絕交於薛舉。 遣其將宗羅睺 武德三年,頡利又納義 遭長遜入朝,以五原地歸于我。 可汗者,啓民 攻陷 可汗第三子也, 平涼郡,北與頡利 成公主爲妻,以始畢之子什鉢苾爲突利可汗,遣使入朝,告 初,隋五 初爲莫賀咄設,牙直五原之北。 原太守張長遜因亂以其所部五原城隸於突厥。 頡利並從之, 因發突厥兵及長遜之衆, 連結。 高祖 **息之,遣光祿卿宇文歌齎金** 高祖 入長安, 並會於太 一帛以 薛舉 歌 路

處羅

死,高祖爲之罷朝一日,詔百官就館弔其使

使者特勤熱寒、阿史德等還蕃,賜以金帛 挫,於是乃懼,仍放順德還,更請和好,獻魚膠數十斤,欲令二 財苑君璋將兵六千人共攻雁門,定襄王李大恩擊走之。 左驍衞大將軍長孫順德等各使于突厥, 每優容之,賜與不可勝計,頡利言辭悖傲, **頡利初嗣立,承父兄之資,兵馬強盛,** 頡利並拘之, 求請無厭。 有憑陵中國之志。 我亦留其使前後數輩 四年四 先是漢陽公褒(1)、太常卿鄭元璹 國同 月, 高祖以中原初定,不遑外略 頡利 於此膠。 自率萬餘騎 ,至是爲大恩所 高祖嘉之,放其 ,與馬邑

期以二月會于馬邑, 五 年春, 李大恩奏言突厥 晟後 期 不 飢荒, 至, 大恩不能獨 馬邑 可圖。 進,頓兵新城以待之。 韶大恩與殿內少監獨孤晟帥師討苑君璋 頡利 遣數萬騎 典劉 黑

列

第

百四四

+

깯

上

突

厥

宗兵至瀟州,乃引兵出塞。 屬合軍,進圍大恩,王師敗績,大恩歿于陣,死者數千人。 六月,劉黑闥又引突厥萬餘騎入 道,太宗出蒲州道以討之。 抄 河北, 頡利復自率五萬騎南侵,至于

汾州,又遣數千騎西入靈、原等州,韶隱太子出豳州 時頡利攻圍拌州,又分兵入汾、路等州,掠男女五千餘口,聞太

隸焉。 往與我盟,急難相救,爾今將兵來,何無香火之情也?亦宜早出,一決勝負。」突利亦不對。 若欲兵馬總來,我唯百騎相禦耳。」頡利弗之測,笑而不對。太宗又前,令騎告突利曰:「爾 餘 謂曰:「頡利誠心遣特勤朝拜,今見特勤,如見頡利。」固引之,乃就坐,尋封思摩爲和順王。 和,許之。 不相負,何爲背約深入吾地?我秦王也,故來一決。 無惡意, 太宗前 騎奄至城西, 七年八月,頡利、突利二可汗舉國入寇,道自原州,連營南上,太宗受詔北討,齊王元吉 ,將渡溝水,頡利見太宗輕出,又聞香火之言,乃陰猜突利,因遣使曰:「王不須渡,我 初,關中霖雨,糧運阻絕,太宗頗患之,諸將憂見於色,頓兵於豳州。 遂不欲戰。其叔姪內離,頡利欲戰不可,因遣突利及夾畢特勤阿史那思摩奉見請 更欲共王自斷當耳。」於是稍引却,各斂軍而退。太宗因縱反間於突利,突利悅而 突利因自託於太宗,願結爲兄弟。思摩初奉見,高祖引升御楊,頓顙固辭,高祖 乘高 而陣,將士大駭。太宗乃親率百騎馳詣虜陣,告之曰:「國家與可汗誓 可汗若自來,我當與可汗兩人獨戰; 頡利、突利率萬

突厥 其腹 極多 大將 師。 心 軍 面 九年 八 ,何故輒將兵入我畿縣? 執失 尉 自 年 出 七月, 和 七 師 遲 敬 月 思力入朝爲覘 親,汝則背之,我實無愧。 拒 德與之戰于涇陽,大破之,獲俟斤阿史德烏沒啜,斬首千餘級。 戰, 頡 頡利自率 頡利 利 集兵 不得進,屯 十餘萬騎進寇武功,京師 十餘萬, 了,自張 爾雖突厥,亦須頗有人心,何故全忘大恩, 形勢云:「二可汗總兵百萬,今已至矣。」太宗謂之曰:「我 大掠 又義軍入京之初, 朔州,又襲將軍張瑾 太宗 帥 戒 師討之, 嚴。 爾父子並親從我,賜 己卯,進寇 次蒲州 于太原 強 頡 高陵,行 利 全軍並沒,脫 自誇強盛。我當先 引 兵 軍總管 汝玉帛, 癸未, 而 去, 身奔 頡 左 武 前 利 後 與 候 旋 於 遣

以 服 容,使知 大懼。 將 謂 負約,其

動大驚, 匈 非卿所 奴 不敢 太宗與侍 太宗獨與頡利臨 自茲 必戰。 挺之。 知也。 始矣。」 中高 事 朕若閉門,虜必大掠,強弱之勢,在今一 出不意 突厥 士廉、中書令房玄齡、將軍周範馳六騎幸渭水之上,與頡 是 皆下馬羅拜。 日 所以掃其境內, 水交言, 磨諸軍 頡 ,乖其本圖 利 請 和 , 俄 韶許焉,車駕即 虜 而衆軍繼至 直 ·却而 入 八門濱 、既深 陣焉。 ,理當自懼。 ,應是開 , 蕭瑀以輕敵固諫于馬前 頡利 日還宮。 舉。 我 見軍容大盛,又 國家初有內難,股又新登九五, 與戰則 朕故獨出,以示輕之, 又耀軍 乙酉, 必克, 又幸城西, 知 與和 利隔津 思力就 ,上日:「吾已籌 則 刑 必 白馬, 拘, 而語, 固, 由 是 興 制

爾矣。」思力懼

而

請命,太宗

不許, 繁之於門下省。

刚

傳

無忌、李靖設伏於幽州以待之〔三〕,虜若奔還,伏兵邀其前,大軍躡其後,覆之如反掌矣。我 之計,唯財利是視。可汗獨在水西,會帥皆來謁我,我因而襲擊其衆,勢同拉朽。然我已令 陛下不納,臣以爲疑。旣而虜自退,其策安在?」上曰:「我觀突厥之兵,雖衆而不整,君臣 頡利同盟于便橋之上,頡利引兵而退。 蕭瑀進曰:「初,頡利之未和也,謀臣猛將多請戰,而 所掠中國戶口者悉令歸之。 在茲乎!將欲取之,必固與之,此之謂也。」九月,頡利獻馬三千匹,羊萬口,上不受,詔頡利 修德,結怨於我,爲患不細。我今卷甲韜戈,啗以玉帛,頑虜驕恣,必自此始,破亡之漸,其 所以不戰者,卽位日淺,爲國之道,安靜爲務,一與虜戰,必有死傷;又匈虜一敗,或當懼而

可,股不爲也。縱突厥部落叛盡,六畜皆死,股終示以信,不妄討之,待其無禮,方擒取耳。」 夫一言,尙須存信,何況天下主乎! 豈有親與之和,利其災禍而乘危迫險以滅之耶?諸公爲 平地數尺,羊馬皆死,人大飢,乃懼我師出乘其弊,引兵入朔州,揚言會獵,實設備焉。侍臣咸 突利討之,師又敗績,輕騎奔還。頡利怒,拘之十餘日,突利由是怨望,內欲背之。其國大雪, 曰:「夷狄無信,先自猜疑,盟後將兵,忽踐疆境。可乘其便,數以背約,因而討之。」太宗曰:「匹 貞觀元年,陰山已北薛延陀、迴紇、拔也古等餘部皆相率背叛,擊走其欲谷設。 二年印,突利遣使奏言與頡利有隙,奏請擊之,詔秦武通以丼州兵馬隨便應接。三 頡利遣

以其請和,後復援梁師都,詔兵部尚書李靖、代州都督張公謹出定襄道,幷州都督李勣、右 道,並受媾節度以討之。十二月,突利可汗及郁射設、蔭奈特勤等並帥所部來奔。 武 年大雪,六畜多死,國中大餒,頡利用度不給,復重斂諸部,由是下不堪命,內外多叛之。 諸胡,疏遠族類,胡人貪冒,性多翻覆,以故法令滋彰,兵革歲動,國人患之,諸部攜 年,薛延陀自稱可汗于漠北,遣使來貢方物。 《衞將軍丘行恭出通漢道,左武衞大將軍柴紹出金河道,衞孝節出恆安道,薛萬徹出暢武 頡利始稱臣, 尚公主, 請修壻禮。 頡利 每委 任

隋 將軍,賜以田宅。五年,太宗謂侍臣曰:「天道福善禍淫,事猶影響。昔啓民亡國奔隋,文帝不 見羸憊,授虢州刺史,以彼土多鏖鹿, 耳。」仍韶還其家口,館於太僕,廩食之。 記 沙鉢羅營,生擒頡利送于京師 遂滅其國。 國內附 蕭后及楊政道來降。二月,頡利計窘,竀于鐵山,兵尙數萬,使執失思力入朝謝罪, 論爾之罪狀,誠爲不小,但自渭水曾面爲盟,從此以來,未有深犯,所以錄此, 四年正月,李靖進屯惡陽嶺,夜襲定襄,頡利驚擾,因徙牙於磧口,胡酋康蘇密等遂以 太宗遣鴻臚卿唐儉、 頡利 乘千里馬,獨騎奔于從姪沙鉢羅部落。三月,行軍副總管張寶相率衆奄至 將軍安修仁持節安撫之,頡利稍自安。 太宗謂曰:「凡有功於我者,必不能忘,有惡於我者,終亦不 縱其畋獵, 頡利鬱鬱不得志,與其家人或相對悲歌 庶不失物性。 頡利辭不願往,遂授 靖乘間襲擊,大破之, 而 右 不 泣。 請舉 衞大 ·相責

列傳

第

百

四十四上

突

厥上

各粟帛,大興士衆,營衞安置,乃得存立,旣而強盛,當須子子孫孫思念報德。 焚屍於灞水之東,贈歸義王,諡曰荒。 其舊臣胡祿達官吐谷渾邪自刎以殉。 兄弟之所屠戮。今頡利破亡,豈非背恩忘義所致也!」八年卒,韶其國人葬之,從其俗禮, 起兵圍煬帝於雁門,及隋國將亂,又恃強深入,遂使昔安立其家國者,身及子孫,並爲頡利 纔至始畢,即

之,贈中郎將,仍葬於問利墓側,樹碑以紀之。 渾邪者,頡利之母婆施氏之媵臣也,頡利初觐,以付渾邪,至是哀慟而死。 太宗聞而異

州之北。突利在東偏,管奚、霫等數十部,徵稅無度,諸部多怨之。貞觀初,奚、霫等並來歸 其東牙之兵,號爲泥步設。 隋淮南公主之北也, 遂妻之。 頡利嗣位, 以爲突利可汗, 牙直幽 附,頡利怒其失衆,遺北征延陀,又喪師族,遂囚而撻焉。 突利可汗什鉢苾者,始畢可汗之嫡子,頡利之姪也。隋大業中,突利年數歲,始畢遺領

國者,勞心以憂萬姓,世祚乃長;役人以奉其身,社稷必滅。今北蕃百姓喪亡,誠由其君 亂,驟徵兵於突利,拒之不與,由是有隙。 貞觀三年,表請入朝,上謂侍臣曰:「殷觀前代爲 突利初自武德時,深自結於太宗,太宗亦以恩義撫之,結爲兄弟,與盟而去。後頡利政 州,道病卒,年二十九。太宗爲之舉哀,詔中書侍郎岑文本爲其碑文,子賀邏鶻 後,無歲不侵擾中國。 天實禍淫,大降災變,爾衆散亂,死亡略盡。 不君之故也。至使突利情願入朝,若非困迫,何能至此?夷狄弱則邊境無虞,亦甚爲慰,然 都督。當須依我國法,整齊所部,不得妄相侵掠,如有所違,當獲重罪。」五年,徵入朝,至井 所以不立爾爲可汗者,正爲啓民前事故也。改變前法,欲中國久安,爾宗族永固,是以授爾 食邑封七百戶,以其下兵衆置順、肺等州,帥部落還蕃。 進取,突利乃率其衆來奔,太宗禮之甚厚,頻賜以御膳。 彼必背之。不若因其亂而取之,所謂取亂侮亡之道。」太宗然之。因令將軍周範屯太原以圖 曰:「殷與突利結爲兄弟,不可以不救。」杜如晦進曰:「夷狄無信,其來自久,國家雖爲守約, 聞,唯藉公等盡忠匡弼,無得惰於諫諍也。」突利尋爲頡利所攻,遣使來乞師,太宗謂近臣 見其顚狽,又不能不懼,所以然者,慮已有不逮,恐禍變亦爾。 身投隋,隋家竪立,遂至強盛,荷隋之恩,未嘗報德。 至爾父始畢反爲隋家之患,自爾已 太宗謂曰:「昔爾祖啓民亡失兵馬, 四年,授右衞大將軍,封北平郡王, 股今視不能遠見,聽不能遠 旣事窮後,乃來投我,我

奮擊,乃退,北走渡渭水,欲奔其部落。 人,幷擁賀邏鶻,相與夜犯御營,踰第四重幕,引弓亂發,殺衞士數十人。折衝孫武開率兵 突利弟結社率,貞觀初入朝,歷位中郎將。十三年,從幸九成宮,陰結部落得四十餘 尋皆捕而斬之,詔原賀邏鶻,流于嶺外。

殷鑒不遠,陛下必用彦博之言遣居河南,所謂養獸自遺患也。」彦博又曰:「聞聖人之道,無 郡,平吳已後,郭欽、江統勸武帝逐出塞外,不用欽等言,數年之後,遂傾瀍、洛。前代覆車, 南,所謂死而生之,亡而存之,懷我德惠,終無叛逆。」魏徵又曰:「晉代有魏時胡落,分居近 餘,歸心降附,陛下不加憐愍,棄而不納,非天地之道,阻四夷之意,臣愚甚謂不可。 遣居河 河南處也。」温彦博奏曰:「天子之於物也,天覆地載,有歸我者則必養之。今突厥破滅之 今降者幾至十萬,數年之間,孳息百倍,居我肘腋,密邇王畿,心腹之疾,將爲後患,尤不可 性也。〉案、漢患其若是,故發猛將以擊之,收取河南,以爲郡縣,陛下奈何以內地居之。且 卽宜遣還河北,居其故土。匈奴人面獸心,非我族類,強必寇盜,弱則卑服,不顧恩義,其天 破敗者也,此是上天勦絕,宗廟神武。且其世寇中國,百姓冤讎,陛下以其降伏,不能誅滅, 則乖物性,故非含育之道。太宗將從之。祕書監魏徵奏言:「突厥自古至今,未有如斯之 得爲捍蔽,又不離其土俗,因而撫之,一則實空虛之地,二則示無猜心。若遣向河南兗、豫, 之利,塞北可常空矣。唯中書令温彦博議請準漢建武時置降匈奴於五原塞下,全其部落, 其種落,俘之河南虎、豫之地,散居州縣,各使耕織,百萬胡虜可得化爲百姓,則中國有加戶 言突厥恃強,擾亂中國,爲日久矣。今天實喪之,窮來歸我,本非慕義之心。因其歸命,分 **頡利之敗也,其部落或走薛延陀,或走西域,而來降者甚衆。 詔議安邊之術。 朝士多**

謂非便,乃徙於河北,立右武候大將軍、化州都督、懷化郡王思壓爲乙彌泥孰俟利苾可汗, 所不通,古先哲王,有教無類。突厥餘魂,以命歸我,我援護之,收居內地,稟我指麾,教以 賜姓李氏,率所部建牙於河北。 都督府,以統其部衆。其酋首至者皆拜爲將軍、中郎將等官,布列朝廷,五品以上百餘人, 自幽州至靈州置順、祐、化、長四州都督府,又分頡利之地六州,左置定襄都督府,右置雲中 禮法,數年之後,盡爲農民,選其酋首,遣居宿衞,畏威懷德,何患之有。光武居南單于於內 因而入居長安者數千家。自結社率之反也,太宗始患之。又上書者多云處突厥於中國,殊

羅、頡利世,常爲夾畢特勤,終不得典兵爲設。武德初,數來朝貢,高祖封爲和順郡王。 其國亂,諸部多歸中國,唯思摩隨逐頡利,竟與同擒。 都督,令統頡利舊部落於河南之地,尋改封懷化郡王 思摩者,頡利族人也。始畢、處羅以其貌似胡人,不類突厥,疑非阿史那族類,故歷處 太宗嘉其忠,除右武侯大將軍、化州

及將徙於白道之北,思摩等咸憚薛延陀,不肯出塞,太宗遣司農卿郭嗣本賜延陀璽書 列 第 一百四十四上 突 厥 上 五

那忠爲左賢王,左武衞將軍阿史那泥孰爲右賢王以貳之。 之,幷賜之鼓纛。突厥及胡在諸州安置者,並令渡河北,還其舊部。 胎厥子孫,長守富貴也。」於是命禮部尚書趙郡王孝恭<u>裔</u>書就思摩部落, 守土境、鎭撫部落。 我策爾延陀日月在前,今突厥理是居後,後者爲小,前者爲大。 南,任其放牧,今戶口羊馬日向滋多。 元許册立,不可失信,卽欲遣突厥渡河,復其國土。 之,實不貪其土地,利其人馬也。 自黜廢頡利以後,恆欲更立可汗,是以所降部落等並置河 之,諸部落悉 我百姓不異。 口:「突厥頡利 心歸化。 但中國禮義,不滅爾國,前破突厥,止爲頡利一人爲百姓之害,所以廢而黜 可汗未破已前,自恃強盛,抄掠中國,百姓被其殺者不可勝紀。 若其踰越,故相抄掠,我卽將兵各問其罪。此約旣定,非但有便爾身, 我略其舊過,嘉其從善,並授官爵,同我百僚,所有部落,愛之如子,與 爾在磧北,突厥居磧南,各 又以左屯衞將軍阿史 築壇於河上以拜 我發兵擊破

破前 萬,勝兵四萬人,思摩不能撫其衆,皆不愜服。 社率竟反, 之曰:「擅相侵者,國有常刑。」延陀曰:「至尊遣莫相侵掠,敢不奉韶。然突厥翻覆難信,其未 (,連年殺中國人,動以千萬計。 薛延陀聞太宗遣思摩渡河北,盧其部落翻附磧北,預蓄輕騎,伺至而擊之。太宗遣敕 此輩獸心,不可信也。 臣荷恩甚深,請爲至尊誅之。」時思摩下部衆渡河者凡十 至尊破突厥,須收爲奴婢,將與百姓,而反養之如子,結 至十七年,相率叛之,南渡河,請分處於勝、

爲吮 厦二州之間 血 其見 ,韶許之。 顧 遇 如 此。 思摩遂輕騎 未 幾, 卒于京師。 入 朝, `尋授右武衞將軍,從征遼東,爲流矢所中, 贈兵部尙書、夏州 都督,陪葬昭陵,立墳以象白 太宗親

爲立碑於化州

阿息 闕俟 賜宅於長安, 騎 其子沙鉢羅特勤來朝, 里,勝兵三萬 人勇烈,有謀略,頗爲衆附。 可汗之敗,北荒 追 貞觀 車鼻 利發 先是, Ш (,獲之,送于京師,仍獻 車鼻開 及拔塞 二十三年,遺右驍衞郞將高侃潛 貞觀中,突厥別部有車鼻者,亦阿史那之族也,代爲小可汗,牙在金山之北。頡 處其餘衆於鬱督 諸部將推爲大可汗,遇薛延陀爲可汗,車鼻不敢當,遂率所部歸於延陀。 匐處木昆莫賀咄俟斤等率部落背車鼻(E),相繼來降。 \pm 自稱 師 至,召所部兵,皆不赴,遂攜其妻子從數百騎而遁,其衆盡降。 乙注車鼻可汗。 **貢方物,又請身自入朝。** 延陀惡而 軍 于社廟,又獻于昭陵。 山 置 將誅之,車鼻密知其謀,竄歸於舊所, 狼山都督以統之。 西有歌羅 引迴紇、僕骨等兵衆襲擊之。其酋長歌邏祿泥敦 太宗遣將軍郭廣敬徵之,竟不至,太宗大 禄,北有結骨,皆附隸之。 高宗數其罪而赦之,拜左武衞將軍 車鼻長子羯漫陀先統拔悉密部。 永徽 自延陀破後,遣 其地去京師 完 年,侃 侃率精 軍 利 萬

列

傳

第

百

四

+

74

上

突

厥

上

車鼻未敗前,遣其子菴鑠入朝,太宗嘉之,拜左屯衞將軍,更置新黎州以統其衆。

州,各以其首領爲都督、刺史。高宗東封泰山,狼山都督葛邏祿社利等首領三十餘人,並 雲中桑乾三都督、蘇農等一十四州,瀚海都護領瀚海金微新黎等七都督、 扈從至嶽下,勒名於封禪之碑。自永徽已後,殆三十年,北鄙無事。 車鼻旣破之後,突厥盡爲封疆之臣,於是分置單于、瀚海二都護府。 單于都護領狼山 仙萼賀蘭等八

伏念詣京師,斬于東市。 韶裴行儉率將軍曹繼叔、程務挺、李崇直、李文暕等討之。伏念窘急,詣行儉降。 年,突厥又迎頡利從兄之子阿史那伏念於夏州,將渡河立爲可汗,諸部落復響應從之。 周道務等統衆三十餘萬,討擊温傅,大破之,泥孰匐爲其下所殺,幷擒奉職而還。永隆元 士死者萬餘人。又詔禮部尙書裴行儉爲定襄道行軍大總管,率太僕少卿李思文、營州都督 二十四州並叛應之。高宗遣鴻臚卿蕭嗣業、右千牛將軍李景嘉率衆討之,反爲温傅所敗,兵 調露元年,單于管內突厥首領阿史德温傅、奉職二部落始相率反叛,立泥敦匐爲可汗, 永淳二年,突厥阿史那骨咄祿復反叛。 行儉遂虜 又

姓 世襲吐屯啜。伏念旣破,骨咄祿鳩集亡散,入總材山,聚爲羣盜,有衆五千餘人。又抄掠九 元珍,在單于檢校降戶部落,嘗坐事爲單于長史王本立所拘繫,會骨咄祿入寇,元珍請依舊 了,得羊馬甚多,漸至強盛,乃自立爲可汗,以其弟默啜爲殺,咄悉匐爲葉護。時有阿史德 咄祿者,頡利之疏屬,亦姓阿史那氏。其祖父本是單于右雲中都督舍利元英下首領

檢校部落,本立許之,因而便投骨咄祿。

骨咄祿得之,甚喜,立爲阿波達干,令專統兵馬事

候,見元珍等部落皆不設備,遂率衆掩襲之。既至,又遣人報賊, 詔常之與寶璧計議,遙爲聲援。 齒常之擊卻之。 其年八月,又寇朔州,復以常之為燕然道大總管,擊賊於黃花堆,大破之, 忻州,與賊戰,大敗,死者五千餘人。三年,骨咄祿及元珍又寇昌平,詔左鷹揚衞大將軍黑 朔、代等州,左玉鈴衞中郎將淳于處平爲陽曲道總管,與副將中郎將蒲英節率兵赴援,行至 人更,則天詔左武威衞大將軍程務挺爲單于道安撫大使以備之。 反爲骨咄祿所敗,全軍盡沒,寶璧輕騎遁歸。 追奔四十餘里,賊衆遂散走磧北。 永淳二年,進寇蔚州,豐州都督崔智辯擊之,反爲賊所殺。文明元年,又寇朔州,殺掠 寶璧以爲破賊在朝夕,貪功先行, 。右監門衞中郞將爨寶璧又率精兵一萬三千人出塞窮追 初,寶璧見常之破賊, 又令人出塞 垂拱二年, **令得設備出戰,** 遽表請窮其餘黨, 骨咄祿 二千餘里覘 塗爲賊 又寇

百四十四上

突

厥上

所覆,寶璧坐此伏誅。 則天大怒,因改骨咄祿爲不卒祿。 元珍後率兵討突騎施 ,臨陣戰死。

骨咄祿,天授中病卒。

以討之,旣不遇賊,尋班師焉。 年(至),率衆寇靈州,殺掠人吏。 默啜者,骨咄祿之弟也。骨咄祿死時,其子尙幼,默啜遂篡其位,自立爲可汗。 默啜俄遣使來朝,則天大悅,册授左衞大將軍,封歸國公,賜 則天遣白馬寺僧薛懷義爲代北道行軍大總管,領十八將軍 長壽二

物五千段。明年,復遣使請和,又加授遷善可汗。

戶,卽率部落兵馬爲國家討擊契丹。」制許之。默啜遂攻討契丹,部衆大潰,盡獲其家口,默 萬歲通天元年,契丹首領李盡忠、孫萬榮反叛,攻陷營府,默啜遣使上言:「請還河西降

啜自此兵衆漸盛。則天尋遣使册立默啜爲特進、頡跌利施大單于、立功報國可汗。 年,默啜表請與則天爲子,幷言有女,請和親。 初,咸亨中,突厥諸部落來降附者,多處之 聖曆元

豐、勝、靈、夏、朔、代等六州,謂之降戶。默啜至是又索此降戶及單于都護府之地,兼請農

器、種子,則天初不許。 懼其兵勢,納言姚璹、鸞臺侍郞楊再思建議請許其和親,遂盡驅六州降戶數千帳,丼種子四 默啜大怨怒,言辭甚慢, 拘我使人司賓卿田歸道,將害之。 時朝廷

萬餘碩、農器三千事以與之,默啜浸強由此也

李家 等 官尚 高 則 蔚 以 微 虚 羽 軍 州 爲 叡 天 抄 林 沙 兵 日 掠 抗 吒 書,右武 衞 Ŧi. 印 :「我女擬嫁與李家天子兒, 今聞李家 陷 祚 汗,與 趙 節 千 年 大 忠 釆 將 等皆持 購 不從,遂 義 人 定 則 默 八降之。 狐 爲 軍 等州 之率 斬 威 天 啜 縣 天兵 閻 綶 天 令 衞 立 重兵 敬容爲 俄 啜者: 衆 男女八九萬 遇 子種末總 魏 鄓 其 俄 西道 害。 將 進 王 + 弟 進 與與 一寇嬀、 楊 封王,改 餘 武 变 咄悉 則天乃立 天兵 前軍 齊莊攝 萬 賊 定州 承 盡,唯 相 襲 嗣 匐 (西道 ·總管, 檀等州, 男准 人,從 望 爲 我 默啜號 殺 你今將武家兒來, 司賓卿 左 一靜難 後 有 廬 不 幽州 陽 刺史孫彥高 廂 敢 陵 五 軍總管 兩 則天 王 祭 戰。 見 回 王 爲 及平狄、清夷 都督張 ,大齎金 延秀就納 在,我 斬啜。 道 爲 八令司 骨 河 一,統 皇 而 咄 北 去,所 太子,令充河 今將兵 仁亶 禄 道 兵 屬 帛 尋 焚燒 + 卿 其 子 元 文圍 此 默矩 爲 等 送 帥 過 五 武 女爲妃 是 殘 百 萬 赴 納 天兵 軍 助 重 逼 姓 天子 ,靜難 爲 殺 以 規 立。 虜庭。 言 趙州 廬舍, 北道 爲後 東道 遭 為 右廂祭, 狄仁傑總兵 不 逐收 兒 天兵中道大總管 軍 可 右豹韜 否? 援。 總管,率兵三十萬擊之。 行 長 行 勝 虜掠 使左 延秀等,拘之別 史 軍 至 紀。 各主兵馬二萬餘 我突厥積代 /唐波若 默啜又 黑 大 男女, 玉鈴衞將軍 衞大將軍 一萬 元 沙 沙吒 南 帥, 追之, 出 無 翻 庭 忠義 軍 自 方右 小 城應之, 閻 未 默 已來 長 恆 所傷 慕容 發而 及 無 武 啜 知 岳道, 皆殺之。 後 微 謂 威 所 刺 降 玄 默 衞 號 攝 軍 知 崱 又 總 史 右 將 知

武道行軍大總管以備之,又命安北大都護相王旦爲天兵道元帥「台」,統諸軍討擊,竟未行而 汗,自是連歲寇邊。 其子匐俱爲小可汗, 久視元年,掠隴右諸監馬萬餘匹而去。 位在兩察之上,仍主處木昆等十姓兵馬四萬餘人,又號爲拓西可 制右肅政御史大夫魏元忠爲靈

授諸衞 鳴沙縣 掠 魔右 重明廷立見之(t)。默啜遣大臣移力貪汗入朝,獻馬千匹及方物以謝許親之意。 長安三年,默啜遣使莫賀達干請以女妻皇太子之子,則天令太子男平恩王重俊、義興 大將軍,賞物二千段。 羣牧馬萬餘匹而去,忠義坐免。中宗下制絕其請婚,仍購募能斬獲默啜者封國王, ,靈武軍大總管沙吒忠義拒戰久之,官軍敗績,死者六千餘人,賊遂進寇原、會等州, · 羽亭,太子、相王及朝集使三品以上並預會,重賜以遣之。 中宗卽位,默啜又寇靈州 又命內外官各進破突厥之策。 右補闕盧俌上疏曰: 則天滅

悍之俗,難以德綏,可以威制,而降自三代,無聞上策。今匈奴不臣,擾我亭障,皇赫斯 納婁敬之議,與匈奴和親,妻以宗女,賂以鉅萬,冒頓益驕,邊寇不止。則遠荒之地,凶 將整元戎。 療秋謀元帥,取其說禮樂、敦詩書。

晉臣

杜預射不穿札,而建平

與之勳,是知中權 臣 聞 有虞咸熙,苗人逆命,殷宗大化,鬼方不賓,則戎狄交侵,其來遠矣。 臣聞方叔帥師,功歌周雅,去病耀武,勳勒燕山,則萬里折衝,在於擇

矢窮,義勇之士,猶能死戰,功合紀錄,以勸戎行,賞罰旣明,將士盡節,此擒敵之術也。 制謀,不在一夫之勇。其蕃將沙吒忠義等身雖驍悍,志無遠圖,此乃騎將之材,本不 有刑,古之常典。近者鳴沙之役,主將先逃,輕挫國威,須正邦憲。又其中軍旣敗,陣亂 。且師出以律,將軍死綏。秦克長平,趙括受戮,胡去馬邑,王恢 坐誅,則棄軍

柳」,夕歌秋杜,十年之後,可以久安。 夷險,其所虜獲,因而賞之。近戰則守家,遠戰則利貨,趨赴鋒鏑,不勞訓誓,朝賦「楊 實塞下,宜因古法,募人徙邊,選其勝兵,免其行役,次廬伍,明敎令,則狃習戎事,究識 請購辯勇之士,班、傅之儔,旁結諸蕃,與圖攻取,此又掎角之勢也。 臣聞以蠻夷攻蠻夷,中國之長算,故陳陽統西域而郅支滅,常惠用烏孫而 臣聞昔置新秦以 匈奴敗。

不稔 設烽燧,精飾**戈矛,來則懲而禦之,去則備而守之,此又古之善經也**。 方千里,制在一賢。其邊州刺史不可不愼擇,得其人而任之。蒐乘訓兵,屯田 爵不以私 多狩以教戰 ,利在保境,不可窮兵。 使內郡黔黎,各安其業,擇其宰牧,輕其賦徭, 臣聞漢拜郅都,匈奴避境,趙命李牧,林胡遠竄。則朔方之安危,邊城之勝負,地 愛人之財,節其徭役;惜人之力,不廣臺樹。察地利天時以趨耕穫,命秋獮 則數年之後,有勇知方,帑藏山積,金革犀利。 然後整六軍,絕大漠、 去歲亢陽,天下 事無過舉, 積栗, 謹

列

傳

第

百四十

四上

突厥

雷擊萬里,風掃二庭,斬歸林之質,懸藁街之邸,使百蠻震怖,五兵載戢,則上合天時, 下順人事。 理內以及外,綏近以來遠,以惠中國,以靜四方。臣少慕文儒,不習軍旅,

奇正之術,多媿前良,獻替是司,輕陳瞽議。

屯衞大將軍張仁亶攝右御史臺大夫, 充朔方道大總管以禦之。 仁亶始於河外築三受降城, 上覽而善之。默啜於是殺我行人假鴻臚卿臧思言。思言對賊不屈節,特贈鴻臚卿,仍命左

絕其南寇之路。

我支特勤來朝,授右驍衞員外大將軍。俄而睿宗傳位,親竟不成 睿宗踐祚,默啜又遣使請和親,制以宋王成器女爲金山公主許嫁之。 默啜乃遣其男楊

簡、跌跌都督跌跌思泰等各率其衆,相繼來降,前後總萬餘帳。 匹, 攜其妻來奔,制授左衞大將軍,封燕北郡王,封其妻爲金山公主,賜宅一區,奴婢十人,馬十 散。開元二年,遣其子移涅可汗及同俄特勤、妹壻火拔頡利發石阿失畢率精騎圍逼北庭。右 萬餘里,控弦四十萬,自頡利之後最爲強盛,自恃兵威,虐用其衆。默啜旣老,部落漸多逃 聽衞將軍郭處瓘嬰城固守,俄而出兵擒同俄特勤于城下,斬之。 虜因退縮,火拔懼不敢歸, 物千段。 初,默啜景雲中率兵西擊娑葛,破滅之。契丹及溪自神功之後,常受其徵役,其地東西 明年,十姓部落左廂五咄六啜、右廂五弩失畢五俟斤及子壻高麗莫離支高文 制令居河南之舊地;授高

煩 都 簡 公。 左 衞 自餘 員 外 首 大 將 領 軍, 封 拜 封 賜物 遼 西 各 郡王; 有 差。 陜跌 默啜 思泰爲特進、 女壻阿史德 胡 右衞 禄 俄又歸朝,授以 員 外大將 軍 兼 特 陜跌 進 都督, 其秋

啜 興 九姓 首領 阿布 思等戰于 请 北 九姓大潰,人畜 多死, 阿布思率衆來 降

骨 遇拔 啪 禄 曳固进 四 之子 年 默啜 卒頡 闕 特勤 叉 質 八北討 鳩 略 合舊 於柳 九 姓拔 部 林 中 殺默啜子小可汗及諸弟幷親信略盡 曳 ٠, 固 突出擊默啜, ,戰于獨樂河, 斬之, 拔曳固 便與入蕃使郝 一大敗。 默啜負勝 立其兄左賢王 靈 荃傳默啜 輕歸 首 而 一默棘 至 不 設 京 備 師

是

毗

伽

川

欲谷 突厥 闕 特 勤 以女爲 部 毗 落頗 不 伽 受, 可 汗以 小殺 多攜 遂以爲左賢王 開元 貢 可 敦 ,乃召默啜時衙官暾欲谷爲謀主。 淡 四 年卽位,本蕃號爲 冤死 專掌 ,廢歸部落,及 兵 馬。 是時 小殺。 復用,年已七十餘,蕃 奚、 性仁友,自以得國是闕特 契丹相 初, 空款塞 默啜 下 一,突騎 衙官盡 人甚敬伏之。 施蘇祿 爲闕特勤 勤之功, 自立 所殺 爲 固 可汗, 讓

都 護 張 俄 知 而 運 降 盡 戶 阿悉 收 其 爛 器 仗,令渡 陜 跌 思泰等復 河 面 南,蕃人怨怒。 自河 曲 叛 歸 御史中丞姜晦爲巡邊使,蕃 初, 降戶 南 至單于, 左 衞大將軍 人訴無弓矢, 單一副

舊俗,一朝失利,必將爲唐所倂。且寺觀之法,敎人仁弱,本非用武爭強之道,不可置也。」 爲業,又皆習武。強則進兵抄掠,弱則竄伏山林,唐兵雖多,無所施用。若築城而居,改變 尙疲羸,須且息養三數年,始可觀變而舉。」<u>小殺又欲修築城壁,造立寺觀,暾欲谷曰:「不</u> 降戶,謀欲南入爲寇,暾欲谷曰:「唐主英武,人和年豐,未有間隙,不可動也。 所擊,賊衆大潰,散投黑山呼延谷,釋張知運而去。上以張知運喪師,斬之以徇。小殺旣得 敗,臨陣生擒知運,擬送與突厥,朔方總管薛訥率兵追討之。賊至大斌縣,又爲將軍郭知運 小殺等深然其策。 可。突厥人戶寡少,不敵唐家百分之一,所以常能抗拒者,正以隨逐水草,居處無常,射獵 不得射獵,晦悉給還之,故有抗敵之具。張知運旣不設備,與降戶戰于青剛嶺,爲降戶所 。我衆新集,猶

與張嘉貞不協、奏請有所不愜、必不敢動。若王晙兵馬不來、拔悉密獨至,卽須擊取之,勢 今在北庭, 與兩蕃東、西相去極遠, 勢必不合。 王畯兵馬, 計亦無能至此。 易爲也。」九年秋,拔悉密果臨突厥衙帳,而王畯兵及兩蕃不至。拔悉密懼而引退,突厥欲 臨到,卽移衙帳向北三日,唐兵糧盡,自然去矣。且拔悉密輕而好利,聞命必是先來,王晙 秋初,引朔方兵數道俱入,掩突厥衙帳於稽落河上。小殺聞之,大恐。 八年多,御史大夫王晙爲朔方大總管,奏請西徵拔悉密,東發奚、契丹兩蕃,期以明年 暾欲谷曰:「拔悉密 必若能來,候其

校凉州 結其袖 當 遣 尙公主,上但厚賜 厥 欲谷分兵間道先 擊之,暾欲谷曰:「此衆去家千里,必將 副 所 卽 將盧 擒 須 事 決戰。 會風 **丼虜其男女而還。** 公利 小殺由是大振, 雪凍烈, 我今乘勝,必有功矣。」公利等兵至删丹, 判官元澄出兵邀擊之。 掩 而遣之。 北庭, 盡墜弓矢,由是官軍 因縱 暾欲 盡有默啜之衆。 卒擊拔悉密之還衆,遂散 谷迴兵, 死 暾欲谷曰:「敬述若守城 戰, 因出赤亭以掠凉州 大敗,元澄脫 未 俄又遣使請和 可 擎也, 身而 遇賊, 走 不 授 如 , 走。 羊 北 乞與玄宗爲子,上許之。 以兵躡之。」去北庭二 馬。 自 元澄令兵士揎臂持滿 庭 敬述 固 而城陷一 。, 卽 時楊敬述爲凉州 坐 與連和 削 不得入, 除官爵 气;若出 百里 一,白 盡爲突 都督 衣 仍 兵 相 檢

其意。 從, 也。 **溪及製丹舊是突厥之**奴,亦 成之事,忽此 人,衆爲之用; 則突厥不敢 三虜協心, 十三年,玄宗將 小殺 與其妻及闕特勤、 微發, 闕特 不從,又亦難爲舉動。 動 無 勤 豈非名實相 遺策, 東巡,中書令張說謀欲 聽武 善戰, 尙 知我 嘋 唐家公主,突厥前後請結和 欲谷等環坐帳中設宴,謂 學國 乖 所向 東巡,萬 無前 說 日:「突厥 加 ; 暾欲 兵以備突厥,兵部郎 窺邊, 谷深沉有謀,老而 比 雖 何以禦之?」光庭請 請 振 和 親 日:「吐蕃 , 獸心 獨 不 振攝 難 中裴光庭曰:「封 -蒙許, 狗 益智, 測 種 鴻 唐 臚卿,往 何也? 且小殺 遣使徴 李靖、 灵 徐勣 突厥 其 者 」袁振日: 之爲婚 禪者 大 以 之 臣 丽 告 流 告 扈 愛

蕃。」振許爲奏請,小殺乃遣其大臣阿史德頡利發入朝貢獻,因扈從東巡。 (可汗旣與皇帝爲子,父子豈合爲婚姻?」小殺等曰:「兩蕃亦蒙賜姓,猶得尙主,但依此例, 有何不可?且聞入蕃公主,皆非天子之女,今之所求,豈問眞假,頻請不得, 實亦羞見諸

射,起居舍人呂向上疏曰: 無也。」上因令問飢否,對曰:「仰觀聖武如此,十日不食,猶爲飽也。」自是常令突厥入仗馳 F |引弓傍射,一發獲之。 玄宗發都,至嘉會頓,引頡利發及諸蕃酋長入仗,仍與之弓箭。 時有冤起於御馬之前, 頡利發便下馬捧冤蹈舞曰:「聖人神武超絕,若天上則不知,人間

鏃於前,同獲獸之樂,是屑略太過,未敢取也。雖聖胸豁達,與物無猜,而愚心徘徊,與 仰英麥之四照,送神藝之百發,恩意俱極,誠無得踰焉。乃更賜以馳逐,使操弓矢競飛 從官,赴封禪之禮,參玉帛之會,此德業自盛,固不可名焉。 今夫突厥者,正與此類,安忍殘賊,莫顧君親。陛下持武義臨之,修文德來之,旣慴威 **殪玄方,墟幽土,單于爲醢,穹廬爲污,何塞過責?特願陛下勿復親近,使知分限,待不** 靈,又沐聲教,以力以勢,不得不庭,故稽顙稱臣,奔命遣使。陛下乃能收其傾効,雜以 加慄。 臣聞鴟梟不鳴,未爲瑞鳥,猛虎雖伏,豈齊仁獸,是由醜性毒行,久務常積故也。 **儻此等各懷犬吠,交肆盜憎,荆卿詭動,何羅竊至,暫逼嚴蹕,稍冒淸塵,縱即** 因復韶許侍遊,召入禁仗,

失常,歸於得所,以謂 迴兩曜之鑒,祛九宇之憂,孰不幸甚!

H 納 其言 ,遂令諸蕃先發。 東封迴 ,上爲頡利發設讌,厚賜而遣之,竟不許其和親

狀。 渡, 李融爲其碑文。 郎中呂向 立其子爲伊然可汗。 互市之所,每年齎縑帛數十萬匹就邊以遺之。二十年,闕特勤死,詔金吾將軍張去逸、都官 小殺丼獻其書。 二十年,小殺爲其大臣梅錄啜所毒, 五 年, ·齎璽書入蕃弔祭,丼爲立碑,上自爲碑文,仍立祠 小殺使其大臣梅錄啜來朝,獻名馬三十匹。時吐蕃與小殺書,將計議 無幾,伊然病卒,又立其弟爲登利 上嘉其誠,引梅錄啜宴於紫宸殿,厚加賞賚,仍許於朔方軍西受降城爲 韶宗正卿李佺往申弔祭, 藥發未死, 先討斬梅錄啜, 盡滅其黨。 丼册立伊然,爲立碑廟,仍令史官起居舍人 可汗。 廟, 刻石爲像, 四壁畫其戰陣之 旣卒,國 同時入

國政 其母 鋭皆分在 誘斬 ?,不爲蕃 登利者,猶華言果報也。 西殺 兩殺之下。 人所伏。 ,盡倂其衆,而左殺懼禍 二十八年,上遺右金吾將軍李質齎璽書册立登利爲可汗。俄而登利與 登利從叔父二人分掌兵馬,在東者號爲左殺,在 登利年幼,其母卽暾欲谷之女,與其小臣飫斯達干姦通,干預 及己,勒兵攻登利,殺之,自立,號烏蘇米施可汗。 西者號爲右殺,其精

列

傳

百

四

+

四上

突厥

上

校

勘記

阿布思頡利發等,並率其部衆相次來降。天寶元年八月,降虜至京師,上令先謁太廟,仍於 啜之孫勃德支特勤、毗伽可汗女大洛公主、伊然可汗小妻余塞匐、登利可汗女余燭公主及 |殺又不爲國人所附,拔悉密部落起兵擊之,左殺大敗,脫身遁走,國中大亂。 西殺妻子及默

校勘記

殿庭引見,御華萼樓以宴之,上賦詩以紀其事。

- (二) 漢陽公瓌 「璣」上各本原有「蘇」字,據本書卷六〇漢陽王璣傳、冊府卷九八〇剛。
- 3 幽州 通鑑卷一九一同,胡注云:「幽州當作豳州。」合鈔卷二五五突厥傳作豳州。
- CE 二年 此處當以作「二年」爲是,據改。 各本原作「三年」,通典卷一九七、寰宇記卷一九五均作「二年」。 且下文旣又有「三年」,
- 及拔塞匐處木昆 「及」字各本原作「乃」,據寰宇記卷一九六改。
- (3) 長壽二年 通典卷一九八、寰宇記卷一九六均作「長壽三年」。
- (代) 安北大都護 「護」字各本原作「督」,據新書卷二一五上突厥傳、通鑑卷二〇七改。
- (4) 平恩王重俊義興王重明 按本書卷八六中宗諸子傳,平恩王當爲重福,義興王當爲重俊,史文

列傳第一百四十四下

突厥下

陸及弩失畢、歌邏祿、處月、處密、伊吾等諸種。風俗大抵與突厥同,唯言語微差。其官有 葉護,有特勤,常以可汗子弟及宗族爲之;又有乙斤屈利啜、閻洪達、頡利發、吐屯、俟斤等 至其南庭;又正北八日行,至其北庭。 東至突厥國,西至雷翥海, 官,皆代襲其位。 西突厥本與北突厥同祖。初,木杆與沙鉢略可汗有隙,因分爲二。其國卽烏孫之故地, 南至疏勒,北至瀚海,在長安北七千里。 鐵勒、龜茲及西域諸胡國,皆歸附之。其人雜有都 自焉耆國西北七日行,

之。先與始畢有隙,及在京師,始畢遣使請殺之,高祖不許。羣臣諫曰:「今若不與,則是存 薩那 久之。不得已,乃引<u>曷薩那</u>於內殿,與之縱酒,旣而送至中書省,縱北突厥使殺之。 太宗 封歸義郡王。獻大珠於高祖,高祖勞之曰:「珠信爲寶, 股所重者赤心, 珠無所用。」竟不受 即位,令以禮改葬。 一人而失一國也,後必爲患。」太宗曰:「人窮來歸我,殺之不義。」驟諫於高祖,由是遲迴者 河开。 可汗,隋煬帝大業中與其弟闕達設及特勤大奈入朝。仍從煬帝征高麗,賜號爲曷 遇江都之亂,從宇文化及至河北。化及敗,歸長安,高祖爲之降榻,引與同坐,

吐鳥過拔闕可汗,厚加撫慰。尋爲李軌所滅。 闕達設初居於會寧,有部落三千餘騎。至隋末,自稱闕達可汗。武德初,遣使內屬,拜

州都督,封竇國公,實封三百戶。十二年卒,贈輔國大將軍。初,曷薩那之朝隋也,爲煬帝 德、劉黑闥,並有殊功。賜宮女三人,雜綵萬餘段。 貞觀三年,累遷右武衞大將軍、檢校豐 京城,以力戰功,賞物五千段,賜姓史氏。武德初,從太宗破薛舉。又從平王世充,破竇建 軍多已奔退,大奈將數百騎出顯和後,掩其不備,擊大破之,諸軍復振。 夫。後分其部落於樓煩。會高祖舉兵,大奈率其衆以從。隋將桑顯和襲義軍於飲馬泉,諸 特勤大奈,隋大業中與曷薩那可汗同歸中國。及從煬帝討遼東,以功授金紫光祿大 拜光祿大夫。及平

國皆役屬之。遂與北突厥爲敵,乃建庭於龜茲北三彌山。 射匱 可汗者,達頭可汗之孫也。 既立後,始開土宇,東至金山,西至海,自玉門已西諸 尋卒。 弟統葉護可汗代立。

萬,霸有西域,據舊烏孫之地。又移庭於石國北之千泉。其西域諸國王悉授頡利發,幷遣 統葉護可汗,勇而有謀,善攻戰。遂北幷鐵勒,西拒波斯,南接罽賓,悉歸之,控弦數十

吐屯一人監統之,督其征賦。西戎之盛,未之有也。

護許以五年多。 武德三年,遣使貢條支巨卵。時北突厥作息,高祖厚加撫結,與之丼力以圖北蕃,統葉 大軍將發, 頡利可汗聞之大懼, 復與統葉護通和,無相征伐。 統葉護尋遣

對曰:「當今之務,莫若遠交而近攻,正可權許其婚,以威北狄。 使來請婚,高祖謂侍臣曰:「西突厥去我懸遠, 急疾不相得力, 今請婚, 其計安在?」封德彝 思其宜。」高祖遂許之婚,令高平王道立至其國,統葉護大悅。 待之數年後,中國盛全,徐 遇頡利可汗頻歲入寇,西蕃

列傳第一百四十四下 突厥下

路梗,由是未果爲婚。

強盛 父所殺而自立,是爲莫賀咄侯屈利俟毗可汗。 死所祭而焚之。 又遣人謂統葉護曰:「汝若迎唐家公主,要須經我國中而過。」統葉護患之,未克婚。爲其伯 ·無恩於國,部衆咸怨,歌邏祿種多叛之。 頡利可汗不悅中國與之和親,數遣兵入寇, 貞觀元年,遣眞珠統俟斤與高平王道立來獻萬釘寶鈿金帶,馬五千疋。時統葉護自負 會其國亂,不果至而止。 太宗聞統葉護之死,甚悼之,遣齎玉帛至其

宗答之曰:「汝國擾亂,君臣未定,戰爭不息,何得言婚。」竟不許。 居,泥孰遂迎而立之,是爲乙毗鉢羅肆葉護可汗。連兵不息,俱遣使來朝,各請婚於我。太 失畢部共推泥孰莫賀設爲可汗,泥孰不從。時統葉護之子咥力特勤避莫賀咄之難,亡在康 其西域諸國及鐵勒先役屬於西突厥者,悉叛之,國內虛耗。 莫賀咄侯屈利俟毗可汗,先分統突厥種類爲小可汗,及此自稱大可汗,國人不附。 仍諷令各保所部,無相征

叉 (興兵以擊莫賀咄,大敗之。 莫賀咄遁於金山,尋爲咄陸可汗所害,國人乃奉肆葉護爲大 肆葉護旣是舊主之子,爲衆心所歸,其西面都陸可汗及莫賀咄可汗部豪帥,多來附之。

能 統 可汗。 師潛謀擊之,肆葉護以輕騎遁於康居,尋卒。 自 馭之略。 固。 肆葉護可汗立,大發兵北征鐵勒,薛延陀逆擊之,反爲所敗。 肆葉護素憚泥孰,而陰欲圖之,泥孰遂適焉耆。 有乙利 可汗者,於肆葉護功最多,由是授小可汗,以非罪族滅之。 國人迎泥孰於焉耆而立之,是爲咄陸可汗。 其後設卑達干與突厥弩失畢二部 **肆葉護性猜狠信讒 墨下震**駭,莫

藏。 卒,其弟同娥設立,是爲沙鉢羅咥利失可汗。 居藩,務加懷輯,與之結盟爲兄弟。 貞觀 咄陸 七年,遣鴻臚少卿劉善因至其國,册授爲吞阿婁拔奚利邲咄陸可汗。 可汗泥孰者,亦稱大渡可汗。父莫賀設,本隸統葉護。武德中,嘗至京師。 既被推爲可汗,遣使詣闕請降,太宗遣使賜以名號 明年,泥孰 時 及鼓

俄而 爲左右廂, :其國分爲十部,每部令一人統之,號爲十設。 沙鉢羅咥利失可汗以貞觀九年上表請婚,獻馬五百疋。 一廂各置五箭。 其左厢號五咄六部落, 置五大啜, 每設賜以 朝廷 箭, 一啜管一箭; 唯厚加撫慰, 故稱十箭焉。 其右廂號爲五 未許其婚。 又分十箭

列

領。 **弩失畢,置五大俟斤,一俟斤管一箭,都號爲十箭。其後或稱一箭爲一部落,大箭頭爲大首** 五咄六部落居於碎葉已東,五弩失畢部落居於碎葉已西,自是都號爲十姓部落

爲其俟斤所破,咥利失復得舊地,弩失畢、處密等並歸咥利失。 吐屯等召國人,將立欲谷設爲大可汗,以咥利失爲小可汗。統吐屯爲人所殺,欲谷設兵又 拒之, 戰數合, 統吐屯不利而去。 咥利失奔其弟步利設, 與保焉耆。 其阿悉吉闕俟斤與統 咥利失旣不爲衆所歸,部衆攜貳,爲其統吐屯所襲,麾下亡散。 咥利失以左右百餘騎

落酋帥迎咥利失弟伽那之子薄布特勤而立之,是爲乙毗沙鉢羅葉護可汗。 於鏃曷山西,謂爲北庭。自厥越失、拔悉彌、駁馬、結骨、火燒、觸木昆諸國皆臣之〔〕。十 多死,各引去。因與咥利失中分,自伊列河已西屬咄陸,已東屬咥利失。 三年,咥利失爲其吐屯俟利發與欲谷設通謀作難,咥利失窮蹙,奔拔汗那而死。 十二年,西部竟立欲谷設爲乙毗咄陸可汗。乙毗咄陸可汗旣立,與咥利失大戰,兩軍 咄陸可汗又建庭 弩失畢部

善、且末、吐火羅、焉耆、石國、史國、何國、穆國、康國,皆受其節度。 沙鉢羅葉護可汗旣立,建庭於睢合水北,謂之南庭。 東以伊列河爲界,自龜茲、鄯 累遣使朝貢,太宗降璽

列傳第一百四十四下 突厥下

攻擊。 書慰勉。 會 一咄陸遣使詣闕,太宗諭以敦睦之道。 貞觀十五年,令左領軍將軍張大師往授焉,賜以鼓纛。 咄陸于 時兵衆漸強,西域 于時咄陸可汗與葉護頻相 諸國復 來歸

幾,咄陸遣石國吐屯攻葉護,擒之,送於咄陸,尋爲所殺。

山, 使詣闕,請立可汗。 敦啜部將胡祿居所襲,衆多亡逸,其國大亂。 遺處月、處密等圍天山縣,郭恪又擊走之。恪乘勝進拔處月俟斤所居之城, 自 恃 斬首千餘級, 降其處密之衆而歸。 其強, <u>咄陸可汗旣幷其國,弩失畢諸姓心不服咄陸,皆叛之。</u> 專擅 西域。 太宗遣使齎壅書立莫賀咄乙毗可汗之子,是爲乙毗射匱可汗。 遣兵寇伊州,安西都護郭恪率輕騎二千自烏骨邀擊, 咄陸初以泥孰啜自擅 貞觀十五年,部下屋利啜等謀欲廢咄陸,各遣 咄陸復率兵擊吐火羅, 取所部物,斬之以徇; 尋爲泥 敗之。 追奔及 於遏索 咄陸又 破之。

割 中國使人先爲 龜茲、 乙毗射匱可汗立,乃發弩失畢兵就白水擊咄陸。自知不爲衆所附行了,乃西走吐火羅國。 于闐、疏勒、朱俱波、葱嶺等五國爲聘禮。及太宗崩,賀魯反叛,射匱部落爲其所倂。 咄陸所拘者,射匱悉以禮資送歸長安,復遣使貢方物,請賜婚。太宗許之,詔令

禄、弩失畢五姓之衆。其後,咄陸西走吐火羅國,射匱 賀魯爲葉護,以繼步眞,居於多邏斯川,在西州直北一千五百里,統處密、處月、姑蘇 二十二年,乃率其部落內屬,詔居庭州。 阳 '史那賀魯者,曳步利設射匱特勤之子也。 尋授左聽衞將軍、瑤池都督。 杒, 阿史那步眞旣來歸國, 可汗遣兵迫逐,賀魯不常厥居。 高宗卽位,進拜左聽 咄陸可汗乃立 貞觀 歌羅

衞大將軍,瑤池都督如故。

厅; 泉,自號沙鉢羅可汗,統攝咄陸、弩失畢十姓。 弩失畢有五俟斤:一曰阿悉結闕俟斤,最爲強盛; 居闕啜,賀魯以女妻之; 四日阿悉結泥孰俟斤; 永徽二年,與其子咥運率衆西遁,據咄陸可汗之地,總有西域諸郡,建牙于雙河及千 三日攝舍提暾啜; 五日哥舒處半俟斤。 四日突騎施賀邏施啜; 其咄陸有五啜:一曰處木昆律啜; 二日哥舒闕俟斤,三日拔塞幹暾沙鉢俟 各有所部,勝兵數十萬,並羈屬賀魯。 五日鼠尼施處半啜。 二日胡祿

虜渠帥六十餘人。 軍梁建方、右驍衞大將軍契苾何力率燕然都護所部迴紇兵五萬騎討之,前後斬首五千級, 賀魯尋立咥運爲莫賀咄葉護,數侵擾西蕃諸部,又進寇庭州。 四年,咄陸可汗死,其子眞珠葉護與五弩失畢請擊賀魯,破其牙帳,斬首 三年, 詔遣左武候大將 域諸國,亦多附隸焉。

伊麗 任雅 海 各率衆來降。 大潰,又與蘇定方攻賀魯於碎葉水,大破之。 安撫大使。 都督迴紇婆閨等率師討擊,仍使右武衞大將軍阿史那彌射、 河,兵馬溺死者甚衆。 相等與之交戰,賊衆大敗,斬大首領都搭達干等二百餘人。 顯慶二年,遣右屯衞將軍蘇定方,燕然都護任雅相,副都護蕭嗣業,左驍衞大將 定方行至曳咥河西, 彌射又進次雙河,賀魯先使步失達干鳩集散卒,據栅拒戰。 嗣業至千泉賀魯下牙之處,彌射進軍至伊麗水,處月、處密等部 賀魯率胡祿居闕啜等二萬餘騎列陣 左屯衞 賀魯及闕啜輕騎奔竀 而 大將軍阿史那 待。 彌射、步眞攻之, 定方率副總管 步眞 軍 渡 爲

灤白:「我破亡虜耳!先帝厚我,而我背之,今日之敗,天怒我也。 府,西盡于波斯,並隸安西都護府。 令獻於昭陵及太廟,韶特冤死。 市,至京殺我,請向昭陵,使得謝罪於先帝,是本願也。」高宗聞而愍之。 迎日,賀魯信其言入城,遂被拘執。 賀魯與 咥運 欲投 鼠 轉設, 至石國之蘇咄城傍,人馬飢乏, 分其種落置崑陵、濛池二都護府,其所役屬諸國,皆分置州 四年,賀魯卒。 蕭嗣業旣至石國, 韶葬于頡利墓側,刻石以紀其事 鼠耨設乃以賀魯屬之。 城主伊涅達干詐將酒 舊聞漢法,殺人皆於都 及俘賀魯至京師, 賀魯謂 食出 嗣

六年 往 欲自立 平 處密部落入朝,授右監門大將軍。 西域 阳 詔 爲 史那彌射者,室點密可汗五代孫也。 遣 可汗, 諸 鴻臚 胡胡 國 少卿劉善因就蕃立爲奚利邲咄陸可汗, 遂謀殺彌射弟姪二十餘人。 ,自爲可汗,號十 姓部落,世統其衆。 其後步眞遂自立爲咄陸葉護,其部落多不服,委之遁 初,室點密從單于統領十大首領,有兵十萬衆, 彌射旣與步眞有隙, 彌射在本蕃爲莫賀咄葉護 賜以 一鼓纛、綵帛萬段。 以貞觀十三年 其族兄步眞 (E)° 率所部處

有統 年。 乃册 性從賀魯,非其本情,卿等纔至卽降,亦是赤心向國。 道 絕 無辜之甿,久遭塗炭。 撫 川 領 育。 汗 立 步眞復攜家屬 比 爾射後從太宗征高麗有功, 彌 者賀魯猖狂,百姓重 兼 逐使 右衞大將軍、蒙池 射爲興昔亡可汗兼右衞大將軍、崑陵都護,分押賀魯下五咄六部落; 卿早歸闕庭,久參宿衞,深感恩義,甚 凶渠畏威,夷人慕德, 入朝,授左屯衞大將軍 故遣右屯衞將軍蘇定方等統率騎勇, 都護, 被劫掠。 封平襄縣伯。 仍分押五弩失畢部落。 , 伐叛柔服, 西域 **朕君臨四海,情均養育。** 知法式,所以册立卿等各爲一部 顯慶二年,轉右武衞大將軍。 總平。 卿宜與盧承慶等準其部落大小,位望 因下韶曰:「自 賀魯父子旣已擒獲,諸頭部落須 北路討逐;卿等宣暢朝風,南 不可使凶狡之虜,恣行侵漁; 西蕃罹亂, 及討平賀魯, 步眞授繼往 可汗。 = 一十餘 但

髙 ,節級授刺史以下官。」

物數百萬段分賜可汗及諸首領。 吏而謀曰:「彌射若反,我輩即無 落,遂密告海政云:「彌射欲謀反,請以計誅之。」時海政兵纔數千,懸師 龍朔中, 非反,爲步眞所誣,而海政不能審察,濫行誅戮 又令彌射、 步眞率所部從風海道大總管蘇海政討 、噍類。 由是彌射率其麾下,隨例請物,海政盡收斬之。 今宜先舉事, 則可克捷。」乃僞稱 龜茲。 在彌射境內,遂集軍 步員嘗欲并 有敕, 令大總管齎 其後 彌射部 西蕃

言彌射

鈴衞 將軍。 安撫 謀反被害。 元慶爲左玉 招 將軍兼濛 則 慰十 天 卒于長安。 臨 其子獻,配流崖州。 鈴衛將軍兼崑陵都護,令襲興昔亡可汗,押五咄六部落; 姓大使。 朝,十姓無主數年,部落多散失。 池都護,押五弩失畢部落。 獻本蕃漸爲默啜及烏質勒所侵,遂不敢還國。 長安三年,召還。 尋進授元慶左衞大將軍。 垂拱 累授右聽衛大將 初,遂擢授彌射子左豹韜衞翊府中郎將 軍,襲父興昔亡可汗,充 開元中,累遷右金吾大 如意元年,爲來俊臣 步眞 子斛瑟羅爲右 誣 玉

卯 史那 列 傳 第 步 眞 百 四 在 + 本 20 蕃授 下 左 突 屯衞大將 厥 下 軍。 與彌射計平賀魯, 加授驃騎大將軍、行右衞

將軍 卿, 大將 拱 初 轉太僕卿兼濛池都護、十姓可汗。 -,改封竭忠事主可汗,仍賜濛池都護。 軍、濛 ,授 及隨斛瑟羅纔六七萬人,徙居內地,西突厥阿史那氏於是遂絕。 右 玉鈴衞將軍兼濛池都護、襲繼往絕可汗,押五 池 都 護、繼往 絕可汗,押五弩失畢部落。 自垂拱已後,十姓 **尋卒。** 子懷道,神龍年累授右屯衞大將軍、光祿 尋 卒。 弩失畢部落。 |部落頻被突厥默啜侵掠,死散殆 其子斛瑟羅, 天授元年,拜左衞大 本蕃爲步利設,

所件。 子娑葛代統其衆,詔便立娑葛爲金河郡王,仍賜以宮女四人。 胡 刑 千人。 相 嚴酷,衆皆畏之,尤能撫恤其部落,由是爲遠 接, 突騎施鳥質勒者,西突厥之別種也。 景龍二年, 詔封爲 東南至西、庭州。 嘗屯聚碎葉西北界,後漸攻陷碎葉,徙其牙帳居之。 西河郡王,令攝御史大夫解琬就加册立。 斛瑟羅以部衆削弱,自 初隸在斛瑟羅下,號爲莫賀達干。後以斛瑟羅用 近諸胡所歸附。 則天時入朝,不敢還蕃,其地並爲烏質勒 東北與突厥爲鄰,西南與諸 其下置都督二十員,各統兵 未至, 鳥質勒卒。 其長

使齎金七百兩以路楚客,請停娑葛統兵。 初 ,娑葛代父統兵,鳥質勒下部將闕啜忠節甚忌之,以兵部尚書宗楚客當朝任勢,密遣 楚客乃遣御史中丞馮嘉賓充使至其境,陰與忠節

娑葛。 籌其 兄弟尙 「立爲可汗。 索楚客 事 默啜 ,并自致書以申意。 不 和協, 乃留遮弩,遺兵二萬人與其左右來討娑葛,擒之而還。 頭。 豈能盡心於我。」遂興娑葛俱殺之。 景龍三年,娑葛弟遮弩恨所分部落少於其兄,遂叛入突厥,請爲鄉導,以討 在路爲娑葛遊兵所獲,遂斬嘉賓,仍進兵攻陷火燒等城,遣使上 默啜兵還,娑葛下部將蘇祿鳩集餘衆, 默啜顧謂遮弩曰:「汝於

怒,發兵分寇四鎮。 順 使來朝。開元三年,制授蘇祿爲左羽林軍大將軍、金方道經略大使,進爲特勤,遣侍御史解忠 畜並爲蘇祿 阿史那氏女,豈合宣教與吾節度耶!」杖其使者,留而不遣,其馬經雪寒,死並盡。 齎壓書册立爲忠順可汗。 使至京 時杜暹爲安西都護,公主遣牙官齎馬千疋詣安西互市, 蘇祿者,突騎施別種也。頗善綏撫,十姓部落漸歸附之,衆二十萬,遂雄西域之地,尋遣 所掠,安西僅全。 師,玄宗御丹鳳樓設宴。 會杜暹入知政事,趙頤貞代爲安西都護,城守久之,由是四鎭 自是每年遺使朝獻,上乃立史懷道女爲金河公主以妻之〔思〕。 蘇祿既聞杜暹入相,稍引 突厥先遣使入朝, 是日亦來預宴,與蘇祿使爭長。 退,俄又遣使入朝獻方物。 使者宣公主教與暹, 貯 **暹怒日** 十八年, 蘇祿 ?積及人

列

傳

第

厥使曰:「突騎施國小,本是突厥之臣,不宜居上。」蘇祿使曰:「今日此宴,乃爲我設,不合居 下。」於是中書門下及百僚議,遂於東西幕下兩處分坐,突厥使在東,突騎施使在西。 宴訖,

厚賚而遣之。

諸部,心始攜貳。 爲葉護,費用漸廣,先旣不爲積貯,晚年抄掠所得者,留不分之,又因風病,一手攣縮,其下 使南通吐蕃,東附突厥(私)。 蘇祿性尤清儉,每戰伐,有所克獲,盡分與將士及諸部落。其下愛之,甚爲其用。潛又遣 突厥及吐蕃亦嫁女與蘇祿。旣以三國女爲可敦,又分立數子

阻 闕獻俘,玄宗御花萼樓以宴之,仍令將吐火仙獻于太廟。俄又黃姓、黑姓自相屠殺,各遣使 則 道之子昕爲可汗以鎭撫之,莫賀達干不肯,曰:「討平蘇祿,本是我之元謀,若立史昕爲主, 蘇祿之子咄火仙爲可汗,以輯其餘衆,與莫賀達干自相攻擊。莫賀達干遣使告安西都護蓋 嘉運,嘉運率兵討之,大敗都摩度之衆,臨陣擒咄火仙,幷收得金河公主而還。又欲立史懷 國家何以酬賞於我?」乃不立史昕,便令莫賀達干統衆。二十七年二月,嘉運率將士詣 二十六年夏,莫賀達干勒兵夜攻蘇祿,殺之。都摩度初與莫賀達干連謀,俄又相背,立 有大首領莫賀達干、都摩度兩部落,最爲強盛。百姓又分爲黃姓、黑姓兩種,互相猜

盛附。

哉!頡利之衰也,兄弟構隙而部族離心,當太宗之理,謀臣猛將討逐之,其亡也宜哉!洎武 之功。殊不知突厥之始也,賞罰明而將士戮力,遇煬帝之亂,亡命蓄怒者旣附之,其興也宜 |厥諸族,遇其理,則衆心悅附而甲兵興焉; 遇其亂,則族類怨怒而本根破矣! 理亂二道,華 后亂朝,默啜犯塞,玄宗纂嗣,傳首京師,東封太山,西戎扈蹕,開元之代,繼踵來降。 其時焉,不其盛矣!竟滅其族而身死於國者,何也?咸謂太宗有馭夷狄之道,李勣著戡定 力而入平京師,羣賊附其強而迭據河朔。高祖同御榻以延其使,太宗幸便橋以約其和。 隋文修王道,肅軍容,示恩威以羈縻之;煬帝失政教,生戎心,肇亂離以啓發之。高祖借其 史臣曰:中原多事,外國窺邊,周險狁、漢匈奴之後,其類實繁,前史論之備矣。 突厥自 西突

贊曰:中國失政,邊夷幸災。理亂之道,取鑒將來。

一途,或質言於盛衰倚伏,未爲確論

校勘記

(1) 觸木昆 列 傳第 「木」字各本原作「水」,據通典卷一九九、寰宇記卷一九七改。 百四十四下 校 勘 記

- (11) 自知不爲衆所附 通典卷一九九、寰宇記卷一九七,「自」上有「大敗之咄陸」五字。
- 3 詐將酒食出迎 「詐」字各本原作「許」,據通典卷一九九、寰宇記卷一九七改。
- (11) 彌射在本蕃爲莫賀咄葉護 「彌射」二字各本原無,據通典卷一九九、寰宇記卷一九七補。
- (是) 金河公主 通典卷一九九、寰宇記卷一九七同。 唐會要卷六、新書卷二一五下突厥傅作「交河

公主」。

(K) 東附突厥 「東」字各本原無,據通典卷一九九、寰宇記卷一九七補。

舊唐書卷一百九十一

列傳第一百四十五

迴紇

爲生。 恐爲變,遂集其渠帥數百人盡誅之,特勒由是叛。特勒始有僕骨、同羅、迴紇、拔野古、覆羅, **迦**可汗,特勒於是分散。 兵五萬,人口 並號俟斤口,後稱迴紇焉。 突厥,近謂之特勒。 迎紇,其先匈奴之裔也,在後魏時,號鐵勒部落。 自突厥有國,東西征討,皆資其用,以制北荒。 十萬人。 無君長,居無恆所,隨水草流移,人性凶忍,善騎射,貪婪尤甚,以寇抄 大業元年,突厥處羅可汗擊特勒諸部,厚斂其物,又猜忌薛延陀, 在薛延陀北境,居娑陵水側,去長安六千九百里,隨逐水草,勝 其衆微小,其俗曉強,依託高車,臣屬 隋開皇末,晉王廣北征突厥,大破步

初,有特健俟斤死,有子曰菩薩,部落以爲賢而立之。 列 傳 百 四 + 五 逥 紇 貞觀初,菩薩與薛延陀侵突厥北 五一九五

於天山 焉 邊 利發」, 戰 陣 突厥 射獵 仍遣使朝貢。菩薩勁勇,有膽 ,又進擊,大破之,俘其部衆,迴紇 領利 爲務。 可汗遭子欲谷設率十萬騎討之,菩薩領騎五千與戰,破之於馬蠶山,因逐北至 其母烏羅渾主知爭訟之事,平反嚴明, ·氣,善籌策,每對敵臨陣,必身先士卒,以少制衆,常以 由是大振。 因率其衆附于薛延陀、號菩薩爲「活頡 部內齊肅。 迴紇之盛,由菩薩之興

州 州 可汗, 州 爲 功, 白 可 吐 汗 燕然府,僕骨爲金徵府四,拔野古爲 霫爲寘顏州; 迷度爲 於故單于臺置燕然都護府統之,以導賓貢。 府置 賜宴內殿。 貞 一,斛薩 遂倂 遺統 觀 都督,州置刺史,府州皆置長史、司馬已下官主之。以迴紇部爲瀚海府,拜其俟利發 懷化 中擒降突厥頡利等可汗之後,北虜唯菩薩、薛延陀爲盛。 其部曲,奄有其地。 迴紇、 為高 大將軍兼瀚海都督。 太宗幸靈武,受其降款,因請迴鶻已南置郵遞,通管北方。 又以迴紇 國州,阿跌爲鷄田州,契苾爲楡溪州 僕骨、 同羅、 西北結骨爲堅昆府, 思結、 貞觀 時吐迷度已自稱可汗, 二十年,南過賀蘭山, 阿跌等部。 幽陵府,同羅爲龜林府,思結爲盧山府,渾部爲阜繭 其北骨利幹為玄闕州 迴紇 ,跌結爲鷄鹿州,阿布思爲蹛林州 **酋帥吐迷度與諸部大破薛延陀多彌** 臨黃河,遺使入貢,以破薛延陀 署官號皆如突厥故事。 太宗册北突厥莫賀咄爲 東北俱羅勃爲燭龍 太宗爲置六府七 以多覽

瀚海都督。 勃潛謀殺吐迷度以歸車鼻。 左屯衞大將軍 仍以敦禮爲金山道副將軍。 跪拜致謝,禮臣擒而斬之以聞。 燕然 貞觀 副都護元禮臣遣人給烏紇云:「將奏而爲都督,替吐迷度也。」烏紇 二十二年,吐迷度爲其姪烏紇所殺。 後俱羅勃來朝,太宗留之不遺。 翊衞左郎將婆閏爲左驍衞大將軍(B)、大俟利發、使持節迴紇部落諸軍事 贈吐迷度左衞大將軍,賻物及衣服設祭甚厚。 烏紇、俱羅勃,並 太宗恐迴紇部落攜離,十月,遣兵部尚書崔敦禮往安撫之, 韶西突厥可汗阿史那賀魯統五啜、五俟斤二十 一車鼻之壻也,烏紇遂夜領騎十餘劫吐迷度,殺 初,烏紇蒸其叔母,遂與俱陸莫賀達 輕騎至禮臣所, 以吐迷度子前 一干俱羅

收復北庭。 縣,西盡波斯。 賀魯至石國西北蘇咄城,城主伊涅達干執賀魯送洛陽。 爾射、阿史那步眞爲二府都督,統十姓右廂五弩失畢、左廂五咄陸(《)。 魯於陰山 永徽二年,賀魯破北庭,韶將軍梁建方、契苾何力領兵二萬,取迴紇 婆唱死,姪比粟毒主領迴鶻(+),與同羅、 ,再破於金牙山,盡收所據之地,西逐至耶羅川。 顯慶元年,賀魯又犯邊,詔程知節、蘇定方、任雅相、蕭嗣業領兵并迴紇大破賀 加婆閨右衞大將軍兼瀚海都督。 僕固犯邊,高宗命鄭仁泰討平僕固等,比栗 永徽六年,迴鶻遣兵隨 以其地置濛池、崑陵府,以阿史那 賀魯西奔石國,婆閨 以賀魯種落分置州 蕭 五萬騎,大破 嗣業討高麗。 隨蘇定方逐 質魯,

餘部,居多羅斯水南,去西州馬行十五日程。

迴紇不肯西屬突厥

列

僔

第

百

四

毒 敗走,因以鐵勒本部爲天山縣。 永隆中獨解支,嗣聖中伏帝匐,開元中承宗、伏帝難,並

戰,常以二客部落爲軍鋒。 息訖;五日阿勿嘀;六日葛薩;七日斛嗢素;八日藥勿葛;九日奚耶勿。每一部落一都 有十一都督,本九姓部落:一日樂羅葛,卽可汗之姓;二日胡咄葛;三日咄羅勿;四日貊歌 退保烏德健山,南去西城一千七百里,西城即漢之高闕塞也。西城北去磧石口三百里(云)。 破拔悉密,收一部落,破葛邏祿,收一部落,各置都督一人,統號十一部落。 開元 中,迴鶻漸盛,殺凉州都督王君奠,斷安西諸國入長安路,玄宗命郭知運等討逐, 每行止關

使首領大將軍多攬等十五人入朝。九月戊寅,加承宋開府儀同三司,拜宗正卿,納迴紇公 遣首領來朝,請和親,封迴紇公主爲毗伽公主。肅宗在彭原,遇之甚厚。二載二月,迴紇又 男承案封爲燉煌王,將軍石定番,使于迴紇,以修好徵兵。及至其牙,可汗以女嫁於承案, 伽 元帥廣平王見葉護,約爲兄弟,接之頗有恩義。 主爲妃。 闕 |可汗,又遣使入朝,因册爲懷仁可汗。及至德元載七月,肅宗於靈武卽位。 遣故邪王 天寶初,其酋長葉護頡利吐發遣使入朝,封奉義王。三載,擊破拔悉密,自稱骨咄祿毗 迴紇遣其太子葉護領其將帝德等兵馬四千餘衆,助國討逆,肅宗宴賜甚厚。又命 葉護大喜,謂王爲兄。

緒,率其 羊 却 其 賊 + 因 日 ·餘里 將 收 數 埋 西京 精 百 葉護 里。 軍 車 騎 口、牛二十頭、米四 黨背東京 人馬相 鼻施 於大 迴紇望見,踰山 太子日 迴紇 十月,廣平王、副元 、營東, 吐 枕 大首領達干等 撥裴羅等旁南 「國家 藉 北 走渡 ,蹂踐而 將襲 有 河,而葉護從廣 西嶺上曳白旗 我軍之背。 十石 難 死 一十三人先至扶 遠 者 山 帥 來 不 及元 郭 而 相 東,遇賊 可勝數,斬 子 朔方左廂 助, 儀領迴紀兵馬 帥 而 廣 平王、僕射 趨擊之,直出其後,賊衆 何 平王 伏兵于谷中,盡 暇 首 風 食爲。」子儀 一率郭 兵 ,與朔方將士見僕射郭 十餘萬,伏屍三十 馬使僕固 郭子儀 ,與賊戰於陝 子儀等至香積寺東二十 入東京 固 懐 一殪之。 留之,宴 恩指 大敗, 西。 迴紇馳救之, 子儀 里。 畢 初 賊黨 便發。 子儀,留之, 至新店, 軍 次于曲 而 嚴莊 里, 北 其軍 坑, 匹 四 遇 沃 馳 葉護 臨 賊 馬 逐北 宴設 告安 每 戰, 灃 不 日給 龜 水。 軍 使

力 長 十 村 也 坊 柯 月 剽 於 初 功 葉護 癸 掠 階 收 濟 酉 西京,迴 ,賜錦 日 奏日: 艱 葉護自 而 難 止 迴紇 紇 繡 義 網綵 存 財 欲 東京至。 物 入城 邦國 戰兵,留在 金銀 不 幼掠 口 萬 勝計, 器 敕百 里 演廣 Ш. 絕 沙 ,廣平王 官於長 平王 域 苑,今且須 及辭歸 固 德同心,求之古今,所未聞也。 /樂驛 止 又賚之以錦罽寶 蕃 之。 迎, 歸 上 及收 靈 謂 上 夏 一御宣政 日二能 東京 取 馬, ",迴 紇 貝,葉護 爲國家就 殿宴勞之。 更 收范陽, 遂 大喜。 入 大 府庫 事 葉 討 迴 成 護 收以帛,於市井 除 及 義 肅 残 升 勇者 賊。」己 殿, 宗 還 其餘 西京, 卿 鱼

月,傳之子孫,豈惟裂土之封,誓河之賞而已矣。 夫位之崇者,司空第一;名之大者,封王 靖,以可汗有兄弟之約,與國家興父子之軍,奮其智謀,討彼凶逆,一鼓作氣,萬里摧鋒,二 麥,挺生奇略,言必忠信,行表温良,才爲萬人之敵,位列諸蕃之長。屬凶醜亂常,中原未 旬之間,兩京克定。力拔山岳,精貫風雲,蒙犯不以辭其勞,急難無以踰其分。固可懸之日 可司空、仍封忠義王,每載送絹二萬匹至朔方軍,宜差使受領。」

 問門爭長,通事舍人乃分爲左右,從東西門並入。 六月戊戌,宴<u>週</u>紇使於紫宸殿前 乾元元年五月壬申朔,迴紇使多亥阿波八十人,黑衣大食酋長閣之等六人並朝見,至

及瑀至其牙帳,毗伽闕可汗衣赭黃袍,胡帽,坐於帳中榻上,儀衞甚盛,引瑀立於帳外,謂瑀 甲午,肅宗送寧國公主至咸陽磁門驛,公主泣而言曰:「國家事重,死且無恨。」上流涕而還。 公裝冕送至界首。癸巳,以册立迴紇英武威遠毗伽可汗,上御宣政殿,漢中王瑀受册命。 史中丞、鴻臚卿,副之,兼充寧國公主禮會使。特差重臣開府儀同三司、行尙書右僕射、冀國 盧俊。」可汗又報曰:「中使是奴,何得向郎君上立?」雷盧俊竦懼, 跳身向下立定。 踽不拜 曰:「王是天可汗何親?」稱曰:「是唐天子堂弟。」又問:「於王上立者爲誰?」瑀曰:「中使雷 太常卿、攝御史大夫,充册命英武威遠毗伽可汗使;以堂姪左司郎中巽爲兵部郎中、攝御 秋七月丁亥,詔以幼女封爲寧國公主出降。其降蕃日,仍以堂弟漢中郡王瑀爲特進、 萬人,宴於紫宸殿,賜物有差。十二月甲午,迴紇使三婦人,謝寧國公主之聘也,賜宴紫宸 貌,萬里嫁與可汗。可汗是唐家天子女壻,合有禮數,豈得坐於榻上受詔命耶!」可汗乃起 汗結姻好。 比者中國與外蕃親,皆宗室子女,名爲公主。今寧國公主,天子眞女,又有才 隨朔方行營使僕固懷恩押之。 信繒綵衣服金銀器皿,可汗盡分與衙官、酋長等。及瑀回,可汗獻馬五百匹、貂裘、白氎 奉詔,便受册命。翼日,册公主爲可敦,蕃酋歡欣曰:「唐國天子貴重,將眞女來。」瑀所送國 而立,可汗報曰:「兩國主君臣有禮,何得不拜?」瑀曰:「唐天子以可汗有功,故將女嫁與可 八月,迴紇使王子骨啜特勤及宰相帝德等驍將三千人助國討逆。 九月甲申,迴紇使大首領蓋將等謝公主下降,兼奏破堅昆五 肅宗嘉其遠至,賜宴,命

其月庚寅,迴紇特勤辭還行營,上宴之于紫宸殿,賜物有差。乙未,以迴紇王子新除左羽林 迴紇王子骨啜特勤及宰相帝德等十五人自相州奔于西京,肅宗宴之于紫宸殿,賞物有差。 軍大將軍員外置骨啜特勤爲銀青光祿大夫、鴻臚卿員外置。 乾元二年,迴紇骨啜特勤等率衆從郭子儀與九節度於相州城下戰,不利。 三月壬子,

六月丙午,以左金吾衞將軍李通爲試鴻臚卿、攝御史中丞, 充弔祭迴紇使。 夏四月,迴紇毗伽闕可汗死。長子葉護先被殺,乃立其少子登里可汗, 毗伽闕可汗初 其妻爲可敦。

列

殿通謁,賜物有差。十一月戊辰,迴紇使延支伽羅等十人於延英殿謁見,賜物有差。 九月己丑,迴紇九姓可汗使大臣俱陸莫達干等入朝奉表起居。乙卯,迴紇使二十人於延英 面大哭,竟以無子得歸。秋八月,寧國公主自迴紇還,詔百官於明鳳門外迎之。上元元年 ,其牙官、都督等欲以寧國公主殉葬,公主曰:「我中國法,壻死,卽持喪,朝夕哭臨,三年 今週紇娶婦,須慕中國禮。若今依本國法,何須萬里結婚。」然公主亦依迴紇法,營

庫。 秋 業已發至三城北,見荒城無戍卒,州縣盡爲空壘,有輕唐色,乃遣使北收單于兵馬倉糧,又大 相 駭。上使殿中監藥子昂馳勞之,及於太原北忻州南,子昂密數其丁壯,得四千人,老小婦人 馬同收兩京,破安慶緒,與可汗有故。又每年與可汗繒絹數萬匹,可汗豈忘之耶?」然迴紇 辱淸潭。 有敕書?」中使對曰:「我唐家天子雖棄萬國,嗣天子廣平王天生英武,往年與迴紇葉護兵 ,清潭入迴紇庭,迴紇已爲史朝義所誘,云唐家天子頻有大喪,國亂無主,請發兵來收府 **兼萬餘人,戰馬四萬匹,牛羊不紀。** 可汗乃領衆而南,已八月矣。清潭資敕書國信至,可汗曰:「我聞唐家已無主,何爲更 寶應元年,代宗初卽位,以史朝義尙在河洛,遣中使劉淸潭徵兵於迴紇,又修舊好。其 清潭發使來奏云:「迴紇登里可汗傾國自來,有衆十萬,羊馬不知其數。」 京師大

先是,毗伽闕可汗請以子婚,肅宗以僕固懷恩女嫁之。及是爲可敦,與可汗同來,請懷

子昂 策也。」可汗從之。 向 1 恩及懷恩母相見。 可汗 开失望。 官兼掌 入,取 最爲 兼 又不從。 御 書記,給事中李進兼 沙苑路,由潼關 上策。 不如 史中丞,與前 。」可汗不從。 取 又說「取陝州太陽津路,食太原倉粟而 上門路入,直取邢、洺、衞、懷。 上敕懷恩自汾州見之於太原, 子昂 潞府兼御史中丞魏琚爲左右廂兵馬使,以中書舍人韋少華充元 東向 因入奏,上以雍王适爲兵馬元帥, 御史中丞,充元帥行軍司馬,東會迴紇登里可汗營於陝州 又說「取懷州太行路, . 被賊,子昂說之云:「國家頻遭寇逆,州縣虛乏,難爲 賊中兵馬盡在東京,可汗收其財帛,束裝南 南據 懷恩又諫國家恩信不可違背。 東, 河陰之險,直扼賊之喉,亦上策 與澤潞、 加懷恩同中書門下平章事。 河南、 懷鄭節度同入,亦上 供擬, 初欲 白浦 帥 又以 也。 恐 圳 河

孫 李進、少華、魏踞各搒捶一百,少華、踞因搒捶,一宿而死。 卽 今可汗 懷恩與迴紇 唐太子也,太子卽儲君也,豈有中國儲君向外國可汗前舞蹈。」相拒 兩宮在殯,不合有舞蹈。 元 卽 帥 雍王叔,叔姪有禮數,何得不舞蹈? 雍王 領子 昂等從 而見之, 右殺爲先鋒,及諸節度同攻賊,破之,史朝義率殘寇而走。 迴紇宰相及車鼻將軍庭詰曰:「唐天子與登里可汗約爲兄弟, 可汗責雍王不於帳前舞蹈, 」子昂苦辭以 以王 身有喪禮,不合。 少年未諳事,放歸本營。 禮倨。 久之, 車鼻遂引子昂、 元帥雍王退歸靈寶。 子昂辭以元帥是嫡 又報云:「元帥 M

北

列

迴紇 段。 歸, 殿。 使拔賀那上表賀收東京,丼進逆賊史朝義旌旗等物。 河北悉平。 及諸 可汗繼 節度收河北州縣, 進於 懷恩自相州 河陽, 列營而止數月。 西出崞 僕固場與迴紇之衆追躡 口路而 去營百餘里,人被剽劫逼 西, 可汗自河陽北出澤、潞與懷恩會,歷太原,遺 二千餘里,至平州石城縣,梟朝義首 辭還蕃,代宗引見於內殿,賜綵二百 辱,不勝其弊。 懷恩常爲軍 而

英乂權 掠坊市及汝、鄭等州,比 乾縱火焚二閣,傷死者萬計,累旬火焰不止。 初,迴紇至東京,以賊平,恣行殘忍, 知東都留守。 時東都再經賊亂, 屋蕩盡,人悉以紙爲衣,或有衣經者。 朔方軍及郭英乂、魚朝恩等軍不能禁暴, 士女懼之,皆登聖善寺及白馬寺二閣以避之。 及是朝賀,又縱橫大辱官吏。以陝州 與迴紇縱 節度使郭 迴

大王翊 覽將軍封為|靜漠王,諸都督一十一人並封國公。 俱 加 二千戶 公錄」, 册爲婆墨光親麗華毗伽 代宗御宣政殿, ,令王翊就牙帳前禮 充使,就可汗行營行册命焉。可汗、可敦及左右殺、諸都督、內外宰相已下,共加實封 華言「婁羅」 」;「毗伽」, 出册文, 可敦。 册。 加册可汗爲登里頡咄登密施含俱錄英義建功毗 華言「足意智」; 左殺封爲雄朔王 「頡咄」,華言「社稷法用」;「登密施」, 「婆墨」,華言「得憐」。以散騎常侍兼御史大 ,右殺封爲寧朔王,胡祿都督封金河王 華 言「封竟」;「含 伽可汗,可敦

降, 千匹。 翔、同州等處,被其逆命。 范至誠、任敷將兵,又誘迴紇、吐蕃、吐谷渾、党項、奴刺之衆二十餘萬,以犯奉天、醴泉 引 令公亦不主兵,我是以敢來。 縶,我麾下將士,須與汝戰。」迴紇又譯曰:「懷恩負心,來報可汗,云唐國 報汝大厚,汝何背約負信, 右翼,各數百人,漸進,子儀麾下亦馳而至,子儀麾退之。子儀命酒與之飲,贈之纏頭 度李太保。」又曰:「此是朔方軍糧使路大夫。」迴紇便下馬羅拜,子儀亦下馬,迴紇之衆爲 太子太保李光進、兼御史大夫路嗣恭戎裝介馬在子儀之側,子儀指視迴紇 公也。」迴紇曰:「請去甲。」子儀便脫兜鍪槍甲,策馬挺身而前,迴紇酋長相 將馬重英等十月初引退,取邠州舊路而歸。 吐蕃之衆數萬人至奉天縣,朔方節度郭子儀率衆拒之而退。 ,子儀許之,率衆被甲持滿數千人。迴紇譯曰:「此來非惡心,要見令公。」子儀曰:「我令 而懷恩叛,投靈武,有朔方舊將任數、張韶等,收合餘燼,衆至數萬。 子儀執迴紇大將可汗弟合胡祿都督樂羅萬等手,責讓之曰:「我國家知汝迴紇有功, 先以郭子儀屯涇陽,渾日進屯奉天,數摧其鋒。又聞懷恩死,吐蕃 犯我王畿?我須與汝戰,何乃降爲! 今知天可汗見在上都行,令公爲將,懷恩天又殺之。今請追殺 迴紇首領羅達干等率其衆二千餘騎,詣涇陽請 永泰元 我一身挺入汝營,任汝拘 年秋 天子今已向江淮, 日:「此是渭北 顧曰:「是也。」時 廣德二年秋, ,懷恩遣兵馬使 左

列

吐蕃,收其羊馬,以報國

恩

然懷恩子,可敦兄弟,請勿殺之。」合胡祿都督等與宰相磨咄

等分纏頭綵以賞巫師,請諸將同擊吐蕃,子儀如其約。翌日,使領迴紇首領開府石野那等 單騎相見,誰有此心膽!是不戰鬭見一大人,巫師有徵矣。」歡躍久之。子儀撫其背,首領 說可汗亦萬歲!兩國將相亦萬歲!若起負心違背盟約者,身死陣前,家口屠戮。」合胡祿都 行大安穩,然不與唐家兵馬鬭,見一大人卽歸。』今日領兵見令公,令公不爲疑,脫去衣甲, 督等失色,及杯至,即譯曰:「如令公盟約。」皆喜曰:「初發本部來日,將巫師兩人來,云:『此 六人入京朝見(10)。 干、平章事海盈闕達干等,子儀先執杯,合胡祿都督請咒,子儀咒曰:「大唐天子萬萬歲 宰相噋莫賀達干、宰相護都毗伽將軍、宰相揭拉裴羅達干、宰相梅錄大將軍羅達

僕固 使巫 錫賚甚厚。閏月,子儀自涇陽領僕固名臣入奏,迴紇進馬,及宴別,前後賚繒綵十萬匹而還。 宰相梅錄大將軍、開府儀同三司、試太常卿羅達干等一百九十六人來見,上賜宴於延英殿, 可勝紀,收得蕃落五千餘人。初白元光等到靈臺縣西,探知賊勢,爲月明,思少陰晦,迴紇 一赤山嶺,共破吐蕃等十餘萬衆,斬首五萬餘級,生擒一萬餘人,駝馬牛羊凡百里相繼,不 名臣,懷恩之姪,尤爲驍將,亦領千餘騎來降。 師 叉五 便致風雪。及遲明戰,吐蕃盡寒凍,弓矢皆廢,披氊徐進,元光與迴紇隨而殺之蔽野。 日,朔方先鋒兵馬使、開府、南陽郡王白元光與迴紇兵馬合於涇州靈臺縣西五十 尋而子儀又使迴紇宰相護地毗伽將軍,

時帑藏空虛 了,朝官無祿俸,隨月給手力: 謂之資課錢。 稅朝官閏十月、十一月、十二月課以

計許市六千匹。 是月,迴紇使使赤心領馬一萬匹來求市,代宗以馬價出於租賦,不欲重困於民,命有司量入 非一,蕃得帛無厭,我得馬無用,朝廷甚苦之。是時特詔厚賜遣之,示以廣恩,且俾知愧也 以馬和市繒帛,仍歲來市,以馬一匹易絹四十匹,動至數萬馬。 禁。八年十一月,迴紇一百四十人還蕃,以信物一千餘乘。 寺,入坊市強暴,逐長安令邵說於含光門之街,奪說所乘馬將去。 光門、朱雀門。 大曆六年正月,迴紇於鴻臚寺擅出坊市,掠人子女,所在官奪返,毆怒,以三百騎 是日,皇城諸門盡閉,上使中使劉淸潭宜慰,乃止。 迴紇恃功,自乾元之後,屢遣使 其使候遣繼留於鴻臚寺者 七年七月,迴紇 說脫身避走,有司 出 不 犯 鴻 能 臚

太原尹 武略,乃敢凌逼,賴光晟邀戰勝之,北人乃安。 | 統戰于| 羊武谷, 破之, 廻紇引退。 馳入縣獄,劫囚而出,斫傷獄吏。 十年九月,廻紇白晝刺人於東市,市人執之,拘於萬年縣。 、兼御史大夫鮑防與迴紇戰于陽曲,我師敗績,死者千餘人。代州都督張光晟與迴 十三年正月,迴紇寇太原,過楡次、太谷,河東節度留後、 先是辛雲京守太原,迴紇懼雲京,不敢窺抖、代,知鮑防無 德宗初即位, 使中官梁文秀告哀於迴紇, 且 其首領赤心聞之,自鴻臚寺

列

國南 开不聽。 馬數萬計,可謂大捷矣。以道途艱阻,比及國,傷耗殆盡。 修舊好,可汗移地健不爲禮。而九姓胡素屬於迴紇者,又陳中國便利以誘其心,可汗乃舉 下 ,將乘我喪。 頓莫賀乘人之心,因擊殺之,并殺其親信及九姓胡所誘來者凡二千人。 其宰相頓莫賀達干諫曰:「唐,大國也,且無負於我。 今若舉而不捷,將安歸乎?」可 前年入太原,獲羊

月,迴紇汨咄祿長壽天親毗伽可汗薨,廢朝三日,文武三品已上就鴻臚寺弔其來使。 宰相首領皆至,分館鴻臚、將作。癸巳,見於宣政殿。乙未,德宗召迴紇公主、出使者對於 王湛然爲咸安公主婚禮使,關播檢校右僕射、送咸安公主及册迴紇可汗使。 貞元五年十二 麟德殿,各有頒賜。庚子,韶咸安公主降迴紇可汗,仍置府官屬視親王例。以殿中監、嗣滕 妻妾凡五十六婦人來迎可敦,凡遣人千餘,納聘馬二千。 於和親 貢方物,且請和親。 節册爲武義成功可汗。貞元三年八月,迴紇可汗遣首領墨啜達干、多覽將軍合闕達干等來 頓莫賀自立號爲合骨咄祿毗伽可汗,使其酋長建達干隨文秀來朝。命京兆尹源休持 ?,其禮甚恭,上言:「昔爲兄弟,今爲子壻,半子也。」又詈辱吐蕃使者,及使大首領等 四年十月,迴紇公主及使至自蕃,德宗御延喜門見之。時迴紇可汗喜 德宗令朔州、太原分留七百人,其

夫,充册迴紇忠貞可汗使。是歲四月,忠貞可汗爲其弟所殺而篡立。時迴紇大將頡干迦斯 貞元六年六月,廻紇使移職伽達干歸蕃,賜馬價絹三十萬匹。以鴻臚卿郭鋒兼御史大

迦斯 西擊 軍告忠貞可汗之哀於我,且請册新君。 禮焉。盡以所陳器幣頒賜左右諸從行將士,己無所取。自是其國稍安,乃遣達比特勤梅錄將 是歲,吐蕃陷北庭都護府。 今幸得立,惟仰食於阿爹。」可汗以子事之,頡干迦斯以卑遜興感,乃相持號哭,遂執臣子之 命曰:「惟大相生死之。」悉以所陳器幣贈頡干迦斯以悅之。 至也,可汗等出迎郊野,陳郭鋒所送國信器幣,可汗與次將相等皆俯伏自說廢立之由,且請 吐蕃未回,其次相率國人縱殺篡者而立忠貞之子爲可汗, 年方十六七。 西討回,將至牙帳,次相等懼其後有廢立,不欲漢使知之,留鋒數月而回。 使至,廢朝三日,仍令三品已上官就鴻臚寺弔其使。 。可汗又拜泣曰:「兒愚幼無知, 及六月,頡干 頡干迦斯之

其先葛祿部落及白服突厥素與迴紇通和,亦憾其侵掠。因吐蕃厚賂見誘,遂附之。 出奔西州,頡干利亦還。 蕃率葛禄、白服之衆去多寇北庭,迴紇大相頡干迦斯率衆援之,頻敗。吐蕃急攻之,北庭之 **資,必強取之。又有沙陀部落六千餘帳,與北庭相依,亦屬於迴紇,肆行抄奪,尤所厭苦。** 人旣苦迴紇,乃舉城降焉,沙陀部落亦降。 頡干利收合餘燼, 晨夜奔還。 北庭、安西旣假道於迴紇以朝奏,因附庸焉。 六年秋(11),悉其國丁壯五萬人,召襲古,將復焉,俄爲所敗,死者 襲古餘衆僅百六十,將復入西州, 節度使、檢校工部尙書楊襲古將麾下二千餘衆 迴紇徵求無厭,北庭差近,凡生事之 頡干迦斯紿之曰: 於是吐

列

亡,唯西州之人,猶固守焉。頡于迦斯敗,葛祿乘勝取迴紇之浮圖川,迴紇震恐,悉遷西北 、與我同至牙帳,當送君歸本朝。」旣及牙帳,留而不遣,竟殺之。 自是安西阻絕,莫知存

部落羊馬於牙帳之南以避之。

統遣使律支達干等來朝,告小寧國公主薨,廢朝三日。故,肅宗以寧國公主降**迴**紇,又以榮王 靈檢校右僕射。靈本唐人,姓呂氏,因入迴紇,爲可汗養子,遂以可汗姓爲薬羅葛靈,在國用 月,迴紇遣殺支將軍獻吐蕃俘大首領結心,德宗御延喜門觀之。八年七月,以迴紇藥羅葛 蕃、葛祿於北庭所捷及其俘畜。先是,吐蕃入靈州,爲迴紇所敗,夜以火攻,駭而退。十二 親可汗立,出居於外,生英武二子,爲天親可汗所殺。無幾薨。七年八月,迴紇遣使獻敗吐 女媵之;及寧國來歸,榮王女爲可敦,迴紇號爲小寧國公主,歷配英武、英義二可汗。 因來朝,寵賚甚厚,仍給市馬絹七萬匹。九年九月,遣使來朝貢。 貞元七年五月庚申朔,以鴻臚少卿庾疑兼御史大夫,册迴紇可汗及弔祭使。是月,迴 及天

體請和親,使伊難珠還蕃,宴于三殿,賜以銀器繒帛。是歲,迴鶻數千騎至鸊鵜泉,邊軍戒 年,藹德曷里祿沒弭施合密毗迦可汗遣使改爲迴鶻,義取迴旋輕捷如鶻也。八年四月,迴 十二月二日,宴歸國迴鶻摩尼八人,令至中書見宰臣。先是,迴鶻請和親,憲宗使有司 貞元十一年六月庚寅,册拜迴紇騰里邏羽錄沒密施合祿胡毗伽懷信可汗Cillo 元和四

計之,禮費約五百萬貫,方內有誅討,未任其親,以摩尼爲迴鶻信奉,故使宰臣言其不可。 乃詔宗正少卿李孝誠使于迴鶻,太常博士殷侑副之,諭其來請之意

蕃以迎太和公主歸國。」其月敕:「太和公主出降迴紇,宜特置府,其官屬宜視親王例。」 憲 示; 入朝迎公主,於鴻臚寺安置。敕:太和公主出降迴鶻爲可敦,宜令中書舍人王起赴鴻臚寺宜 侍、兼御史大夫,持節册立、兼弔祭使。 月, 和親故也。 加 兼御史中丞, 充副使, 太常博士殷侑改殿中侍御史, 充判官。 吐蕃犯青塞堡, 以迴紇 以左金吾衞大將軍胡証檢校戶部尙書,持節充送公主入迴鶻及册可汗使,光祿卿李 正衙册迴鶻君長爲登羅羽錄沒密施句主錄毗伽可汗,以少府監裴通爲檢校左散騎常 長慶元年,毗伽保義可汗薨,輟朝三日,仍令諸司三品已上官就鴻臚寺弔其使者。 鹽州刺史李文悅發兵擊退之。 五月,迴鶻宰相、都督、公主、摩尼等五百七十三人 ,迴鶻奏:「以一萬騎出北庭,一萬騎出安西 7,拓吐 四

赴迴紇國 宰相、駙馬、梅錄司馬,兼公主一人、葉護公主一人,及達干丼駝馬千餘來迎。 十妹爲太和公主,將出降,迴紇登邏骨沒密施合毗伽可汗遣使伊難珠、句錄都督思結丼外 有勳勞於王室, 又西戎比歲爲邊患, 遂許以妻之。旣許而憲宗崩。 迴紇 ,穆宗御通化門左个臨送,使百僚章敬寺前立班,儀衞甚盛,士女傾城觀焉。 自咸安公主歿後,屢歸款請繼前好,久未之許。至元和末,其請彌切,憲宗以北 穆宗卽位,踰年乃封 太和公主發 第 虜

列傳

第

百四十五

迴

月,振武節度張惟淸奏:「準韶發兵三千赴蔚州,數內已發一千人訖,餘二千人,待太和公主 豐州刺史李祐奏:「迎太和公主迴鶻三千於柳泉下營拓吐蕃二言。」 出界即發遣。」又奏:「天德轉牒云:迴鶻七百六十人將駝馬及車,相次至黃蘆泉迎候公主。」

中使止迴紇令歸。會其已上豐州北界,不從止。詔發繒帛七萬匹賜之,方還。五月,命使 册立登囉骨沒密施合毗伽昭禮可汗公司,遣品官田務豐領國信十二車使迴鶻,賜可汗及太 亂,迴鶻請以兵從度討伐。朝議以寶應初迴紇收復兩京,恃功驕恣難制,咸以爲不可,遂命 二年二月,賜迴紇馬價絹五萬匹。三月,又賜馬價絹七萬匹。是月,裴度招討幽、鎭之

出樓前西向拜。可汗坐而視,公主再俯拜訖,復入氊幄中,解前所服而披可敦服,通裾大 坐,設氊幄於樓下以居公主,使羣胡主教公主以胡法。公主始解唐服而衣胡服,以一嫗侍, 公主來時,去花門數百里卽先去,今何獨拒我?」証曰:「我天子韶送公主以投可汗,今未見 牙帳尚可信宿,可汗遣數百騎來請與公主先從他道去。 胡証曰:「不可。」 虜使曰:「前咸安 卿李子鴻、判官虞部郎中張敏、太常博士殷侑送太和公主至自迴紇,皆云:初,公主去迴紇 可汗,豈宜先往!」虜使乃止。旣至虜庭,乃擇吉日,册公主爲迴鶻可敦。可汗先升樓東向 長慶二年閏十月,金吾大將軍胡証、副使光祿卿李憲、婚禮使衞尉卿李銳、副使宗正少

坐。自此臣下朝謁,并拜可敦。可敦自有牙帳,命二相出入帳中。賦等將歸,可敦宴之帳 引公主升興,迴紇九姓相分負其興,隨日右轉於庭者九,公主乃降興升樓,與可汗俱東向 襦,皆茜色,金飾冠如角前指,後出樓俯拜可汗如初禮。 虜先設大輿曲晟,前設小座,相者

中,留連號啼者竟日,可汗因贈漢使以厚貺

兵在外,怨誅柴革、安允合,又殺薩特勤可汗,以廅馺特勤爲可汗。 特勤柴革欲篡薩特勤可汗公思,薩特勤可汗覺,殺柴革及安允合。又有迴鶻相掘羅勿者,擁 月,入朝迴鶻進太和公主所獻馬射女子七人,沙陀小兒二人。開成初,其相有安允合者,與 支投安西。又有近可汗牙十三部,以特勤烏介爲可汗,南來附漢。 相駁職者,擁外甥龐特勤及男鹿丼遏粉等兄弟五人、一十五部西奔葛邏祿,一支投吐蕃,一 勿,走引點戛斯領十萬騎破迴鶻城,殺置駁,斬掘羅勿,燒蕩殆盡,迴鶻散奔諸蕃。 左聽衞將軍、皇城留守唐弘實爲金吾將軍兼御史大夫,持節充入迴鶻弔祭册立使。 九年六 册親弟薩特勤。廢朝三日,仍令諸司文武三品、尙書省四品以上官就鴻臚寺弔其使者。以 三萬匹賜迴紇充馬價。七年三月,迴紇李義節等將駝馬到,且報可汗三月二十七日薨,已 大和元年,命中使以絹二十萬匹付鴻臚寺宣賜迴鶻充馬價。三年正月,中使以絹二十 有將軍句錄末賀恨掘羅 有迴鶻

初,點戞斯破迴鶻,得太和公主。點戞斯自稱李陵之後,與國同姓,遂令達干十人送公 列 百 四十 五 廽 紇

烏介獲而殺之 弟仲至率兵大破|那頡之衆,全收七千帳,殺戮收擒老小近九萬人。|那頡中箭,透駝羣潛脫 帳,東瞰振武、大同,據室韋、黑沙、楡林,東南入幽州雄武軍西北界。 幽州節度使張仲武遣 後誘赤心宰相同謁烏介可汗,發赤心於可汗帳下丼僕固二人。那頡戰勝,全占赤心下七千 動那頡啜擁部衆,不賓烏介。赤心欲犯塞,烏介遣其屬嗢沒斯先布誠於天德軍使田牟,然 渡大磧,至天德界,奏請天德城與太和公主居。 至塞上。 烏介途遇點戛斯使,達干等並被殺,太和公主却歸烏介可汗,乃質公主同行,南 有迴鶻相赤心者,與連位相姓僕固者,與特

二部南奔吐蕃,有特勤可質力二部東北奔大室韋,有特勤荷勿廢東討契丹,戰死。 降振武,三部首領皆賜姓李氏,及名思忠、思貞、思惠、思恩,充歸義使。 詔配諸道。 羯可敦一部,外相諸洛固阿跌一部,及牙帳大將曹磨你等七部,共三萬衆,相次降於幽州, 度使張仲武充東面招控迴鶻使。二年多、三年春、迴鶻特勤龐俱遮、阿敦寧二部,迴鶻公主密 武、雲朔,比罹俘戮。詔諸道兵悉至防捍,以河東節度使劉沔充南面招控迴鶻使,以幽州節 烏介諸部獨稱十萬衆,駐牙大同軍北閭門山,時會昌二年秋,頻劫東陝已北,天德、振 有特勤嗢沒斯、阿歷支、習勿啜三部,迴鶻相愛耶勿弘順、迴鶻尚書呂衡等諸部 有特勤葉被沽兄李

會昌三年,迴鶻尚書僕固繹到幽州,約以太和公主歸幽州,烏介去幽州界八十里下營,

帳,因 烏介嫁妹與室章,託附之。 東北約四百里外, 其親信骨肉及摩尼志淨等四人已先入振武軍。是夜,河東劉沔率兵奄至烏介營,烏介驚走 迎歸國。 烏介部衆至大中元年詣幽州降,留者漂流餓凍,衆十萬,所存止三千已下。 依和解室韋下營,不及將太和公主同走。 爲迴鶻相美權者逸隱啜逼諸迴鶻殺烏介於金山,以其弟特勤遏 豐州刺史石雄兵遇太和公主

捻爲

可汗,復有衆五千以上,其食用糧羊皆取給於奚王碩舍朗。

外獨數帳,散藏諸山深林,盜劫諸蕃,皆西向傾心望安西雕勒之到。 萬,從西南天德北界來取遏捻及諸迴鶻,大敗室章。 遏捻等懼,是夜與妻葛祿、子特勤毒斯等九騎西走,餘衆奔之不及,迴鶻諸相達官老幼大 所產,交易而返。 西諸城。 五百人已下,依室章。張仲武因賀正室章經過幽州,仲武却令還蕃,遣送遏捻等來向幽州。 室章分迴鶻餘衆爲七分,七姓室章各占一分。經三宿,點憂斯相阿播領諸蕃兵稱七 大中元年春,張仲武大破溪衆,其迴鶻無所取給,日有耗散。 其後嗣君弱臣強,居甘州,無復昔時之盛。到今時遣使入朝,進玉馬二物及本土 迴鶻在室韋者,阿播皆收歸磧北。 至二年春,唯存名王貴臣 魔勒已自稱可汗,有磧 在

若亡,竟爲手足之疥焉。 僖、昭之世,黃、朱迭興,竟爲胸背之疽焉。 手疥背疽 弛,無以抑其憑陵。 恐恥和親,姑息不暇。 僕固懷恩爲叛,尤甚阽危; 郭子儀之能軍,終免 以平河朔,戡難中興之功,大卽大矣!然生靈之膏血已乾,不能供其求取;朝廷之法令並 足,四夷八蠻,翕然向化,要荒之外,畏威懷惠,不其盛矣!天寶末,奸臣弄權於內,逆臣跋 以名爵玉帛以恩之。其義何哉?蓋以狄不可盡,而以威惠羈縻之。 困,其理昭然。 扈於外,內外結釁而車駕遽遷,華夷生心而神器將墜。 「邊陲之患,爲手足之疥;中國之困,爲胸背之疽。」突厥爲煬帝之患深矣,隋竟滅,中國之 贊曰:土德初隆,比屋可封。朝綱中否,邊鄙興戎。安、史亂國,迴紇恃功。 史臣曰:自三代以前,兩漢之後,西羌、北狄,互興部族,其名不同,爲患一也。 比昔諸戎,於國之功最大,爲民之害亦深。及勢利日隆,盛衰時變,冰消瓦解,如存 自太宗平突厥,破延陀,而迴紇興焉。太宗幸靈武以降之,置州府以安之, 肅宗誘迴紇以復京畿,代宗誘迴紇 開元中,三綱正,百姓 ,誠爲確 恃功伊何? 蔡邕云:

咸議姑息。 民不聊生,國彈其力。華夷有截,盛衰如織。彼旣長惡,我乃修德。 疽疥之義,

百代可則。

- (1) 並號俟斤 「並」字各本原作「步」,據寰宇記卷一九八、冊府卷九五六改。
- (II) 金微府 「微」字各本原作「徽」,據本書卷一九四上突厥傳、寰宇記卷一九六、新書卷四三下地

理志、删府卷九五六改。

- 3 軍部 「渾」下各本原有「都」字,據本書卷一九九下鐵勒傳、寰宇記卷一九八、冊府卷九五六刪。
- 蹄林州 「蹛」字各本原作「歸」,據本書卷一九九下鐵勒傳、新書卷四三下地理志、卷二一七上

回鶻傳改。

- (至) 翊衞左郎將 「衞」字各本原無,據冊府卷七九四補。
- **?** 右廂五弩失畢左廂五咄陸 「右」字各本原作「左」,「左」字原作「右」,據本書卷一九四下突厥傳、

寰宇記卷一九七改。

- (4) 姪 各本原作「妹」,據冊府卷九六七、通鑑卷二〇〇改。
- (公) 磺石口 新書卷二一七上回鶻傳、元和志卷四、寰宇記卷一九九均作「磧口」。
- (去) 見在上都 「都」字原作「郭」,據通鑑卷二二三及考異引舊書史文改。
- 8 石野那 「石」字聞、殿、廣本作「古」,懼盈齋、局本作「右」,今據本書卷一二〇郭子儀傳、通鑑卷

二二三改。

列傳第一百四十五 校勘記

= 一六年秋 「六」字各本原作「十」,據本書卷一三德宗紀、通鑑卷二三三改。

(IID ·····・毗伽懷信可汗 「伽」字各本原無,據唐會要卷九八、通鑑卷二三五補。

GI 柳泉 各本原作「卿泉」,據冊府卷九七九改。

(回 ……毗伽昭禮可汗 「昭」字各本原無,據唐會要卷九八、新書卷二一七下四鶻傳補

CIB 特勤柴革 「革」字各本原作「草」,據通鑑卷二四六及考異引舊書史文改。

舊 唐書卷一百九十六上

列傳第一百四十六上

吐蕃上

守。 孤之後也。 後魏神瑞元年,傉檀爲西秦乞佛熾盤所滅,樊尼招集餘衆,以投沮渠蒙遜,蒙遜以爲臨松太 後子孫繁昌,又侵伐不息,土宇漸廣。 爲羣羌所懷,皆撫以恩信,歸之如市。遂改姓爲窣勃野,以禿髮爲國號,語訛謂之吐蕃。 及蒙遜滅,樊尼乃率衆西奔,濟黃河,逾積石,於羌中建國,開地千里。樊尼威惠夙著, 吐蕃,在長安之西八千里,本漢西羌之地也。 利鹿孤有子曰樊尼,及利鹿孤卒,樊尼尚幼,弟傉檀嗣位,以樊尼爲安西將軍。 歷周及隋,猶隔諸羌,未通於中國。 其種落莫知所出也,或云南凉秃髮利鹿

官,不常厥職,臨時統領。 其國人號其王爲贊普,相爲大論、小論,以統理國事。 徴兵用 金箭,寇至舉烽燧,百里一亭。 無文字,刻木結繩爲約。 用刑嚴峻,小罪剜眼鼻,或 五二一九

列 傳 第

百 깯 + 六 上

吐

上

御

牛,令客自射牲以供饌。與其臣下一年一小盟,刑羊狗獼猴,先折其足而殺之,繼裂其腸而 共保我家,惟天神地祇,共知爾志。 屠之,令巫者告于天地山川日月星辰之神云:「若心遷變,懷奸反覆,神明鑒之,同于羊狗。」 三年一大盟,夜於壇墠之上與衆陳設肴饌,殺犬馬牛驢以爲牲,咒曰:「爾等咸須同心戮力, 一鞭鞭之,但隨喜怒而無常科。 囚人於地牢,深數丈,二三年方出之。 有負此盟,使爾身體屠裂,同於此性。」 宴異國賓客,必驅犛

汙穢,絕不櫛沐。 郭。 衆,必以徇焉,其俗恥之,以爲次死。 於子,子倨於父,出入皆少者在前,老者居其後。軍令嚴肅,每戰,前隊皆死,後隊方進。 鼠,狀如雀鼠,其大如貓,皮可爲裘。 又多金銀銅錫。 其人或隨畜牧而不常厥居,然頗有城 之類,皆悉埋之。仍於墓上起大室,立土堆,插雜木爲祠祭之所。 喪,截髮,青黛塗面,衣服皆黑,既葬卽吉。 信巫覡。不知節候,麥熟爲歲首。 兵死,惡病終。 其國都城號爲邏些城。屋皆平頭,高者至數十尺。貴人處於大氊帳,名爲拂廬。寢處 其地氣候大寒,不生秔稻,有青뢣麥、營豆、小麥、喬麥。 累代戰沒,以爲甲門。 接手飲酒,以氈爲盤,捻麨爲椀,實以羹酪,丼而食之。多事羱羝之神,人 圍棋陸博,吹蠡鳴鼓爲戲,弓劍不離身。 重壯賤老,母拜 拜必兩手據地,作狗吠之聲,以身再揖而止。居父母 臨陣敗北者,懸狐尾於其首,表其似狐之怯,稠人廣 其贊普死,以人殉葬,衣服珍玩及嘗所乘馬弓劍 畜多犛牛猪犬羊馬。又有天

諸羌並賓伏之。太宗遣行人馮德遐往撫慰之。見德遐,大悅。 貞觀八年,其贊普棄宗弄讚始遣使朝貢。弄讚弱冠嗣位,性驍武,多英略,其鄰國羊同及 聞突厥及吐谷渾皆尙公主,

道行軍總管,率步騎五萬以擊之。 迎公主,又謂其屬曰:「若大國不嫁公主與我;即當入寇。」 逡進攻松州。 掠。於是進兵攻破党項及白蘭諸羌,率其衆二十餘萬,頓於松州西境。 同連,發兵以擊吐谷渾。 國,待我甚厚,許嫁公主。 乃遣使隨德遐入朝,多資金寶,奉表求婚,太宗未之許。使者旣返,言於弄讚曰:「初至大 失思力爲白蘭道行軍總管,左武衞將軍牛進達爲闊水道行軍總管,右領軍將軍劉蘭爲洮河 賊,反爲所敗,邊人大擾。 而退,遣使謝罪,因復請婚,太宗許之。弄讚乃遣其相祿東贊致禮,獻金五千兩,自餘寶玩 吐谷渾不能支,遁於青海之上,以避其鋒,其國人畜並爲吐蕃所 會吐谷渾王入朝,有相離間,由是禮薄,遂不許嫁。」弄讚遂與洋 太宗遣吏部尚書侯君集爲當彌道行營大總管,右領軍大將軍執 進達先鋒自松州夜襲其營,斬千餘級。 遣使貢金帛,云來 都督韓威輕騎 弄讚大懼 ,引兵 覘

之美,俯仰有愧沮之色。 弄讚 貞觀 率其部兵次柏海,親迎於河源。 十五年,太宗以文成公主妻之,令禮部尚書、江夏郡王道宗主婚,持節送公主於吐 及與公主歸國, 謂所親曰:「我父祖未有通婚上國者,今我得尙大 見道宗,執子壻之禮甚恭。 既而 薂 大國服飾 禮儀

數百

列傳

第

百四十六

上

吐蕃

上

其人赭面,弄讚令國中權且罷之,自亦釋氈裘,襲紈綺,漸慕華風。仍遺魯豪子弟,請入國 唐公主,爲幸實多。當爲公主築一城,以誇示後代。」遂築城邑,立棟宇以居處焉。公主惡

學以習詩、書。又請中國識文之人典其表疏。

也,故作金鵝奉獻。」其鵝黃金鑄成,其高七尺,中可實酒三斛。二十二年,右衞率府長史 駕,少進之間,已聞歸國。雁飛迅越,不及陛下速疾。奴忝預子壻,喜百常夷。夫鵝,猶雁 王玄策使往西域,爲中天竺所掠,吐蕃發精兵與玄策擊天竺,大破之,遣使來獻捷 而高麗恃遠,闕於臣禮。天子自領百萬,度遼致討,隳城陷陣,指日凱旋。夷狄纔聞陛下發 太宗伐遼東還、遺祿東贊來賀、奉表曰:「聖天子平定四方、日月所照之國、並爲臣妾、

墨之匠,並許焉。乃刊石像其形,列昭陵玄闕之下。 請置太宗靈座之前。高宗嘉之,進封爲資王,賜雜綵三千段。因請蠶種及造酒、碾、磑、紙、 忌等云:「天子初卽位,若臣下有不忠之心者,當勒兵以赴國除討。」并獻金銀珠寶十五種, 高宗嗣位,授弄讚爲駙馬都尉,封西海郡王,賜物二千段。弄讚因致書于司徒長孫無

早死,其孫繼立,復號贊普,時年幼,國事皆委祿東贊。祿東姓葵氏〔1〕,雖不識文記,而性 明毅嚴重,講兵訓師,雅有節制,吐蕃之幷諸羌,雄霸本土,多其謀也。初,太宗旣許降文成 永徽元年,弄讚卒。高宗爲之舉哀,遺右武候將軍鮮于臣濟持節資璽書弔祭。弄讚子

東鸞有子五人:長日贊悉若,早死;次欽陵,次贊婆,次悉多干,次勃論。及東贊死,欽 乖。且贊普未謁公主,陪臣安敢輒娶。」太宗嘉之,欲撫以厚恩,雖奇其答而不遂其請。 大將軍,又以琅邪長公主外孫女段氏妻之。 禄東贊辭曰:「臣本國有婦,父母所聘,情不忍 公主,贊普使祿東贊來迎,召見顧問,進對合旨,太宗禮之,有異諸蕃,乃拜祿東贊爲右衞

陵兄弟復專其國

那道眞、右衞將軍郭待封爲副,率衆十餘萬以討之。 軍至大非川,爲吐蕃大將論欽陵所敗, 急。咸亨元年四月,詔以右威衞大將軍薛仁貴爲邏娑道行軍大總管,左衞員外大將軍阿史 仁貴等並坐除名。 怒,遂率兵以擊吐谷渾,吐谷渾大敗,河源王慕容諾曷鉢及弘化公主脫身走投凉州 自是吐蕃連歲寇邊,當、悉等州諸羌盡降之。 後與吐谷渾不和,龍朔、麟德中遞相表奏,各論曲直,國家依違,未爲與奪。 · 吐谷渾全國盡沒, 唯慕容諾曷鉢及其親信數千帳來內屬, 仍徙於靈州。 ,遺使告

州長史李孝逸、魯州都督拓王奉等發劍南、山南兵募以防禦之。 及諸州驍勇,以爲猛士,不簡色役。亦有嘗任文武官者召入殿庭賜宴,遣往擊之。又令益 之。儀鳳三年,又命中書令李敬玄兼鄯州都督,往代仁戟於洮河鎭守。 上元三年,進寇鄯、廓等州,殺掠人吏,高宗命尚書左僕射劉仁軌往洮河軍鎮守以禦 其年秋, 敬玄與工部尚書 仍召募關內、 河東

引兵守之。時吐蕃盡收羊同、党項及諸羌之地,東與凉、松、茂、屬等州相接,南至婆羅門, 劉審禮率兵與吐蕃戰于青海,官軍敗績,審禮沒于陣,敬玄按軍不敢救。 西又攻陷龜茲、疏勒等四鎮,北抵突厥,地方萬餘里,自漢、魏已來,西戎之盛,未之有也。 五三人,夜斫賊營,賊遂潰亂,自相蹂賤,死者三百餘人。 于承風嶺,阻泥溝不能動,賊屯於高岡以壓之。偏將左領軍員外將軍黑齒常之率敢死之士 往劍南兵募,於茂州之西南築安戎城以壓其境。俄有生羌爲吐蕃鄉導,攻陷其城,遂 敬玄遂摊衆鄯州,坐改爲衡州刺 俄而收軍却出,頓

募,且遣備邊,明烽堠,勿令侵抄。 劉齊賢、皇甫文亮等皆言嚴守之便。 將興師,相繼不絕。 高宗聞審禮等敗沒,召侍臣問綏禦之策,中書舍人郭正一曰:「吐蕃作梗,年歲已深,命 空勞士馬,虛費糧儲,近討則徒損兵威,深入則未窮巢穴。 使國用豐足,人心叶同,寬之數年,可一舉而滅。」給事中 尋而黑齒常之破吐蕃大將贊婆及素和貴於良非川,殺 望少發兵

獲二千餘級,吐蕃遂引退。 韶以常之爲河源軍使以鎭禦之。

大臣論寒調傍來告喪,且請和。 儀鳳四年,贊普卒。 其子器弩悉弄嗣位,復號贊普,時年八歲,國政復委於欽陵。 高宗遣郎將宋令文入蕃會葬。 永隆元年,文成公主薨,高

宗又遣使弔祭之。

則天臨朝,命文昌右相革待價爲安息道大總管,安西大都護閻温古爲副。 永昌元年,

大總管 大將軍 歲通天元年 首 勒、碎葉等 之,力屈爲賊 退 率 大度西山 兵往 領咎 還, 一卒饑 軍竟 捶 饉 ,率副總管婁師德與吐蕃將論欽陵、贊婆戰于素羅 張玄遇 征吐蕃 率羌蠻部落 勒 四鎮,乃於龜茲置安西都護府,發兵以鎭守之。 不行。 皆 ,吐蕃四萬衆奄至凉州城下,都督許欽明初不之覺,輕出 石 所殺。時吐蕃 轉 紀 率精卒二萬充安撫使以納之。 ,遲留不進,待價坐流繡州〔三〕,温古處斬。 死 功 溝壑。 如意 而 還。 八千餘 元年, 明年 又遣 長壽元年,武威軍 人詣玄遇內附, 吐蕃大首領曷蘇率其所屬幷貴川部落請降,則天令右玉鈴衞 使請和,則天將許之; 又命文昌右相岑長倩爲武 總管王孝傑大破吐蕃之衆,克復龜茲、于闐 玄遇以其部落置葉川州,以昝捶爲刺 師次大渡水,曷蘇事洩,爲本國所擒。 論欽陵乃請去安西四鎭兵,仍索分十 待價素無統禦之才,遂狼 开山,官軍 威道 萬歲登封 行 軍大總管以討吐蕃 · 敗績 按部,遂遇賊,拒戰久 元年,孝傑復爲肅邊 了,孝傑坐冤官。 級很失據 史,仍於 又有 萬 疏 大

漸 國 爲 長 , 隣,三十餘年 吐蕃 乃與其 自論欽陵兄弟專統兵馬,欽陵每居中用事,諸弟分據方面,贊婆則專在東境,與中 發使 大臣 召 ,常爲邊 欽 .論嚴等密圖之。 陵、 贊婆等, 患。 其 欽陵舉兵不受召,贊普自帥衆討之,欽陵未戰而潰,遂自 兄弟皆有才略,諸 時欽 陵在外,贊普乃佯言將獵,召兵執欽陵親黨二千餘 蕃憚之。 聖曆二年,其贊普器弩悉弄年

姓之地,則天竟不許之。

列傳

第

百

四

六

上

吐

林飛騎郊外迎之,授贊婆輔國大將軍、行右衞大將軍,封歸德郡王,優賜甚厚,仍令領其部 殺,其親信左右同日自殺者百餘人。贊婆率所部千餘人及其兄子莽布支等來降,則天遣羽

兵於洪源谷討擊。尋卒,贈特進、安西大都護。

千匹、金二千兩以求婚,則天許之。 樂,一生所未見。自顧微瑣,何以仰答天恩,區區褊心,唯願大家萬歲。」明年,又遣使獻馬 則天許之。於是論彌薩等相視笑忭拜謝曰:「臣自歸投聖朝,前後禮數優渥,又得親觀奇 督陳大慈與賊凡四戰,皆破之,斬首千餘級。於是吐蕃遣使論彌薩等入朝請求和 布支戰于洪源谷,斬其副將二人,獲首二千五百級。長安二年,贊普率衆萬餘人寇悉州,都 之於麟德殿,奏百戲於殿庭。論彌薩曰:「臣生於邊荒,由來不識中國音樂,乞放臣親觀。」 久視元年,吐蕃又遣其將麴莽布支寇凉州,圍逼昌松縣。 **隴右諸軍州大使唐休璟與莽** ,則天宴

禮女爲金城公主許嫁之〔三〕。自是頻歲貢獻。景龍三年十一月,又遣其大臣尚贊吐等來迎 器弩悉弄之子棄隸蹜贊爲贊普,時年七歲。中宗神龍元年,吐蕃使來告喪,中宗爲之舉哀, 廢朝一日。俄而贊普之祖母遣其大臣悉薰熱來獻方物,爲其孫請婚,中宗以所養雍王守 女,中宗宴之於苑內毬場,命駙馬都尉楊愼交與吐蕃使打毬,中宗率侍臣觀之。四年正月, 時吐蕃南境屬國泥婆羅門等皆叛,贊普自往討之,卒於軍中。諸子爭立,久之,國人立 遂割深慈,爲國大計,築茲外館,**聿膺嘉禮,降彼吐蕃**贊普,即以今月進發,殷親自送 女,豈不鍾念,但爲人父母,志息黎元,若允乃誠而,更敦和好,則邊土寧晏,兵役服息。 普及祖母可敦、酋長等,屢披誠款,積有歲時,思託舊親,請崇新好。金城公主,股之少 自文成公主往化其國,因多變革,我之邊隅,亟興師旅,彼之蕃落,頗聞彫弊。頃者贊 貢。太宗文武聖皇帝德侔覆載,情深億兆,思偃兵甲,遂通姻好,數十年間,一方淸淨。 受命上靈,克纂洪業,庶幾前烈,永致和平。睠彼吐蕃,僻在西服,皇運之始,早申朝 是隆周理曆,恢柔遠之圖;強漢乘時,建和親之議。斯蓋御宇長策四,經邦茂範。 聖人布化,用百姓爲心;王者垂仁,以八荒無外。故能光宅遐邇,裁成品物。 由

以旣充外使,恐失其權寵,殊不悅,司農卿趙履温私謂之曰:「公國之宰輔,而爲一介之使, 中宗召侍中紀處訥謂曰:「昔文成公主出降,則江夏王送之。卿雅識蕃情,有安邊之略,可 軍楊矩使焉。 爲朕充吐蕃使也。」處訥拜謝,旣而以不練邊事固辭。上又令中書侍郎趙彥昭充使。彥昭 不亦鄙乎?」 于郊外。 **彥昭曰:「然計將安出?」履温因陰託安樂公主密奏留之。於是以左衞大將** 其月,帝幸始平縣以送公主,設帳殿於百頃泊側,引王公宰相及吐蕃使入宴。

傳第

一百四十六上

吐蕃上

盔

餞別 中坐酒闌,命吐蕃使進前,諭以公主孩幼,割慈遠嫁之旨,上悲泣歔欷久之。 ,曲赦始平縣大辟罪已下,百姓給復一年,改始平縣爲金城縣,又改其地爲鳳池鄉愴別 因命從臣賦詩

公主旣至吐蕃,別築一城以居之。

良,堪頓兵畜牧,又與唐境接近,自是復叛,始率兵入寇。 厚遺之,因請河西九曲之地以爲金城公主湯沐之所,矩遂奏與之。吐蕃旣得九曲,其地肥 都護,又與吐蕃比境,互相攻掠,吐蕃內雖怨怒,外敦和好。時楊矩爲鄯州都督,吐蕃遣使 劍南兵募往經略之。蠻昏傍名乃引吐蕃攻知古,殺之,仍斷其屍以祭天。時張玄表爲安西 睿宗即位,攝監察御史李知古上言:「姚州諸蠻,先屬吐蕃,請發兵擊之。」途令知古徵

枕藉 <u>賓力戰死之,晚等率兵而進,大破吐蕃之衆,殺數萬人,盡收得所掠羊馬。 賊餘黨奔北,相</u> 仍下詔將大舉親征,召募將士,克期進發。俄而唆等與賊相遇於渭源之武階驛,前軍王海 牧羊馬而去。楊矩悔懼,飮藥而死。玄宗令攝左羽林將軍薛訥及太僕少卿王晙率兵邀擊之。 知運、王君奧相次爲河西節度使以捍之。 吐蕃遣其大臣宗俄因子至洮河祭其死亡之士,仍款塞請和,上不許之。自是連年犯邊,郭 而死,洮水爲之不流。上遂罷親征,命紫微舍人倪若水往按軍實,仍弔祭王海賓而還。 開元二年秋,吐蕃大將盆達焉、乞力徐等率衆十餘萬寇臨洮軍,又進寇蘭、渭等州,掠監

甚。」上曰:「待吾與王君奠籌之。」說出,謂源乾曜曰:「君奠勇而無謀,常思僥倖,兩國和 張 息 何以爲功?若入陳謀,則吾計不遂矣。」尋而君奠入朝奏事 說奏言:「吐蕃 ,縱令屢勝,亦不 旣 自恃兵強,每通表疏 醜逆, ·能補。 誠負萬誅,然又事征討, 聞其悔過請和,惟陛 ,求敵國之禮 , 一下遣使,許其稽顙內屬,以息邊境 言詞悖慢, 實爲勞弊。 ,遂請率兵深入以討之。 上甚怒之。 且十數年 世、 及 封禪禮畢 凉、 河、 ,則蒼 中 書令 生幸

諾邏 將士 甚衆 爲 獻及王君與之父壽,盡 臭縱兵俘之而還。 之西,時海水冰合 師順 河西節 時悉諾 一息甲牧馬, 率衆入攻大斗谷,又移攻甘州,焚燒市里。 ,遂取積石軍 十 五 年 娶城固守, 凡八十日 度使 正月, 邏 恭 ,以建康 而野草皆盡,馬死過半。 禄 1,將士 西路而還。君奠先令人潛入賊境,於其歸路燒草。 君奠率兵破吐蕃于青海之西,虜其輜重及羊馬 其年 威名 軍使、左金吾將軍張守珪爲瓜州 取城中軍資及倉糧 甚 並 九月,吐蕃大將悉諾邏恭祿及燭龍莽布支攻陷 振 乘冰而渡。 ,賊遂引退。 ,蕭嵩乃縱反間於吐蕃,云其與中國潛通 會悉諾邏已渡大非川,輜重及 俄 君臭與秦州都督張景順等率衆襲其後,入至青海 ,仍毁其城而去。 而王君奠爲迴紇餘黨所殺 君奠畏其鋒,不敢出 刺 史, 又進攻玉門軍及常樂縣 修築州 而還。 旋兵 一戰。 悉諾邏軍還至大非川, 城,招輯 ,贊普遂召而 瓜 ,乃命兵部尚書蕭 州城,執刺史田 尙 會大 先是,吐蕃大將悉 在青海之側,君 百姓,令其 雪,賊凍死者 誅之。 ,縣令

忠亮 駝橋 露 兤 而復合,賊徒大潰,臨陣斬其副將一人。賊敗,散走投山,哭擊四合。初,上聞吐蕃重來入 合勢追 ,謂侍臣曰:「吐蕃驕暴,恃力而來,朕今按地圖,審利害,親指授將帥,破之必矣。」數日而 引兵 明 而 還。 年 討,破其大莫門城,生擒千餘人,獲馬一千匹、犛牛五百頭,器仗衣資甚衆,又焚其駱 至青海西南渴波谷,與吐蕃接戰,大破之。俄而積石、莫門兩軍兵馬總至,與忠亮 秋 八月,蕭嵩又遣副將杜賓客率弩手四千人與吐蕃戰于祁連城下,自辰至暮,散 吐蕃大將悉末期復率衆攻瓜州,守珪出兵擊走之。 隴右節度使、鄯州都督張

也 問 令其稽顙稱臣,永息邊境,此永代安人之道也。」上然其言,因令惟明及內侍張元方充使往 激怒陛下。 因 口 [奏事 國家。今河西、隴右、百姓疲竭、事皆由此。若陛下遣使往視金城公主,因與贊普面約通和, 吐蕃。惟明、元方等至吐蕃,既見贊普及公主,具宜上意。贊普等欣然請和,盡出貞觀以來 惟 遂於石堡城置振武軍,仍獻其俘囚于太廟。 十七 面面 明日:「開元之初,贊普幼稚,豈能如此。 年,朔方大總管信安王禕又率兵赴隴右,拔其石堡城,斬首四百餘級,生擒二百餘 陳通和之便。上曰:「吐蕃贊普往年嘗與朕書,悖慢無禮,朕意欲討之, 兩國旣鬭,興師動衆,因利乘便,公行隱盜,僞作功狀,以希勳爵,所損鉅萬,何 於是吐蕃頻遣使請和,忠王友皇甫惟 必是在邊軍將務邀一時之功,偽作此書, 何得和 明

前後敕書以示惟明等,令其重臣名悉獵隨惟明等入朝,上表曰:

舅遠察赤心,許依舊好,長令百姓快樂。如蒙聖恩,千年萬歲,外甥終不敢先違盟誓。 謹奉金胡瓶一、金盤一、金椀一、馬腦盃一、零羊衫段一,謹充微國之禮。 意,悉獵所知。外甥蕃中已處分邊將,不許抄掠,若有漢人來投,便令却送。伏望皇帝 不勝喜荷。謹遣論名悉獵及副使押衙將軍浪些紇夜悉獵入朝(日),奏取進止。兩國事 將不許,所以不敢自奏。去多公主遣使人婁衆失力將狀專往,蒙降使看公主來,外甥 枉被邊將讒搆鬭亂,令舅致怪。伏乞垂察追留,死將萬足。前數度使人入朝,皆被邊 遂成釁隙。外甥以先代文成公主、今金城公主之故,深識尊卑,豈敢失禮。 又緣年小, 間爲張玄表、李知古等東西兩處先動兵馬,侵抄吐蕃,邊將所以互相征討,迄至今日, 外甥是先皇帝舅宿親,又蒙降金城公主,遂和同爲一家,天下百姓,普皆安樂。中

受袍帶器物而却進魚袋,辭曰:「本國無此章服,不敢當殊異之賞。」上嘉而許之。韶御史大 宴,與語,甚禮之,賜紫袍金帶及魚袋,丼時服、繒綵、銀盤、胡瓶,仍於別館供擬甚厚。悉獵 仗以見之。悉獵頗曉書記,先會迎金城公主至長安,當時朝廷皆稱其才辯。及是上引入內 金城公主又別進金鵝盤盞雜器物等。十八年十月,名悉獵等至京師,上御宣政殿,列羽林 夫崔琳充使報聘。 仍於赤嶺各豎分界之碑,約以更不相侵。

列

時吐蕃使奏云:「公主請毛詩、禮記、佐傳、文選各一部。」制令秘書省寫與之。正字于

休烈上疏請日:

得已,請去春秋。當周德旣衰,諸侯強盛,禮樂自出,戰伐交興,情僞於是乎生,變詐於 料之,恐非公主本意也。慮有奔北之類,勸敎於中。若陛下慮失藩情,以備國信,必不 正可錫之錦綺,厚以玉帛,何必率從其求,以資其智。 臣忝叨列位, 職刊秘籍, 實痛經 國,一以喪法危邦,可取鑒也。且公主下嫁從人,遠適異國,合慕夷禮,返求良書,愚臣 異借寇兵而資盜糧也!臣聞魯秉周禮,齊不加兵,吳獲乘車,楚疲奔命。一以守典存 月令有興廢之兵,深於傳,則知用師多詭詐之計,深於文,則知往來有書檄之制。何 持銳,善學不迴。若達於書,必能知戰。深於詩,則知武夫有師干之試;深於禮,則知 以假人。傳曰:「裔不謀夏,夷不亂華。」所以格其非心,在乎有備無患。昔東平王入朝求 縣鞶纓,仲尼曰:『惜也,不如多與之邑。惟名與器,不可假人。』」狄固貪婪,貴貨易土, 是乎起,則有以臣召君之事,取威定霸之名。若與此書,國之患也。傳曰:「于奚請曲 示征戰之書;今西戎,國之寇讎,豈可貽經典之事!且臣聞吐蕃之性,慓悍果決,敏情 ·娱記、諸子,漢帝不與。 蓋以史記多兵謀,諸子雜詭術。 夫以東平,漢之懿戚,尙不欲 臣聞戎狄,國之寇也;經籍,國之典也。戎之生心,不可以無備;典有恆制,不可

典,棄在戎夷。昧死上聞,惟陛下深察。

物金銀器玩數百事,皆形制奇異。上令列於提象門外,以示百僚。 矜其精銳。二十二年,遣將軍李佺於赤嶺與吐蕃分界立碑。二十四年正月,吐蕃遣使貢方 疏奏不省。 二十一年,又制工部尚書李暠往聘吐蕃,每唐使入境,所在盛陳甲兵及騎馬,以

賞,出蕃自是復絕朝貢。希逸以失信怏怏,在軍不得志,俄遷爲河南尹,行至京師,與趙惠 代希逸爲河西節度使;鄯州都督杜希望爲隴右節度使;太僕卿王昱爲益州長史氏之、劍南 希逸不得已而從之,大破吐蕃於青海之上,殺獲甚衆,乞力徐輕身遁逸。 必克捷」。上使內給事趙惠琮與孫誨馳往觀察事宜。惠琮等至凉州,遂矯詔令希逸掩襲之, 畜牧被野。 掩吾不備,後悔無益也。」希逸固請之,遂發使與乞力徐殺自狗爲盟,各去守備。於是吐蕃 豈不善也?」

乞力徐報曰:「常侍忠厚,必是誠言。但恐朝廷未必皆相信任。萬一有人交搆, 守捉使。希逸謂吐蕃將乞力徐曰:「兩國和好,何須守捉,妨人耕種。請皆罷之,以成一家, 國,上甚怒之。時散騎常侍崔希逸爲河西節度使,於凉州鎭守。 其年,吐蕃西擊勃律,遣使來告急,上使報吐蕃,令其罷兵。 俄而希逸廉人孫誨入朝奏事,誨欲自邀其功,因奏言「吐蕃無備,若發兵掩之」, 孫酶亦以罪被戮。 韶以岐州刺史蕭炅爲戶部侍郎判凉州事, 時吐蕃與漢樹栅爲界,置 吐蕃不受韶,遂攻破勃律 惠琮、孫誨皆加厚

節度使,分道經略,以討吐蕃。仍令毀其分界之碑。

賊。 尋又重貶爲端州高要尉而死。 教安戎城,官軍大敗,兩城並爲賊所陷,昱脫身走免,將士已下數萬人及軍糧資仗等並沒于 右築兩城,以爲攻拒之所,頓兵於蓬婆嶺下,運劍南道資粮以守之。其年九月,吐蕃悉銳以 希望引衆擊破之,因於鹽泉城置鎭西軍。時王昱又率劍南兵募攻其安戎城。先於安戎城左 其年七月,希望又從鄯州發兵奪吐蕃河橋,於河左樂鹽泉城。 昱坐左遷括州刺史。初昱之在軍,謬賞其子錢帛萬計,并擅與紫袍等,所費鉅萬,坐是 十六年四月,杜希望率衆攻吐蕃新城,拔之,以其城爲威戎軍〔七〕,發兵一千以鎮之。 吐蕃將兵三萬人以拒官軍,

安戎之策,上甚悅,徙脹宥爲光祿卿,拔兼瓊令知益州長史事,代脹宥節度,仍爲之親畫取 益州司馬、防禦副使。宥旣文吏,素無攻戰之策,兼瓊遂專其戎事。俄而兼瓊入奏,盛陳攻取 屯兵,斷臨洮軍之路。 王昱既敗之後,詔以華州刺史張宥爲益州長史、劍南防禦使,主客員外郎章仇兼瓊爲 二十七年七月,吐蕃又寇白草、安人等軍,敕臨洮、朔方等軍分兵救援。 時吐蕃於中路 白水軍守捉使高東于拒守連旬,俄而賊退,蕭炅遣偏將掩其後,擊破

二十八年春,兼瓊密與安戎城中吐蕃翟都局及維州別駕董承宴等通謀,都局等逡翻城

以小審無知,事須處置,授以奇計,所以行之,獲彼戎心,歸我城守,有足爲慰也。」其年十 屬凝寒,賊久之自引退。韶改安戎城爲平戎城。 月,吐蕃又引衆寇安戎城及維州,章仇兼瓊遣裨將率衆禦之,仍發關中曠騎以救援焉。 引吐蕃,遂被固守,歲月旣久,攻伐亦多。其地險阻,非力所制。朝廷羣議,不合取之。朕 合,應如響至,前古以來,所未有也。請宣示百僚,編諸史策。」手制答曰:「此城儀鳳年中羌 事 然改圖,自相謀陷。神算運於不測,睿略通於未然,累載逋誅,一朝蕩滅。 百萬之衆,難以施功。陛下親紆祕策,不興師旅,頃令中使李思敬曉喻羌族,莫不懷恩,翻 席等上表日:「伏以吐蕃此城,正當衝要,憑險自固,恃以窺邊。 歸款,因引官軍入城,盡殺吐蕃將士,使監察御史許遠率兵鎭守。上聞之甚悅。中書令李林 ,,陛下從容問臣等曰:『卿等但看四夷不久當漸摧喪。』德音纔降,遽聞戎捷。 積年以來, 蟻聚爲患, 縱有 又臣等今日奏 則知聖與天

能守,玄宗憤之。天寶初,令皇甫惟明、王忠嗣爲隴右節度,皆不能克。七載,以哥舒翰爲 仁軍,渾崖峯騎將盛希液以衆五千攻而破之。十二月,吐蕃又襲石堡城,節度使蓋嘉運不 院右節度使,攻而拔之,改石堡城爲神武軍 主舉哀於光順門外,輟朝三日。六月,吐蕃四十萬攻承風堡,至河源軍,西入長寧橋,至安 二十九年春,金城公主薨,吐蕃遣使來告哀,仍請和,上不許之。使到數月後,始爲公

京兆少尹崔光遠兼御史中丞,持節賫國信册命弔祭之。及還,而安祿山已竊據洛陽,以河、 天寶十四載,贊普乞黎蘇籠獵贊死,大臣立其子婆悉籠獵贊爲主,復爲贊普。玄宗遣

隴兵募令哥舒翰爲將,屯潼關。

爲賢豪所據,則爲遠夷侵廢,迨千年矣。」武德初,薛仁杲奄有隴上之地,至於河虜,李軌 境"湮沒者數十州。 間隙,日蹙邊城,或爲虜掠傷殺,或轉死溝壑。數年之後,鳳翔之西,邠州之北,盡蕃戎之 河隴、朔方之將鎭兵入靖國難,謂之行營。 置四鎮。前王之所未伏,盡爲臣妾,秦、漢之封域,得議其土境耶!於是歲調山東丁男爲 靈州置朔方節度,又有受降城、單于都護庭爲之藩衞。及潼關失守,河洛阻兵,於是盡徵 相繼,以却於強敵。 戍卒,繒帛爲軍資,有屯田以資糗糧,牧使以娛羊馬。大軍萬人,小軍千人,烽戍邏卒,萬里 盡有凉州之域公了,通於磧外。貞觀中,李靖破吐谷渾,侯君集平高昌,阿史那社爾開西域, **磧外置西域都護,控引胡國;又分隴西爲金城、西平等郡,雜以氐、羌居之。歷代喪亂,不** 昔秦以隴山已西爲隴西郡。 隴右鄯州為節度,河西凉州為節度,安西、北庭亦置節度,關內則於 漢懷匈奴於河右,置姑臧、張掖、酒泉、伊吾等郡;又於 曩時軍營邊州無備預矣。乾元之後,吐蕃乘我

肅宗元年建寅月甲辰,吐蕃遣使來朝請和,敕宰相郭子儀、蕭華、裴邈慶等於中書設

之芳、左庶子兼御史中丞崔倫使于吐蕃,至其境而留之。 軍防,卽漢之笮路,乾元之後,亦陷於吐蕃。寶應二年三月,遣左散騎常侍兼御史大夫李 乃於延英殿引見,勞賜各有差。而劍南西山又與吐蕃、氐、羌隣接,武德以來,開置州縣,立 鴻臚寺歃血,以申蕃戎之禮。從之。寶應元年六月,吐蕃使燭番莽耳等二人頁方物入朝, 將詣光宅寺爲盟誓,使者云:蕃法盟誓,取三牲血歃之,無向佛寺之事,請明日須於

官軍收上都,以郭子儀爲留守。 號,大赦,署置官員,尋以司封崔瓌等爲相公。郭子儀退軍南保商州,吐蕃居城十五日退, 守。降將高暉引吐蕃入上都城,與吐蕃大將馬重英等立故邪王男廣武王承宏爲帝,立年 吐蕃以吐谷渾、党項羌之衆二十餘萬,自龍光度而東。郭子儀退軍,車駕幸陝州,京師失 廣德元年九月,吐蕃寇陷涇州。十月,寇邠州,又陷奉天縣。遣中書令郭子儀西禦。

軍判官、中書舍人王延昌、監察御史李萼謂子儀曰:「令公身爲元帥,主上蒙塵於外,家國之 子儀領部曲數百人及其妻子僕從南入牛心谷,駝馬車牛數百兩,子儀遲留,未知所適。 一至於此。今吐蕃之勢日逼,豈可懷安於谷中,何不南趨商州,漸赴行在。」子儀遽從 延昌日:「吐蕃知令公南行,必分兵來逼,若當大路,事卽危矣。 初,車駕東幸,衣冠戚里盡南投荆襄及隱竄山谷,於是六軍將士持兵剽劫,所在阻絕。郭 不如取玉山路而去,出

列

留于軍中主約,專以數騎往迎子儀,去洛南十餘里,及之,遂與子儀迴至商州。賭將大喜, 李惟詵等數人,各有部曲,率其數十騎,相次而至,又從其計,皆相率爲軍,約不侵暴。 撫之,以圖收長安,此則將軍非常之功也。」知節大悅。其時諸軍將臧希讓、高昇、彭體盈、 其下虜掠,何所歸乎?今郭令公元帥也,已欲至洛南,將軍若整頓士卒,喻以禍福,請令公來 其不意。」子儀又從之。延昌與李萼皆從子儀,子儀之隊千餘人,山路狹隘,連延百餘里,人 皆邍其約束。 人資財鞍馬,已有日矣。延昌與專既至,說知節曰:「將軍身掌禁兵,軍敗而不赴行在,又恣 不得馳。 先是,六軍將張知節與麾下數百人自京城奔于商州印了,大掠避難朝官、士庶及居 延昌與專恐狹徑被追,前後不相救,至倒迴口,遂與子儀別行,踰絕澗,登七盤,趨 延昌

仲卿探知官軍,其勢益壯,遂相爲表裏,以狀聞于子儀。仲卿帥二百餘騎遊奕,直渡遙水。 第五琦攝京兆尹,同收長安。全緒至韓公堆,晝則擊鼓,廣張旗幟,夜則多燃火以疑吐蕃。 州,未知仲卿之舉,募人往探賊勢,羽林將軍長孫全緒請行,以二百騎隸之。又令太子賓客 糾合散兵及諸驍勇願從者百餘人,南保藍田,以拒吐蕃,其衆漸振,至于千人。一子儀旣至商 吐蕃將入京師也,前光祿卿殷仲卿逃難而出,鞍馬衣服盡爲土賊所掠。 仲卿至藍田,

吐蕃懼,問百姓,百姓皆給之曰:「郭令公自商州領衆却收長安,大軍不知其數。」賊以爲然

逐抽軍而還,餘衆尚在城。軍將

王撫及御史大夫王仲昇頓兵自苑中入,惟鼓大呼,仲卿之 師又入城,吐蕃皆奔走,乃收上都。郭子儀乘之:鼓行入長安,人心乃安。

開懸門,賊乃抽退,皆曰:「此將不惜死,不可當,且避之。」又復居原、會、成、渭之地 騎,璘奮擊大呼,賊徒披靡,無敢當者,賊疲而歸。 賊衆恃其驍勇,翌日又逼城請戰,璘披甲 領精騎千餘自河西救楊志烈迴,引兵入城。遲明,單騎持滿,直衝賊衆,左右願從者百餘 吐蕃退至鳳翔,節度孫志直閉門拒之,吐蕃圍守數日。會鎭西節度、兼御史中丞馬璘

破五千衆,斬首千餘級,生擒八十五人,降其大將四人,馬五百匹。十一月,僕固懷恩引吐 度白孝德及副元帥先鋒郭晞嬰城拒之,以挫其鋒。賊衆遂逼奉天縣西二十里爲營,郭子儀 屯於奉天,又按軍不戰。 郭晞於邠州西三十里,令精騎二百五十人、步卒五十人斫懷恩營, 靈武遣其黨范志誠、任數等引吐蕃、吐谷渾之衆來犯王畿。十月,懷恩之衆至邠州挑戰,節 十二月,乘輿還上都。二年五月,放李之芳還。九月,叛將僕射、大寧郡王僕固懷恩自

廣德二年,河西節度楊志烈被圍,守數年,以孤城無援,乃跳身西投甘州,凉州又陷於

泳泰元年三月,吐蕃請和,遣宰相元載、杜鴻漸等於興唐寺與之盟而罷。 第 百 四十六 上 吐 蕃上 秋九月,僕固

懷恩 數日,斂軍回營。專又日進夜斫賊營於梁母神下,殺千餘人,生擒五百人,獲駝馬器械 鏑者, 軍中望而益振。明日, 吐蕃悉衆圍之, 日進命拋車夾石投之, 雜以弓弩, 贼死傷衆。 驚駭,無不應弦而斃。 守要害。初,吐蕃列營奉天,渾日進單騎衝之,驍騎二百人繼進,衝突其營,左右擊刺,賊徒 守亮屯軍於奉天以拒之,於是韶追副元帥郭子儀於河中府領衆赴援,屯於涇陽,諸將各屯 十萬衆至奉天界,邠州節度使白孝德不能禦,京城戒嚴。先是,朔方先鋒兵馬使渾日進、孫 誘吐蕃、迴紇之衆,南犯王畿。 日進挾一蕃將,躍馬而歸,蕃將奮身,失其撒飯一,日進之衆,無中鋒 吐蕃大將尚結息贊磨、尙息東贊、尙野息及馬重英率二

不止。 十二匹,駝一百一十五頭,器械、幡旗共三萬餘事。 |敷以兵五千餘人犯白水縣。| 渾日進露布而至, 原,使五十人擊而盡殺之,無噍類。 吐蕃移營於醴泉縣九嵏山北,因攻掠醴泉。 五日已前,交戰二百餘陣,破吐蕃一萬餘衆,斬首五千級,生擒一百六十人,馬一千二百四 上又下詔親征,括朝官馬,京城置團練。 自前 年吐蕃犯王畿後,於中渭橋鄠豐城以營兵,至是功 自十七日雨至二十五日晚際始止CID,議者以爲天助。 京城大駭,人皆空室,大戶鑿竇以出。 鎭西節度馬璘遇吐蕃遊奕四百餘人於武功東 屯於奉天馬嵬店。今月十九日已後至二十 朝官震懼,家 畢 口迴避者十室八九,禁之 逆黨任

吐蕃退至永壽北,遇迴紇之衆,雖聞懷恩死,皆悖其衆,相誘而奔,復來寇。 至奉天,兩

與迴紇合於涇陽,靈臺縣東五十里攻破吐蕃,斬首及生擒獲駝馬牛羊甚衆。 蕃猜貳爭長,別爲營壘。吐蕃遊奕至窯底,吐蕃又至馬嵬店,因縱火焚居人廬舍而退。迴紇 三千騎詣涇陽降款,請擊吐蕃爲効,子儀許之。於是朔方先鋒兵馬使開府南陽郡王白元光 上停親征,京

校勘記

師解嚴,宰相上表稱賀。

- (1) 蒆氏 通典卷一九〇、寰宇記卷一八五作「薛氏」。
- (三) 繍州 各本原作「浦州」,據本書卷六則天紀、卷七七章挺傳、通鑑卷二〇四改。
- (三) 雍王守禮 「守」字各本原作「宗」,據御覽卷七九八、冊府卷九七九改
- (四) 斯蓋御宇長策 「御」字各本原無,據御覽卷七九八、唐大詔令集卷四二補。
- (三) 謹遺論名悉獵 各本原作「護遺諭名悉獵」,據殘宋本冊府卷九七九改。
- (字) 王昱 「昱」字各本原作「昊」,據本書卷九玄宗紀、卷一〇三王忠嗣傳、新書卷二一六上吐蕃傳
- (七) 威戎軍 「戎」字各本原作「武」,據本書卷九玄宗紀、通典卷一七二改。
- (K) 李軌 各本原作「李殷」,據合鈔卷二五六上吐蕃傳改。

- (な) 装遵慶 「裴」字各本原作「張」,據本書卷一一三裴遵慶傳、新書卷二一六上、吐蕃傳改。
- (10) 專以司封崔瓌等爲相 通鑑卷二二三作「以前翰林學士于可封等相」,疑史文有誤。
- (11) 京城 「京」字各本原無,據通鑑卷二二三考異引舊書史文補。
- Cli 自十七日雨至二十五日晚際始止 「雨」字各本原無,據合鈔卷二五六上吐蕃傳補。

舊唐書卷一百九十六下

列傳第一百四十六下

吐蕃下

例, 百餘 仙來朝,景仙奏云:「贊普請以鳳林關爲界。」俄又遺使路悉等十五人來朝。三年八月,吐蕃 節度使。 於靈州破 萬寇靈武,大將尙悉摩寇邠州,邠寧節度使馬璘破二萬餘衆, 五百匹。十一月,和蕃使、檢校戶部尚書、兼御史大夫薛景仙自吐蕃使還,首領論泣陵 朔方騎將白元光破之。 人隨濟來朝,且謝申好。大曆二年十月,靈州破吐蕃二萬餘衆,生擒五百人,獲馬一千 永泰二年二月,命大理少卿兼御史中丞楊濟修好于吐蕃。 劍南 吐蕃六萬餘衆。十二月,以蕃寇歲犯西疆,增修鎮守,乃移馬璘鎭涇州,仍爲 西川 亦破吐蕃萬餘衆。 俄又復破二萬衆於靈武,獲羊馬數千計。 五年五月,徙置當台之、悉、拓、靜、恭五州于山陵要害 擒其俘以獻之。九月,寇 四月,吐蕃遣首領論泣藏等 關內副元帥郭子儀 隨 涇原 饠

列

傳

第

百四四

十六下

吐

下

之地,以備吐蕃。

|渾 城 舉營遁去。 初,吐蕃犯我邪郊,馬璘以精卒二千餘人潛夜掩賊營,射賊豹皮將中目 與賊戰于宜祿,我師不利,副將史籍等三人死之,村墅居人爲驅掠者凡千餘人。 八年秋,吐蕃 |璘因收獲||朔方兵健二百餘人,百姓七百餘人,駝馬數百匹。 六萬騎寇靈武,蹂踐我禾稼而去。 十月,寇涇、邠等州,郭子儀遣先鋒將 子儀大破吐蕃 , **賊衆扶之號泣,遂** 十餘萬衆。 是夜,

汧、隴 以千金之費,錫以六牧之馬。其戎裝戰器,軍用邊儲,各有司存,素皆精辦。咨爾將相文武宣 萬衆,分列前後。魏博自己、成德、昭義、永平總六萬衆,大舒左右。股內整禁旅,親誓諸將,資 何必勞人;如或不恭,自當伐罪。 力之臣,夫師克在和,善戰不陣,各宜保據疆 而北會。 之徭,凡三萬衆,屯於回中〔三〕,張大軍之援。忠誠以武落別校,右地奇鋒,凡二萬衆,出岐陽 稽胡、鮮卑雜種步馬五萬衆,嚴會栒邑,克壯舊軍。抱玉以晉之高都,韓之上黨,河、湟義從, 九年四月,以吐蕃侵擾,預爲邊備,乃降敕:「宜令子儀以上郡、北地、四塞、五原、義渠、 少年,凡三萬衆,橫絕高壁,斜界連營。馬璘以西域前庭,車師後部,兼廣武之戍,下蔡 希讓以三輔太常之徒,六郡良家之子,自渭上而西合汴宋、淄青、河陽、幽薊 然後眷求統一,以制諸軍。 一界,屯據要衝,斥堠惟明,首尾相應。若旣悔過, 進取之宜,俟於後命。」 ()總四

寇:一入茂州,過汶川及灌口;一入扶、文,過方維、白壩;一自黎、雅過邛崍關,連陷郡邑。 年八月,命太常少卿章倫持節使吐蕃,統蕃俘五百人歸之。 等二十餘萬衆,斬首萬餘級,生擒噶城兵馬使一千三百五十人,獻于闕下,牛羊及軍資器 械,不可勝紀。十二年九月,入寇坊州,掠党項羊馬而去。十月,崔寧破吐蕃望漢城。 十一年正月,劍南節度使崔寧大破吐蕃故洪等四節度兼突厥、吐渾、氐、蠻、羌、党項 十月,吐蕃率南蠻衆二十萬來 十四四

乃發禁兵四千人及幽州兵五千人同討,大破之。

統徙江、嶺,因緣求財及給養之費,不勝其弊。去年多,吐蕃大興師以三道來侵,會德宗初 發使奉贄,不二旬而復命。 今靈武之師,聞命輒已;而山南之師已入扶、文,蜀師已趨灌口,追且不及,是三恨也。」乃 哀,一也。不知山陵之期,而賻不成禮,二也。不知皇帝舅聖明繼立,已發衆軍三道連衡。 侵伐。吐蕃始閗歸其人,不之信,及蕃俘入境,部落皆畏威懷惠。 卽位,以德綏四方,徵其俘囚五百餘人,各給衣一襲,使倫統還其國,與之約和,敕邊將無得 庸二乎!」乃各給縑二匹、衣一襲而歸之。 五月,以韋倫爲太常卿,復使吐蕃。 其多,遣宰 「不知是來也,而有三恨,奈何?」倫曰:「未達所謂。」乞立贊曰:「不知大國之喪,而弔不及 建中元年四月,韋倫至。自大曆中聘使前後數輩,皆留之不造,俘獲其人,必遣中官部 蜀帥上所獲戎俘,有司請準舊事頒爲徒隸,上曰:「要約著矣,言 其贊普乞立贊謂倫日:

列

百

相 論欽明思等五十五人隨倫至,且獻方物。 吐蕃見倫再至,甚歡。 既就館,聲樂以娛之,留

九日而還,兼遣其渠帥報命。

以「領取」爲「領之」。且謂曰:「前相楊炎不循故事,致此誤爾。」其定界盟,並從之。 甥少信物,至領取。』我大蕃與唐舅甥國耳,何得以臣禮見處?又所欲定界,雲州之西,請以 亦親與盟。」」乃邀漢衡遣使奏定。魯使還奏焉,爲改敕書,以「貢獻」爲「進」,以「賜」爲「寄」, 賀蘭山 列館,贊普令止之,先命取國信敕,旣而使謂漢衡曰:「來敕云:"所貢獻物,並領訖; 今賜外 二年十二月,入蕃使判官常魯與吐蕃使論悉諾羅等至自蕃中。初,魯與其使崔漢衡至 I為界。 其盟約,請依景龍二年敕書云:『唐使到彼,外甥先與盟誓;藩使到此,阿舅

州 未決,已過其期,遂命澤詣結贊復定盟會期,且告遺隴右節度使張鎰與之同盟。澤至故原 其恥,不肯約和。 都官員外與獎澤兼御史中丞、充入審計會使。 竟以結贊代結息爲大相,終約和好,期以十月十五日會盟於境上。以崔漢衡爲鴻臚卿,以 兼 御史中丞崔漢衡與蕃使區頰贊至。時吐蕃大相尚結息忍而好殺,以嘗覆敗於劍南,思刷 ,與結贊相見,以來年正月十五日會盟於淸水西。 三年四月,放先沒蕃將士僧尼等八百人歸還,報歸蕃俘也。 九月,和藩使、殿中少監、 其次相尚結贊有材略,因言於贊普,請定界明約,以息邊人。贊普然之, 初,漢衡與吐蕃約定月日盟誓,漢衡到,商量

「漢非牛不田,蕃非馬不行,今請以羊、豕、犬三物代之。」結贊許諾。 論力徐等亦七人,俱升壇爲盟。初約漢以牛,蕃以馬,鎰恥與之盟,將殺其禮,乃謂結贊曰: 樊澤、常魯、于頔等七人皆朝服;結贊與其本國將相論悉頗藏、論臧熱、論利馳、斯官者、 者半之,列於壇外二百步,散從者半之,分立壇下。 四 「年正月,詔張鎰與尚結贊盟于淸水。將盟,鎰與結贊約,各以二千人赴壇所, 鎰與賓佐齊映、齊抗及會盟官崔漢衡、 塞外無豕,結贊請出抵

羊, 鎰出犬及羊, 乃於壇北刑之, 雜血二器而歃盟。文曰:

劍南 業,被四海之聲教。與吐蕃贊普,代爲婚姻,固結隣好,安危同體,甥舅之國,將二百 見屬 以歸蕃落。 縣,暨劍南西山大渡河東,爲漢界。蕃國守鎭在蘭、渭、原、會,西至臨洮,東至成州,抵 義,堅盟從約。今國家所守界:涇州西至彈箏峽西口,隴州西至淸水縣,鳳州西至同谷 彼獨以兩國之要,求之永久,古有結盟,今請用之。國家務息邊人,外其故地,棄利蹈 其間或因小忿,棄惠爲讎,封疆騒然,靡有寧歲。皇帝踐祚,愍茲黎元,俾釋俘隸, [漢諸蠻,以今所分見住處,依前爲定。 其|黃河以北,從故|新泉軍,直北至大磧,直 西界臍些諸蠻,大渡水西南,爲蕃界。其兵馬鎭守之處,州縣見有居人,彼此兩邊 唐有天下,恢奄禹跡,舟車所至,奠不率俾。以累聖重光,歷年爲永,彰王者之丕 蕃國展禮,同茲叶和,行人往復,累布成命。是必詐謀不起,兵車不用矣。

百四十六下

一蕃下

將相受辭而會,齋戒將事,告天地山川之神,惟神照臨,無得愆墜。 馬處漢守,並依見守,不得侵越。 南至賀蘭 山駱駝嶺爲界,中間悉爲閒田。 其先未有兵馬處,不得新置,并築城堡耕種。 盟文有所不載者,蕃有兵馬處蕃守,漢有兵 其盟文藏于宗廟, 今二國

結贊亦出盟文,不加於坎,但埋牲而已。 盟畢,結實請鎰就壇之西南隅佛幄中焚香爲誓。

副在有司,二國之成,其永保之。

誓畢,復升壇飲酒。 獻酬之禮,各用其物,以將厚意而歸。

盟使。 之內非便,請卜壇於京城之西。 蕃使判官于頔與蕃使論頰沒藏等至自靑海。七月,以禮部尙書李揆加御史大夫,爲入蕃會 三日,朝服陞壇,關播跪讀盟文。 里壇所,將盟,以淸水之會疆場不定〔四〕,遂罷,因留頰贊未遣,復令漢衡使於贊普。六月,答 二月,命崔漢衡持節答蕃,遣區頻贊等歸。 司農卿段秀實、少府監李昌虁、京兆尹王翃、左金吾衞將軍渾瑊等與區頰贊等會盟於 初,于頔至自蕃中,與尚結贊約「疆場旣定,請歸其使」。從之。 又命宰相李忠臣、盧杞、關播、右僕射崔寧、工部尚書喬琳、御史大夫于頎、太府卿張 其禮如淸水之儀。先盟二日,命有司告太廟,盟官致齋。 盟畢,宴賜而遣之。 上初令宰相、尚書與蕃相區頻贊盟於豐邑 以豐邑坊盟壇在京城

興元元年二月,以右散騎常侍兼御史大夫于頎往涇州已來宣慰吐蕃,仍與州府計會頓

會及安西、北庭宣慰使。是月,渾瑊與吐蕃論莽羅率衆大破朱泚將韓旻、張廷芝、宋歸朝等 遞。時吐蕃款塞請以兵助平國難,故遣使焉。四月,命太常少卿、兼御史中丞沈房爲入藩計

於武功之武亭川,斬首萬餘級。

使于吐蕃。初,吐蕃大相尚結贊累遣使請盟會定界,乃命成使之。至上砦原,與結贊相見, 之。九月,以吐蕃遊騎及於好時,上復遣張獻甫等統兵屯於咸陽,又詔遣左監門將軍康成 令其使論乞陀與成同來。 軍張獻甫與神策將李昇曇、蘇淸沔等統兵屯於咸陽,召河中節度駱元光率衆戍咸陽以援 掠人畜,取禾稼,西境騒然。 貞元二年,命倉部郎中、兼侍御史趙聿爲入吐蕃使。八月,吐蕃寇涇、隴、邠、寧數道, 諸道節度及軍鎭咸閉壁自守而已。京師戒嚴。上遣左金吾將

兵襲吐蕃之雅沙堡(m),大破之,焚其歸積,斬蕃會扈屈律設贊等七人(x),傳首京師 賊衆果敗,副將史廷玉力戰死之。又寇鳳翔城下,李晟出兵禦之,一夕而退。十月,李晟遣 但候其前軍已過,見五方旗、虎豹衣,則其中軍也。出其不意,乃是奇功。」他如其言出擊之, 曰:「賊之大衆,當過城下,無擊其首尾。首尾雖敗,中軍力全,若合勢攻之,汝必受其弊。 是月,鳳翔節度使李晟以吐蕃侵軼,遣其將王佖夜襲賊營,率驍勇三千人入汧陽,誠之 十一月,吐蕃陷鹽州。 初,賊之來也,刺史杜彥光使以牛酒犒之。 吐蕃謂曰:「我欲州

華州、潼關節度駱元光、邪寧節度韓遊壞統衆與鳳翔、鄜、邪及諸道戍卒,屯於塞上,又命燧 夏等州,各留千餘人守之,結贊大衆屯於鳴沙。自去冬及春,羊馬多死,糧餉不給。 復據其城。又寇銀州,素無城壁,人皆奔散。三年春,命檢校左庶子、兼御史中丞崔澣爲入 喜賂信詐,乃與頰熱俱入朝,盛言其可保信,許盟約,上於是從之。燈旣赴朝也,諸軍但閉 不許。又遺其大將論頰熱厚禮卑詞求燧請盟,燧以奏焉,上又不許,惟促其合勢討逐。 率師次於石州,分兵隔河與元光等掎角討之。 結贊聞而大懼,累遣使請和,仍約盟會,上皆 吐蕃使,相次又遣左庶子李銛使之。河東、保寧等道節度使馬燧來朝。 城居之,聽爾率其人而去。」彥光乃悉衆奔鄜州。 亦由此失兵柄而奉朝請矣。 壁而已。結贊遽悉其衆棄夏州而歸,馬旣多死,有徒行者。及是夏平凉之會,竟渝盟,馬燧 十二月,陷夏州,刺史拓拔乾暉率衆而去, 初,尙結贊旣陷鹽、 時詔遣

禮,實無至者,乃引軍還。及鹽、夏二州之師,二州懼我之衆,請以城與我,求全而歸,非我所 武功,未獲酬償,所以來耳。及徙涇州,其節度使閉城自守,音問莫達。又徙鳳翔,請通使 於李令公,亦不見納。 曰:「本以定界碑被牽倒,恐二國背盟相侵,故造境上請修舊好。又審軍頃年破失泚之衆於 四月,崔澣至自鳴沙。 及遭康成、王眞之來,皆不能達大國之命。 初,澣至鳴沙,與尚結贊相見,詢問其違約陷鹽、夏州之故,對 日望大臣充使,兼展情

馬八萬六千餘匹,可戰者僅三萬人,餘悉童幼,備數而 李觀,亦請同主之。」又同章表上聞。 元帥已下凡二十一人赴。 歸奏決定,當以鹽、夏相還也。」又云:「淸水之會,同盟者少,是以和好輕慢不成。 攻陷也。 今君以國親將命,若結好復盟,蕃之願也。 靈州節度使杜希全稟性和善,外境所知,請令主盟會。 |澣誘賂||蕃中給役者,求其人馬眞數,凡五萬九千餘人、 盟會之期及定界之所,唯命是聽。 今蕃相 涇州節度

贊已復命,遽追還,告而 不利于我。平凉川 崔澣與尚結贊約復會於淸水,且先歸我鹽、夏二州,結贊云:「淸水非吉地,請會於原州之 萬餘人,遺華州潼關節度駱元光赴之。上令宰臣召吐蕃使論泣贊等於中書議會盟之所。初 以兵部尚書崔漢衡爲盟會副使,司勳員外郞鄭叔矩爲判官。 觀今已改官,以侍中渾瑊充盟會使。」約以五月二十四日復盟於淸水。 日盟于土梨樹,上召宰臣謀之。先是左神策將馬有麟奏:「土梨樹地多險隘, 土梨樹。」又請盟畢歸二州。 歸于我,纔就盟會。上疑蕃情不實,以得州爲信焉。 是日,改崔澣爲鴻臚卿,再入吐蕃,令澣報尚結贊曰:「杜希全職在靈州,不可出境。 四隅坦平,且近涇州,就之爲便。」由是乃定盟所於平涼川。 遣之。 |澣遣使與泣贊等同奏,上務懷柔遠人,皆從之。 五月,渾瑊以充盟會使來辭,且受命。 渾瑊赴會盟所,上令城統衆二 又令告以鹽、夏二州 約以五月十五 恐蕃軍隱伏 時審使論泣

列

儜

直,大將扶餘準、馬寧及神策、鳳翔、河東大將孟日華、李至言、樂演明、范澄、馬弇等六十餘 並爲亂兵所殺。漢衡及中官劉延邕、俱文珍、李淸朝,漢衡判官鄭叔矩、路泌,掌書記袁同 裨將辛榮招合數百人,據北阜與賊接戰,須臾賊衆四合,榮力屈而降。 鳳朝及城判官韓弇, 以下服衣冠劍珮以俟命。」蓋誘其下馬,將劫持之。一域與崔漢衡、監軍特進宋鳳朝等皆入幕 將梁奉貞率六十騎爲遊軍,纔至蕃中,皆被執留, 城不虞也。結贊又遣人請城曰:「請侍中 馬不加銜,城伏于鬣而手加之,凡馳十餘里,銜方及口,故追騎之矢,過而不傷焉。唯城之 人皆陷焉。餘將士及夫役死者四五百人,驅掠者千餘人,咸被解奪其衣。 渾減與尚結贊會於平凉。初,減與結贊約,以兵三千人列于壇之東西,散手四百人至

與相見,數讓國家,因怒渾瑊日:「武功之捷,皆我之力,許以涇州、靈州相報,皆食其言,負 各繁一橛,又以毛罽都覆之,守衞者臥其上,以防其亡逸也。至故原州,結贊坐于帳中,召 各以一木自領至趾約于身,以毛繩三束之,又以毛繩連其髮而牽之。夜皆踣於地,以髮繩 曰:「我漢使崔尙書也,結贊與我善,如若殺我,結贊亦殺汝。」乃捨之,盡驅而西。旣已面縛, 初,漢衡爲亂軍所擊,其從吏呂温以身蔽之,刃中温而漢衡獲免。漢衡乃夷言謂執者

我深矣。舉國所忿。本劫是盟,在擒瑊也。吾遣以金飾桎梏待瑊,將獻贊普。 辛榮、扶餘準等於故廓州、鄯州分囚之。結贊本請杜希全、李觀同盟,將執二節將,率其銳 石門,遣中官俱文珍、渾瑊之將馬寧、馬燧之將馬弇歸于我,遂送漢衡、叔矩等囚於河州, 致君等耳,當遣君輩三人歸也。」呂温帶瘡亦至,結贊嘉其義, 師來犯京師,希全等旣不行,又欲執渾城長驅入寇,其謀也如此。 厚給賚之。 上遣中官王子恆賫詔書 結贊率其衆於 既以失之、虚

以遺結贊,蕃界不納而還。

營而已,器械資糧悉棄之,賴元光之衆陣於營中,珹旣入,賊追騎方退。元光乃先遣輜重 | 減之濠栅可踰越焉。及

| 及

場

野

等

場

字

房

字

朝

彩

不

能

整

来

多

已

奔

散

、
 原去盟所六七十里,蕃情多詐,侍中倘有急,何由知之?請次侍中爲營,以虞其變。」減以非 次與<u></u> 域俱申其號令,嚴其部伍而還。 域復鎭于奉天。 瑊至,空 竊以潘

六月,鹽、夏二州吐蕃焚城門及廬舍,毁城壁而歸。 七月,韶曰:

戰伐之謀,遂從通和之請。 乃者吐蕃犯塞,毒我生靈,俶擾隴東,深入河曲。 亦知戎醜,志在貪婪,重遠修睦之辭,乃允尋盟之會。 朕以兵戈粗定, 傷夷未瘳,

五二五三

與一子九品官。仍並與正員官。餘將士各與一子官,仍委本使卽具名銜聞奏。 隱匿,變發壝宮,縱犬羊兇狡之羣,乘文武信誠之衆,蒼黃淪陷,深用惻然。 |成等,各與一子八品官;試左金吾兵曹參軍||袁同直、楡次尉||裴頲及副兵馬使以下,各 路泌、殿中侍御史韓弇及大將孟日華、辛榮、李至言、范澄、王良賁、樂演明、陽昔、權交 崔漢衡等,皆國之良士,朝之蓋臣,嬰繁窮廬,眇然殊域。念其家室,或未周於屢空, 之不明,致其至此。旣無德於萬衆,亦有愧於四方,宵旰貽憂,何嗟而及。今兵部尙書 錄以息男,庶或資於薄俸。漢衡宜與一子七品官,司勳員外郞鄭叔矩、檢校戶部郞中 此皆由朕

於是遣決勝軍使唐良臣以衆六百人戍潘原堡,神策副將蘇太平率其衆五百人戍隴州。

原。是日,相次屯於所趨之地,連營數十里。其所陽賊營,距鳳翔四十里,京師震恐,士庶 華、中官劉延邕,俱至石門而遣之。 結贊令五十騎送至境上,且齎表請進。 及潘原,李觀使 青石嶺。先是,吐蕃之衆自潘口東分爲三道:其一趨隴州,其一趨汧陽之東,其一趨釣竿 止曰:「有韶不許更納蕃使。」受其表而返其人。自是吐蕃率羌、渾之衆犯塞,分屯於潘口及 人畜,斷吳山神之首,百姓丁壯者驅之以歸,羸老者咸殺之,或斷手鑿目,棄之而去。初,李 八月,崔漢衡至自吐蕃。初,漢衡與同陷者並至河州,尚結贊令召漢衡與神策將孟日 賊遣羌、渾之衆,衣漢戎服,僞稱邢君牙之衆,奄至吳山及寶雞北界,焚燒廬舍,驅掠

晟在鳳翔,令伐大木塞安化峽,及是,賊並焚之。

道。 焉。 爲賊境,樵蘇殆絕,收刈禾稼,必布陣於野而收穫之。 慟哭而降。 中唯一井,投石俄而滿焉。又飛梁架濠而過,苦攻之。堡將張明遂興其衆男女千餘口 **雲堡,又陷。堡之三面頗峭峻,唯北面連原,以濠爲固。** 下,將焚之,仙鶴遂降於賊。賊並焚廬舍,毀城壁,虜士衆十三四,收丁壯棄老而去。 賊自是每日令遊騎千餘至隴州,州兵不敢復出。凡四日,圍中絕水,援軍不至,賊又積柴城 蘇太平率一千五百人赴之。及中路,其遊騎百餘沒於賊,太平素懦怯寡謀, 火相應,賊大驚,因襲其營,賊乃退散。時吐蕃攻陷華亭。 入計以破吐蕃圍。 東向哭辭鄉國。」衆遂大哭。其時一慟而絕者數百人,投崖谷死傷者千餘人,聞者爲之痛心 掠汧陽、吳山、華亭等界人庶男女萬餘口,悉送至安化峽西,將分隸羌、渾等,乃曰:「從爾輩 其守將王仙鶴及鎭兵百姓凡三千人,皆在圍中,使人間道請救於隴州,刺史韓淸沔令 渾城遣其將任蒙主以衆三千戍好時。是月,吐蕃之衆復至,分屯於豐義及華亭。 九月,詔神策軍將石季章以衆三千戍武功,召唐良臣自潘原戍百里城。 涇州之西,唯有連雲堡每偵候賊之進退,及是堡陷,涇州不敢啓西門,西門 隴州刺史韓淸沔與蘇太平夜出兵伏於大像龕,及夜半,令城中及龕各舉 **穫旣失時,所得多空穗,於是涇人有** 賊自其北建拋樓七具,擊堡中,堡 初,賊之圍華亭也,先絕其汲水 遽引衆退歸 是月, 北攻連 吐蕃· 東向 外皆 百僚 大

列傳

第

百四四

十六下

吐簪

自是涇、隴、邪等賊之所至,俘掠殆盡。是秋,數州人無積聚者,邊將唯遣使表賀賊退而已。 飢 吐蕃驅掠連雲堡之衆及邠、涇編戶逃竄山谷者,幷牛畜萬計,悉其衆送至彈箏峽。

及暮,賊退,全義亦引還。自是賊之騎常往來徑、邠之間,諸城西門莫敢啓者。 賊又修故原 十月,吐蕃數千騎復至長武城,韓全義率衆禦之。韓遊壞之將請以衆助之,遊壞不許。

州城,其大衆屯焉。

焉。九月,吐蕃將尙悉董星、論莽羅等寇寧州,節度使張獻甫率衆禦之,斬首百餘級,敗轉 舍,人畜沒者約二三萬,計凡二旬方退。陳許行營將韓全義自長武城率衆抗之,無功而還。 疾疫而退。是來也,方盛暑而無患。蓋華人陷者,厚其資產,質其妻子,爲戎虜所將而侵軼 遊壞素無軍政,且疾不能興,閉城自守,莫敢禦也。先是,吐蕃入寇,恆以秋冬,及春則多遇 四年五月,吐蕃三萬餘騎犯塞,分入涇、邠、寧、慶、麟等州,焚彭原縣廨舍,所至燒廬

匹。遮遮者,吐蕃驍勇者也,或云尚結贊之子,頻爲邊患。自其死也,官軍所攻城栅,無不 州臺登北谷大破吐蕃青海、獵城二節度,殺其大兵馬使乞臧遮遮、悉多楊朱,斬首二千餘 級,其投崖谷赴水死者不可勝數,生擒籠官四十五人,收獲器械一萬餘事、馬牛羊一萬餘頭 五年十月,劍南節度使韋皋遣將王有道等與東蠻兩林直那時、勿鄧夢衝等帥兵於故當 寇麟坊等州,縱掠而去。

降下,蕃衆日却,數年間,盡復屬州之境。

庭,迴紇 遣兵 吐蕃 東、 帳、留 帳, 利 城降於吐蕃,沙陀部落亦降焉。 通 大敗,死 ,葛祿之衆乘勝取迴紇之浮圖川,迴紇震恐 和 而 **振武分兵爲援,又分神策六軍之卒三千餘** 興北 徴水 引去。 還。 出 八年四月,吐蕃寇靈州,掠人畜,攻陷水口城, 六年 而 亦 戰,大將王 不遣,竟殺之。 大相頡干迦斯 者大半。 、憾其奪掠,因吐蕃厚路見誘,遂附之。 庭 無 ٠, 七年秋,又悉其丁壯五六萬人,將復北庭,仍召襲古偕行,俄爲吐蕃、葛禄等所擊, 相依 度。 吐蕃 六月,吐蕃數千騎 陷我 ,亦屬於迴紇。 北庭近羌, 進 頡干 北 用 率衆援之,頻戰敗績,吐蕃攻圍頗急。 自是安西阻絕,莫知存否,唯西州之人,猶固守焉。 死之。 庭都 ·迦斯紿之曰:「且與我同至牙帳,當送君歸本朝也。」襲古從之,及牙 凡服用食物所資, 護府。 由青石嶺寇涇州 九月, 迴紇肆其抄奪, 北庭節度使楊襲古與麾下二千餘 初, 西川節度使韋皋攻吐蕃之維州 北庭、 、悉遷 安西 必強取之,人不聊生矣。 人戍於定遠、懷遠 ,掠田 於是吐蕃率葛祿、白服之衆,去歲各來 尤所厭苦。 ,既假道於迴紇朝奏,因附 進 西北部落羊馬於牙帳之南以避之(+)。 軍千餘人還,及連雲堡,守捉使 圍州城,塞水口及支渠以營田。 其葛祿部及白服突厥 北庭之人旣苦迴紇,是歲 二城,上御神武樓勞遣之。 人出奔西州,頡干迦斯 ,獲大將論贊熱及首領 又有 沙陀 庸 頡干迦斯 素 部 唐朝臣 與 蕃 六 乃舉 既敗 千 韶河 寇 迴 性 餘 紇 出出

列

獻于京師。十一月,山南西道節度嚴震擊破吐蕃於芳州及黑水堡,焚其積聚,幷獻首虜。

器械、旗幟、牛馬於闕下。初,將城鹽州,上命皋出師以分吐蕃之兵,皋遣大將董勔、張芬 其力。由是板築之際,虜無犯塞者。及畢,中外咸稱賀焉。是月,西川韋皋獻獲吐蕃首虜、 爲邊患,故命城之,二旬而畢。又詔兼御史大夫紇干遂統兵五千與兼御史中丞杜彥光之衆 焚定廉故城。凡平栅堡五十餘所。 出西山及南道,破峨和城、通鶴軍。吐蕃南道元帥論莽熱率衆來援,又破之,殺傷數千人, 成之。是役也,上念將士之勞,厚令度支供給。又韶涇原、劍南云、山南諸軍深討吐蕃,以分 九年二月,韶城鹽州。是州先爲吐蕃所毀,自此塞外無堡障,靈武勢隔,西逼鄜坊,甚

朝至午,大破之,生擒大籠官七人,陣上殺獲三百人,餘被刀箭者不可勝紀,收獲馬畜五百 軍。十二年九月,吐蕃寇慶州及華池縣,殺傷頗甚。十三年正月,邢君牙奏請於隴州西七十 攻陷欽、横、潯、貴四州,吐蕃渠帥論乞髯蕩沒藏悉諾律以其家屬來降,明年並以爲歸德將 下營,僅經一月,進軍逼臺登城。 魯州刺史曹高任率領諸軍將士幷東蠻子弟合勢接戰,自 之性,數負恩背約,不受表狀,任其使却歸。五月十七日,吐蕃於劍南山、馬嶺三處開路,分軍 里築城以備西戎,名永信城。吐蕃贊普遣使農桑昔齎表請修和好,邊將以聞。上以其豺狼 十年,南韶蠻툻異牟尋大破吐蕃於神川,使來獻捷,語在南韶傳。十一年八月,黃少卿

餘頭匹、器械二千餘事。十四年十月,夏州節度使韓全義破吐蕃於鹽州西北。十六年六月,

鹽州破吐蕃於烏蘭橋下行。

州。 北邊故也。 將勒步騎合二萬,出成都西山,南北九道並進,逼棲雞、老翁、故維州、保州、松州諸城,以紓 親老,懇祈全活。」悲不自勝。又曰:「余奉命率師備邊,因求資食,遂涉漢疆,展轉東進至麟 王室,高祖建義中泯,子孫流播絕域,今三代矣。雖代居職位,世掌兵要,思本之心無涯,顧 徐舍人也。命解縛,坐帳中,曰:「師勿懼。余本漢人,司空英國公五代孫也。屬武后斷喪 引延素等疾趨至帳前,皆馬革梏手,毛繩縲頸。見一吐蕃年少,身長六尺餘,赤髭大目,乃 適有飛鳥使至,飛鳥,獨中國驛騎也,云:「術者上變,召軍亟還。」遂歸之。時詔韋皋分遣偏 血族無由自拔耳。此藩、漢交境也,復九十里至安樂州,師無由歸東矣。」延素曰:「僧身孤 次鹽州西九十里橫槽烽頓軍,呼延州僧延素輩七人,稱徐舍人召。其火隊吐蕃沒勒遽 城旣無備,援兵又絕,是以拔之。 知郭使君是勳臣子孫,必將活之,不幸爲亂兵所害。」 十七年七月,吐蕃寇鹽州,又陷鱗州,殺刺史郭鋒,毀城隍,大掠居人,驅党項部落而

九月, 莽熱,吐蕃內大相也。先貞元十六年,章皋累破吐蕃二萬餘衆於黎州、巂州,吐 章皋大破吐蕃於維州。十八年正月,章皋擒吐蕃大首領論莽熱來獻,賜崇仁里

傳

部落郝 使崔 南道 泉出 都將 使、部統羣牧大使率雜虜十萬衆來解維州之圍。王師萬餘衆,據險設伏以待之。先以千人 經 明年 戰千餘里,吐蕃連敗,靈、朔之寇引衆南下,於是贊普遣莽熱以內大相兼東境五道節度兵馬 拔其七城、五軍鎮,受降三千餘戶,生擒六千餘人,斬首一萬餘級,遂圍維州。 及 進 吐 婴、籠官馬定德與其大將八十七人,舉部落來降。 (磨些)量三部落主直那時率兵四千進攻昆明、諾濟城。自八月至于十二月,累破十六萬衆, 略使路惟明與三部落主趙日進等率兵三千進攻逋租、偏松等城,黎州經略使王有道率三 蕃 逼 逐大搜閱,築壘造舟,潛謀寇邊,皋悉挫之。於是吐蕃**酋帥**兼監統曩貢、臘城等九節度**娶** 三兵成都 雅 高 一堯臣率兵一千出龍溪石門路南,維保二州兵馬使仇冕、保霸 ,吐蕃昆明城管磨些蠻千餘戶又來降。 吐蕃維州城中,北路兵馬使邢玼丼諸州刺史董懷愕等率兵四千進攻棲鷄、 每用兵,定德常乘驛計議,諸將稟其成算。 倜 金信等二千過大渡河深入吐蕃界,篱州經略使陳孝陽與行營兵馬使何大海、 、邛、黎、巂等路。 、王英俊等率兵二千進逼故松州,隨東路兵馬使元膺丼諸將郝宗等復分兵八千出 西山以舒北邊。 又令邛州鎮南軍使、御史大夫章良金發鎭兵一千三百續進,雅州 皋遂命鎮靜軍兵馬使陳消等統兵萬人出三奇路(10), 吐蕃以其衆外潰,遂北寇靈、朔,陷麟州。 至是自以邊功不立,懼得罪而 定德有計畫,愛要習知兵法及 兩州刺史董振等率兵二千 救軍 歸心焉。 山川地形, 老翁等城, 再至,轉 章義等 威戎軍 其

挑戰,莽熱見我師之少也,悉衆來追,入于伏中,諸將四面疾擊,遂擒莽熱,虜衆大潰。

爲副使。七月,吐蕃使論悉諾等來朝。永貞元年十月,贊普使論乞樓勃藏來貢,助德宗山 命左金吾衞將軍、兼御史中丞田景度持節告哀于吐蕃,以庫部員外郎、兼御史中丞熊執易 陵金銀、衣服、牛馬等。 十一月,以衞尉少卿、兼御史中丞侯幼平充入蕃告册立等使。 僧南撥特計波等五十四人來朝。十二月,遣使論襲熱、郭志崇來朝。二十一年二月,順宗 立,一歲卒,次子嗣立。命文武三品以上官弔其使。四月,吐蕃使臧河南 觀察使論乞冉及 年三月上旬,贊普卒,廢朝三日,命工部侍郎、胰薦弔祭之。 贊普以貞元十三年四月卒,長子 十九年五月,吐蕃使論頰熱至。六月,以右龍武大將軍薛伾兼御史大夫,使于吐蕃。二十

矩、泌,平凉之盟陷焉,凡二十餘年,竟不屈節,因沒于蕃中,至是請和,故歸之。 六月,命宰 中丞李銛爲入蕃使印了,丹王府長史、兼侍御史吳暈副之。六年至十年,遣使朝貢不絕。十 相杜佑等與吐蕃使議事中書令廳,且言歸我秦、原、安樂州地。七月,遣鴻臚少卿、攝御史 二年四月,吐蕃以贊普卒來告,以右衞將軍烏重玘兼御史中丞,充弔祭使,殿中侍御史段鈞 五年五月,遣使論思耶熱來朝,并歸鄭叔矩、路泌之柩及叔矩男文延等一十三人。叔 元和元年正月, 福建道送到吐蕃生口十七人, 韶給遞乘放還蕃。 六月, 遣使論勃藏來

使王 鹽州 人,殺戮二千人,生擒節度副使一人、判官長行三十九人,獲羊馬甚衆。 二萬餘衆,收復原州城,獲羊馬不知其數。 播攻拔峨和、棲雞等城。 上言 十三年十月, 吐蕃 入河曲,夏州破五萬餘人。 吐蕃圍我宥州、 鳳翔,上言遣使修好。 夏州 靈武破長樂州羅城,焚其屋宇器械。 節度田縉於靈武亦破三千餘人。 是月, 靈武於定遠城破吐蕃二萬 平凉鎮遏 使郝玼破 西川節度 + 月,

誅絕。 及近甸,遽聞蟻聚,來犯封睡,河曲之間,頗爲暴擾。 京輦,將君長之命,陳和好之誠。 貸。 弘覆以忘懷。 予衷苟孚,庶使知感。 鳳 翔節度使以 我有殊德,寧不是思,重譯貢珍,道途相繼,申恩示禮 逈 **朕深惟德化之未被,豈慮夷俗之不賓,其國失信,其使何罪!** 年正月,敕曰:「朕臨御萬邦,推布誠信,西戎納款, 此意曉諭。 臨軒召見,館餼加厚,復以信幣,諭之簡書。 其藩使論矩立藏等并後般來使,并宜放歸本國。 背惠棄約,斯謂無名, ,曾無闕焉。 積有歲時,中或虧違,亦嘗苞 釋其維繫以遂性,示之 昨者藩使奉章,又至 公議物情,咸請 亦旣 言旋,纔

賊以飛梯、鵝車、木驢等四面齊攻,城欲陷者數四。 令尚綺心兒共領軍約十五萬衆,圍我鹽州數重,党項首領 八月,吐蕃營於慶州方渠,大軍至河州界。 十月,吐蕃節度論三摩及宰相尙塔藏、中書 刺史李文悅率兵士乘城力戰,城穿壞不 亦發兵驅羊馬以 助。 閱 歷三旬,

可守,撤屋版以禦之,晝夜防拒,或潛兵斫營,開城出戰,約殺賊萬餘衆。 凡二十七日,賊乃退。 諸道救兵無至者。

將郝跳數襲擊審壘,殺戮甚衆,邠州李光顏復以全師而至,戎人懼而退。蓋田縉始生國患, 誓。」遂貶之。 戎人實以邊將擾之致忿,徒假洎爲辭也。 涇州上言:「吐蕃大將並退。」於是 武城下會盟,消懦怯,恐不得還,唯唯而已。至是西戎入寇,且曰:「田洎許我統兵馬赴盟 充答請和好使,貶前入吐蕃使、秘書少監田洎郴州司戶口。初,洎入蕃爲弔祭使,蕃請於長 領兵赴長樂州,幷奉詔討吐蕃也。十二月,吐蕃千餘人圍烏、白池 罷神策行營兵。自田縉統夏州,以貪狠侵擾,党項苦之,屢引西戎犯塞。及是大兵入寇,邊 都監,統神策兵四千人,丼發八鎭全軍往救援。以太府少卿、兼御史中丞邵同持節入吐蕃, 而賴光顏、郝玼之驅戮也。十一月,夏州節度使李祐自領兵赴長澤鎮,靈武節度使李聽自 七月,遺使來弔祭。十月,侵逼涇州。命右軍中尉梁守謙充左右神策、京西、京北行營 十五年二月,以秘書少監兼御史中丞田洎入吐蕃告哀,并告册立。三月,攻掠我青塞

吐蕃遣使請盟,上許之。宰相欲重其事,請告太廟,太常禮院奏曰:「謹按肅宗、代宗故事, 與吐蕃會盟,並不告廟。 唯德宗建中末,與吐蕃會盟於延平門,欲重其誠信,特令告廟。

列傳第

百四十

六

下

吐

長慶元年六月,犯靑塞堡,以我與迴紇和親故也。鹽州刺史李文悅發兵進擊之。九月,

御史中丞劉師老爲副,尙舍奉御、兼監察御史李武、京兆府奉先縣丞兼監察御史李公度爲 謹參詳,恐不合告。」從之。乃命大理卿、兼御史大夫劉元鼎充西蕃盟會使,以兵部郎中、兼 貞元三年,會於平凉,亦無告廟之文。伏以事出一時,又非經制,求之典禮,亦無其文。 吾大將軍皆預焉。其詞曰: 十月十日,與吐蕃使盟,宰臣及右僕射、六曹尚書、中執法、太常、司農卿、京兆尹、金

名而垂永久,類上帝以答嘉應,享皇靈以酬景福, 無違者,蓋所以偃兵息人,崇姻繼好,懋建遠略,規恢長利故也。 會盟於京師,壇于城之西郊,坎于壇北。 酉,文武孝德皇帝韶丞相臣植、臣播、臣元穎等,與大將和蕃使禮部尚書論訥羅等口事, 重光,克彰濬哲,罔忝洪緒,十有二葉,二百有四載。 維唐承天,撫有八紘,聲教所臻,靡不來廷。 凡讀誓、刑性、加書、復壤、陟降、周旋之禮,動 兢業齋栗,懼其隕顚,續武紹文,疊慶 曷有怠已?越歲在癸丑多十月癸 則我太祖,權明號而建不拔,鋪鴻

絕。中夏見管,維唐是君,西裔一方,大蕃爲主。 絕其交侵。襟帶要害,謹守如故,彼無此詐,此無彼虞。 焉消除,追崇舅甥,曩昔結拨。邊堠撤警,戍烽韜煙,患難相恤, 原夫昊穹上臨,黃祗下載,茫茫蠢蠢之類,必資官司,爲厥宰臣,苟無統紀,則相滅 自今而後,屏去兵革,宿忿舊惡,廓 嗚呼!愛人爲仁,保境爲信 暴掠不作, 亭障甌脫,

畏天爲智,事神爲禮,有一不至,搆災于躬。塞山崇崇,河水湯湯,日吉辰良,奠其兩

疆,西爲大蕃,東實巨唐。 大臣執簡,播告秋方。

界,彼此不得征,不得討,不得相爲寇讎,不得侵謀境土。若有所疑,或要捉生問事,便 大蕃贊普及宰相鉢闡布、尚綺心兒等,先寄盟文要節云:「蕃、漢兩邦,各守見管本

給衣糧放還。」今並依從,更無添改。

宰相已下各於盟文後自書名。靈武節度使李進誠於大石山下破吐蕃三千騎回。 預盟之官十七人,皆列名焉。其劉元鼎等與論訥羅同赴吐蕃本國就盟,仍敕元鼎到彼,令

山,山形如蝎,河源在其間,水甚清泠,流經諸水,色遂赤,續爲諸水所注,漸旣黃濁。 流,在洪濟橋西南二千餘里,其水極爲淺狹,春可揭涉,秋夏則以船渡。 即破滅矣,會我聞本國有喪而還。迴紇之弱如此,而唐國待之厚於我,何哉?」元鼎云:「迴 都元帥、尚書令尚綺心兒云:「迴紇,小國也。我以丙申年踰磧討逐,去其城郭二日程,計到 逐便邀截。」又言:「擒得與党項送書信吐蕃一百五十人。」是月劉元鼎自吐蕃使迴,奏云: 「去四月二十四日到吐蕃牙帳,以五月六日會盟訖。」初,元鼎往來蕃中,並路經河州,見其 二年二月,遣使來請定界。六月,復遣使來朝。鹽州奏:「吐蕃千餘人入靈武界,遣兵 其南三百餘里有三 叉其

普於悶 自 源 諾息等隨 沙州 西 去 之西 懼 蕃 盧 之列館 元鼎來謝,命太僕少卿杜載使以答之。 JIJ, ,乃南入吐渾國,至此 蓋贊普夏衙之所,其川 約四 驛 每驛約 二百餘里。 轉微,故號 在羅娑川 磧尾。 東北去莫賀延磧尾,闊五 前百百 計其地理,當劍南之直 里,臧河之所流 也。 十里 向,向 時 四 吐蕃遣使論悉 南漸狹小,北 元鼎初見贊

度使 來。 使以答之。 犀牛、羊、鹿各一。 延喜樓觀之,莫不歡呼忭舞,更相解辮,爭冠帶于康衢,然後命善地以處之,觀者咸稱萬歲。 宰相尚恐熱殺 會昌 康季榮以聞, 三年 二年, Ė 大和 月, 贊普卒。 遣使論答熱來朝賀。 五 命太僕卿陸耽往勞焉。 東道節度使口声,以秦、原、安樂等三州丼石門、木硤等七關款塞,涇原 寶曆 年至八年,遺使朝貢不絕,我亦時遺使報之。 元年三月,遣使尚綺立熱來朝,且請和好。 十二月,遺論贊等來告哀, 四年九月,遺使求五臺山圖。 其年七月, 韶以將作少監李璟弔祭之。大中三 河、隴耆老 率長幼千餘人赴闕,上御 開成元年、 九月, 十月, 遣 貢犛牛及銀鑄成 光祿卿 二年,皆遣 李銳 年 節 使 爲

無常聖,我衰則彼盛,我盛則彼衰,盛則侵我郊圻,衰則服我聲教。 史臣曰: 戎狄之爲患也久矣! 自秦、漢已還,載籍大備,可得而詳也。 懷柔之道,備預之方,儒 但 世 罕小康,君

以 不可以忠信而御也。 近郊,背惠食言,不顧禮義,即可知也。 假之也。 臣 彼一此,或勝或負,可謂勞矣。迨至幽陵盜起,乘輿播遷,戍卒咸歸,河、湟失守,此又天 [多議於和親,武將唯期於戰勝,此其大較也。彼|吐蕃者,西陲開國,積有歲年,蠶食鄰蕃, 恢土字。 自茲密邇京邑,時縱寇掠,雖每遺行人,來修舊好,玉帛纔至於上國,烽燧已及於 高宗朝,地方萬里,與我抗衡,近代以來,莫之與盛。 孔子曰:「夷狄之有君,不如諸夏之亡也。」誠哉是言! 夫要以神明,貴其誠信,平凉之會,畜其詐謀,此又 至如式遏邊境,命制 出師,

其心豺狼。 贊曰:西戎之地,吐蕃是強。蠶食隣國,鷹揚漢疆。乍叛乍服,或弛或張。 禮義雖攝,

校勘記

- 各本原作「安」,據本書卷一一代宗紀、新書卷二一六下吐蕃傳改。
- 回中 聞、殿、懼盈齋、廣本作「泗中」,局本作「洄中」,今據唐大詔令集卷一〇七、冊府卷九九二

改。

- 魏博 「博」字各本原無,據唐大韶令集卷一〇七補。
- (題) 將盟以清水之會疆場不定 列 僔 第 一百四十六 下 校 「將」字及「疆場」二字各本原無,據冊府卷九八一補。 勘 記

出 推沙堡 「摧」字各本原作「堆」,據本書卷一二德宗紀、卷一三三李晟傳、冊府卷九九二改。

(六) 扈屈律設費 「設贊」二字本書卷一三三李晟興作「悉蒙」。

(4) 西北部落 「北」字各本原作「州」,據本書卷一九五四統傳、通鑑卷二三三改。

3 劍南 各本原作「湖南」,據新書卷二一六下吐蕃傳、通鑑卷二三四改。

(元) 鹽州 新書卷二一六下吐蕃傳、通鑑卷二三五均作「靈州」。

(10) 陳洎 「洎」字聞本原無、殿、懼盈齊、局、廣本均作「泊」,據本書卷一四〇章皋傳、冊府卷九八七

改。

 $\stackrel{\triangle}{=}$

郴州司戶

二二 李銛 各本原作「李銘」,據冊府卷九八〇、新書卷二一六下吐蕃傳改。 「郴」字各本原作「柳」,據新書卷二一六下、吐蕃傳、通鑑卷二四一改。

與大將和蕃使 **一班府卷九八一作「與大蕃和使」,是。**

(層 大石山 各本原作「太谷山」,據新書卷二一六下、吐蕃傳、通鑑卷二四二改。

音

殺東道節度使

「殺」字各本原無,據唐會要卷九七補。

舊唐書卷一百九十七

列傳第一百四十七

南蠻 西南蠻

東謝蠻 林邑 婆利 西趙蠻 盤盤 牂 轲 蠻 眞臘 南平獠 陀洹 訶陵 東女國 **墮和羅** 南詔蠻 墮婆登 驃國

四百匹,分爲前後。其人拳髮色黑,俗皆徒跣,得麝香以塗身,一日之中,再塗再洗。 王之侍衞,有兵五千人,能用弩及穳,以藤爲甲,以竹爲弓,乘象而戰。王出則列象千頭,馬 鎖,以爲瓔珞,卷髮而戴花。夫人服朝霞古貝以爲短裙,首戴金花,身飾以金鎖眞珠瓔珞。 不識冰雪,常多霧雨。其王所居城,立木爲栅。王著白氎古貝,斜絡膊,繞腰,上加眞珠金 林邑國,漢日南象林之地,在交州南千餘里。其國延袤數千里,北與驪州接。地氣多温, 拜謁

列傳

第

百

四十

七

南壁

西南豐

五二六九

哭,以棺盛屍,積柴燔柩,收其灰,藏於金瓶,送之水中。俗以二月爲歲首,稻歲再熟。 以南,草木冬榮,四時皆食生菜,以檳榔汁爲酒。 有結遼鳥,能解人語。 皆合掌頓顙。 嫁娶之法,得取同姓。俗有文字,尤信佛法,人多出家。父母死,子則剔髮而

人乃立頭黎之女壻婆羅門爲王。後大臣及國人感思舊主,乃廢婆羅門而立頭黎之嫡女爲 形,列於玄闕之前。 令放還於林藪。自此朝貢不絕。頭黎死,子范鎭龍代立。太宗崩,韶於陵所刊石圖頭黎之 詔太子右庶子李百藥爲之賦。又獻白鸚鵡,精識辯慧,善於應答。太宗憫之, 光照數尺,狀如水精,正午向日,以艾承之口,即火燃。五年,又獻五色鸚鵡。 其王錦綵。貞觀初,遣使貢馴犀。四年,其王范頭黎遣使獻火珠,大如雞卵, 武德六年,其王范梵志遣使來朝。八年,又遣使獻方物,高祖爲設九部樂以宴之,及賜 十九年,鎮龍爲其臣摩訶漫多伽獨所殺,其宗族並誅夷,范氏遂絕。 並付其使, 太宗異之, 圓白皎潔, 國

自林邑以南,皆卷髮黑身,通號爲「崑崙」。

婆利國,在林邑東南海中洲上。其地延袤數千里,自交州南渡海,經林邑、扶南、赤土、

象,鳴金擊鼓吹蠡爲樂。男子皆拳髮,被古貝布,橫幅以繞腰。 花形如皮弁,裝以眞珠瓔珞,身坐金牀。侍女有金花寶縷之飾,或持白拂孔雀扇。 丹丹數國乃至焉。 使隨林邑使獻方物。 穀一歲再熟。 其人皆黑色,穿耳附璫。 有古貝草,緝其花以作布,粗者名古貝,細者名白氎。 王姓刹利耶伽,名護路那婆,世有其位。 風氣暑熱,恆如中國之盛 貞觀四年,其王遣 行 :則駕 王戴

修國爲鄰,人皆學婆羅門書,甚敬佛法。貞觀九年,遺使來朝,貢方物 盤盤國, 在林邑西南海曲中,北與林邑隔小海,自交州船行四十日乃至。 其國與狼牙

癘毒。 十日行。 真臘國,在林邑西北,本扶南之屬國,「崑崙」之類。在京師南二萬七百里,北至愛州六 海中大魚有時半出,望之如山。 其俗東向開戶,以東爲上。 其王姓刹利氏。 有大城三十餘所, 有戰象五千頭,尤好者飼以飯肉。 每五六月中,毒氣流行,即以牛豕祠之,不者則 王都伊奢那城。 風俗被服與林邑同。 與鄰國戰,則象隊在 地饒瘴 五 穀

列傳

第一

百

四十

七

南壁

西南

聯

前,於背上以木作樓,上有四人,皆持弓箭。 國尙佛道及天神,天神爲大,佛道次之。

水眞臘; 甚厚。南方人謂眞臘國爲吉蔑國。 武德六年,遣使貢方物。 半以北多山阜,謂之陸眞臘,亦謂之文單國。高宗、則天、玄宗朝,並遣使朝 貞觀二年,又與林邑國俱來朝獻。太宗嘉其陸海疲勞,錫賚 自神龍以後,眞臘分爲二:半以南近海多陂澤處,謂之

了

即陸眞臘。 遣李摩那等來朝。 水真臘國,其境東西南北約員八百里,東至奔陀浪州,西至墮羅鉢底國,南至小海,北 其王所居城號婆羅提拔。國之東界有小城,皆謂之國。其國多象。元和八年,

其王姓察失利,字婆末婆那。 十八年,遣使來朝。二十一年,又遣使獻白鸚鵡及婆律膏,仍請馬及銅鐘,詔並給之。 陀洹國,在林邑西南大海中,東南與墮和羅接,去交趾三月餘日行。賓服於墮和羅。 土無蠶桑,以白氎朝霞布爲衣。俗皆樓居,謂之「干欄」。貞觀

肢, 同。 祗僮五人、鸚鵡、頻伽鳥幷異種名寶。 飲之亦醉。 城,作大屋 十二年,其王遣使貢方物。 文字,頗識 然後加以婆律膏及龍腦等香,積柴以燔之。 其國種稻,每月一熟。 墮婆登國,在林邑南,海行二月,東與訶陵、西與迷黎車接,北界大海。 風俗與訶陵略 墮 十三年,遣使進僧祗女二人、鸚鵡、玳瑁及生犀等。 訶凌國,在南方海中洲上居,東與婆利、西與墮婆登、北與眞臘接,南臨大海。 和羅國,南與盤盤、北與迦羅舍佛、東與眞臘接,西鄰大海。去廣州五月日行。 列 傳 |重閣,以椶櫚皮覆之,王坐其中,悉用象牙爲牀。 星曆。俗以椰樹花爲酒,其樹生花,長三尺餘,大如人膊,割之取汁以成酒,味甘, 第 貞觀十四年,遺使來朝。 百 四 + 七 二十三年,又遣使獻象牙、火珠,請賜好馬,詔許之。 亦有文字,書之於貝多葉。 南 西 大曆三年、四年皆遣使朝貢(II)。元和十年,遣使獻僧 南 以其使李訶內爲果毅,訶內請迴授其弟,詔褒而從 貞觀二十一年,其王遣使獻古貝、象牙、白 其死者,口實以金,又以金釧貫於四 食不用匙筯,以手而撮。 五二七三 豎木為

貞觀

亦有

檀,太宗璽書報之,并賜以雜物。

犬羊之皮,以爲外飾。坐皆蹲踞。男女椎髻,以緋束之,後垂向下。其首領謝元深,旣世爲 離。丈夫衣服,有衫襖大口袴,以綿綢及布爲之。右肩上斜束皮帶,裝以螺殼、虎豹猿狖及 自送之。 女夫慚,逃避經旬方出。 犯罪者,小事杖罰之,大事殺之,盜物倍還其臟。婚姻之禮,以牛酒爲聘。 以牛耕,但爲畬田,每歲易。俗無文字,刻木爲契。散在山洞間,依樹爲層巢而居,汲流以 **脋長,其部落皆尊畏之。謝氏一族,法不育女,自云高姓不可下嫁故也。** 皆自營生業,無賦稅之事。謁見貴人,皆執鞭而拜。有功勞者,以牛馬銅鼓賞之。 貞觀三年,元深入朝,冠烏熊皮冠,若今之髦頭,以金銀絡額,身披毛帔,韋皮行縢而 東謝蠻,其地在黔州之西數百里,南接守宮獠,西連夷子,北至白蠻行。土宜五穀,不 讌聚則擊銅鼓,吹大角,歌舞以爲樂。 好帶刀劍,未嘗捨 女歸夫家,皆母 有

篇。今萬國來朝,至於此輩章服,實可圖寫,今請撰爲王會圖。」從之。以其地爲應州,仍拜

又有南謝首領謝強,與西謝鄰,共元深俱來朝見,爲南壽

中書侍郎顏師古奏言:「昔周武王時,天下太平,遠國歸款,周史乃書其事爲王會

元深爲刺史,隸黔州都督府(至)。

(国)。

州刺史,後改爲莊州。

賜優論,兼同牂柯刺史授官。其牂柯兩州,戶口殷盛,人力強大,鄰側諸蕃,悉皆敬憚。 例入朝。今年懇訴稱州接牂柯,同被聲教,獨此排擯,竊自慚恥,謹遣隨牂柯等朝賀。伏乞特 軍謝文經「私」。黔中經略招討觀察使王礎奏:「前件刺史,建中三年一度朝貢,自後更不許隨 首領、繼襲攝蠻州巴江縣令、賜紫金魚袋宋萬傳,界首子弟大首領、朝散大夫、、牂州錄事參 國公、賜紫金魚袋宋鼎,左右大首領、朝散大夫、前檢校邛州刺史、賜紫金魚袋謝汕,左右大 巳改官訖,餘依舊。」 比兩州每三年一度朝貢,仍依料阿輪環差定,并以才幹位望爲衆推者充。」敕旨曰:「宋鼎等 貞元十三年正月,西南蕃大酋長、正議大夫、檢校蠻州長史、繼襲蠻州刺史、資陽郡開

餘。 南北十八日行,東西二十三日行。其風俗物產與東謝同。首領趙氏, 貞觀三年, 遺使入朝。 二十一年, 以其地置明州, 以首領趙磨爲刺史。 西趙蠻,在東謝之南,其界東至夷子,西至昆明,南至西洱河。 山洞阻深,莫知道 世爲酋長。有戶萬 里

|州 無徭役,唯征戰之時,乃相屯聚。刻木爲契。其法:劫盜者二倍還贓;殺人者出牛馬三十頭, 乃得贖死,以納死家。 一千五百里,西至昆明九百里。 **鲜牱蠻,首領亦姓謝氏。** 風俗物產,略與東謝同。 其地北去充州一百五十里(+)、東至辰州二千四百里、南至交 無城壁,散爲部落而居。 其首領謝龍羽, 土氣鬱熱,多霖雨。 大業末據其地,勝兵數萬 稻栗再熟。

使,丼齎國信物,降璽書賜其王焉• 來賀正。 察使差本道軍將充押領悍柯、昆明等使。」四年正月,遣使來朝。 **貢不絕,褒之也。自七年至十八年,凡五遣使來。** 朝,且獻方物。 元 十年閏五月,大酋長謝元齊死,詔立其嫡孫嘉藝襲其官封。二十五年,大酋長趙君道來 武德三年,遺使朝貢,授龍羽洋州刺史,封夜郎郡公。 長慶中, 大曆中、貞元初,數遣使朝貢。七年二月,授其酋長趙主俗官,以其歲初 亦朝貢不絕。 寶曆元年十二月, 七年、九年、十一年,凡三遣使來。 元和三年五月敕:「自今以後,委黔 遣使謝良震來朝。 貞觀四年十二月,遣使朝貢。 是月,遣中使魏德 其年十二月,又遣使 大和五年至會昌 和 南 領 其 觀 朝

年,凡七遣使來。

人橫布兩幅,穿中而貫其首,名爲「通裙」。其人美髮,爲髻髻垂於後。 瘴癘,山有毒草及沙虱、蝮蛇。 女,多賣與富人爲婢。 斜貫其耳,貴者亦有珠璫。 南平獠者, 東與智州、南與渝州、西與南州、北與涪州接公。 俗皆婦人執役。 人並樓居, 土多女少男, 爲婚之法, 女氏必先貨求男族, 其王姓朱氏,號爲劍荔王,遣使內附,以其地隸于渝 登梯而上,號爲「干欄」。男子左袵露髮徒 部落四千餘戶。 以竹筒 如筆,長三四 貧者無以嫁 跳; 土氣多 婦

州

餘城。 接, 侍女數百人,五日一聽政。 在山谷間。 東南與雅州接, 大者爲王,其次爲小王。 東女國,西羌之別種,以西海中復有女國,故稱東女焉。 其王所居名康延川,中有弱水南流,用牛皮爲船以渡。 女王號爲「賓就」。有女官,曰「髙霸」,平議國事。 界隔羅女蠻及白狼夷。 女王若死,國中多斂金錢,動至數萬,更於王族求令女二人而立 若 大王死,即 小王嗣立, 其境東西九日行,南北二十日行。 或姑死而婦繼,無有篡奪。 俗以女爲王。 在外官僚,並男夫爲之。其王 戶四萬餘衆,勝兵萬餘人,散 東與茂州、党項 有大小八十 其所居,

列傳

第

百四四

+

南

西南

羔変 之,內骨於瓶中,糅以金屑而埋之。 而 於天竺。 俗信之,名爲 有 起 鳥如雞,飛 ,飾以紋錦。 重 屋 以十一 一,王 至 息 一九層 入巫者之懷,因剖腹而視之,每有一穀,來歲必登,若有霜雪,必多災異。 100 月爲正。 爲 小鬟 國 其居喪, 人至六層。 髻, 其俗每至十月,令巫者齎楮詣山中, 飾之以金。 服飾 不改, 其王 國王 一將葬,其大臣親屬殉死者數 服青毛綾裙,下領衫, 爲父母則三年不櫛沐。 耳 垂璫, 足履鞣釋。 俗重婦 散糟麥於空, 上披青袍 貴 一人。 人死者, 人而輕 其袖 丈夫。 或剝其皮而藏 大咒呼鳥。 委地。 文字同 多則 其 俄

令宰臣 遣使 井 以男子 玉 而 降璽 遣之。 鈴鈴 來 衞 隋大業中,蜀王秀遣使招之,拒而不受。 爲 巨下 書慰撫之。 朝。 員 外將軍, 還至隴右,會突厥入寇,被掠於虜庭。 開元二 同宴。 仍以瑞錦製蕃服以賜之。 十九年十二月,其王趙曳夫遣子獻方物。 垂拱 又封 曳夫爲歸昌王, 二年,其王斂臂遣大臣陽劍左來朝,仍請官號。 授左金吾衞大將軍, 天授三年, 其王俄琰兒來朝。 武德中,女王湯滂氏始遣使貢 及頡利平,其使復來入朝。 賜其子帛八十匹,放還。 天寶元 年, 則天册拜斂臂爲左 命 太宗送令反國 方物,高祖 有 萬歲通天元年, 司宴於曲江 後復 厚資

南 水 國王姪薛尙悉囊、弱水國王董辟和、悉董國王楊息贊、淸遠國王蘇唐磨、咄霸國王董藐 貞元 九年七月,其王陽立悉與哥隣國王董臥庭、白狗國王羅陀忽、逋租 國王 弟鄧吉知、

其 之。土有絲絮,歲輸於吐蕃。 蓬 爲保寧都督 長 九 庭、 蘇 王 毅等官; 落。其悉 大首 史; 自 通 ,各率其 美玉鉢、 顚 來 以 銀 頟 薛 朝 進。 董 自 董 青光祿 尚悉囊試少府少監兼霸州 西川 國, 召見於麟德殿。 種落詣劍南西川內附。 府長 中 臥 南 在弱水 郞 卿等,皆授以官。 原多故, 節度使章皋處其衆於維、霸、保等州,給以 史伝」,襲哥隣王。 唐,並授銀靑光祿 大夫、試衞尉卿 西,故亦謂 皆爲吐蕃所役屬。 授立悉銀青光祿大夫、歸化州刺 至是悉與之同盟,相率獻款,兼齎天寶中國家所賜官誥共三 俄 之弱 ; 南水 其哥隣國等,皆散居山川。 又授女國王兄陽厥銀青光祿大夫、試太府卿; 大夫、武太僕卿。 立 長史;董 水 悉妹乞悉漫頗有才智, 西 國王薛莫庭及湯息贊(10)、 [悉董 其部落, 臥庭行 王。舊皆分隸邊 大者不過三二千戶, 至綿州卒,贈武 種 史; 糧耕牛, 咸樂生業。 從其兄來朝, 那,祖、父例 弱水王即國初女國之弱水部 鄧吉知試太府 董藐蓬 徳州 各置縣令 刺 授將軍 封 史,命其 女國 和義郡夫人 少卿 立 悉 清遠王弟 + 中郎、 唱後湯拂 心等數國 數 子 兼 利囉 丹 人 理 果 州

蠻及西山八國使。 忽 ,皆授試衞尉卿。 其年, 西山 松州生羌等二萬餘戶 其部落代襲刺 立悉等並赴明年元 史等官,然亦潛通吐蕃,故謂之「兩面羌」。 會訖 相繼 內附。 ,錫以金帛,各遣 其黏信部落主董夢葱,龍諾部落主董辟 還。 尋詔 加章皋統押近界羌、

唐地足矣。」子名曰盛邏皮。邏盛至京師,賜錦袍金帶歸國。 細奴邏生邏盛,武后時來朝。其妻方娠, 邏盛次姚州, 聞妻生子, 曰: 「吾且有子, 死於 **蜀時爲諸葛亮所征,皆臣服之。國初有蒙舍龍,生迦獨龐。迦獨生細奴邏,高宗時來** 在漢永昌故郡東,姚州之西。其先渠帥有六,自號「六詔」,兵力相埓,各有君長,無統 南韶蠻,本鳥蠻之別種也,姓蒙氏。 蠻謂王爲「韶」,自言哀牢之後,代居蒙舍州爲渠

大。每入覲,朝廷亦加禮異。二十七年,徙居大和城。天寶四載,歸義遣孫鳳迦異來朝,授 節度使王昱受歸義賂,奏六詔合爲一詔。歸義旣倂五詔,服羣蠻,破吐蕃之衆兵,日以驕 不相得,歸義常銜之。 鴻臚卿,歸國,恩賜甚厚,歸義意望亦高。時劍南節度使章仇兼瓊遣使至雲南,與歸義言語 公,賜名曰歸義。其後破洱河蠻,以功策授雲南王。歸義漸強盛,餘五詔浸弱。先是,劍南 開元初,邏盛死,子盛邏皮立。盛邏皮死,子皮邏閣立。二十六年,詔授特進,封越國

之。有所徵求,閣羅鳳多不應,虔陀遣人駡辱之,仍密奏其罪惡。閣羅鳳忿怨,因發兵反, 太守。仲通褊急寡謀,虔陀矯詐,待之不以禮。舊事,南詔常與其妻子謁見都督,虔陀皆私 七年,歸義卒,詔立子閣羅鳳襲雲南王。無何,鮮于仲通爲劍南節度使,張虔陀爲雲南 列傳第一百四十七 南豐 西南豐

地,非唐所有也。」仲通不許,囚其使,進兵逼大和城,爲南詔所敗。自是閣羅鳳北臣吐蕃, 反,閣羅鳳乘釁攻陷嶲州及會同軍,西復降尋傳蠻 涉海瘴死者相屬於路,天下始騷然苦之。宓復敗於大和城北,死者十八、九。會安祿山 年,劍南節度使楊國忠執國政,仍奏徵天下兵,俾留後、侍御史李宓將十餘萬,輦餉者在外, 吐蕃令閣羅鳳爲贊普鍾,號曰東帝,給以金印。蠻謂弟爲「鍾」。時天寶十一年也。十二 錄事參軍姜如芝俱來,請還其所虜掠,且言:「吐蕃大兵壓境,若不許,當歸命吐蕃,雲南之 攻圍虔陀,殺之,時天寶九年也。明年,仲通率兵出戎、嶲州。 閣羅鳳遣使謝罪,仍與雲南

之勞、重稅之困,利莫大焉。」牟尋善其言,謀內附者十餘年矣。會劍南西川節度使韋皋招撫 牟尋曰:「自昔南韶嘗款附中國,中國尙禮義,以惠養爲務,無所求取。今棄蕃歸唐,無遠戍 回爲淸平官,事皆咨之,秉政用事。餘淸平官五人,事回卑謹,或有過,回輒撻之。回嘗言於 學,雖牟尋、夢湊,回得箠撻,故牟尋以下皆嚴憚之。蠻謂相爲淸平官,凡置六人。牟尋以 更名曰蠻利,甚愛重之,命敎鳳迦異。及異牟尋立,又命敎其子尋夢湊。 鄭回者,本相州人,天寶中舉明經,授萬州西瀘縣令,萬州陷,爲所虜。 撫其衆。吐蕃役賦南蠻重數,又奪諸蠻險地立城堡,歲徵兵以助鎭防,牟尋益厭苦之。有 大曆十四年,閣羅鳳子鳳迦異先閣羅鳳死,立迦異子,是爲異牟尋,頗知書,有才智,善 閣羅鳳以回有儒學, 回久爲蠻師,凡授

諸蠻,苴烏星、虜望等歸化,微聞牟尋之意,因令蠻寓書於牟尋,且招懷之,時貞元四年也。 七年,又遣間使持書喩之。道出磨些蠻,其魁主潛告吐蕃。使至雲南,吐蕃已知之,令詰牢 牟尋懼,因給吐蕃曰:「唐使,本蠻也,韋皋許其求歸,無他謀。」遂執送吐蕃。吐蕃益疑

之,多召南韶大臣之子爲質,牟尋愈怨。

令佐時稱伴柯使,衣以伴柯服而入。佐時不肯,曰:「我大唐使,安得服小夷之服。」牟專不 得已,乃夜迎佐時,設位陳燈燭。佐時乃大宜詔書,牟尋恐吐蕃知,顧左右無色,而業已歸 是時也,吐蕃使數百人,先佐時在南詔,牟尋悉召諸種落與議歸化,或未畢至,未敢公言,密 其赤心耳。」上嘉之,乃賜牟尋詔書,因命韋皋遣使以觀其情。皋遂命巡官崔佐時至牟尋所 使皆至京師,且曰:「牟尋請歸大國,永爲藩國。所獻生金,以喻向北之意如金也;丹砂,示 唐,久之,歔欷流涕,皆俯伏受命。 都陽苴咩城,南去太和城十餘里,東北至成都二千四百里,東至安南如至成都,通水陸行。 凡三輩,致書與章皋,各資生金丹砂爲贄。三分前皋所與牟專書,各持其一爲信。歲中,三 九年四月,年尋乃與酋長定計遣使:趙莫羅眉由兩川,楊大和堅由黔中,或由安南。

室,一沉於西洱河,一置祖廟,一以進天子。閣勸即尋夢凑也。鄭回見佐時,多所指導,故佐 其明年正月, 異牟尋使其子閣勸及淸平官等與佐時盟於點蒼山神祠。 盟書一藏於神

時探得其情。 仍刻 金 契以獻。 乃請牟尋斬吐蕃使數人, 閣勸 賦詩以餞之。 牟尋乃去吐蕃所立帝號,私於佐時請復南詔舊名。 以示歸唐。 又得其吐蕃所興金印。 牟尋尋遣佐時

佐時與盟訖,

留二旬有六日而歸

神 千,乃許。 淸 册 欲 训 南 平官尹仇寬獻所受吐蕃印五,二用黃金,今賜請以黃金,從蠻夷所重,傳示無窮。從皋之 因徵兵以襲之,乃示寡弱, 詔,仍賜牟尋印,鑄用黃金,以銀爲窠,文曰:「貞元册南韶印。」先是,章皋奏南韶前遣 初 遂斷鐵橋, 遺使告捷。 吐蕃 牟尋遽遣兵五千人戍吐蕃,乃自將數萬踵其後,晝夜兼行,乘其無備,大破吐蕃於 因爭北庭,與迴鶻大戰,死傷頗衆,乃徵兵於牟尋,須萬人。牟尋旣定計歸我, 謂吐蕃曰:「蠻軍素少,僅可發三千人。」吐蕃少之,請益至五 且請章皋使閱其所虜獲及城堡,以取信焉。 時韋皋上言:「 牟

審將帥俘馘百人至京師。湊羅棟歸國,在道而卒,贈右散騎常侍。授尹輔酋檢校太子詹事兼 十一年三月,遣淸平官尹輔酋隨袁滋來朝。 弟也,錫賚甚厚。以尹仇寬爲檢校左散騎常侍,餘各授官有差。俄又封尹仇寬爲高溪郡王。 十 年八月, 遣使蒙湊羅棟及尹仇寬來獻鐸樂、浪人劍及吐蕃印八紐。 又得先沒蕃將衞景昇、韓演等,丼南韶所獲吐 凑羅棟,牟尋之

列

傳

御 左列中書三官宣奉行,復舊制也。 史中丞,餘亦差次授官。又降敕書賜異牟尋及子閣勸,淸平官鄭回、尹仇寬等各一書,書 九月,異牟尋遺使獻馬六十匹。

等先受吐蕃金字告身五十片。十四年,異牟尋遣酋望大將軍王丘各等賀正,兼獻方物。 領襲恭化郡王劉志寧試太常卿。二十年,南詔遣使朝貢。 九年正月旦,上御含元殿受南詔朝賀,以其使楊鎮龍武爲試太僕少卿,授黎州廓淸道蠻首 十二年,章皋於雅州會野路招收得投降蠻首領高萬唐等六十九人,戶約七千,兼萬唐

册立其君長。以少府少監李銑充册立弔祭使,左贊善大夫許撓佐副之。十二年至十五年, 比年遣使來朝,或年內二三至者。 四年正月,以太常少卿武少儀充弔祭使,仍册牟尋之子驃信苴蒙閣勸爲南詔王口,仍命鑄 「元和册南詔印」。七年十月,皆遣使朝貢。十一年五月,以龍蒙盛卒,廢朝三日。遣使來請 元和二年八月, 遣使鄧傍傳來朝, 授試殿中監。 三年十二月, 以異牟尋卒, 廢朝三日。

州,逼成都府,入梓州 年正月,其王蒙嵯頗以表自陳請罪,兼疏元穎過失。國家方事柔遠,專釋其罪,復遣使來朝。 乘我無備,大舉諸部入寇。 寶曆三年,大和元年,亦遣使來。三年,杜元穎鎭西川,以文儒自高,不練戎事。 西郭,驅劫玉帛子女而去。 牧守屢陳, 亦不之信。 上聞之,大怒,再貶元穎爲循州司馬。 十一月,蜀川出軍與戰,不利。 陷我邛 南蠻 明

百里。 百里。 **驃國,在永昌故郡南二千餘里,去上都一萬四千里。 其國境,東西三千里,南北三千五** 東隣眞臘國,西接東天竺國,南盡溟海,北通南詔些樂城界,東北拒陽苴咩城六千八 往來通聘迦羅婆提等二十國,役屬者道林王等九城,食境土者羅君潛等二百九十部

門,至二十不悟佛理,乃復長髮爲居人。其衣服悉以白氎爲朝霞,繞腰而已。不衣繒帛,云 出於蠶,爲其傷生故也。君臣父子長幼有序。華言謂之驃,自謂突羅成,闍婆人謂之徒里 本東之,復犯者撻其背,數止五,輕者止三,殺人者戮之。男女七歲則落髮,止寺舍,依桑 嬪姝甚衆,常數百人。其羅城構以塼甃,周一百六十里,豪岸亦構塼,相傳本是舍利 其王姓困没長,名摩羅惹。其國相名摩訶思那。其王近適則异以金繩牀, 其俗好生惡殺。 其土宜菽粟稻粱,無麻麥。其理無刑名桎梏之具,犯罪者以竹五十 城內有居人數萬家,佛寺百餘區。其堂宇皆錯以金銀,塗以丹彩,地以紫鑛,覆以 遠適則乘

掘。

移)因南詔重譯來朝,又獻其國樂凡十曲,與樂工三十五人俱。 古未嘗通 中國。 貞元中,其王聞南韶異牟尋歸附,心慕之。十八年日,乃遣其弟悉利 樂曲皆演釋氏經論之詞意。

蕁以悉利移爲試太僕卿。

夷不少矣,雖言語不通,嗜欲不同,亦能候律瞻風,遠修職貢。但患已之不德,不患人之不 夏者也。以圓蓋方輿之廣,廣谷大川之多,民生其間,胡可勝道,此謂蕃國者也。西南之蠻 史臣曰:禹畫九州,周分六服,斷長補短,止方七千,國賦之所均,王敎之所備,此謂華

來。何以驗之?貞觀、開元之盛,來朝者多也。

贊曰:五方異氣,所稟不同。維南極海,曰蠻與戎。惡我則叛,好我則通。 不可不德,使

其膽風。

校勘記

(1) 以艾承之 「承」字各本原作「蒸」,據唐會要卷九八改。

(三) 大曆三年四年 「四年」各本原作「四月」, 按册府卷九七二、大曆三年十一月,四年正月、十二

月,訶陵並遣使朝貢。 據改「四月」爲「四年」。

- 3 北至白鹭 「白」字各本原無,據唐會要卷九九、冊府卷九五七、御覽卷七八八補。
- 章皮行縢而著履 「韋」字各本原作「爲」,據唐會要卷九九、御覽卷七七八改。
- が無い 隸黔州都督府 「隸」字各本原作「領」,據新書卷二二二下南蠻傳、唐會要卷九九、御覽卷七八

八東謝蠻改。

- **?** 貞元十三年正月西南蕃大酋長……宋鼎…… 特州錄事參軍謝文經 此事云:「建中三年,大酋長檢校蠻州長史資陽郡公宋鼎與諸謝朝賀,德宗以其國小,不許。 新書卷二二二下南蠻傳記 訴
- 於點中觀察使王礎,……。 | 礎奏……請許三年一朝,詔從之。」
- **3** (4) 充州 西與南州北與涪州接 「充」字各本原作「充」,據通典卷一八七、新書卷四三下地理志改。 「南州北與」四字各本原無,據合鈔卷二五八上南平發傳改。 新書卷二
- 二二下南平獠傅作「西接南州、北涪州」。
- 「九」 保寧都督府長史 「保」字各本原作「寶」,據唐會要卷九九、寰宇記卷一七九改。
- 8 南水國王…… 「水」字各本原無,據唐會要卷九九、通鑑卷二三四補。
- 南韶王 「王」字各本原無,據唐會要卷九九補。
- 十八年 列 傳 「十」字各本原無,據唐會要卷一〇〇、冊府卷九七二、通鑑卷二三六補。 百 四 + 七 校 勘 12

舊唐書卷一百九十八

列傳第一百四十八

西戎

泥婆羅 天竺 **罽賓** 党項羌 康國 高昌 波斯 吐谷渾 拂菻 大食 焉耆 龜茲 疏勒 于闐

珠、玻瓈、車渠、珊瑚、琥珀、瓔珞,耳垂金鉤玉璫,佩寶裝伏突,坐獅子牀,其堂內散花燃 衣服以一幅布蔽身,日數盥浴。以板爲屋,壁皆雕畫。俗重博戲,好吹蠡擊鼓。頗解推測 用手,無匕箸。 盈虛,兼通曆術。 泥婆羅國,在吐蕃西。 其器皆銅。 事五天神,鐫石爲像,每日淸水浴神,烹羊而祭。其王那陵提婆,身著眞 多商賈,少田作。以銅爲錢,面文爲人,背文爲馬牛,不穿孔。 其俗翦髮與眉齊,穿耳,揎以竹筩牛角,綴至肩者以爲姣麗。 食

五二八九

列

傳

第

百四十八

西戏

栿皆飾珠寶。 香口。大臣及諸左右並坐於地,持兵數百列侍其側。宮中有七層之樓,覆以銅瓦,欄檻楹 那陵提婆之父,爲其叔父所篡,那陵提婆逃難於外,吐蕃因而納焉,克復其位,遂羈屬 樓之四角,各懸銅槽,下有金龍,激水上樓,注於槽中,從龍口而出,狀若飛

年,其王尸利那連陀羅又遣使朝貢。 懸釜而炊,須臾而熟。 其後王玄策爲天竺所掠,泥婆羅發騎與吐蕃共破天竺有功。 永徽二 貞觀中,衞尉丞李義表往使天竺,塗經其國,那陵提婆見之大喜,與義表同出觀阿耆婆 周迴二十餘步,水恆沸,雖流滾暴集,樂石焦金,未嘗增減。以物投之,卽生烟焰,

北連 L、拓拔氏,而拓拔最爲強族。俗皆土著,居有棟宇,其屋織犛牛尾及羊毛覆之,每年一易。 餘騎,小者數千騎,不相統一。有細封氏、費聽氏、往利氏、頗超氏、野辭氏、房當氏、米擒 吐谷渾,處山谷間,亙三千里。其種每姓別自爲部落,一姓之中復分爲小部落,大者萬 自周氏滅宕昌、鄧至之後,党項始強。其界東至松州,西接葉護,南雜春桑、迷桑等羌, 党項羌,在古析支之地,漢西羌之別種也。魏、晉之後,西羌微弱,或臣中國,或竄山

降。 名爲 俗尙武,無法令賦役。其人多壽,年一百五六十歲。不事產業,好爲盜竊,互相凌劫。 畜犛牛、馬、驢、羊,以供其食。不知稼穡,土無五穀。氣候多風寒,五月草始生,八月霜雪 甚,然不婚同姓。 復讎,若讎人未得,必蓬頭垢面跣足蔬食,要斬讎人而後復常。男女並衣裘褐,仍披大氊。 朝,常爲邊患。 求大麥於他界,醞以爲酒。妻其庶母及伯叔母、嫂、子弟之婦,淫穢烝褻,諸夷中最爲 火葬。 無文字,但候草木以記歲時。三年一相聚,殺牛羊以祭天。自周及隋,或叛或 老死者以爲盡天年,親戚不哭;少死者則云夭枉,乃悲哭之。死則焚屍,

長相 領爲 步賴因來朝,宴賜甚厚,列其地爲軌州,拜步賴爲刺史,仍請率所部討吐谷渾。 貞觀三年,南會州都督鄭元璹遣使招諭,其酋長細封步賴舉部內附,太宗降璽書慰撫 刺刺 : 次率部落皆來內屬,請同編戶,太宗厚加撫慰,列其地爲崌、淎、巖、遠四州,各拜 其後諸

也。」洛生知其不悟,於是率輕騎襲之,擊破赤辭於肅遠山,斬首數百級,虜雜畜六千而還。 福,赤辭曰:「我被渾主親戚之恩,腹心相寄,生死不貳,焉知其他。汝可速去,無令汚我刀 而赤辭不至。李靖之擊吐谷渾,赤辭屯狼道坡以抗官軍。廓州刺史久且洛生遣使論以禍 有羌 **會拓拔赤辭者,初臣屬吐谷渾,甚爲渾主伏允所暱,與之結婚。及貞觀初,諸羌歸**

列

之「弭薬」。 內徙,始移其部落於慶州,置靜邊等州以處之。 屬,拜赤辭爲西戎州都督,賜姓李氏,自此職貢不絕。其後吐蕃強盛,拓拔氏漸爲所逼,遂請 赤辭見其宗黨離, 又令岷州都督李道彦說論之, 始有歸化之意。 赤辭從子思頭密送誠款,其黨拓拔細豆又以所部來降。 後岷州都督劉師立復遣人招誘, 其故地陷於吐蕃,其處者爲其役屬,吐蕃謂 於是與思頭並率衆內

及吐谷渾舉國內屬,黑党項酋長號敦善王因貢方物。 又有黑党項,在於赤水之西。 李靖之擊吐谷渾也,渾主伏允奔黑党項,居以空閑之地。

又有雪山党項,姓破丑氏,居於雪山之下,及白狗、春桑、白蘭等諸羌,自龍朔已後,並

爲吐蕃所破而臣屬焉。

實應初,其首領來朝,請助國供靈州軍糧,優詔褒美。 夏等界內。 其 在 西北邊者,天授三年內附,凡二十萬口,分其地置朝、吳、浮、歸等十州,仍散居靈、 自至德已後,常爲吐蕃所誘,密以官告授之,使爲偵道,故時或侵叛,尋亦底寧。

州部落、寧定州部落、羅雲州部落、朝鳳州部落,並詣山南西道都防禦使、梁州刺史臧希讓 月, 其歸順州部落、乾封州部落、歸義州部落、順化州部落、和寧州部落、和義州部落、保善 其 在徑、隴州界者,上元元年率其衆十餘萬詣鳳翔節度使崔光遠請降。 寶應元年十二

請州印,希讓以聞,許之。

撫党項使。以部落繁富,時遠近商賈,齎繒貨入貿羊馬。至大和、開成之際,其藩鎭統領無 永安城鎮將阿史那思昧擾其部落〔三〕,求取駝馬無厭,中使又贊成其事,党項不堪其弊,遂 者,以侍御史、內供奉鄭賀主之,仍各賜緋魚以重其事。 久而無狀,尋皆罷之。 小梗。會昌初,上頻命使安撫之,兼命憲臣爲使,分三印以統之。在哪、寧、延者,以侍御 緒,恣其貪婪,不顧危亡,或強市其羊馬,不酬其直,以是部落苦之,遂相率爲盜,靈、鹽之路 率部落奔過河。 元和九年五月,復置宥州以護党項。 十五年十一月,命太子中允]李寮爲宣 居慶州者號爲東山部落,居夏州者號爲平夏部落。永泰、大曆已後,居石州,依水草。至是 石州奔過河西。党項有六府部落,日野利越詩、野利龍兒、野利厥律、兒黃、野海、野窣等。 史、內供奉崔君會主之;在鹽、夏、長、澤者,以侍御史、內供奉字鄠主之;在鹽、武、麟、勝 貞元三年十二月,初禁商賈以牛、馬、器械於党項部落貿易。十五年二月,六州党項自

城,王都高昌,其交河城,前王庭也;田地城,校尉城也。勝兵且萬人。厥土良沃,穀麥 高昌者,漢車師前王之庭,後漢戊已校尉之故地,在京師西四千三百里。其國有二十 傳第一百四十八 西戎

嵗 亦採中國之號焉。 大夫、車師太守、封弁國公,仍以 再 熟,有蒲萄酒, 其王 宜五果,有草名白疊,國人採其花,織以爲布。 一麴伯雅,即後魏時高昌王嘉之六世孫 成屬宇文氏女爲華容公主以妻之。 也。 隋煬帝時入朝,拜左光祿 有文字,知書計,所置官

預宗親 狗,自此始也。 域 文泰 、諸國所有動靜,輒以奏聞。 又獻狗雄雌各一,高六寸,長尺餘,性甚慧,能曳馬銜燭,云本出拂菻國。 武德二年,伯雅死,子文泰嗣,遣使來告哀, ,韶賜李氏,封常樂公主,下韶慰諭之。 太宗嗣位,復貢玄狐裘,因賜其妻宇文氏花鈿一具。 貞觀四年多,文泰來朝,及將歸蕃,賜遺甚厚。其妻宇文氏請 高祖遣前河州刺史朱惠表往 宇文氏復貢玉盤 用之。 中國 有拂菻 七年, 西

敗,或 證 議 泰 三年,太宗謂其使曰:「高昌數年來朝貢脫略,無藩臣 擊破焉耆 事。 又與葉護連結,將擊伊吾。 **豈得如此!** 時 有奔高昌者,文泰皆拘留不遣。 文泰竟不遺,乃遣其長史麴雍 西戎諸國來朝貢者,皆塗經高昌,文泰後稍壅絕之。 三城,虜其男女而 今茲歲首,萬國來朝,而文泰不至。 去。 太宗以其反覆,下書切讓,徵其大臣冠軍阿史那矩 焉耆王 來謝罪。 太宗詔令括送,文泰尙隱蔽之。 上表訴之,太宗遣虞部郎中李道裕往 杒, 大業之亂,中國 一禮,國中署置官號, 增城深塹,預備討伐。 伊吾先臣西突厥,至是內屬,文 人多投於突厥。 準我 又尋與西突厥乙毗 日者我使 百 問其狀。 僚,稱臣於 入朝,將與 及頡 利

管,率左屯衞大將軍薛萬均及突厥、契苾之衆,步騎數萬衆以擊之。時公卿近臣,皆以行經 使。』事人闕禮,雜間鄰好,惡而不誅,善者何勸?明年,當發兵馬以擊爾。」是時薛延陀可汗 欲來者,文泰悉拘留之。又遣使謂薛延陀云:『旣自爲可汗,與漢天子敵也,何須拜謁其 彼,文泰云:『鷹飛于天,雉竄于蒿,猫遊于堂,鼠安于穴,各得其所,豈不活耶!』又西域使 爲憂也?」及聞王師臨磧口,惶駭計無所出,發病而死。 運不給,若發三萬以下,吾能制之。加以磧路艱險,自然疲頓,吾以逸待勞,坐收其弊,何足 謂所親曰:「吾往者朝覲,見秦、隴之北,城邑蕭條,非復有隋之比。設今伐我,發兵多則糧 沙磧,萬里用兵,恐難得志,又界居絕域,縱得之,不可以守,競以爲諫,太宗皆不聽。文泰 復下璽書,示以禍福,徵之入朝。文泰稱疾不至。太宗乃命吏部尚書侯君集爲交河道大總 表請爲軍向導,以擊高昌,太宗許之。令民部尚書唐儉至延陀,與謀進取。太宗冀其悔過,

者,先王也。咎深譴積,身已喪亡。智盛襲位無幾,君其赦諸?」君集謂曰:「若能悔禍,當 **)集分兵掠地,下其三郡、五縣、二十二城,戶八千,口三萬七千七百,馬四千三百匹。 其界東** 面縛軍門也。」又命諸軍引衝車、拋車以逼之,飛石雨下,城中大懼。 而退。 其子智盛嗣立。 旣而君集兵奄至柳谷,進趨田地城,將軍契苾何力爲前軍,與之接戰 大軍繼之,攻拔其城,虜男女七千餘口,進逼其都。智盛移君集書曰:「有罪於天子 智盛窮蹙,出城降。

帛,約 悦,宴百僚,班賜各有差,曲赦高昌部內從軍兵士已上,父子犯死罪已下,期親犯流已下,大 霜 西八百里,南北五 功犯徒已下,小功總麻犯杖罪,悉原之。 雪,迴手自消滅。」文泰使人捕其初唱者,不能得。 有急相爲表裏。及聞君集兵至,欲谷設懼而西走,不敢救。 百里。先是,其國童謠云:「高昌兵馬如霜雪,漢家兵馬如日月。 初,文泰與西突厥欲谷設通和,遺其金 君集尋遣使告捷,太宗大 日月照

城,與高昌相影響,至是慴而來降,以其地爲庭州。 從,竟以其地置西州,又置安西都護府,留兵以鎭之。 豪右,皆徙中國。 須千餘人鎭守,數年一易,每及交番,死者十有三四,遣辦衣資,離別親戚,十年之後,隴右 人而立其子,所謂伐罪弔民,威德被於遐外,爲國之善者也。今若利其土壤,以爲州縣,常 商胡被其遏絕貢獻,加之不禮大國,遂使王誅載加。若罪止文泰,斯亦可矣,未若撫其 時太宗欲以高昌爲州縣,特進魏徵諫曰:「陛下初臨天下,高昌夫婦先來朝謁。 陛下終不得高昌撮穀尺布以助中國,所謂散有用而事無用,臣未見其可。」太宗不 於是勒石紀功而旋。 初,西突厥遣其葉護屯兵於可汗浮圖 其智盛君臣及其 自後數

弟智湛爲右武衞中郎將,天山縣公(三)。及太宗崩,刊石像智盛之形,列於昭陵玄闕之下。智 麴氏有國,至智盛凡九世一百三十四年而滅。 專拜智盛爲左武衞將軍,封金城郡公;

麟德中終於左驍衛大將軍、西州刺史。 天授初, 其子崇裕授左武衞大將軍, 交河郡王。

卒,封襲遂絕。

沫。 得 足而 庶母 出 近代已來,有王公、僕射、尙書、郞中。其俗頗識文字。男子通服長裙繒帽,或戴羃羅。婦 地 人 「良馬、 (以金花爲首飾,辮髮縈後,綴以珠貝。 其婚姻富家厚出聘財,貧人竊女而去。 父卒,妻其 數千里。 埋 龍 一沙中。 西北 止 ;兄亡,妻其諸嫂。 喪有服制,葬訖而除。 種。 吐谷渾,其先居於徒河之淸山,屬晉亂,始度隴,止於甘松之南,洮水之西,南極白蘭, **氂牛、銅、鐵、朱砂之類。** 嘗得波斯馬,放入海,因生驄駒,能日行千里,故代稱「青海驄」焉。 地**兼鄯善、且** 殺人及盜馬者罪死,他犯則徵物以贖罪。 有流沙數百里,夏有熱風,傷弊行旅。 有城郭而不居, 隨逐水草, 廬帳爲室, 肉酪爲糧。其官初有長史、司馬、將軍。 人以爲候,即以氊擁蔽口鼻而避其患。 有青海,周週八百里,中有小山,至多,放牝馬於其上,言 國無常稅,用度不給,輒斂富室商人,以取 風之將至,老駝便知之,則引項而鳴,以口 氣候多寒,土宜大麥、蔓菁,頗有菽粟。

隋煬帝時,其王伏允來犯塞,煬帝親總六軍以討之,伏允以數十騎潛於泥嶺而遁,其仙 百 四十八 西 戎

伏允 鴻 懸水鎭,擊破之,虜牛羊二萬餘頭而還。 時伏允年老昏耄,其邪臣天柱王惑亂之,拘我行人 戰, 段 鄯州 太宗遣使責讓之,徵伏允入朝,稱疾不至。仍爲其子尊王求婚,於是責其親迎以羈縻之。 使朝貢,以順爲請,高祖乃遣之。太宗卽位,伏允遣其洛陽公來朝,使未返,大掠鄯州而去。 臚 允 志玄率邊兵及契苾、党項之衆以擊之。去青海三十里,志玄與左驍衞將軍梁洛仁不欲 頓軍遲留不進,吐谷渾遂驅青海牧馬而遁。亞將李君羨率精騎別路,及賊於青海之南 | 又稱疾不肯入朝,有韶停婚,遣中郎將康處直諭以禍福。 通 悉收故地,復爲邊患。 丞趙德楷。 刺史李玄運上言:「吐谷渾良馬悉牧青海,輕兵掩之,可致大利。」於是遣左驍衞大將軍 率男女十餘萬口來降。煬帝立其質子順爲王,送之本國,令統餘衆,尋復追還。大業末, 和 ,令擊軌以自効,當放順返國。 伏允大悅, 興兵擊之, 戰于庫門, 交綏而退。 太宗頻遣宣諭,使者十餘返,竟無悛心。 高祖受禪,順自江都來歸長安。 時李軌循據凉州,高祖遣使與 伏允遣兵寇蘭、廓二州。時 頻遣

諸將頻與賊遇,連戰破之,獲其高昌王慕容孝雋。 道彥爲赤水道行軍總管,利州刺史高甑生爲鹽澤道行軍總管,丼突厥、契茲之衆以擊之。 |道宗爲||鄯州道行軍總管,仍爲||靖副;||涼州都督||李大亮爲且沫道行軍總管,岷州都督||李 貞觀 九年,詔特進李靖爲西海道行軍大總管,兵部尚書侯君集爲積石道行軍總管,任 孝雋有雄略,伏允心膂之臣也。靖等進

山,飲馬烏海,獲其名王梁屈忽,經塗二千餘里空虛之地,盛夏降霜,多積雪,其地乏水草, 中,衆稍亡散,能屬之者纔百餘騎,乃自縊而死。國人乃立順爲可汗,稱臣內附。 邏貞谷,伏允子大寧王順窮蹙,斬其國相天柱王,舉國來降。伏允大懼,與千餘騎遁于磧 將士噉冰,馬皆食雪。又達于柏梁,北望積石山,觀河源之所出焉。兩軍會於大非川,至破 及其餘黨,破之。磧中乏水,將士皆刺馬血而飮之。侯君集與江夏王道宗趣南路,登漢哭 至且沫西境。或傳伏允西走,渡圖倫磧,欲入于闐。 至赤海,遇其天柱王部落,擊大破之,遂歷于河源。李大亮又俘其名王二十人,雜畜數萬, 將軍薛萬均率輕銳追奔,入磧數百里,

以其愎諫違衆,獨陷迷途,遂誅邪臣,存茲大計。 武。其子大寧王慕容順,隋氏之甥,志懷明悟,長自中土,幸慕華風,爰見時機,深識逆順。 野心彌熾。莫顧藩臣之禮,曾無事上之節,草竊疆場,虐割兆庶,積惡旣稔,天亡有徵。朕 君臨四海,含育萬類,一物失所,責深在予。所以爰命六軍,申茲九伐,義存活國,情非黷 韶曰:「吐谷渾擅相君長,竊據荒裔,志在凶德,政出權門。 酋渠攜貳,種落怨憤,長惡不悛, 子,及得返國,意常快快。會李構等諸軍所向克捷,自以失位,欲因此立功,由是遂降。乃 子能立功,足以補過,旣往之釁,特宜原免。然其建國西鄙,已歷年代,即從廢絕,情所 順,即伏允之嫡子也。初爲侍子於隋,拜金紫光祿大夫,久不得歸,伏允遂立他子爲太 翻然改轍,代父歸罪,忠孝之美,深有可

未忍 ,繼其宗祀,允歸令胤(1)。 可對順爲西平郡王,仍授趙胡呂烏甘豆可汗。」

幾爲臣下所殺。 太宗恐順不能靜其國,仍遺李大亮率精兵數千,爲其聲援。順旣久質於隋,國人不附, 其子燕王諾曷鉢嗣立。

以 信數千帳 遺右威衞 不許之。 位,以其尚主,拜駙馬都尉,賜物四十段。 太宗命民部尚書唐儉持節撫慰之。 王以兵迎之。 因欲襲擊公主,劫諾曷鉢奔于吐蕃 妻之,資送甚厚。 諾曷鉢 , 遺准陽王道明持節册拜, 賜以鼓纛。 諾曷鉢旣幼,大臣爭權,國中大亂。 吐蕃大怒,率兵以擊吐谷渾,諾曷鉢旣不能禦,脫身及弘化公主走投凉州。 爲刺 來內屬,韶左武衞大將軍蘇定方爲安置大使,始徙其部衆于靈州之地,置安樂州, 大將軍薛仁貴等救吐谷渾,爲吐蕃所敗,於是吐谷渾遂爲吐蕃所倂。 鄯州刺史杜鳳舉與威信王合軍擊丞相宣王,破之,殺其兄弟三人,遣使言狀。 史,欲其安而且樂也。 十五年, 諾曷鉢所部丞相宜王專權(思),陰謀作難,將徵兵, 詐言祭山神, ,期有日矣。 太宗崩, 太宗遺兵援之,封爲河源郡王,仍授烏地也拔勒豆 其後與吐蕃互相攻伐,各遣使請兵救援,高宗皆 諾曷鉢因入朝請婚。 刻石圖諾曷鉢之形, 諾曷鉢知而大懼,率輕騎走鄯善城,其威信 十四年,太宗以弘化公主 列於昭陵之下。 諾曷鉢以親 高宗嗣 高宗

垂拱四年,諾曷鉢卒,子忠嗣。 忠卒,子宣趙嗣。 聖曆三年,授宜趙左豹韜衞員外大將

以朔方節度副使、左金吾衞大將軍同正慕容復爲襲長樂州都督、青海國王、烏地也拔勒豆 其部衆又東徙,散在朔方、河東之境。今俗多謂之退渾,蓋語急而然。 軍,仍襲父鳥地也拔勒豆可汗。宣趙卒,子曦皓嗣。曦皓卒,子兆嗣。 貞元十四年十二月, 及吐蕃陷我安樂州,

百五十年。 吐谷渾自晉永嘉之末,始西渡洮水,建國於羣羌之故地,至龍朔三年爲吐蕃所滅,凡三

未幾,卒,其封襲遂絕。

突騎支。勝兵二千餘人,常役屬於西突厥。其地良沃,多蒲萄,頗有魚鹽之利 焉耆國,在京師西四千三百里(长),東接高昌,西鄰龜茲,即漢時故地。其王姓龍氏,名

既立,素善焉耆,令與焉耆爲援。 西突厥國亂,太宗遣中郎將桑孝彥領左右胄曹韋弘機往安撫之,仍册立咥利失可汗。 突厥莫賀設與咄陸、弩失畢不協,奔于焉耆,咄陸復來攻之。六年,遣使言狀,并貢名馬。 遂閉, 西域朝貢者皆由高昌。及是, 高昌大怒, 遂與焉耆結怨, 遺兵襲焉耆, 大掠而去。 貞觀六年,突騎支遣使貢方物,復請開大磧路以便行李,太宗許之。自隋末罹亂,磧路 十二年,處月、處密與高昌攻陷焉耆五城,掠男女一千五 可汗

傳第一百四十八

西戎

破 百 高昌,其王詣軍門稱謁。 焚其廬舍而去。 十四年,侯君集討高昌,遣使與之相結,焉耆王大喜,請爲聲援。 焉耆人先爲高昌所虜者,悉歸之。 由是遺使謝恩,幷貢方物。 及

突騎支丼其妻子送行在所,韶宥之。 行,夜至城下,潛遣將士浮水而渡,至曉, 道,以頡鼻弟栗婆準爲鄉導。 虜其王突騎支,首虜千餘級。 孝恪請擊之,太宗許焉。 其年, 西突厥重臣屈利啜爲其弟娶焉耆王女,由是相爲脣齒,朝貢遂闕。 會焉耆王弟頡鼻葉護兄弟三人來至西州,孝恪選步騎三千出銀山 以栗婆準導軍有功, 馬耆所都城,四面有水,自恃險固,不**虞於我**。 一時攀堞,鼓角齊震,城中大擾。 留攝國事而還。 時駕幸洛陽宮,孝恪鎖 孝恪縱兵擊之, 安西都護郭 孝恪倍道兼

|茲,保其東城,以禦官軍,社爾擊擒之,數其罪而斬焉。 殺。 以修職貢。及太宗葬昭陵,乃刻石像龍突騎支之形,列於玄闕之下。 懼 令其吐屯來攝

焉耆,遣使朝貢。 而返國。 薛婆阿那支旣得處般啜爲搜,遂有國。及阿史那社爾之討龜茲,阿那支大懼,遂奔龜 杒 西突厥屈利啜將兵來援焉耆,孝恪還師三日,屈利啜乃囚栗婆準,而西突厥處般啜 焉耆又立栗婆準從父兄薛婆阿那支爲王。 太宗數之曰:「焉耆者,我兵擊得,汝何人,輒來統攝。」吐屯 處般啜乃執栗婆準送於龜茲, 求得阿那支從父弟先那準立爲王, 自是朝貢不絕。 爲所

其王以錦蒙項,著錦袍金寶帶,坐金獅子牀。有良馬、封牛。饒蒲萄酒,富室至數百石 龜茲國, 男女皆翦髮,垂與項齊,唯王不翦髮。學胡書及婆羅門書、算計之事,尤重佛法。 即漢西域舊地也,在京師西七千五百里。其王姓白氏。有城郭屋宇,耕田畜

貞觀 護郭孝恪來伐焉耆,龜茲遣兵援助,自是職貢頗闕。 四年,又遣使獻馬,太宗賜以璽書,撫慰甚厚,由此歲貢不絕,然臣於西突厥。安西都 高祖卽位,其主蘇伐勃駃遣使來朝。勃駃尋卒,子蘇伐疊代立,號時健莫賀俟利發。

|利發見||威兵少,悉衆而至。||威退行三十里,與繼叔軍會,合擊大破之。其王退保都城,社爾 與龜茲王相遇,及其相那利、將羯獵顚等,有衆五萬,逆拒王師。威乃僞遁而引之,其王俟 其都城三百里。遣伊州刺史韓威率千餘騎爲前鋒,右驍衞將軍曹繼叔次之。西至多褐城, 焉耆王棄城而遁,社爾遣輕騎追擒之。龜茲大震,守將多棄城而走。社爾進屯磧石(中),去 進軍逼之,王乃輕騎而走,遂下其城,令孝恪守之。遣沙州刺史蘇海政、倚輦奉御薛萬備以 十餘萬騎,以伐龜茲。 爾爲崑山道行軍大總管,與安西都護郭孝恪、司農卿楊弘禮率五將軍,又發鐵勒十三部兵 伐疊死,其弟訶黎布失畢代立,漸失藩臣禮。二十年,太宗遣左驍衞大將軍阿史那社 社爾旣破西蕃處月、處密,乃進師趨其北境,出其不意,西突厥所署

那利 精騎 宗之葬昭陵, 部郎中崔義起 等。 尋放還蕃,撫其餘衆,依舊爲龜茲王,賜物一千段。 五 所 其 逼之, ,虜男女數萬 羯獵顕等獻於社廟。 相 那利僅以 行六百 乃刻石像其形,列於玄闕之前。 與曹繼 口。 里 身免,潛引 ,其王窘急, 叔、韓威等擊之,那利敗走。 社 爾因立其王之弟葉護爲王,勒石紀功而旋。 尋以訶黎布失畢爲左武翊衞中鄓將,那利已下授官各有差。 西突厥之衆幷其國兵萬餘人,來襲孝恪,殺之,官軍 退保于撥換城。 永徽元年,又以訶黎布失畢爲右驍衛大將軍, 尋爲龜茲 社爾等進軍圍之, 人所執以詣軍。 擒其王及大將羯獵 俘其王訶黎布失畢及 前後破其大城 ·大擾。 倉 顚

之,則天竟不許。 萬 傑、阿史那忠節大破吐蕃,克復龜茲、于閩等四鎮, 其後吐蕃大入,焉耆已西四鎭城堡, 人以鎭之。 謂之「四鎭」。高宗嗣位, 先是,太宗旣破龜茲,移置安西都護府於其國城,以郭孝恪爲都護,兼統于闐、 既徵發內地精兵,遠逾沙磧, 其安西都護,則天時有田揚名, 不欲廣地勞人, 並爲賊所陷。 丼資遣衣糧等,甚爲百姓所苦。 復命有司棄龜茲等四鎮, 中宗時有郭元振,開元初則張孝暠、杜暹, 自此復於龜茲置安西都護府, 則天 臨朝,長壽元年,武威軍總管王孝 移安西依舊於西州。 言事 者多請棄 用漢兵三 疏勒、碎

皆有政績,爲夷人所伏。

厥以女妻王。 勝兵二千人。俗事祇神,有胡書文字。 開元十六年,玄宗遣使册立其王裴安定爲疏勒王。 疏勒國,即漢時舊地也。 西帶葱嶺,在京師西九千三百里。 貞觀九年,遺使獻名馬,自是朝貢不 其王姓裴氏。 貞觀 中,突

爲右驍衞將軍,並賜金帶、錦袍、布帛六十段,幷宅一區,留數月而遣之,因請留子弟以宿 振,請因此機,願以輕騎羈取于闖之王。」社爾乃遣萬備率五十騎抵于闖之國,萬備陳國威 使其子以駝萬三百匹饋軍。及將旋師,行軍長史薛萬備請社爾曰:「今者旣破龜茲,國威已 使獻玉帶,太宗優詔答之。十三年,又遣子入侍。及阿史那社爾伐龜茲,其王伏闍信大懼, 俗多機巧,好事祆神,崇佛教。先臣于西突厥。其王姓尉遲氏,名屈密云。 靈,勸其入見天子,伏闍信於是隨萬備來朝。 太宗葬昭陵,刻石像其形,列於玄闕之下。 于闐國,西南帶葱嶺,與龜茲接,在京師西九千七百里。勝兵四千人。其國出美玉。 高宗嗣位,拜右驍衞大將軍,又授其子葉護玷 貞觀六年,遺

垂拱三年,其王伏闍雄復來入朝。 |天授三年, 傳 百 四 十 西 伏闍雄卒, 則天封其子曔爲于闐國王。 五三〇五

開元 難,因堅請留宿衞,故有是命。 監門衞率葉護曜爲太僕員外卿,仍同四鎭節度副使, 十六年,復册立尉遲伏師爲于闐王,數遣使朝貢。 事在勝傳。 權知本國事。以勝至德初領兵赴國 乾元三年,以于闐王尉遲勝弟守左

中見有其迹焉。 神,累石爲宮闕,皆雕文刻鏤,非人力所及。阿育王頗行苛政,置炮烙之刑,謂之地獄,今城 際大海,與扶南、林邑鄰接;西天竺與罽賓、波斯相接;中天竺據四天竺之會,其都城週週 自然而立,僮僕甚盛。於是使役百神,築城以統之,經日而就。 七十餘里,北臨禪連河。云昔有婆羅門領徒千人,肄業於樹下,樹神降之,遂爲夫婦。宮室 邑數百。南天竺際大海;北天竺担雪山,四周有山爲壁,南面一谷,通爲國門,東天竺東 天竺:其一日中天竺,二日東天竺,三日南天竺,四日西天竺,五日北天竺。 地各數千里,城 天竺國,即漢之身毒國,或云婆羅門地也。在葱嶺西北公,周三萬餘里。其中分爲五 此後有阿育王,復役使鬼

有金剛,似紫石英,百鍊不銷,可以切玉。又有旃檀、鬱金諸香。 中天竺王姓乞利咥氏,或云刹利氏,世有其國,不相篡弑。 厥土卑濕暑熱,稻歲四熟。 通於大秦,故其寶物或至

之中野,以施禽獸;或流之於河,以飼魚鼈。無喪紀之文。謀反者幽殺之,小犯罰錢以贖 罪。不孝則斷手則足,截耳割鼻,放流邊外。有文字,善天文算曆之術。其人皆學悉曇章 致敬極者,舐足摩踵。家有奇樂倡伎。其王與大臣多服錦罽。上爲螺髻於頂,餘髮翦之使 快南、交趾貿易焉。百姓殷樂,俗無簿籍,耕王地者輸地利。以齒貝爲貨。人皆深目長鼻。 云是梵天法。書於貝多樹葉以紀事。不殺生飮酒。國中往往有舊佛跡。 俗皆徒跣。衣重白色,唯梵志種姓披白疊以爲異。死者或焚屍取灰,以爲浮圖;或委

大亂。 有也。」乃膜拜而受詔書,因遣使朝貢。 太宗以其地遠,禮之甚厚,復遣衞尉丞李義表報使。 北面以臣之,威勢遠振,刑政甚肅。貞觀十五年,尸羅逸多自稱摩伽陀王,遣使朝貢,太宗降 珠及鬱金香、菩提樹 尸羅逸多遣大臣郊迎,傾城邑以縱觀,焚香夾道,逸多率其臣下東面拜受敕書,復遣使獻火 璽書慰問,尸羅逸多大驚,問諸國人曰:「自古曾有摩訶震旦使人至吾國乎?」 隋煬帝時,遣裴矩應接西蕃,諸國多有至者,唯天竺不通,帝以爲恨。當武德中,其國 其嗣王尸羅逸多練兵聚衆,所向無敵,象不解鞍,人不釋甲,居六載而四天竺之君皆 皆曰:「未之

使天竺,其四天竺國王咸遣使朝貢。 貞觀十年,沙門玄奘至其國, 將梵本經論六百餘部而歸。 會中天竺王尸羅逸多死,國中大亂,其臣那伏帝阿羅 先是遺右率府長史王玄策

得方士 俘虜耶 那順 匹。 赴水溺死者且萬人,阿羅那順棄城而遁, 從玄策 成 臣曰:「夫人耳目玩於聲色, 諸 延年之藥。 (,服竟不効,後放還本國。 國 篡立 貢 於是天竺 一那羅 獻之物。 昔中山以貪寶取弊,蜀侯以金牛致滅,莫不由之。」拜玄策朝散大夫。 玄策 ,乃盡發胡兵以拒玄策。 令兵部尚書崔敦禮監主之,發使天下,採諸奇藥異石,不可稱數。 邇娑婆寐,自言壽二百歲,云有長生之術。太宗深加禮敬,館之於金飈門內,造 震懼,俘阿羅那順以歸。 與副使蔣師仁率二國兵進至中天竺國城,連戰三日,大破之,斬首三千餘級, 玄策 乃挺身宵遁,走至吐蕃,發精銳一千二百人,丼泥婆羅國七千餘騎,以 口鼻耽於臭味,此乃敗德之源。若婆羅門不劫掠我使人,豈爲 太宗之葬昭陵也,刻石像阿羅那順之形,列於玄闕之下。 玄策從騎三十人與胡禦戰,不敵,矢盡,悉被擒。 二十二年至京師,太宗大悅,命有司告宗廟,而謂羣 師仁進擒獲之。 虜男女萬二千人,牛馬三萬餘頭 延 是時就其國 歷歲月,藥 胡並掠

佛頂 其王 南天竺國復遣使來朝。 ′ 南天竺王 骨及錫杖。 發使貢 五 天竺所屬之國數十, 以奇珍異物及地圖,因請老子像及道德經。 遮婁其拔羅婆、北天竺王婁其那那、中天竺王地婆 貞觀 二十年,遣使貢方物。 景雲元年,復遣使貢方物。 風俗物產略同。 天授二年, 有伽沒路國,其俗開東門以向日。 東天竺王摩羅枝摩、 開元二年, 那揭陀國,有醯羅城,中 西那 西天竺復遣使貢方物。 ~',並來! 朝獻。 西天竺王 王玄策至, 有重閣,藏 景龍四 P 羅

南天竺國王,遺使來朝。十七年六月,北天竺國三藏沙門僧密多獻質汗等藥口。 伽寶多枝摩爲國造寺,上表乞寺額,敕以歸化爲名賜之。十一月,遣使册利那羅 授游擊將軍,放還。天寶中,累遣使來。 八年,南天竺國遣使獻五色能言鸚鵡。 大食及吐蕃等,仍求有及名其軍,玄宗甚嘉之,名軍爲懷德軍。 十月,中天竺國王伊沙伏摩遣其大德僧來朝貢。二十九年三月,中天竺王子李承恩來朝 其年,南天竺國王尸利那羅僧伽請以戰象及兵馬討 九月,南天竺王尸利那 伽 寶 十九年 羅僧 多爲

物,詔遣册其王爲葛羅達支特勒。 修鮮等十一州諸軍事兼修鮮都督。開元七年,遣使來朝,進天文經一夾、祕要方幷蕃藥等 尖而尾赤,能食蛇,有被蛇螫者,鼠輒嗅而尿之,其瘡立愈。 祖馨孽,至今曷擷支,父子傳位,已十二代」。其年,改其城爲修鮮都督府。 不至。貞觀十一年,遺使獻名馬,太宗嘉其誠款,賜以繒綵。十六年,又遺使獻褥特鼠,喙 宜稅稻,草木凌寒不死。 其俗尤信佛法。 隋煬帝時,引致 罽賓國,在葱嶺南,去京師萬二千二百里。常役屬於大月氏。 二十七年,其王鳥散特勒灑以年老,上表請以子拂菻罽 西域,前後至者三十餘國,唯罽賓 顯慶三年,訪其國俗,云「王始 其地暑濕,人皆乘象,土 龍朔初,授其王

五三〇九

婆嗣位,許之,仍降使册命。 天寶四年,又册其子勃匐準爲襲罽賓及烏萇國王,仍授左驍衛

將軍。 又有勃律國,在罽賓、吐蕃之間。開元中頻遣使朝獻。 乾元元年,又遣使朝貢。

八年,册立其王蘇麟陀逸之爲

到。 歌舞於道路。生子必以石蜜納口中,明膠置掌內,欲其成長口常甘言,掌持錢如膠之黏物。 俗習胡書。 丈夫翦髮或辮髮。 其王冠氊帽,飾以金寶。婦人盤髻,懷以阜巾,飾以金花。 破,南依葱嶺江三,遂有其地。 勃律國王,朝貢不絕。二十二年,爲吐蕃所破。 以十二月爲歲首。 康國,即漢康居之國也。 善商賈,爭分銖之利。男子年二十,卽遠之旁國,來適中夏,利之所在,無所不 有婆羅門爲之占星候氣,以定吉凶。 枝庶皆以昭武爲姓氏,不忘本也。 其王姓温,月氏人CID。先居張掖祁連山北昭武城,爲突厥所 頗有佛法。 其人皆深目高鼻,多鬚髯。 至十一月,鼓舞乞 人多嗜酒、好

獻名馬。 隋煬帝時,其王屈术支娶西突厥葉護可汗女,遂臣於西突厥。 貞觀九年,又遣使貢獅子,太宗嘉其遠至,命祕書監虞世南爲之賦,自此朝貢歲 武德十年,屈术支遣使

寒,以水相潑,盛爲戲樂。

使册咄曷襲父位。天寶三年,又封爲欽化王,其母可敦封爲郡夫人。十一載、十三載,並遣 九年,其王鳥勒上表,請封其子咄曷爲曹國王,默啜爲米國王,許之。 國人又立突昏爲王。開元六年,遣使貢獻鎖子甲、水精杯、馬腦瓶、駝鳥卵及越諾之類。 康國王,仍拜左驍衛大將軍。 十一年,又獻金桃、銀桃,詔令植之於苑囿。萬歲通天年,則天封其大首領篤婆鉢提爲 鉢提尋卒,又册其子泥涅師師爲康國王。 二十七年,鳥勒卒,遣 師師以神龍中卒,

使朝貢。

帔,多用蘇方青白色爲之,兩邊緣以織成錦。婦人亦巾帔裙衫,辮髮垂後,飾以金銀。 以爲敬,拜必交股。文字同於諸胡。男女皆徒跣。丈夫翦髮,戴白皮帽,衣不開襟,并有巾 諸神,西域諸胡事火祆者,皆詣波斯受法焉。其事神,以麝香和蘇塗鬚點額,及於耳鼻,用 之,奉所書名者爲主焉。其王冠金花冠,坐獅子牀,服錦袍,加以瓔珞。俗事天地日月水火 **抹,正西及南俱臨大海。戶數十萬。其王居有二城,復有大城十餘,猶中國之離宮。其王** 初嗣位,便密選子才堪承統者,書其名字,封而藏之。 王死後,大臣與王之羣子共發封而視 波斯國,在京師西一萬五千三百里,東與吐火羅、康國接,北鄰突厥之可薩部,西北拒拂

收而養之,以賞有功之臣。俗右尊而左卑。以六月一日爲歲首。斷獄不爲文書約束,口決 勒、胡椒、蓽撥、石蜜、千年棗、甘露桃。 師子、白象、珊瑚樹高一二尺、琥珀、車渠、瑪瑙、火珠、玻瓈、琉璃、無食子、香附子、訶黎 氣候暑熱,土地寬平,知耕種,多畜牧,有鳥形如橐駝,飛不能高,食草及肉,亦能噉犬攫羊, 釋焉。其強盜一入獄,至老更不出,小盜罰以銀錢。死亡則棄之於山,制服一月而卽吉。 直,瘡黑者爲有罪。其刑有斷手、刖足、髠鉗、劓則,輕罪翦鬚,或繫牌於項以志之,經時月而 於庭。其繫囚無年限,唯王者代立則釋之。其叛逆之罪,就火狀燒鐵灼其舌,瘡白者爲理 乘象而戰,每一象,戰士百人,有敗衄者則盡殺之。國人生女,年十歲已上有麥貌者,其王 土人極以爲患。又多白馬、駿犬,或赤日行七百里者,駿犬今所謂波斯犬也。出騪及大驢、

抹,於是國人迎而立之,是爲伊恆支,在位二年而卒。兄子伊嗣候立。二十一年,伊嗣候遣 逐,遂奔吐火羅,未至,亦爲大食兵所殺。其子名卑路斯,又投吐火羅葉護,獲免。卑路斯龍 使獻一獸,名活褥蛇, 形類鼠而色青,身長八九寸,能入穴取鼠。 伊嗣候懦弱,爲大首領所 復役屬於西突厥。施利立一年卒,乃立庫薩和之女爲王,突厥又殺之。施利之子單羯方奔拂 護因分其部帥監統其國,波斯竟臣於葉護。及葉護可汗死,其所令監統者因自擅於波斯,不 隋大業末,西突厥葉護可汗頻擊破其國,波斯王庫薩和爲西突厥所殺,其子施利立,葉

國二十餘年,有部落數千人,後漸離散。 王,行儉以其路遠,至安西碎葉而還,卑路斯獨返,不得入其國,漸爲大食所侵,客於吐火羅 朝,高宗甚加恩賜,拜右武衞將軍。 朔 列其地疾陵城爲波斯都督府,授卑路斯爲都督。 完定主義言頻被大食侵擾,請兵救援。 儀鳳三年, 令吏部侍郎裴行儉將兵册送卑路斯爲波斯 韶遺隴州南由縣令王名遠充使西域,分置 至景龍二年,又來入朝,拜爲左威衞將軍,無何病 是後數遣使貢獻。 咸亨中,卑路斯 州 自來入 縣,因

浮海而去。 大曆六年,遣使來朝,獻眞珠等。 獻火毛繡舞筵、長毛繡舞筵、無孔眞珠。乾元元年,波斯與大食同寇廣州 自開元十年至天寶六載,凡十遣使來朝,并獻方物。 四月,遣使獻瑪瑙牀。 ,劫倉庫,焚廬舍, 九年 四

卒,其國遙滅,而部衆猶存。

者,卽以書投囊中,王還宮省發,理其枉直。其王無常人,簡賢者而立之。 宮宇柱櫳,多以水精瑠璃爲之。有貴臣十二人共治國政,常使一 雨不時,輒廢而 拂菻國,一名大秦,在西海之上,東南與波斯接,地方萬餘里,列城四百,邑居連 更立。 其王冠形如鳥舉翼,冠及瓔珞,皆綴以珠寶,著錦繡衣,前不開襟,坐 人將囊隨王 國中災異及風 車,百万 姓有 屬。 其

列傳

爲之,尤絕高峻,凡有十萬餘戶,南臨大海。城東面有大門,其高二十餘丈,自上及下,飾以 爲門扇,香木爲棟梁。其俗無瓦,擣白石爲末,羅之塗屋上,其堅密光潤,還如玉石。 黃金,光輝燦爛,連曜數里。自外至王室,凡有大門三重,列異寶雕飾。第二門之樓中, 懸 金花牀。有一鳥似鵝,其毛綠色,常在王邊倚枕上坐,每進食有毒,其鳥輒鳴。 俄見四簷飛溜,懸波如瀑,激氣成凉風,其巧妙如此。 盛暑之節,人厭囂熱,乃引水潛流,上徧於屋宇,機制巧密,人莫之知。觀者惟聞屋上泉鳴, 一大金秤,以金丸十二枚屬於衡端,以候日之十二時焉,爲一金人,其大如人,立於側,每至 一時,其金丸輒落,鏗然發聲,引唱以紀日時,毫釐無失。 其殿以瑟瑟爲柱,黃金爲地,象牙 其都城疊石

翠、珊瑚、琥珀,凡西域諸珍異多出其國。隋煬帝常將通拂菻,竟不能致。 出入擊鼓,建旌旗幡幟。土多金銀奇寶,有夜光璧、明月珠、駮雞犀、大貝、車渠、瑪瑙、孔 人著甲走馬及擊鼓以駭之,其羔驚鳴而臍絕,便逐水草。俗皆髠而衣繡,乘輜輧白蓋小車, 生於土中,其國人候其欲萌,乃築牆以院之,防外獸所食也。然其臍與地連,割之則死,唯 風俗,男子翦髮,披帔而右袒,婦人不開襟,錦爲頭巾。 家資滿億,封以上位。有羊羔

焉。 貞觀 自大食強盛,漸陵諸國,乃遣大將軍摩拽伐其都城,因約爲和好,請每歲輸之金帛,遂 十七年,拂菻王波多力遣使獻赤玻瓈、綠金精等物,太宗降璽書答慰,賜以綾綺

臣屬 吐火羅大首領獻獅子、羚羊各二。不數月,又遣大德僧來朝貢。 大食焉。 乾封二年,遺使獻底也伽。 大足元年,復遣使來朝。 開元七年正月,其主遣

商旅,其衆漸盛,遂割據波斯西境,自立爲王。波斯、拂菻各遣兵討之,皆爲所敗。 胡人依言,果見穴中有石及矟刃甚多,上有文,教其反叛。於是糾合亡命,渡恆曷水,劫奪 謂之曰:「此山西有三穴,穴中大有兵器,汝可取之。 穴中丼有黑石白文,讀之便作王位。」 大食國,本在波斯之西。 大業中,有波斯胡人牧駝於俱紛摩地那之山,忽有獅 子

北,相去三月行。 海,經八年而未及西岸。 粉摩地那山在國之西南,鄰於大海,其王移穴中黑石置之於國。又嘗遣人乘船,將衣糧入 於諸國。兵刃勁利。其俗勇於戰鬭,好事天神。土多沙石,不堪耕種,唯食駝馬等肉。 人皆笑,動其手脚,頭著樹枝,其使摘取一枝,小兒便死,收在大食王宮。又有女國,在其西 三主矣。其國男兒色黑多鬚,鼻大而長,似婆羅門;婦人白皙。亦有文字。出駝 永徽二年,始遣使朝貢。其王姓大食氏云言,名噉密莫末膩,自云有國已三十四年,歷 海中見一方石,石上有樹,幹赤葉青,樹上總生小兒,長六七寸,見 馬, 俱

詰責之,其使遂請依漢法致拜。其時西域康國、石國之類,皆臣屬之,其境東西萬里,東與 等方物。其使謁見,唯平立不拜,憲司欲糾之,中書令張說奏曰:「大食殊俗,慕義遠來,不 四十餘萬。 突騎施相接焉台。 可置罪。」上特許之。尋又遣使朝獻,自云在本國惟拜天神,雖見王亦無致拜之法,所司屢 朔初,擊破波斯,又破拂菻,始有米麪之屬。又將兵南侵婆羅門,吞倂諸胡國,勝兵 長安中,遣使獻良馬。景雲二年,又獻方物。開元初,遣使來朝,進馬及寶鈿帶

臘,一名釤城。彰音所鑒反。摩訶末後十四代,至末換。末換殺其兄伊疾而自立,復殘忍,其 弟訶論立。貞元中,與吐蕃爲勍敵。

蕃軍太半西禦大食,故鮮爲邊患,其力不足也。十四 兵以收兩都。 爲黑衣大食。阿蒲羅拔卒,立其弟阿蒲恭拂。至德初遣使朝貢,代宗時爲元帥,亦用其國 年,韶以黑衣大食使含嵳、焉雞、沙北三人並爲中郎將,各放還蕃。 生擒末換,殺之,遂求得奚深種阿蒲羅拔,立之。末換已前謂之白衣大食,自阿蒲羅拔後改 下怨之。有呼羅珊木麤人並波悉林舉義兵,應者悉令著黑衣,旬月間衆盈數萬,鼓行而西, 盆泥末換。其奚深後有摩訶末者,勇健多智,衆立之爲主,東西征伐,開地三千里,兼克夏 一云隋開皇中,大食族中有孤列種代爲酋長,孤列種中又有兩姓:一號盆泥奚深,一號 寶應、大曆中頻遣使來。恭拂卒,子迷地立。迷地卒,子牟栖立白思。牟栖卒,

多虞,邠郊之西,即爲戎狄,藁街之邸,來朝亦稀。 唐拓境,遠極安西,弱者德以懷之,強者力以制之。 史臣曰:西方之國,綿亙山川,自張騫奉使已來,介子立功之後,通於中國者多矣。 故古先哲王,務寧華夏,語曰「近者悅,遠 開元之前,貢輸不絕。 天寶之亂,邊徼

贊曰:大蒙之人,西方之國,與時盛衰,隨世通塞。 勿謂戎心,不懷我德,貞觀、開元,藁

街充斥。

者來」,斯之謂矣。

校勘記

散花燃香 「燃」字各本原無,據唐會要卷一〇〇、寰宇記卷一八五補。

阿史那思昧 寰宇記卷一八四、新書卷二二一党項傳、通鑑卷二三五皆作「阿思那思陳」。

(三) 天山 [縣公 「天」字各本原作「太」,據唐會要卷九五、冊府卷九六四改。

令胤 「令」字各本原作「命」,據御覽卷七九四、冊府卷九六四 改

(E) 宣王 「宣」字各本原無,據新書卷二二一、吐谷渾傳、通鑑卷一九六考異引實錄補。

一百四十八 校勘記

列傳

第

(代) 四千三百里 御覽卷七九五、寰宇記卷一八一均作「七千三百里」。

(+) 磺石 各本原作「積石」,據冊府卷九八五、新書卷二二一鑑茲傳改。通鑑卷一九九作「磧口」,

胡注:「新、舊書作磧石」。

(3) 屈密 珊府卷九七〇、新書卷二二一迂闐傳作「屋密」。

(元) 在葱嶺西北 冊府卷九五八、寰宇記卷一八三皆作「在葱嶺之南」。

(10) 三藏沙門僧密多 「三」字各本原無,據冊府卷九七一、實字記卷一八三補。

(11) 月氏人 「人」字各本原無,據冊府卷九五六、寰宇記卷一八三補。

南依葱嶺 冊府卷九五六、寰宇記卷一八三作「西踰葱嶺」。

其王姓大食氏 「王」字各本原無,據御覽卷七九五、冊府卷九五六補。

(1四) 突騎施 「騎」字各本原作「厥」,據唐會要卷一〇〇改。

「牟」字各本原作「卒」,據冊府卷九六六、寰宇配卷一八八改。

舊唐書卷一百九十九-

列傳第一百四十九上

東夷

高麗 百濟 新羅 倭國 日本

城置道使,比刺史。 兄,比正二品。 **交替之日,或不相祗服,** 里,南北二千里。 東渡海至於新羅,西北渡遼水至于營州,南渡海至于百濟,北至靺鞨。 高麗者,出自扶餘之別種也。其國都於平壤城,即漢樂浪郡之故地,在京師東五千一百 對盧以下官,總十二級。外置州縣六十餘城。 其官大者號大對盧,比一品,總知國事,三年一代,若稱職者,不拘年限。 其下各有僚佐,分掌曹事。 皆勒兵相攻,勝者爲之。 衣裳服飾,唯王五綵,以白羅爲冠,白皮小 其王但閉宮自守,不能制禦。 大城置傉薩一,比都督。諸 東 西三千一百 次日太大

五三一九

列

傳

第

百

四

十九

土

東夷

帶,其冠及帶,咸以金飾。官之貴者,則靑羅爲冠,次以緋羅,插二鳥羽,及金銀爲飾,衫筒 食用甕豆、簠簋、罇俎、罍洗,頗有箕子之遺風。 袖,袴大口,白韋帶,黃韋履。國人衣褐戴弁,婦人首加巾幗。好圍棊投壺之戲,人能蹴鞠。

射。其書有五經及史記、漢書、范曄後漢書、三國志、孫盛晉春秋、玉篇、字統、字林,又有 愛書籍,至於衡門廝養之家,各於街衢造大屋,謂之扃堂,子弟未婚之前,晝夜於此讀書習 淫祀,事靈星神、日神、可汗神、箕子神。 國城東有大穴,名神隧,皆以十月,王自祭之。 俗 十二倍酬贓,殺牛馬者,沒身爲奴婢。大體用法嚴峻,少有犯者,乃至路不拾遺。其俗多 競燒灼之,燋爛備體,然後斬首,家悉籍沒;守城降敵,臨陣敗北,殺人行劫者斬;盜物者, 多月皆作長坑,下燃煴火以取暖。 種田養蠶,略同中國。其法:有謀反叛者,則集衆持火炬 文選,尤愛重之。 其所居必依山谷,皆以茅草葺舍,唯佛寺、神廟及王宮、官府乃用瓦。其俗貧窶者多,

貢。故遣使者,跋涉山川,申布誠懇,**殷甚嘉焉。**方今六合寧晏,四海淸平,玉帛旣通,道路 普天之下,情均撫字,日月所照,咸使乂安。王旣統攝遼左,世居藩服,思稟正朔,遠循職 感情末戰士多陷其地,五年,賜建武書曰:「朕恭膺寶命,君臨率土,祗順三靈,綏柔萬國。 其王高建武,即前王高元異母弟也。武德二年,遣使來朝。四年,又遣使朝貢。

其民。 高麗 無 獲 人等,已令追括,尋卽遣送; 遂使. 方 申 骨 輯睦,永敦 肉 乖離,室家分析, 聘好,各保疆場,豈非 彼處有 多歷 年歲,怨曠不 此 國 盛美。 人者,王可放還 但隋氏 申。 今二 季年,連兵構難,攻戰之所,各失 , 國 務盡撫育之方, 通 和 義 無 阻 異, 共弘仁 在此 一恕之 所 有

於是建武悉搜括華人,以禮賓送,前後至者萬數

~,高祖

大喜。

於夷狄,猶太陽之對列星,理無降尊,俯同藩服。 地,周爲箕子之國 往彼,爲之講光子,其王及道俗等觀聽者數千人。 高 云 何必令其稱 閉其道路,不得 麗 表 稱 謝 七年,遣前刑部尚書沈叔安往册建武爲上柱國、遼東 罪 臣於隋,終拒煬帝,此亦何臣之有 ,請與 臣, 新 以自尊大。 羅對 ,漢家玄菟郡 入 朝。 使 會 又相 盟 卽 與 爲韶述股此 耳 有隙 ! 魏、晉 ٠, 屢相 ! 已前, 犪 侵掠。 股敬於萬物 也 一。」侍中裴矩、 高 近在提封之內, 不可許以不臣。 高 韶 祖 員 旭 乃止。 ,不欲 |管謂侍臣曰:「名實之間 外散騎侍郎朱子奢往 郡王、高麗王,仍將天尊像及道士 九年,新羅 驕貴,但據 中書侍郎温 有 百濟遣使訟建武, 彦博日: 土宇,務共安人, 和 解之。 , 理 且中國之 須 遼東之 相

長 孫 師往 至海 貞 觀 ,千有 收 年 瘞 一隋時戰亡骸骨,毀高麗所立京 ,破突厥 餘 里。 頡利 四年 可开 ,遣其太子桓權來 ,建武遣 使 奉賀 觀 朝 ,并上封域圖。 建 沙井 武 貣 懼 、方物,太宗優勞甚 伐其 國 ,乃築 五年,韶遣 泛長城 廣州 東 北 都督府 自扶餘城

其屬官俯伏於地,踐之上馬;及下馬,亦如之。出必先布隊仗,導者長呼以辟行人,百姓畏 云將校閱,并盛陳酒饌於城南,諸大臣皆來臨視,蘇文勒兵盡殺之,死者百餘人。焚倉庫, 避,皆自投坑谷。 職也,自是專國政。蘇文姓泉氏〔〕,鬚貌甚偉,形體魁傑,身佩五刀,左右莫敢仰視。恆令 因馳入王宮,殺建武,立建武弟大陽子藏爲王。自立爲莫離支,獨中國兵部尚書兼中書令 十六年,西部大人蓋蘇文攝職有犯,諸大臣與建武議欲誅之。事洩,蘇文乃悉召部兵,

遭司農丞相里玄獎**齊**璽書往說諭高麗,令勿攻新羅。 蓋蘇文謂玄獎曰:「高麗、新羅,怨隙 賊弑其主,盡殺大臣,用刑有同坑穽,百姓轉動輒死,怨痛在心,道路以目。 夫出師弔伐,須 有其名,因其弑君虐下,敗之甚易也。」 此兵恐未能已。」玄獎曰:「既往之事,焉可追論?」蘇文竟不從。太宗顧謂侍臣曰:「莫離支 已久。往者隋室相侵,新羅乘釁奪高麗五百里之地,城邑新羅皆據有之。自非反地還城, 太宗聞建武死,爲之舉哀,使持節弔祭。十七年,封其嗣王藏爲遼東郡王、高麗王。又

尚書江夏王道宗爲副,領將軍張士貴等率步騎六萬趨遼東,兩軍合勢,太宗親御六軍以 萬,戰船五百艘,自萊州汎海趨平壤;又以特進英國公李勣爲遼東道行軍大總管,禮部 十九年,命刑部尚書張亮爲平壤道行軍大總管,領將軍常何等率江、淮、嶺、硤勁卒四

會之

擊其城 者隋師 程名振 俄而 約, 拋 尤重者,親於馬上持之。 其令並收瘞之。」國內及新城步騎 人, 俘其 千餘級。 車 克遼東,當舉烽。 南 ,飛三百觔石於一里之外者,甚懼之,乃於城上積木爲戰樓以拒 夏 介,所 文沙沙 渡 四 風 《勝兵萬餘口,以其城爲遼州。 、甚勁 遼 帝渡遼水,韶撤橋梁,以堅士卒志。 月,李勣軍渡遼,進攻蓋牟城,拔之,獲生口二萬,以其城置蓋州。 、遇盡 ,時非天贄,從軍 卑城,拔之,廣其男女 ",命縱火焚其 潰。 又推撞車撞其樓閣,無不傾倒。 是日 從官悚動,爭齎以送城下。 ,帝命舉烽,傳入塞 西南樓,延燒城中, 士卒,骸骨相望,徧 四萬來援遼東,江夏王道宗率騎四千遊擊,大破之,斬首 八千口。 初,帝自定州命每數十里置 是日 帝至遼東城下,見士卒負擔以塡 屋宇皆盡。戰士登城,賊乃大潰,燒死者萬餘 ,李勣進軍於遼東城。 於原野 時李勣已率兵攻遼東城。 帝親率甲騎萬餘,與李勣會, 了,良可 哀歎。 一烽,屬于遼城,與太子 掩骼之義, 誠爲先典, 飛石。 帝次遼澤 五月 勣 、塹者,帝分其 高麗 列 張亮 ,韶曰:「頃 車 圍其城 發 聞 石以 副 我 將 有

其城 主孫 因 伐音潛遣 師 次白 山 臨 崖城, 水 四 使請降,日:「臣 面 命攻之, 險絕。 右衞 李勣 以撞 願降,其中有貳者。」詔賜以旗幟,曰:「必降,建之城上。」伐 大將軍李思摩中弩矢, 車撞之,飛石流矢,雨集城中。 帝親爲吮血,將士聞之,莫不 六月, 帝臨 其西 北 感勵 城

列

其妻孥,朕所不忍也。將軍麾下有功者,朕以庫物賞之,庶因將軍贖此一城。」遂受降,獲士 音舉幟於城上,高麗以爲唐兵登也,乃悉降。初,遼東之陷也,伐晉乞降,旣而中悔,帝怒其 悉在加尸,爾爲吾戰,彼將爲戮矣!破一家之妻子,求一人之力用,吾不忍也。」悉令放還。 尸城七百人戍蓋牟城,李勣盡虜之,其人並請隨軍自効。太宗謂曰:「誰不欲爾之力,爾家 女一萬,勝兵二千四百,以其城置巖州,授孫伐音爲巖州刺史。我軍之渡遼也,莫離支遣加 〈覆,許以城中人物分賜戰士。 及是,李勣言於帝曰:「戰士奮厲爭先,不顧矢石者,貪虜獲 今城垂拔,奈何更許其降,無乃辜將士之心乎?」帝曰:「將軍言是也。然縱兵殺戮,虜

並起。 兵一萬一千以爲奇兵,自山北於狹谷出,以衝其後;太宗自將步騎四千,潛鼓角,偃旌幟, 麗 饋運、不過旬日,軍糧必盡,求戰不得,欲歸無路,此不戰而取勝也。」延壽不從,引軍直進。 猛將銳卒,悉萃於此,其鋒不可當也。今爲計者,莫若頓兵不戰,曠日持久,分遣聽雄,斷其 **趣**賊營北高峯之上;令諸軍聞鼓角聲而齊縱。因令所司張受降幕於朝堂之側,曰:「明日 太宗夜召諸將,躬自指麾。遣李勣率步騎一萬五千於城西嶺爲陣,長孫無忌率牛進達等精 、靺鞨之衆十五萬來援安市城。賊中有對盧,年老習事,謂延壽曰:「吾聞中國大亂,英雄 車駕進次安市城北,列營進兵以攻之。高麗北部傉薩高延壽、南部耨薩高惠貞率高 |秦王神武,所向無敵,途平天下,南面爲帝,北夷請服,西戎獻款。 今者傾國而至**,**

午時,納降虜於此矣!」遂率軍而進。

明光甲五千領,他器械稱是。高麗國振駭,后黃城及銀城並自拔,數百里無復人烟。 卿,高惠眞司農卿。張亮又與高麗再戰於建安城下,皆破之,於是列長圍以攻焉 所幸山爲駐蹕山,令將作造破陣圖,命中書侍郎許敬宗爲文勒石以紀其功。授高延壽鴻臚 無忌、勸等引兵圍之,撤東川梁以斷歸路。太宗按轡徐行,觀賊營壘,謂侍臣曰「高麗傾國 太宗又自山而下,引軍臨之,賊因大潰,斬首萬餘級。延壽等率其餘寇,依山自保。於是命 授以戎秩,遷之內地。收靺鞨三千三百,盡坑之,餘衆放還平壞。獲馬三萬疋、牛五萬頭、 人請降,太宗引入轅門。延壽等膝行而前,拜手請命。太宗簡辱薩以下酋長三千五百人, 而來,存亡所繫,一麾而敗,天佑我也。」因下馬再拜以謝天。極壽、惠眞率十五萬六千八百 大懼,將分兵禦之,而其陣已亂。一李勣以步卒長槍一萬擊之,延壽衆敗。無忌縱兵乘其後 明日,延壽獨見李勣兵,欲與戰。太宗遙望無忌軍塵起,令鼓角並作,旗幟齊舉。 因名 賊衆

動,每見太宗旄麾,必乘城鼓譟以拒焉。帝甚怒,李勣曰:「請破之日,男子盡誅。」城中聞 其西面,令抛石撞車壞其樓雉;城中隨其崩壞,卽立木爲栅。 之,人皆死戰。乃令江夏王道宗築土山,攻其城東南隅; 高麗亦埤城增雉以相抗。 八月,移營安市城東,李勣遂攻安市,擁延壽等降衆營其城下以招之。城中人堅守不 道宗以樹條苞壤爲土,屯積 李勣攻

爽

以爲山 據有 兵於山頂以防敵,土山自高而陟,排其城,城崩。會伏愛私離所部,高麗百人自頹城而戰,遂 土山 ,其中間五道加木,被土於其上,不捨晝夜,漸以逼城。 而 **塹斷之,積火縈盾以自固。** 太宗大怒,斬伏愛以徇。 道宗遣果毅都尉傅伏愛領隊 命諸將擊之,三日不能克。

奉辭。 其直, 奴婢者 以布帛贖之, 太宗嘉其堅守,賜絹百疋,以勵事君之節。 一萬四千人, 赦爲百姓。 並遣先集幽州,將分賞將士。 其衆歡呼之聲,三日不息。 太宗愍其父母妻子一朝分散,令有司準 初,攻陷遼東城,其中抗拒王師,應沒爲 高延壽自降後,常積數,尋以憂

太宗以遼東倉儲

無幾,士卒寒凍,乃詔班師。

歷其城,城中皆屏聲偃幟,城主登城拜手

死。

惠眞竟至長安。

重。 不取也。」並還之。 爾之所獻 二十年, 高麗遣使來謝罪,丼獻二美女。 ,信爲美麗。 憫其離父母兄弟於本國,留其身而忘其親,愛其色而傷其心,我 太宗謂其使曰:「歸謂爾主,美色者,人之所

雅相、左武衞大將軍蘇定方、左聽衞大將軍契苾何力等前後討之,皆無大功而還。 運糧及器械, 城,俘獲甚衆。 二十二年,又遣右武衞將軍薛萬徹等往靑丘道伐之,萬徹渡海入鴨綠水,進破其泊灼 貯於鳥胡島, 將欲大舉以伐高麗。 太宗又命江南造大船,遣陝州刺史孫伏伽召募勇敢之士,萊州 未行 而帝崩。 高宗嗣位,又命兵部尚書任 刺史李道裕

管,率裨將郭待封等以征高麗。二年二月,勣度遼至新城,謂諸將曰:「新城是高麗西境鎭 迫,數有降者,自此所向克捷。 高藏及男建遣太大兄男產將首領九十八人,持帛幡出降,且 州四十二、縣一百,又置安東都護府以統之。擢其酋渠有功者授都督、刺史及縣令,與華人 特進如故。 伯;男產先降,授司宰少卿;男建配流黔州;男生以鄉導有功,授右衞大將軍,封汴國公, **壞城,虜高藏、男建等。十二月,至京師,獻俘於含元宮。韶以高藏政不由己,授司平太常** 果開門,勣從兵入,登城鼓譟,燒城門樓,四面火起。男建窘急自刺,不死。十一月,拔平 遺兵出戰,皆大敗。

男建下捉兵總管僧信誠密遣人詣軍中,許開城門爲內應。經五日,信誠 請入朝,勣以禮延接。男建循閉門固守。總章元年九月至,勣又移營於平壤城南,男建頻 城,最爲要害,若不先圖,餘城未易可下。」遂引兵於漸城西南,據山築栅,且攻且守,城中窘 大都督兼平壤道安撫大使,封玄菟郡公。十一月,命司空、英國公李勣爲遼東道行軍大總 獻誠詣闕求哀。 參理百姓。乃遣左武衞將軍薛仁貴總兵鎭之,其後頗有逃散。 與其弟男建、男產不睦,各樹朋黨,以相攻擊。男生爲二弟所逐,走據國內城死守,其子 乾封元年,高藏遣其子入朝,陪位於太山之下。其年,蓋蘇文死,其子男生代爲莫離 高麗國舊分爲五部,有城百七十六,戶六十九萬七千,乃分其地置都督府九、 詔令左驍衞大將軍契苾何力率兵應接之。男生脫身來奔,詔授特進、遼東

忠誠國王,委其統攝安東舊戶,事竟不行。二年,又授高藏男德武爲安東都督,以領本蕃。 爲樹碑。 自是高麗舊戶在安東者漸寡少,分投突厥及靺鞨等,高氏君長遂絕矣。 貧弱者留在安東城傍。 至安東,潛與靺鞨相通謀叛。 儀 鳳 中, 垂拱二年,又封高藏孫寶元爲朝鮮郡王。 高宗授高藏開府儀同三司、遼東都督,封朝鮮王,居安東,鎭本蕃爲主。 高藏以永淳初卒,贈衞尉卿,詔送至京師,於頡利墓左賜以葬地,兼 事覺,召還,配流邛州,丼分徙其人,散向河南、隴右諸州,其 聖曆元年,進授左鷹揚衞大將軍,封爲 高藏

射。」則天嘉而從之。時酷吏來俊臣嘗求貨於獻誠,獻誠拒而不答,遂爲俊臣所構,誣其謀 輔先讓戲誠爲第一,獻誠復讓右玉鈴衞大將軍薛吐摩支,摩支又讓戲誠, 反,縊殺之。 天授中,則天嘗內出金銀寶物,令宰相及南北衙文武官內擇善射者五人共賭之。 「陛下令簡能射者五人,所得者多非漢官。臣恐自此已後,無漢官工射之名,伏望停寢此 男生以儀鳳初卒於長安,贈抖州大都督。子獻誠,授右衞大將軍, 則天後知其冤,贈右羽林衞大將軍,以禮改葬。 兼令羽林衞上下。 既而獻誠奏曰: 內史張光

百濟國,本亦扶餘之別種,嘗爲馬韓故地,在京師東六千二百里,處大海之北,小海之

錮。 法:叛逆者死 南。 皮帶,烏革履。 内官日 衞 兵 東 凡諸 北 內臣 至新羅,西渡海至越州,南渡海 賦稅 、子、史,又表疏並依中華之法 朝廷佐平,掌刑 佐平 ,籍没其家 及風 官人盡緋爲 ,掌宣納 土所產,多與高麗同。 ;殺人者,以奴婢三贖罪; : 獄事 事 •; 衣,銀花飾冠。 內頭 兵官佐平, 掌在外 佐 一平,掌庫藏 至倭國,北渡海 其王 庶人不得衣緋紫。 一服大袖紫袍, 事 •; 兵馬事 官人受財及盜者, 內法佐 至高麗。其王所居有 一平,掌禮儀 青錦袴, 又外置六帶方, 歲時伏臘, 烏羅 三倍追 事 冠,金花爲飾,素 同於中國。 東 衞 管十郡。 臧, 士佐平 西兩 仍終 城。 所置 身禁 其用

有

五經

整書 來通 以 遣 望。 威使 懷,共篤鄰情,卽 嘉 使 股已 中 慰。 义 就 武 一 德 四 年 安。 三三王 國 册爲帶方郡王、百濟王。 對 股 韶遺朱子奢往和之。 世 新 王 自 爲君長 , 姪 羅 祗 其王 停 信 承 王 金眞平 竉 兵 福 一扶餘璋遣使來獻果下 革。 及高麗 命,君 (,撫有東蕃。 ·, 朕 璋因遣 臨 之藩臣,王之鄰國, 新羅 區字,思弘王道 自是歲遣朝貢, 又相 一使奉表陳謝,雖外稱順命,內實相仇 海隅 使 與新羅 人, 退曠, 具敕 馬。 世爲讎敵, ,愛育黎元。 風濤艱阻 通 七年,又遣大臣奉表朝貢。 高祖撫勞甚 和,咸許輯 每 聞遣 ,忠款之至,職貢相尋,尙想徽猷,甚 數相 師,征 舟 陸。 厚。 侵伐。 車 討不 所通 王 因 訟高麗閉其道路,不許 必須忘彼前 一,風 息,阻兵安忍,殊乖所 貞觀元年,太宗賜其王 如故。 雨所及,期之遂性, 高 祖 嘉其誠款 年,遣使 ·識股本

列

傳

來朝,獻鐵甲雕斧。 太宗優勞之,賜綵帛三千段井錦袍等。

之,與高麗和親通好,謀欲取党項城以絕新羅入朝之路。 使册命義慈爲柱國,封帶方郡王、百濟王。 丞相里玄獎齎書告諭兩蕃,示以禍福。及太宗親征高麗,百濟懷二, 十五年,璋卒,其子義慈遣使奉表告哀。 十六年,義慈興兵伐新羅四十餘城,又發兵以守 太宗素服哭之,贈光祿大夫,賻物二百段,遺 新羅遺使告急請救,太宗遣司農 乘虛襲破新羅十城。

高宗嗣位,永徽二年,始又遣使朝貢。使還,降璽書與義慈曰:

數年之中,朝貢遂絕。

二十二年,又破其十餘城。

和。」殷以其言旣順,不可不許。 昔齊桓列土諸侯,尚存亡國; 況殷萬國之主,豈 可不 歲王及高麗、新羅等使並來入朝(三),股命釋茲讎怨,更敦款穆。 新羅使金法敏奏書: 略無寧歲。 卹危藩。 威力並謝。乞韶百濟,令歸所侵之城。若不奉韶,卽自興兵打取。但得故地,卽請交 「高麗、百濟,脣齒相依,競舉兵戈,侵逼交至。大城重鎮,並爲百濟所倂,疆字日蹙, 至如海東三國,開基自久,並列疆界,地實犬牙。近代已來,遂構嫌隙,戰爭交起, 王所兼新羅之城,並宜還其本國;新羅所獲百濟俘虜,亦遣還王。然後解息 途令三韓之氓,命懸刀俎,尋戈肆憤,朝夕相仍。 股代天理物,載深矜愍。去

釋紛,韜戈偃革,百姓獲息肩之願,三蕃無戰爭之勞。

比夫流血邊亭,積屍疆場,耕織

亦令 並 廢, 約 士女無聊,豈可同年而語矣。 東高麗 不不 許 遠相 | 救恤 高 麗若 王若不從進 不 承 命,即令契丹諸蕃渡遼澤 止,殷已依法敏所請,任其與王 入 、抄掠 一決戰; 王 可深

思股

自自

求

多

福,審圖良策,無貽

後

悔

王文度 分置 於京 之,并爲豎 左 衞 熊津 師 大將軍蘇定方統兵討之, 六年,新羅 數 爲 熊津都 日 馬韓、 責 m 而 卒。 宥之。 王金春秋 東明 督,總兵以鎮之。 贈 金紫光祿大夫、 等五都督府, 其國舊 又表 分為 大破 稱百濟 義慈事 五部,統郡 各統 其國 衛尉卿, 與高麗、 州縣, 親以孝行聞, 虜義慈及太子隆、 靺鞨 三十七,城二百,戶 特 立其 許其舊臣赴哭。 侵其北界,已沒三十餘城。 友于兄弟, 小王孝演、 、七十六萬。 **送就** 時 史及縣令。 人號「海東會、 孫皓、陳叔寶墓 偽將 至 五十八人等送 顯慶五年,命 命 是 乃以 右 関。 衞 其 侧 郎 葬 及 將 地

深等於 水 豐立爲王 帶方 及 文度 戦 熊 濟 州 死 津 海 萬 刺 其 餘 江 史 而 劉 卒。 口 西 立. 仁軌 部 道 兩 百濟僧道琛、舊將 北部 深等 代文度統 栅 以 拒 乃釋仁願之圍,退保任存城。 並 官軍 翻 衆, 城應之。 一,仁軌 便道發新羅兵合契以救仁願, 福信率衆據周留城以叛。 與新羅 時 郎將 兵 劉仁 四 面 願留鎭於百濟府城, :夾擊之,賊衆退走入栅,阻 新羅兵士以糧盡引還,時龍朔元 遺使往倭國,迎故王子扶 轉鬭 而 前, 道 琛等引兵圍 所向皆下 水 橋

列

第

百

24

+

九

上

東

夷

踩,併其兵衆,扶餘豐但主祭而已。 於外館, 亡,所以聚結自固守耳! 年三月也。 曰:「聞大唐與新羅約誓, 傳語謂曰:「使人官職小,我是一國大將,不合自參。」不答書遣之。 於是道琛自稱領軍將軍,福信自稱霜岑將軍,招誘叛亡,其勢益張。 一上軌 百濟無問老少, 作書,具陳禍福,遺使諭之。 一切殺之,然後以國付新羅。 道琛等恃衆驕倨,置仁軌 與其受死, **尋而福信殺道** 使告仁軌 豈若戰 之使

浮海 羅 兵以 羅運糧之路。 兵守之。 大山 扶餘豐脫身而走。僞王子扶餘忠勝、忠志等率士女及倭衆並降,百濟諸城皆復歸順,孫仁師 將候 同 金法 | 赴熊津,以益||仁願之衆。 、沙井等栅,殺獲甚衆,仍令分兵以鎭守之。 担官軍 年七月,仁願、仁軌等率留鎭之兵,大破福信餘衆於熊津之東,拔其支羅城及尹城、 趨 扶餘豐問疾,謀襲殺之。 敏帥陸軍 仁軌引新羅之兵乘夜薄城,四面攀堞而上,比明而入據其城,斬首八百級,遂通 周留城。 仁願 孫仁師中路迎擊,破之,遂與仁願之衆相合,兵勢大振。 進,劉仁軌及別帥杜爽(E)、扶餘隆率水軍及糧船,自熊津江往白江以會 乃奏請益兵, 仁軌 週扶餘豐之衆於白江之口**,** 時福信旣專其兵權,與扶餘豐漸相猜貳。 韶發腦、靑、萊、海之兵七千人,遣左威衞將軍孫仁師統衆 扶餘豐覺而率其親信掩殺福信,又遣使往高麗及倭國 福信等以眞峴城臨江高險,又當 四戰皆捷,焚其舟四百艘,賊衆大潰, 於是仁師、仁願及新 福信稱疾,臥於窟 衝要,加 請 新

與劉仁願等振旅而還。 韶劉仁軌代仁願率兵鎭守。 乃授扶餘隆熊津都督,造還本國,共新

羅和親,以招輯其餘衆。

|麟德二年八月,隆到熊津城,與新羅王法敏刑白馬而盟。 先祀神祇及川谷之神, 而後

歃血。其盟文曰:

和好。 無守,禋祀磨滅,罔有遺餘。 歃 人右威衞將軍魯城縣公劉仁願親臨勸諭,具宜成旨,約之以婚姻,申之以盟誓。刑牲 保其桑梓。 規。 宅,作誠來裔;塞源拔本,垂訓後昆。然懷柔伐叛,前王之令典;興亡繼絕,往哲之通 侵削新羅,破邑屠城,略無寧歲。 天子憫一物之失所,憐百姓之無辜,頻命行人,遣其 [有棄信不恆,二三其德,興兵動衆,侵犯邊陲,明神鑒之, 百殃是降,子孫不昌,社稷 血,共敦終始; 事必師古, 往者百濟先王,迷於逆順,不敦鄰好,不睦親姻。結託高麗,交通倭國,共爲殘暴, 負險恃遠,侮慢天經。皇赫斯怒,恭行弔伐,旌旗所指,一戎大定。固可瀦宮污 依倚新羅,長爲與國,各除宿憾,結好和親。恭承詔命,永爲藩服。仍遣使 傳諸囊册。故立前百濟太子司稼正卿扶餘隆爲熊津都督,守其祭祀 分災恤患,恩若弟兄。祗奉綸言,不敢失墜,旣盟之後,共保歲寒。 故作金書鐵契,藏之宗廟,子孫萬代,無或敢犯。神之聽

之,是饗是福

劉仁軌之辭也。 歃訖,埋幣帛於壇下之吉地,藏其盟書於新羅之廟。

之種遂絕。 都督、帶方郡王,令歸本蕃,安輯餘衆。時百濟本地荒毀,漸爲新羅所據,隆竟不敢還舊國 而卒。其孫敬,則天朝襲封帶方郡王、授衞尉卿。其地自此爲新羅及渤海靺鞨所分,百濟 仁願、仁軌等旣還,隆懼新羅,尋歸京師。儀鳳二年,拜光祿大夫、太常員外卿兼熊津

爲飾,髮甚長美。 每以其日拜日月神。又重八月十五日,設樂飲宴,資羣臣,射其庭。 神。其食器用柳桮,亦以鲖及瓦。國人多金、朴兩姓,異姓不爲婚。 綵三百段,自此朝貢不絕。其風俗、刑法、衣服,與高麗、百濟略同,而朝服尚白。好祭山 **德四年,遣使朝貢。**高祖親勞問之,遣通直散騎侍郎庾文素往使焉,賜以璽書及畫屛風、錦 設獅子隊。文武官凡有十七等。其王金眞平,隋文帝時授上開府、樂浪郡公、新羅王。武 高麗。東西千里,南北二千里。有城邑村落。王之所居日金城,周七八里。衞兵三千人, 新羅國,本弁韓之苗裔也。其國在漢時樂浪之地,東及南方俱限大海,西接百濟,北鄰 婦人髮繞頭,以綵及珠 重元日,相慶賀燕饗,

新羅得百濟王,殺之,怨由此始。」七年,遣使册拜金眞平爲柱國,封樂浪郡王、新羅王 由 對曰:「先是百濟往伐高麗, 詣新羅請救, 新羅發兵大破百濟國, 因此爲怨,每相攻伐。 既開海東三國舊結怨隙,遞相攻伐,以其俱爲藩附,務在和睦,乃問其使爲怨所

羅委命國家,不闕朝獻。爾與百濟,宜卽戢兵。若更攻之,明年當出師擊爾國矣。」太宗將 股愍其遠來,必思親戚,宜付使者,聽遣還家。」是歲,眞平卒,無子,立其女**善**德爲王,宗室 封樂浪郡王、新羅王。十七年,遣使上言:「高麗、百濟,累相攻襲,亡失數十城,兩國連兵, 大臣乙祭總知國政。 且 親伐高麗,詔新羅纂集士馬,應接大軍。新羅遣大臣領兵五萬人,入高麗南界,攻水口城, 意 在滅臣社稷。 山川阻遠,懷土可知。近日林邑獻白鸚鵡,尙解思鄉,訴請還國。 貞 觀 五年,遺使獻女樂二人,皆鬒髮美色。太宗謂侍臣曰:「殷聞聲色之娛,不如好德。 謹遣陪臣,歸命大國,乞偏師救助。」太宗遣相里玄獎齎**璽書賜**高麗曰:「新 韶贈眞平左光祿大夫,賻物二百段。 九年,遣使持節册命善德柱國, 鳥獨如此,況人情乎!

進,文王爲左武衞將軍。 浪郡王。二十二年,眞德遣其弟國相、伊贊干金春秋及其子文王來朝(E)。 二十一年,善德卒,贈光祿大夫,餘官封並如故。因立其妹眞德爲王,加授柱國,封樂 春秋請詣國學觀釋奠及講論,太宗因賜以所制温揚及晉祠碑并新 韶授春秋爲特

撰晉書。將歸國,令三品以上宴餞之,優禮甚稱。

章。深仁偕日月,撫運邁陶唐。 之,其詞曰:「大唐開洪業,巍巍皇猷昌。 風凝幽顯,遐邇競呈祥。 德,昭我唐家光。」帝嘉之,拜法敏爲太府卿。 永徽元年, 真德大破百濟之衆,遣其弟法敏以聞(K)。 四時和玉燭,七曜巡萬方行。維岳降宰輔,維帝任忠良。 幡旗旣赫赫,鉦鼓何鍠鍠。外夷違命者, 止戈戎衣定,修文繼百王。統天崇雨施,理物體含 眞德乃織錦作五言太平頭以獻 翦覆被天殃。 五三成

海。 **討平百濟,俘其王扶餘義慈,獻于闕下。** 六年,百濟與高麗、靺鞨率兵侵其北界,攻陷三十餘城,春秋遣使上表求救。 左武衞大將軍蘇定方爲熊津道大總管,統水陸十萬。仍令春秋爲嵎夷道行軍總管,與定方 三年,眞德卒,爲舉哀。詔以春秋嗣,立爲新羅王、加授開府儀同三司、封樂浪郡王。 自是新羅漸有高麗、 百濟之地,其界益大,西至于 顯慶五年,命

明嗣位。 丼於文館詞林採其詞涉規誠者,勒成五十卷以賜之。 龍朔 三年,韶以其國爲雞林州都督府,授法敏爲雞林州都督。 元年,春秋卒,詔其子太府卿法敏嗣位,爲開府儀同三司、上柱國、樂浪郡王、新羅 垂拱二年,政明遣使來朝,因上表請唐禮一 部丼雜文章,則天令所司寫吉凶要禮, 法敏以開耀元年卒, 其子政

立其弟興光爲新羅王,仍襲兄將軍、都督之號。興光本名與太宗同,先天中則天改焉〔六〕。 大將軍,行豹韜衞大將軍、雞林州都督。理洪以長安二年卒,則天爲之舉哀,輟朝二日,遣 天授三年, 政明卒, 則天爲之舉哀, 遣使弔祭, 册立其子, 理洪爲新羅王, 仍令襲父輔國

敬。 兵以討靺鞨,仍加授興光爲開府儀同三司、寧海軍使。二十五年,興光卒,詔贈太子太保,仍 **璃**將進發,上製詩序,太子以下及百僚咸賦詩以送之。上謂璹曰:「新羅號爲君子之國,頗 遺左贊善大夫邢璹攝鴻臚少卿,往新羅弔祭,幷册立其子承慶襲父開府儀同三司、新羅王 盛。」又聞其人多善奕碁,因令善碁人率府兵曹楊季鷹爲璹之副。 知書記,有類中華。以卿學術,善與講論,故選使充此。 開元 越海入寇登州。時興光族人金思蘭先因入朝留京師,拜爲太僕員外卿,至是遺歸國發 其國碁者皆在季鷹之下,於是厚路璹等金寶及藥物等。 十六年,遣使來獻方物,又上表請令人就中國學問經敎,上許之。二十一年,渤海 到彼宜闡揚經典,使知大國儒教之 躊等至彼,

乾運爲開府儀同三司、新羅王,仍册乾運母爲太妃。 七年,遣使金標石來賀正,授衞尉員外 官爵。 加 (册命。三年,上遣倉部郎中、兼御史中丞、賜紫金魚袋歸崇敬持節齎册書往 天寶二年,承慶卒,詔遣贊善大夫魏曜往弔祭之。册立其弟憲英爲新羅王,并襲其兄 大曆二年,憲英卒,國人立其子乾運爲王,仍遣其大臣金隱居奉表入朝,貢方物,請 弔册之。 以

列傳

第一百四十九

上

東夷

使來朝,或一歲再至。

广放還。 八年,遣使來朝,幷獻金、銀、牛黃、魚牙紬、朝霞紬等。 九年至十二年,比歲遣

俊邕爲王。十六年,授俊邕開府儀同三司、檢校太尉、新羅王。令司封郎中、兼御史中丞韋 督雞林州刺史、寧海軍使、新羅王。仍令戶部郎中蓋塤持節册命。其年,良相卒,立上相敬 丹持節册命。丹至鄆州,聞俊邕卒,其子重興立公,韶丹還。永貞元年,韶遺兵部郎中元 信爲王,令襲其官爵。敬信即從兄弟也。十四年,敬信卒,其子先敬信亡,國人立敬信嫡孫 建中四年,乾運卒,無子,國人立其上相金良相爲王。貞元元年,授良相檢校太尉、都

戟,令本國準例給。」四年,遣使金陸珍等來朝貢。 五年,王子金憲章來朝貢。 爲王妃。册使韋丹至中路,知俊邕薨,其册却迴在中書省。今臣還國,伏請授臣以歸。」敕: 其年七月,力奇上言:「貞元十六年,奉詔册臣故主金俊邕爲新羅王,母申氏爲太妃,妻叔氏 「金俊邕等册,宜令鴻臚寺於中書省受領,至寺宣授與金力奇,令奉歸國。仍賜其叔彦昇門 元和元年十一月,放宿衞王子金獻忠歸本國,仍加試祕書監。 三年,遣使金力奇來朝。

季方持節册重興爲王。

三司、檢校太尉、持節大都督雞林州諸軍事,兼持節充寧海軍使、上柱國、新羅國王,彥昇妻 七年,重興卒,立其相金彥昇爲王,遣使金昌南等來告哀。其年七月,授彥昇開府儀同

丞崔 貞氏册爲妃,仍賜其宰相金崇斌等三人戟,亦令本國準例給。 風 飄 延持節弔祭册立,以其質子金士信副之。十一年十一月,其入朝王子金士信等遇惡 至楚州鹽城縣界,淮南節度使李鄘以聞。是歲,新羅飢,其衆一百七十人求食於浙 兼命職方員外郎、攝御史中

東。十五年十一月,遣使朝貢。

州 遣 賜緋魚袋金雲卿,可淄州長史。」 兼 人,並放還。 御史中丞源寂持節弔祭册立。開成元年,王子金義踪來謝恩,兼宿衞。 諸軍事,兼持節充寧海軍使、新羅王;景徽母朴氏爲太妃,妻朴氏爲妃。 使朝貢。 賜物遣之。五年四月,鴻臚寺奏公司:新羅國告哀,質子及年滿合歸國學生等共一百五 長慶二年十二月,遣使金柱弼朝貢。寶曆元年,其王子金昕來朝。 五年,金彥昇卒,以嗣子金景徽爲開府儀同三司、檢校太尉、使持節大都督雞林 會昌元年七月,敕:「歸國新羅官、前入新羅宣慰副使、前充兗州都督府司馬、 大和元年四月,皆 二年四月,放還 命太子左諭德、

月行,南北三月行。 倭國者,古倭奴國也。 世與中國通。其國,居無城郭,以木爲栅,以草爲屋。 去京師一萬四千里,在新羅東南大海中。 依山島 四 面 而 小島五十餘 居,東 西五

傳第

百百

四十九

上

東夷

錦帽,百姓皆椎髻,無冠帶。 者,匍匐 國,皆附屬焉。 而前。 地多女少男。頗有文字,俗敬佛法。 其王姓阿每氏,置一大率,檢察諸國,皆畏附之。 設官有十二等。 衣服之制,頗類新羅 婦人衣純色裙,長腰襦,束髮於後,佩銀花,長八寸,左右各數 並皆跣足,以幅布蔽其前後。 其訴訟 貴人戴

起居。 往撫之。 貞觀五年,遣使獻方物。太宗矜其道遠,敕所司無令歲貢,又遣新州刺史高表仁持節 |表仁無綏遠之才,與王子爭禮,不宣朝命而還。 至二十二年,又附新羅奉表,以通

枝,以明貴賤等級。

焉。 改爲日本。 或云:日本舊小國,倂倭國之地。 又云:其國界東西南北各數千里,西界、南界咸至大海,東界、北界有大山爲限,山外卽 日本國者,倭國之別種也。以其國在日邊,故以日本爲名。或曰:倭國自惡其名不雅, 其人入朝者,多自矜大,不以實對,故中國疑

爲花,分而四散,身服紫袍,以帛爲腰帶。眞人好讀經史,解屬文,容止温雅。則天宴之於 長安三年,其大臣朝臣眞人來貢方物。 朝臣眞人者,獨中國戶部尚書,冠進德冠,其頂

毛人之國。

麟德殿,授司膳卿,放還本國。

使判官高階眞人上言:「前件學生,藝業稍成,願歸本國,便請與臣同歸。」從之。 鎭南都護江江。貞元二十年,遣使來朝,留學生橘逸勢江三、學問僧空海。 其偏使朝臣仲滿,慕中國之風,因留不去,改姓名爲朝衡,仕歷左補闕、儀王友。衡留京師 幅布以爲束修之禮,題云「白龜元年調布」。人亦疑其僞。所得錫賚,盡市文籍,泛海而還。 五十年,好書籍,放歸鄉,逗留不去。天寶十二年,又遣使貢。上元中,擢衡爲左散騎常侍、 開元初,又遣使來朝,因請儒士授經。 韶四門助教趙玄默就鴻臚寺教之,乃遺玄默闊 元和元年,日本國 開成四年,

校勘記

又遺使朝貢。

(1) 姓泉氏 「泉」字各本原作「錢」,據御覽卷七八三、新書卷二二〇高麗傳改。

總章元年 「元年」各本原作「九年」,總章共兩年,作「九年」誤,據通鑑卷二〇一改。

(国) 去歲王及高麗新羅等使並來入朝「及」字各本原作「攻」,據全唐文卷一五改。 「杜」字各本原作「社」,據本書卷八四劉仁軌傳、通鑑卷二〇一改。

(至) 文王 「王」字各本原作「正」,據冊府卷九七四、新書卷二二〇新羅傳改。 下同。

列傳第一百四十九上 校勘記

(长) 遺其弟法敏以聞 本卷下文云法敏爲真德弟春秋之子,新書卷二二〇新羅傳作「遣春秋子法敏

入朝」。 張森楷謂此句「弟」下當脫一「子」字。

(中) 七曜 「七」字各本原作「十」,據御覽卷七八一改。

(3) 重興立 (大) 先天中則天改焉 「立」字各本原作「無」,據唐會要卷九五、冊府卷九六五改。 按先天時則天已卒,此處有誤。

「奏」字各本原無,據唐會要卷九五補。

(10) 鴻臚寺奏

鎭南都護 新書卷二二〇東夷傳作「安南都護」。

橘逸勢 「逸」字各本原作「免」,據日本續羣書類叢傳部橋逸勢傳改

舊唐書卷一百九十九下

列傳第一百四十九下

北狄

鐵勒 契丹 奚 室章 靺鞨 渤海靺鞨 覆 高羅軍

散在磧北。 鐵勒,本匈奴別種。 薛延陀者,自云本姓薛氏,其先擊滅延陀而有其衆,因號爲薛延陀部。 自突厥強盛,鐵勒諸部分散,衆漸寡弱。 至武德初,有薛延陀、

、皆怨,處羅大怒,誅其酋帥百餘人。 初,大業中,西突厥處羅可汗始強大,鐵勒諸部皆臣之,而處羅徵稅無度,薛延陀等諸 鐵勒相率而叛,共推契苾哥楞爲易勿眞莫賀可汗,居

兵器及風俗,大抵與突厥同。

列傳第一百四十九下 北狄

苾二部並去可汗之號以臣之。 廻紇等六部在鬱督軍山者, 貪汗山北,又以薛延陀乙失鉢爲也咥小可汗,居燕末山北。 東屬于始畢,乙失鉢所部在金 西突厥射匱可汗強盛,延陀、契

諸大部落皆屬焉。 伽可汗,賜以鼓纛。夷男大喜,遣使貢方物,復建牙於大漠之北鬱督軍山下,在京師西北六 山者,西臣于葉護。 千里。東至靺鞨,西至葉護,南接沙磧,北至俱倫水(1),迴紇、拔野古、阿跌、同羅、僕骨、霫 推爲主,夷男不敢當。時太宗方圖頡利,遣遊擊將軍喬師望從間道齎册書拜夷男爲眞珠毗 遇頡利之政衰,夷男率其徒屬反攻頡利,大破之。於是頡利部諸姓多叛頡利,歸于夷男,共 貞觀二年,葉護可汗死,其國大亂。乙失鉢之孫日夷男,率其部落七萬餘家附于突厥。

厥,北臨瀚海,即古匈奴之故地,勝兵二十萬,立其二子爲南北部。 太宗亦以其強盛,恐爲 國,建庭於都尉揵山北,獨邏河之南,在京師北三千三百里,東至室章,西至金山,南至突 |李思摩爲可汗,處其部衆於漠南之地,夷男心惡思摩,甚不悅。 後患。十二年,遣使備禮册命,拜其二子皆爲小可汗,外示優崇,實欲分其勢也。 者斬之,小罪者鞭之〔三〕。」夷男甚喜。四年,平突厥頡利之後,朔塞空虚,夷男率其部東返故 三年,夷男遣其弟統特勒來朝,太宗厚加撫接,賜以寶刀及寶鞭,謂曰:「汝所部有大罪 會朝廷立

陀萬矢俱發,傷我戰馬。乃令去馬步陣,率長稍數百爲隊,齊奮以衝之,其衆潰散。 甲仗輜重不可勝計。大度設跳身而遁,萬徹將數百騎追之,弗及。其餘衆大奔走,相騰踐 薛萬徹率數千騎收其執馬者,其衆失馬,莫知所從,因大縱,斬首三千餘級,獲馬萬 没其家口,以賞戰人,至是遂行其法。突厥兵先合輒退,延陀乘勝而逐之。 勸兵拒擊,而延 每五人,以一人經習戰陣者使執馬,而四人前戰,克勝卽授馬以追奔, 是,延陀擊沙鉢羅及阿史那社爾等,以步戰而勝。及其將來寇也,先講武於國中,教習步戰, 白道川至青山,與大度設相及,追之累月,至諾眞水,大度設知不脫,乃亙十里而陳兵。 陽嶺以擊思摩之部。思摩遣使請救,韶英國公李勣、蒲州刺史薛萬徹率步騎數萬赴之。 皆集,邊境空虚,我於此時取思摩如拉朽耳。」因命其子大度設勒兵二十萬,屯白道川,據善 五年,太宗幸洛陽,將有事於太山,夷男謀於其國曰:「天子封太山,萬國必會,士馬 失應接罪至於死 五千匹, 副總管

寇亂,今延陀幈強,須早爲之所。殷熟思之,唯有二策:選徒十萬,擊而虜之,滅除凶 無事,此一策也;若遂其來請,結以婚姻,緩轡羈縻,亦足三十年安靜,此亦一策也。 何者爲先?」司空房玄齡對曰:「今大亂之後,瘡痍未復,且兵凶戰危,聖人所愼。 而死者甚衆,伏屍被野,夷男因乞與突厥和,丼遣使謝罪。 十六年,遺其叔父沙鉢羅泥熟俟斤來請婚(言),獻馬三千匹。太宗謂侍臣曰:「北狄世爲 醜,百年 和親之

狄不可禮義畜,若聘財未備而與之婚,或輕中國,當須要其備禮,於是下詔絕其婚。 草,羊馬多死,遂後期。太宗於是停幸靈州。旣而其聘羊馬來至,所耗將半。議者以爲夷 思摩數遣兵侵掠之,延陀復遣突利失擊思摩,至定襄,抄掠而去。太宗遣英國公李勣援之, 者遂止。太宗乃發使受其羊馬,然夷男先無府藏,調斂其國,往返且萬里,旣涉沙磧,無水 無所恨。然磧北之地,必當有主,捨我別求,固非大國之計。我志決矣,勿復多言。」於是言 及。」夷男曰:「吾聞大唐天子聖德遠被,日月所照,皆來賓服。我歸心委質,冀得覩天顏,死 財,或說夷男曰:「我薛延陀可汗與大唐天子俱一國主,何有自往朝謁?如或拘留,悔之無 帥也,天子立我爲可汗,今復嫁我公主,車駕親至靈州,斯亦足矣。」於是稅諸部羊馬以爲聘 之。因徵夷男備親迎之禮,仍發詔將幸靈州與之會。夷男大悅,謂其國中曰:「我本鐵勒之小 策,實天下幸甚。」太宗曰:「股爲蒼生父母,苟可以利之,豈惜一女?」遂許以新興公主妻 見虜已出塞而還。太宗以其數與思摩交兵,璽書責讓之。 既而李

男少子肆葉護拔灼襲殺其兄突利失可汗而自立,是為頡利俱利薛沙多彌可汗。 拔灼性褊 麗莫離支潛令靺鞨誑惑夷男,啗以厚利,夷男氣懾不敢動。俄而夷男卒,太宗爲之舉哀。 夷 夷男遣使致謝,復請發兵助軍,太宗答以優詔而止。其多,太宗拔遼東諸城,破駐蹕陣,而高 十九年(图),謂其使人曰:「語爾可汗,我父子並東征高麗,汝若能寇邊者,但當來也。」

力擊敗之,虜其衆數萬,拔灼輕騎遁去,尋爲迴紇所殺,宗族殆盡。其餘衆尚五六萬,竄於 馭下無恩,多所殺戮,其下不附。 是時復以太宗尚在遼東,遂發兵寇夏州,將軍執失思

西域,又諸姓俟斤遞相攻擊,各遣使歸命。

頓顙歡呼,請入朝。太宗至靈州,其鐵勒諸部相繼至數千人,仍請列爲州縣,北荒悉平。 宗擊破之,斬首千餘級。萬徹又與迴紇相遇,二將各遣使諭以綏懷之意,其會帥見使者,皆 部兵分道並進;太宗親幸靈州,爲諸軍聲援。旣而道宗渡磧,遇延陀餘衆數萬來拒戰, 將軍執失思力領突厥兵,代州都督薛萬徹、營州都督張儉、右聽衞大將軍契苾何力名統所 二十年,太宗遣使江夏王道宗、左衞大將軍阿史那社爾爲瀚海道安撫大使;右領軍大

垣。 御天下,二紀于茲,粤以眇身,一匡寰宇。 師,遙擒頡利;今茲始弘廟略,已滅延陀。 僭稱驕子,分天街於紫宸;仰應旄頭,抗大禮於皇極。 **振絕代之英聲,畢天下之能事。** 長策風行,已振金微之表至,揚威電發,遠聾沙場之外。 惟天爲大,合其德者弗違;謂地蓋厚,體其仁者光被。 彼匈奴者,與開闢而俱生;奄有龍庭,共上皇而 始勤勞於昧旦,終致治於昇平。 雖壓駕出征,未踰郊甸;前驅所輔,纔掩塞 緬窺邃古,能無力制。 故能彌綸八極,輿蓋二儀, 鐵勒諸姓、迴紇胡祿俟 製者 自股 聊命偏 並 列

百

四十

· 九

北狄

靈儲祉,錫以太康; 宗廟威靈,成茲克定。即宜備禮,告于淸廟,仍頒示普天。 王所不能屈,今咸滅之。斯實書契所未有,古今之壯觀,豈朕一人獨能宣力(+)。蓋由上 山之囿。混元已降,殊未前聞;無疆之業,永貽來裔。古人所不能致,今旣吞之;前 瀚海、盡入提封;解其辮髮、並垂冠帶。上變星昴、歸於東井之躔;下掩蹛林、袪入南 利發等(水),總百餘萬戶,散處北溪,遠遣使人,委身內屬,請同編列,並爲州郡。 收其

地。 使蕭嗣業在迴紇中,因而請降。 勣進加討擊。 勒素服薛延陀之衆,及咄摩支至,九姓渠帥莫不危懼。朝議恐爲磧北之患,復令英國公李 入國後,鐵勒會帥潛知其部落,仍持兩端。 乃去可汗之號,遣使奉表,請居鬱督軍山北。詔兵部尚書崔敦禮就加綏撫。 其後延陀西遁之衆,共推夷男兄子咄摩支爲伊特勿失可汗,率部落七萬餘口,西歸故 勸率九姓鐵勒二萬騎至于天山。咄摩支見官軍奄至,惶駭不知所爲,且聞詔 嗣業與之俱至京師,詔授右武衞將軍,賜以田宅。 李勣因縱兵追擊,前後斬五千餘級,虜男女三萬 而諸部鐵 **咄摩支**

府,拔野古部爲幽陵都督府,同羅部爲龜林都督府,思結部爲盧山都督府,渾部爲皋蘭州, 土,擇其部落,置爲州府:以迴紇部爲瀚海都督府,僕骨爲金微都督府,多覽甚爲燕然都督 二十一年〔5〕,契苾、迴紇等十餘部落以薛延陀亡散殆盡,乃相繼歸國。太宗各因其地

首領先逃逸者請歸國,高宗更置溪彈州以安恤之。至則天時,突厥強盛,鐵勒諸部在漠北 州,白霫部爲寘顏州,凡一十三州。 都護以統之。是歲,太宗以鐵勒諸部並皆內屬,詔賜京城百姓大酺三日。 **斛薛部爲高闕州,奚結部爲雞鹿州,阿跌部爲雞田州,契苾部爲楡溪州,思結別部爲蹛林** 拜其酋長爲都督、刺史,給玄金魚以爲符信, 又置燕然 永徽元年,延陀

陀叛後,朝貢遂絕。 六日飛霞驃,七日發電赤,八日流金甌,九日翺麟紫,十日奔虹赤。 異,爲之制名,號爲十驥:一日騰霜白,二日皎雪驄,三日凝露驄,四日懸光驄,五日决波騟 蘇密往慰撫之,仍列其地爲玄闕州。俄又遣使隨蘇密使入朝, 者漸爲所併。迴紇、製苾、思結、渾部徙于甘、凉二州之地。 其骨利幹北距大海,去京師最遠,自古未通中國。貞觀中遣使來朝貢,遣雲麾將軍康 獻良馬十匹。 又爲文以敍其事。 太宗奇其駿 自延

來,居無常處。 西與奚國接,南至營州,北至室韋。冷陘山在其國南,與奚西山相崎,地方二千里。 契丹,居潢水之南(云),黄龍之北,鮮卑之故地,在京城東北五千三百里。東與高麗鄰, 其君長姓大賀氏。 勝兵四萬三千人,分為八部,若有徵發,諸部皆須議合, 逐獵往

五三四九

死者不得作塚墓,以馬駕車送入大山,置之樹上,亦無服紀。子孫死,父母晨夕哭之,父母 不得獨舉。 奮 唐 獵則別部,戰則同行。 本臣突厥,好與奚鬭,不利則遁保青山及鮮卑山。

窟哥為左監門大將軍。其曾孫祜莫離,則天時歷左衞將軍兼檢校彈汗州刺史,歸順郡王。 君長及老人等,賜物各有差,授其審長窟哥爲左武衞將軍。二十二年,窟哥等部咸請內屬, 乃置松漠都督府,以窟哥爲左領軍將軍兼松漠都督府、無極縣男,賜姓李氏。顯慶初,又拜 討,便來救援。計不久自當擒滅,縱其不得,終不以契丹易之。」太宗伐高麗,至營州,會其 別類,今來降我,何故索之。師都本中國人,據我州城,以爲盜竊,突厥無故容納之,我師往 其君摩會率其部落來降。 死,子孫不哭。其餘風俗與突厥同。 武德初,數抄邊境。 二年,入寇平州。 突厥頡利遣使請以梁師都易契丹,太宗謂曰:「契丹、突厥,本是 六年,其君長咄羅遣使貢名馬豐貂。 貞觀二年,

鈴衞將 州都督趙翽所侵侮,二人遂舉兵殺翽,據營州作亂。 遣使內附,詔令於營州城傍安置,授雲麾將軍,行遼州總管。 至曾孫<u>萬榮,垂拱初累授右玉</u> 兼松漠都督。 軍、歸誠州刺史,封永樂縣公。萬歲通天中,萬榮與其妹壻松漠都督李盡忠,俱爲營 則天怒其叛亂, 下詔改萬榮名爲萬斬, 盡忠爲盡滅。 盡滅尋自稱無上可汗, 盡忠卽窟哥之胤,歷位右武衞大將軍

又契丹有別部會帥孫敖曹,初仕隋爲金紫光祿大夫。武德四年,與靺鞨酋長突地稽俱

遇、仁節 殺刺 邊道 遇、 輕騎筲遁, 衆,以輕騎數千人東走。 戰于東硤石谷,孝傑在陣陷没(10),宏暉棄甲而遁。 以萬斬爲大將, 大總管,御史大失婁師德爲副大總管, 左鷹 俄而 大總管、建安郡王武攸宜遣裨將討之,不能克。 史陸寶積, 揚 並爲賊 李盡滅死,萬斬代領其衆。 衞將軍曹仁師、司農少卿麻仁節率兵討之。 至潞河東,解鞍憩於林下,其奴斬之。 所虜。 前鋒略地, 屠官吏子女數千人。俄而奚及突厥之衆掩擊其後, 又令夏官尚書王孝傑、左羽林將軍蘇宏暉領兵七萬以繼之。 前軍副總管張九節率數百騎設伏以邀之。 所向皆下, 萬斬又遣別帥駱務整、何阿小爲遊軍前鋒 右武衞將軍沙吒忠義爲前軍總管,率兵三十萬以討 旬日兵至數萬, 張九節傳其首于東都, 萬斬 又詔左金吾大將軍、河內王 進逼 與萬斬戰于西硤石谷,官軍敗績,玄 乘勝率其衆入幽州,殺略人吏。 檀州 韶令右金吾大將軍張玄 萬斬窮蹙,乃將其 掠其幼弱。 自是其餘衆遂降 ,攻陷冀州 萬 武懿宗爲 與萬 斬棄其 家奴 斬

舊帥 公主以妻之。 置 |松漠都督府,封失活爲松漠郡王,拜左金吾衞大將軍兼松漠 拜爲刺史, 開元三年,其首領李失活以默啜政衰,率種落內附。 又以將軍薛泰督軍以鎭撫之。 明年,失活入朝, 失活即盡忠之從父弟也。 都督 封宗室外甥女楊氏爲永樂 其所 統 部 落 於是復 各因

列傳第一百四十九下 北狄

仍封鬱于爲松漠郡王,授左金吾衞員外大將軍兼靜析軍經略大使,賜物千段。鬱于還蕃, 可突于來朝,拜左羽林將軍,從幸幷州。 可突于之罪。十年,鬱于入朝請婚。上又封從妹夫率更令慕容嘉賓女爲燕郡公主以妻之, 可突于立娑固從父弟鬱于爲主台,俄又遣使請罪,上乃令册立鬱于,令襲娑固官爵,仍赦 官軍不利,娑固、大輔臨陣皆爲可突于所殺,生拘薛泰。 六年,失活死,上爲之舉哀,贈特進。 都督許欽澹令薛泰帥驍勇五百人,又徵奚王李大輔者及娑固合衆以討可突于公司。 娑固大臣可突于曉勇四, 頗得衆心,娑固謀欲除之。 失活從父弟娑固代統其衆,遣使册立,仍令襲其 營府震恐,許欽濟移軍西入渝關。 可突于反攻娑固,娑固奔

邵固 經略大使,改封廣化郡王,又封皇從外甥女陳氏爲東華公主以妻之。 復相猜阻。 [爲主。 明年, 鬱于病死,弟吐于代統其衆(E),襲兄官爵,復以<u>燕郡公主爲妻。</u>吐于與可突于 其多,車駕東巡,邵固詣行在所,因從至岳下,拜左羽林軍員外大將軍、靜析軍 十三年,攜公主來奔,便不敢還,改封遼陽郡王,因留宿衞。 可突于立李盡忠弟

之,必不來矣。」十八年,可突于殺邵固,率部落幷脅奚衆降于突厥,東華公主走投平盧軍 相張說謂 邵 固還蕃,又遣可突于入朝,貢方物,中書侍郎李元紘不禮焉,可突于怏怏而去。 人曰:「兩蕃必叛。可突于人面獸心,唯利是視,執其國政,人心附之,若不優禮縻

班師。 乾走投安東得免,拜左驍衞將軍。 衣一副、銀器十事、絹綵三千疋。 數十人。 時契丹衙官李過折與可突于分掌兵馬,情不叶,悔潛誘之,過折夜勒兵斬可突于及其支黨 **遂持兩端,散走保險。** 精騎萬人, 丼領降溪之衆追擊之。 管,領衆與幽州長史趙含章出塞擊破之,俘獲甚衆。 忠王浚爲河北道行軍元帥以討之,師竟不行。 於是詔中書舍人裴寬、給事中薛侃等於京城及關內、河東、河南、 使僞降。 人,盡爲賊所殺。 明年,可突于又來抄掠。 俄又迴惑不定,引衆漸向西北,將就突厥。 二十三年正月,傳首東都。 韶以張守珪爲幽州長 官軍大敗,知義、守忠率麾下遁歸,英傑、克勤沒于陣,其下六千餘 幽州長史薛楚玉遣副將郭英傑、吳克勤、鄔知義、羅守忠率 其年,過折爲可突于餘黨泥禮所殺, 并其諸子, 唯一子刺 軍至渝關都山之下, 詔封過折爲北平郡王,授特進,檢校松漠州都督,賜錦 史兼御史中丞以經略之。可突于漸爲守珪所逼,遣 二十年,詔禮部尚書信安王禕爲行軍副大總 守珪遣管記王悔等就部落招論之二言。 可突于率其麾下遠遁,奚衆盡降,禪乃 可突于領突厥兵以拒官軍。溪衆 河北分道募壯勇之士,以

就潢水 天寶 南 十年,安禄山誣其酋長欲叛,請舉兵討之。八月,以幽州、雲中、平盧之衆數萬人, 契丹衙與之戰,祿山大敗而還,死者數千人。至十二年,又降附。迄于貞元,常間

歲來修藩禮。

奏,乞國家賜印。」許之,以「奉國契丹之印」爲文。 大和、開成時遣使來朝貢。會昌二年九月,制:「契丹新立王屈戍公司,可雲麾將軍,守右武 **拽何已下,各授官放還。十一年,大首領熱蘇等二十五人來朝。自後至元和、長慶、寶曆、** 衞將軍員外置同正員。」 幽州節度使張仲武上言:「屈戍等云,契丹舊用迴紇印,今懇請聞 貞元四年,與奚衆同寇我振武,大掠人畜而去。九年、十年,復遣使來朝,大首領悔落

帳,兼用車爲營,牙中常五百人持兵自衞。 此外部落皆散居山谷,無賦稅。 與契丹戰爭。 分爲五部,每部置俟斤一人。風俗並於突厥,每隨逐水草,以畜牧爲業,遷徙無常。居有氊 接契丹,西至突厥,南拒白狼河,北至霫國。自營州西北饒樂水以至其國。勝兵三萬餘人, (奚國,蓋匈奴之別種也,所居亦鮮卑故地,即東胡之界也,在京師東北四千餘里。東 其人善射獵,好

天年,契丹叛後,溪衆管屬突厥,兩國常遞爲表裏,號曰「兩蕃」。景雲元年,其首領李大輔遣 度者爲右領軍兼饒樂都督,封樓煩縣公,賜姓李氏。 武德中,遣使朝貢。貞觀二十二年,酋長可度者率其所部內屬,乃置饒樂都督府,以可 顯慶初,又授右監門大將軍。 萬歲通

使貢方物,睿宗嘉之,宴賜甚厚。

失部 奉敕 突厥默啜,並 國 前 信物 軍 左驍 來 伍,大輔 延 此 和 |儉 招諭蕃將,李楷洛等不受節度而輒用兵,請斬以謝。」大輔曰:「若奉敕招諭,有何 衛將軍李楷將等與大輔會戰,我師敗績。 元 年,左羽林將軍、檢校幽州大都督孫儉公司,率兵十二萬以襲其部落,師次冷硎, 遇害。 率軍中繒帛萬餘段丼袍帶以與之。 乃率衆逼之,由是大敗,兵士死傷者數萬。 大輔曰:「將軍可南還,無相驚擾。」儉軍 儉懼,不敢進救,造使矯報大輔云:「我 儉及副將周以悌為大輔所擒,送于 漸

依舊置 仍 入朝,韶封從外甥女辛氏爲固安公主以妻之,賜物一千五百疋,遣右領軍將軍李濟持節送 拜左金吾員外大將軍、饒樂州都督。 開元三年,大輔遣其大臣粤蘇梅落來請降,詔復立其地爲饒樂州,封大輔爲饒樂郡王, 營州都督府,上從之。 敕太子詹事姜師度充使督工作(云),役八千餘人。其年,大輔 五年,大輔與契丹首領松漠郡王李失活威請於柳城

吾員 遞 論 外大將軍兼保塞軍經略大使,賜物一千段,仍以固安公主爲妻。 八 年,大輔率兵救契丹,戰死,其弟魯蘇嗣立。十年,入朝,詔令襲其兄饒樂郡王、右金 告,韶令 離婚,復以 成安公主之女韋氏為東光公主以妻之。十四年, 而公主與嫡母未和, 又改封魯蘇爲

列

傳

第

百四十九下

北狄

賜物十萬段,移其部落於幽州界安置。 其部落五千帳來降。 斬首二百級。 不能制,走投渝關,東光公主奔歸平盧軍。 奉誠王,授右羽林軍員外將軍。 自是溪衆稍稍歸降。二十年,信安王禕奉詔討叛溪。奚酋長李詩瑣高等以 韶封李詩爲歸義王兼特進、左羽林軍大將軍同正,仍充歸義州都督, 十八年,奚衆爲契丹衙官可突于所脅,復叛降突厥。 天寶五載,又封其王娑固爲昭信王,仍授饒樂都督。 其秋,幽州長史趙含章發淸夷軍兵擊奚,破之,

朝。 錫以金帛遺還,餘皆駐而館之,率爲常也。 亦少爲寇。 押奚、契丹兩蕃使。 以奚首領索低爲右武威衞將軍同正,充檀、薊兩州遊奕兵馬使,仍賜姓李氏。 萬 「餘衆。 十一年,遣使獻名馬。 自大曆後,朝貢時至。 元和元年, 其每歲朝賀,常各遣數百人至幽州,則選其酋渠三五十人赴闕,引見於麟德殿, 自至德之後,藩臣多擅封壤,朝廷優容之,彼務自完,不生邊事,故二蕃 其王饒樂府都督、襲歸誠王梅落來朝,加檢校司空,放還蕃。三年, 貞元四年七月,奚及室章寇振武。十一年四月,幽州奏卻奚六 爾後每歲朝貢不絕,或歲中二三至。故事,常以范陽節度使爲 八年,遺使來

室韋者,契丹之別類也。 居峱越河北,其國在京師東北七千里。東至黑水靺鞨,西至

多多霜 突厥 富者項著五 以皮覆 其財物, 于突厥。 ,南接契丹,北至于海。 霰。 1上,相聚而居,至數十百家。 夫婦同車而載,鼓舞共歸。 兵器有角弓楛矢,尤善射, 色雜珠。 畜宜犬豕,豢養而噉之,其皮用以爲韋,男子女人通以爲服。 婚嫁之法,男先就女舍,三年役力,因得親迎其婦。役日已滿,女家分 其國無君長,有大首領十七人,並號「莫賀弗」,世管攝之,而附 剡木爲犂,不加金刃,人牽以種,不解用牛。 時聚弋獵,事畢而散。 武德中,獻方物。 貞觀三年,遣使貢豐貂,自此朝貢不 其人土著,無賦斂。 被髮左袵, 或爲小室, 夏多霧雨,

姤接。 鳥 里。 絕。 又 和解部落,次東又有烏羅護部落,又有那禮部落。 又有塞曷支部落, 室草、婆萵室草、訥北室草、駱駝室草,並在柳城郡之東北,近者三千五百里,遠者六千二百 北 丸之遺人, 今室章最西與迴紇接界者, 有婆萵室草,東又有嶺西室草,又東南至黃頭室草,此部落兵強,人戶亦多,東北與達 又云:室章,我唐有九部焉。 嶺 西 室韋北又有訥北 今亦自 此部落有良馬,人戶亦多,居啜河之南,其河彼俗謂之燕支河。次又有 稱 烏 丸國。 支室章,此部落較小。 烏素固部落,當俱輪泊之西南。次東有移塞沒部落。次東 武德、貞觀中,亦遣使來朝貢。其北大山之北有大室章部 所謂嶺西室韋、山北室韋、黃頭室韋、大如者室韋、小如者 又東北有山北室章,又北有小如者室章, 烏羅護之東北二百餘里,那河之北有古

傳

第

百

之北,北黑水靺鞨之南,東流注于海。烏丸東南三百里,又有東室章部落,在峱越河之北。 章界,又東經蒙兀室章之北,落俎室章之南,又東流與那河、忽汗河合,又東經南黑水靺鞨 落,其部落傍望建河居。其河源出突厥東北界俱輪泊,屈曲東流,經西室韋界,又東經大室 月,室章大都督阿成等三十人來朝公司。開成、會昌中,亦遣使來朝貢不絕。 年閏十二月,室韋都督和解熱素等一十人來朝。大和五年至八年,凡三遣使來。九年十二 其河東南流,與那河合。開元、天寶間,比年或間歲入貢。大曆中,亦頻遣使來貢。貞元八

宇,並依山水掘地爲穴,架木於上,以土覆之,狀如中國之塚墓,相聚而居。 夏則出隨水草, 數百口,食其肉而衣其皮。死者穿地埋之,以身襯土,無棺斂之具,殺所乘馬於屍前設祭。 冬則入處穴中。父子相承,世爲君長。俗無文字。兵器有角弓及楛矢。其畜宜猪,富人至 北方,尤稱勁健,每恃其勇,恆爲鄰境之患。俗皆編髮,性凶悍,無憂戚,貴壯而賤老。 高麗,北鄰室章。其國凡爲數十部,各有酋帥,或附於高麗,或臣於突厥。而黑水靺鞨最處 有

有

的

突

地

稽

者

,

隋

末

率

其

部

千

餘

家

入

屬

,

處

之

於

營
州

,
場

帝

授

突

地

稽

金

紫

光

歳

大

夫

、 靺鞨,蓋肅愼之地,後魏謂之勿吉,在京師東北六千餘里。東至於海,西接突厥,南界 列傳第一百四十九下 北狄

不敢進。 氏。 貢 將 寇湟中,謹 突地 雄 城 遼 軍, 邊, ,每歲不 西太守。 尋卒。 會高 稽率 爲 封燕國公。 夷 上元三年,又破吐蕃數萬衆於青海, 開 所 行兵 絕。 人所憚。 道 子謹行, 部赴定州 武德初, 引突厥 (士樵 永淳 '偉貌',武力絕人。 採,素不設備,忽聞 累拜右領軍大將 遣間使朝貢,以其部落置燕州, 來攻幽州, ,遺使詣太宗請受節度,以戰功封蓍國公。 元年卒,贈幽州 突地 軍,爲積石道經略大使。 稽 麟德 都督,陪葬乾陵。 、賊至,遂建旗伐鼓,開門以待之。 率兵邀擊, 中,歷遷營州都督。 降璽書勞勉之。 大破之。 仍以突地稽爲總管。 自後或有酋長自來,或遣使來朝 貞觀 吐蕃論欽陵等率衆十萬人入 累授鎭軍大將軍,行右衞大 其部落家僮數千人,以財力 又徙 初, 其部落於幽州之昌平 拜右 吐蕃疑有伏兵,竟 衞將 劉黑闥之叛也, 軍, 賜 姓 李

六年, 部落 部 亦 又以 因 爲 高 其 其 黑 白 南 麗 都 破 Ш 水府,仍以其首領 北 督賜姓李氏, 為 後 部,素附於高麗,因收平壤之後,部衆多入中國。 奔散微弱,後無聞焉,縱有遺人,並爲渤海編戶。唯黑水部全盛,分爲十六部, 稱(三)。 開元 名 戲誠,授雲麾將軍兼黑水經略使,仍以幽州都督爲其押使,自此 爲都督,諸部 十三年,安東都護薛泰請於黑水靺鞨內置黑水軍。 刺 史隸 屬焉。 中國 置長 汨咄、 史, 安居骨、號室等部CIOI, 就其部落監領之。 續更以最大 十

麗、靺鞨之衆以拒楷固,王師大敗,楷固脫身而還。 玉鈐衞大將軍李楷固率兵討其餘黨, 契丹李盡 渤海靺鞨大祚榮者,本高麗別種也。 忠反叛,祚榮與靺鞨乞四比羽各領亡命東奔,保阻以自固。 先破斬乞四比羽,又度天門嶺以迫祚榮。 高麗旣滅,祚榮率家屬徙居營州。 屬契丹及奚盡降突厥,道路阻絕,則天 盡忠旣死,則天命右 萬歲通天年, 祚樂合高

張行岌往招慰之。 突厥。其地在營州之東二千里,南與新羅相接。越憙靺鞨東北至黑水靺鞨(宣),地方二千里, 不能討,祚榮遂率其衆東保桂婁之故地〔三〕,據東牟山,築城以居之。 天二年,遺郎將崔訢往册拜祚榮爲左驍衞員外大將軍、渤海郡王,仍以其所統爲忽汗州,加 編戶十餘萬, 忽汗州都督,自是每歲遣使朝貢 祚榮驍勇善用兵,靺鞨之衆及高麗餘燼,稍稍歸之。 勝兵數萬人。 祚榮遣子入侍, 將加册立, 會契丹與突厥連歲寇邊, 使命不達。 睿宗先 風俗與高麗及契丹同,頗有文字及書記。中宗卽位,遺侍御史 聖曆中,自立爲振國王,遣使通于

軍、渤海郡王、忽汗州都督。 開 元七年, 祚榮死,玄宗遣使弔祭,乃册立其嫡子桂婁郡王大武藝襲父爲左驍衞大將

有欺誑之理 之。上密遣門藝往安西,仍報武藝云:「門藝遠來歸投,義不可殺。今流向嶺南,已遣去訖。」 |藝忿棄其衆,間道來奔,韶授左驍衞將軍。 武藝尋遣使朝貢,仍上表極言門藝罪狀,請殺 不從。 伏, 唐兵一臨, 掃地俱盡。今日渤海之衆, 數倍少於高麗, 乃欲違背唐家, 事必不可。」武藝 官屬,致有漏洩,左遷道邃爲曹州 乃留其使馬文軌、葱勿雅,別遣使報之。 強,萬倍於我,一朝結怨,但自取滅亡。昔高麗全盛之時,強兵三十餘萬,抗敵唐家,不事賓 至京師、開元初還國、至是謂武藝曰:「黑水請唐家官吏、卽欲擊之、是背唐也。 必是與唐家通謀,腹背攻我也。」遣母弟大門藝及其舅任雅發兵以擊黑水。 曰:「黑水途經我境,始與唐家相通。 門藝兵至境,又上書固諫。武藝怒,遣從兄大壹夏代門藝統兵,徵門藝,欲殺之。門 四年,黑水靺鞨遣使來朝,詔以其地爲黑水州,仍置長史,遣使鎭押。 ! 今聞門藝不向嶺南,伏請依前殺却。」由是鴻臚少卿李道邃、源復以不能督察 刺史,復爲澤州刺 舊請突厥吐屯,皆先告我同去。今不計會,卽請漢官, 俄有洩其事者,武藝又上書云:「大國示人以信,豈 史。 遣門藝暫向嶺南以報之。 門藝曾充質子 武藝謂其屬 唐國人衆兵

令太僕員 無功而還。 二十年,武藝遣其將張文休率海賊攻登州 外卿金思蘭往新羅發兵以攻其南境。 武藝懷怨不已,密遣使至東都,假刺客刺門藝於天津橋南,門藝格之,不死。 刺史章俊。 屬山阻寒凍,雪深丈餘,兵士死者過半,竟 韶遣門藝往幽州徵兵以討之,仍

列傳

第

百四十九下

北

狄

河南府捕獲其賊,盡殺之。

大常靖爲衞尉卿同正,令還蕃。八月,其王子大貞翰來朝,請備宿衞。十年正月,以來朝王 子大清允爲右衞將軍同正,其下三十餘人,拜官有差。 十年,或頻遣使來朝,或間歲而至,或歲內二三至者。十二年正月,遣使獻日本國舞女一十 父爲左驍衞大將軍、忽汗州都督。欽茂承詔赦其境內,遣使隨守簡入朝貢獻。大曆二年至 一人及方物。四月、十二月,使復來。建中三年五月、貞元七年正月,皆遣使來朝,授其使 二十五年,武藝病卒,其子欽茂嗣立。詔遣內侍段守簡往册欽茂爲渤海郡王,仍嗣其

其郡王、將軍而已, 嵩璘遣使敍理,故再加册命。十一月,以王姪大能信爲左驍衞中郞將、 虞候、婁蕃長,都督茹富仇爲右武衞將軍,放還。 進、太子詹事、賓客,寶應元年,進封國王,大曆中,累加拜司空、太尉;及嵩璘襲位,但授 空,進封渤海國王三。嵩璘父欽茂,開元中,襲父位爲郡王左金吾大將軍,天寶中,累加特 十一年二月,遣內常侍殷志贍册大嵩璘爲渤海郡王。十四年,加銀青光祿大夫、檢校司

督,依前渤海國王。 五年,遣使朝貢者二。 七年,亦遣使來朝。 八年正月,授元瑜弟權知國 太尉。十二月,遣使朝貢。 二十一年,遣使來朝。順宗加嵩璘金紫光祿大夫、檢校司空。元和元年十月,加檢校 四年,以嵩璘男元瑜爲銀青光祿大夫、檢校祕書監、忽汗州都

務言義銀青光祿大夫、檢校祕書監、都督、渤海國王,遣內侍李重旻使焉。

遺使來朝貢。長慶二年正月,又遺使來。四年二月,大叡等五人來朝,請備宿衞。 寶曆中, 督、渤海國王。十五年閏正月,遣使來朝,加大仁秀金紫光祿大夫、檢校司空。十二月,復 比歲修貢。大和元年、四年,皆遭使來朝。 十三年,遣使來朝,且告哀。五月,以知國務大仁秀爲銀青光祿大夫、檢校祕書監、都

等六人來朝。開成後,亦修職貢不絕。 人,隨寶英請赴上都學問。先遺學生三人,事業稍成,請歸本國,許之。二月,王子大先晟 六年,遣王子大明俊等來朝。七年正月,遣同中書右平章事高寶英來謝册命,仍遣學生三 五年,大仁秀卒,以權知國務大彝震爲銀青光祿大夫、檢校祕書監、都督、渤海國王。

以赤皮爲衣緣,婦人貴銅釧,衣襟上下懸小銅鈴,風俗略與契丹同。 戶,勝兵萬餘人。貞觀三年,其君長遣使貢方物。 西至突厥,南至契丹,北與烏羅渾接。地周二千里,四面有山,環繞其境。人多善射獵,好 霫,匈奴之別種也,居于潢水北,亦鮮卑之故地,其國在京師東北五千里。東接靺鞨, 有都倫紇斤部落四萬

西與突厥,南與契丹,北與烏丸接。風俗與靺鞨同。貞觀六年,其君長遣使獻貂皮焉。 烏羅渾國,蓋後魏之烏洛侯也,今亦謂之烏羅護,其國在京師東北六千三百里。東與靺

悔於出師也可知矣。何者?夷狄之國,猶石田也,得之無益,失之何傷,必務求虛名,以勞 欲,由是而起。亂臣賊子,得以爲資,不戢自焚,遂亡其國。我太宗文皇帝親馭戎輅,東征 有用。但當修文德以來之,被聲敎以服之,擇信臣以撫之,謹邊備以防之,使重譯來庭,航 高麗,雖有成功,所損亦甚。 及凱還之日,顧謂左右曰:「使股有魏徵在,必無此行矣。」則是 然、抑亦稟於天性。太平之人仁,空峒之人武,信矣。隋煬帝縱欲無厭,興兵遼左,急斂暴 史臣曰:北狄密邇中華, 侵邊蓋有之矣; 東夷隔礙瀛海, 作梗罕常聞之。 非惟勢使之

贊曰:東夷之人,北狄之俗。爰考潤官,是稱蠻服。 未得無傷,已得何足。 宜務懷柔,

謂之羈束。

海入貢,茲庶得其道也。

- 校勘記
- 俱倫水 「水」字各本原作「山」,據通典卷一九九、寰宇記卷一九八改。
- (三) 大罪者斬之小罪者 鞭之 「斬之小罪者」五字各本原無, 據通鑑卷一九三補。 唐會要卷九六作

「大罪斬之,小罪鞭之」。

- 3 泥熟俟斤 各本原作「泥敦策厅」,據冊府卷九七八、通鑑卷一九六改。
- 十九年 各本原作「十七年」,據本書卷三太宗紀及卷一九九高麗傳、通鑑卷一九八改。
- 金 金微 、珊府卷一二改。 「微」字各本原作「徽」, 據本書卷一九四上突厥傳、寰宇記卷一九六、新書卷四三下地理
- (2) 胡祿俟利發 |志 「胡」字各本原作「月」,據唐大韶令集卷七九、冊府卷一二改。
- (4) 獨能宣力 「宣力」二字各本原無、據唐大韶令集卷七九、冊府卷一二補。
- S2 二十一年 是歲大酺,元龜八〇固在二十一年正月甲寅也。」 各本原作「二十二年」,據通典卷一九八改。 突厥集史:「二十二爲二十一訛。下文云
- (元) 潢水 各本原作「黄水」,據唐會要卷九六、新書卷二一九契丹傳改。
- 8 在陣陷沒 列 倅 第 百 「在」字各本原作「左」,據冊府卷九八六改。 四 + 九 下 校 勘 記

可突于 通鑑卷二一二、合鈔卷二五九下北狄傳作「可突干」。

= 李大輔 唐會要卷九六、通鑑卷二一一皆作「李大酺」。

唐會要卷九六作「鬱於」,通鑑卷二一二作「鬱干」。

GB. 吐于 通鑑卷二一二作「吐干」。

□吾 管記王悔等 「記」字各本原作「紀」,據本書卷一○三張守珪傳改。

云 契丹新立王屈戍 「王」字各本原作「五」,據唐會要卷九六改。

(1) 孫儉 新書卷二一九北狄傳、通鑑卷二一〇作「孫佺」。

CIS 姜師度 「姜」字各本原作「羊」,據通鑑卷二一一改。

CIO 大都督 「都」字各本原作「勝」,據唐會要卷九六、冊府卷九七二改。

(110) 安居骨號室等部 「號」字各本原無,據通典卷一八六、簑字記卷一九五補。

「稱」字各本原作「栅」,據唐會要卷九六、合鈔卷二五九下北狄傳改。

桂婁 新書卷二一九北狄傳作「挹婁」。

部又以南北爲稱

南與新羅相接越憙靺鞨東北至黑水靺鞨 **删府卷九五九作「南與新羅相接,西接越憙靺鞨,東**

進封渤海國王 北至黑水靺鞨。」 各本原作「進封渤海郡王」,據下文及冊府卷九六五改。

舊唐書卷二百上

列傳第一百五十上

安祿山 子慶緒 高尙 孫孝哲 史思明 子朝義

爲業。 生,行必尅獲,拔爲偏將。常嫌其肥,以守珪威風素高,畏懼不敢飽食。以曉勇聞,遂養爲 互市牙郎。二十年,張守珪爲幽州節度,禄山盜羊事覺,守珪剝坐,欲棒殺之,大呼曰:「大 以與其兄及延偃相攜而出,感愧之,約與思順等幷爲兄弟,冒姓爲安。及長,解六蕃語,爲 開元初,與將軍安道買男俱逃出突厥中。道買次男貞節爲嵐州別駕,收獲之。年十餘歲, 夫不欲滅兩蕃耶?何爲打殺禄山!」守珪見其肥白,壯其言而釋之。 令與鄉人史思明同捉 安祿山,營州柳城雜種胡人也。 突厥呼鬭戰爲軋犖山,遂以名之。少孤,隨母在突厥中,將軍安波至兄延偃妻其母。 本無姓氏,名軋犖山。母阿史德氏,亦突厥巫師,以卜

列

第一

百五十上

安祿

蕃人,蕃人先母而後父。」玄宗大悅,遂命楊銛巳下並約爲兄弟姊妹。 信臣,玄宗意益堅不搖矣。後請爲貴妃養兒,入對皆先拜太眞,玄宗怪而問之,對曰:「臣是 數載之後, 益寵之。三載,代裴寬爲范陽節度,河北採訪、平盧軍等使如故。 採訪使張利貞常受其賂, 乞爲好言,玄宗益信嚮之。天寶元年,以平盧爲節度,以祿山攝中丞爲使。入朝奏事,玄宗 二十八年,爲平盧兵馬使。性巧點,人多譽之。授營州都督、平盧軍使。 黜陟使席建侯又言其公直無私;裴寬受代,及李林甫順旨,並言其美。數公皆 厚路往來者,

若但言「大夫須好檢校」,則反手據牀曰:「阿與,我死也!」李龜年嘗斆其說, 玄宗以爲笑 其情而先言之,豫山以爲神明,每見林甫,雖盛多亦汗治。林甫接以温言,中書廳引坐,以 山 己披袍覆之,禄山欣荷,無所隱,呼爲十郎。駱谷奏事,先問「十郎何言?」有好言則喜躍, 承恩深,入謁不甚罄折。 **六載,加大夫。** 常令劉駱谷奏事。與王鉷俱爲大夫。李林甫爲相,朝臣莫敢抗禮,祿 林甫命王鉷,鉷趨拜謹甚,祿山悚息,腰漸曲。 每與語,皆揣知

前,作胡旋舞,疾如 坐東爲設一大金雞障,前置一榻坐之,卷去其簾。十載入朝,又求爲河東節度,因拜之。男 晚年益肥壯,腹垂過膝,重三百三十斤,每行以肩膊左右擡挽其身,方能移步。至玄宗 風焉。爲置第字,窮極壯麗,以金銀爲篣筐笊籬等。上御勤政樓,於御

十一人:長子慶宗,太僕卿;少子慶緒,鴻臚卿。 慶宗又尙郡主。

待其昏醉, 斬首埋之, 皆不覺死, 每度數十人。十一載八月, 祿山倂率河東等軍五六萬, 號 幕下,高尙掌書記,劉駱谷留居西京爲耳目,安守忠、李歸仁、蔡希德、牛庭玠、向潤客、崔乾 犬不絕,人無聊矣。旣肥大不任戰,前後十餘度欺誘契丹,宴設酒中著莨菪子,預掘一坑, 站、尹子奇、何千年、武令珣、能元皓、田承嗣、田乾眞,皆拔於行間。每月進奉生口駝馬鷹 千匹,牛羊稱是。銀三道節度,進奏無不允。引張通儒、李庭堅、平冽、李史魚、獨孤問俗在 **溪**小兒二十餘人走上山,墜坑中,其男慶緒等扶持之。 會夜,解走,投平盧城 帳。屬久雨,弓箭皆漲濕,將士困極,奚又夾攻之,殺傷略盡。祿山被射,折其玉簪,以麾下 十五萬,以討契丹。去平盧千餘里,至土護眞河,即北黃河也。又倍程三百里,奄至契丹牙 祿山陰有逆謀,於范陽北築雄武城,外示禦寇,內貯兵器,積穀爲保守之計,戰馬萬五

等使,上筋脚馬,皆陰選擇之,奪得樓煩監牧及奪張文儼馬牧。 殷、隴右羣牧等都使,奏吉温爲武部侍郎、兼中丞,爲其副,又請知總監事。 又云「召必不至」,洎召之而至。十三載正月,謁於華淸宮,因涕泣言:「臣蕃人,不識字,陛 下擢臣不次,被楊國忠欲得殺臣。」玄宗益親厚之,遂以爲左僕射,却迴。其月,又請爲閉 楊國忠屢奏祿山必反。十二載,玄宗使中官輔璆琳覘之,得其賄賂,盛言其忠。 三月一日,歸范陽,疾行出 既爲閑廏、羣牧 國忠

關,日 行三四 一百里,至范陽。 人言反者,玄宗必大怒,縛送與之。十四載,玄宗又召之,託疾

十一月,反于范陽,矯稱奉恩命以兵討逆賊楊國忠。以諸蕃馬步十五萬,夜半行,平明 賜其子婚,令就觀禮,又辭。

禄山 禄山 清, 谷南 者六七千人,遂入陳留郡。太守郭納初拒戰,至是出降。至滎陽,太守崔無詖拒戰,城陷死 常淸等相次爲大將以擊之。 食,日六十里。以高尚、嚴莊爲謀主,孫孝哲、高邈、何千年爲腹心。天下承平日久,人不知 至陳留郡,河南節度張介然城陷死之,傳首河北。 戰,聞其兵起,朝廷震驚。 太守竇庭芝走投河東。 召河南尹達奚珣,使之蒞事。 「,祿山在興中驚哭曰:「吾子何罪而殺之!」狂而怒,官軍之降者夾道,命交相斫焉,死 走至陝郡,高仙芝率兵守陝城,皆棄甲西走潼關,懼賊追躡,相蹂藉而死者塞路。 忽,率軍大至。 而過。 次于泥水甖子谷,將軍荔非守瑜蹲而射之,殺數百人,矢及祿山輿,祿山不敢過,乃取 守瑜箭盡,投河 封常清自苑西隤牆使伐樹塞路而奔。 賊使崔乾祐守陝郡。 禁衞皆市井商販之人,乃開左藏庫出錦帛召募。因以高仙艺、封 而死。 **祿山令嚴肅,得士死力,無不一當百,遇之必敗。十二月,度河** 初,常清欲殺珣,恐應賊,憕、奕諫止之。常清旣敗,唯與 東京留守李憕、中丞盧奕、採訪使判官蔣淸燒絕河陽橋。 臨汝太守章斌降于賊。 陳留郭門祿山男慶緒見誅慶宗榜,泣告 祿山入東京, 殺李憕、 盧奕、蔣

荆、襄、黔中、 嶺南子弟十萬餘,與賊將武令珣戰于葉縣城北 吳河,王師盡沒。 五年正月,賊竊號燕國,立年聖武,達奚珣已下署爲丞相。 五月,南陽節度魯炅率 六月,李光

爲其帳下執送于賊。關門不守,玄宗幸蜀,太子收兵靈武。賊乃遣張通儒爲西京留守,田 投范陽。 膀、郭子儀出土門路,大破賊衆於常山郡東嘉山,河北諸郡歸降者十餘, 祿山窘急,圖欲却 會哥舒翰自潼關領馬步八萬,與賊將崔乾禧戰于靈寶西,爲賊覆敗,翰西奔潼關,

乾眞爲京兆尹,安守忠屯兵苑中。十一月,遣阿史那承慶攻陷潁川,屠之。

位於晉王慶緒,尊祿山爲太上皇。慶緒縱樂飮酒無度,呼莊爲兄,事之大小必咨之。 刀,及覺難作,捫牀頭不得,但撼幄帳大呼曰:「是我家賊!」腹腸已數斗流在牀上,言訖氣 戶外,莊持刀領豎李豬兒同入祿山帳內,豬兒以大刀斫其腹。祿山眼無所見,牀頭常有一 月朔受朝,瘡甚而中罷。以疾加躁急,動用斧鉞,嚴莊亦被捶撻,莊乃日夜謀之。立慶緒於 因掘牀下深數尺爲坑,以氊罽包其屍埋之。又無哭泣之儀。莊卽宣言於外,言祿山傳 初,豬兒出契丹部落,十數歲事祿山,甚點慧。。祿山持刀盡去其勢,血流數升,欲死,祿

Ш 人助之,兩人擡起肚,豬兒以頭戴之,始取裙褲帶及繫腰帶。玄宗龍祿山,賜華淸宮湯浴, 以灰火傅之, 第 盡日 百 五 · 而蘇,因爲閹人。 祿山頗寵之,最見信用。 祿山肚大,每著衣帶,三四 十 上 安 瞂 Ш

皆許豬兒等入助解著衣服。 然終見刳者,豬兒也。

主。 鴻 臚 慶緒 卿, 慶緒,祿山第二子也。 兼廣陽太守。 素懦 弱,言詞無序, 初名仁執, 母康氏,祿山糟糠之妻。 莊恐衆不伏,不令見人。莊爲僞御史大夫、馮翊郡王,以 玄宗賜名慶緒,爲祿山 慶緒善騎射,祿山偏愛之。 都知兵 (馬使。 嚴莊、 未二十,拜

陽。 郡, 乾元元年,偽德州刺史王暕、貝州刺史宇文寬等皆歸順,河北諸軍各以城守累月,賊使蔡希 河北,保鄴郡。 於新店,逐北 子儀拔河東郡,崔乾祐 旬日之內,賊將各以衆至者六萬餘,兇威復振。 賊懼,令嚴莊 從慶緒者,唯疲卒一千三百而已。 厚其 賊之死者積 月,肅宗南幸鳳翔郡,始知祿山 軍將官秩,以固其心。 二十里,斬首十餘萬,伏屍三十里。 嚴莊至河內,南來歸順。 傾其驍勇而來拒。 如山阜。 南遁。八月,迴紇三千騎至。九月,廣平王領蕃漢之衆收西京,走安 十月,賊將尹子奇攻陷睢陽郡,殺張巡、姚誾等。 廣平王遣副元帥郭子儀等與賊戰于陝西曲沃,大破之 偽中書令張通儒秉政,改相州爲成安府,署置百官。 死,使僕固懷恩使于迴紇,結婚請兵討逆。 賊將阿史那承慶等麾下三萬餘人,悉奔恆、趙、范 偽靑、齊節度能元皓獨率衆歸順。 嚴莊奔至東京,告慶緒,慶緒率其餘衆奔 、王師乘勝 高尙立爲僞 明年,改 其月,郭 至陝 專其

兵最銳,性剛直,張通儒譖而縊殺之,三軍冤痛不爲用。 縱屠戮,人心始離。又不親政事,繕治亭沼樓船,爲長夜之飮。 德、安太淸急擊,復陷於賊, 虜之以歸, 臠食其肉。 其下潛謀歸順者衆矣,賊皆易置之,以 以崔乾祐爲天下兵馬使,權領中外 高尚等各不相叶。 蔡希德

灌城下,城中水泉大上,井皆滿溢。以安太清代乾祐爲都知兵馬使。思明南攻魏州,節度 往滏陽以應。及至滏陽,子儀之圍已固,築城穿壕各三重,樓櫓之盛,古所未有。 黨大潰。使薛嵩求救於史思明,言禪讓之禮。 陣也,使善射者三千人伏於壘垣內。明日接戰,子儀麾其屬僞奔,慶緒逐之,伏者齊發,賊 其衆營於鄴縣南。 使崔光遠南走,思明據其城數日,卽乾元二年正月一日也。 兵。乾祐性愎戾,士卒不附。 等皆合迎謝。」對曰:「任公暫往見思明。」思明與之涕泗,厚其禮,復命歸城。 自十月被圍至二月,城中人相食,米斗錢七萬餘,鼠一頭直數千,馬食隤牆麥麧及馬糞濯而 更拒思明。諸將曰:「今日安可更背史王乎!」張通儒、高尙、平冽謂慶緒曰:「史王遠來,臣 飼之。 九月,肅宗遣郭子儀等九節度率步騎二十萬攻之,以魚朝恩爲軍容使。 思明引衆來救。三月六日,子儀等戰敗,遂解圍而南,斷河陽橋以守穀水。 慶緒使收子儀等營中糧,尙六七萬石,復與孫孝哲、乾祐謀閉門自守,議 思明先遣李歸仁以步卒一萬、馬軍三千,先 思明爲稱燕王,立年號。 初,子儀之列 又引水以 思明領

待之。及諸弟領至于庭,再拜稽首曰:「臣不克負荷,棄失兩都,久陷重圍,不意大王以太上 皇故,將兵遠救。」思明曰:「棄失兩都,用兵不利,亦何事也。 爾爲人子,殺汝父以求位,庸 思明密召安太清令誘之。慶緒不獲已,以三百騎詣思明。思明引入,令三軍擐甲執兵

日,西師必散,此城無憂。」卒如其言。 **祿山父子僭逆三年而滅。初王師之圍相州也,意朝夕屠陷,唯術士桑道茂曰:「三月六**

非大逆乎?吾爲太上皇討賊。」卽牽出,幷其四弟及高尚、孫孝哲、崔乾祐,皆縊殺之。

軍吳懷實以託之。懷實引見高力士,置賓館中,令與男丞相錫爲學,無問家事,一以委之。 入籍爲兄弟。李齊物爲懷州刺史,舉高尙不仕,送京師,并助錢三萬。齊物寓書於中官將 危寧當舉事而死,終不能咬草根以求活耳!」縣尉有姓高者,以其宗盟,引置門下,遂以尚 興令狐潮鄰里,通其婢,生一女,遂收之。尚頗篤學,瞻文詞。嘗嘆息謂汝南周銑曰:「高不 無何,令妻父呂令皓特表薦之。 高尚,幽州雍奴人也,本名不危。 母老,乞食於人,尚周遊不歸侍養。寓居河朔縣界,

天寶元年,拜左領軍倉曹參軍同正員。六載,安祿山奏爲平盧掌書記,出入祿山臥內。

倚與嚴莊、孫孝哲計畫,白祿山以爲事必成。及顏杲卿殺李欽湊於土門,揚聲言榮王琬、哥 |豫山肥多睡,尚執筆在旁或通宵焉,由是寖親厚之。 遂與祿山解圖讖,勸其反。 |天寶十 | 舒翰二十萬衆徇河北,十七郡皆歸順。顏眞卿破袁知泰三萬衆於堂邑〔1〕,賀蘭進明再拔 年,祿山表爲屯田員外郎。及隨祿山寇陷東京,偽授中書侍郎。 山,憂悶不知所爲。 存,向西至關,一步不通,河北並已無矣,萬全何在?更不須見我。」尚等遂數日不得見祿 信都,李光弼、郭子儀繼收常山、趙郡,河北路絕者再。河南諸郡皆有防禦,潼關有哥舒翰 禄山大懼, 怒尚等日:「汝元向我道萬全, 必無所畏。今四邊若此, 賴鄭、 汴數州尙 **偽赦書制敕多出其手。始,**

事,今無憂矣。爲之奈何?」乾眞曰:「不如喚取慰勞之。」遂召尚等飮宴作樂,祿山自唱歌 跖,亦十年五歲矣,豈有人能制我耶!尚、莊等皆佐命元勳,何得隔絕不與相見,令其憂懼。 以送酒,待之如初。阿浩,乾眞小字也。及慶緒至相州,僞授侍中。 只此數人,豈不能爲患乎。外間聞之,必心搖動。」祿山喜曰:「阿浩,非汝誰能開豁我心裏 者乎! 今四邊兵馬雖多, 皆非精銳, 豈我之比。縱事不成, 收取數萬衆, 橫行天下, 為一盜 會田乾眞自潼關至,曉諭禄山曰:「自古帝王,皆有勝敗,然後成大事,豈有一舉而得之

Ŧ, 者畏之。 祿山使孝哲與張通儒同守西京,妃王宗枝皆罹其酷。 與嚴莊爭權不睦, 死,奪其使,以鄧季陽代之。慶緒之奔,莊懼爲所圖,因而來奔。 孝哲尤用事,亞於嚴莊。裘馬華侈,頗事豪貴,每食皆備珍饌。性殘忍,果於殺戮,聞 孫孝哲,契丹人也。母爲祿山所通,因得狎近。及祿山僭逆,僞授殿中監、閑廢使,封 及祿山

勇聞。 性急躁。 與語,甚奇之。問其年,曰「四十矣」。玄宗撫其背曰:「卿貴在後,勉之。」遷大將軍、北平太 守珪爲幽州節度,奏爲折衝。天寶初,頻立戰功,至將軍,知平盧軍事。嘗入奏,玄宗賜坐, 十一載,祿山奏授平盧節度都知兵馬使。 史思明,本名翠干,營州寧夷州突厥雜種胡人也。麥瘦,少鬚髮,鳶肩傴背,廞目側鼻。 初事特進烏知義,每今騎覘賊,必生擒以歸。又解六蕃語,與祿山同爲互市郎。張 與安祿山同鄉里,先祿山一日生,思明除日生,祿山歲日生。及長,相善,俱以驍

杲卿於常山, 十四載,安祿山反,命思明討饒陽等諸郡,陷之。十五載正月六日,思明與蔡希德圍顏 九日拔之。又圍饒陽,二十九日不能拔。李光弼出土門,拔常山郡,思明解

東兵 走入 爲 圍 副 而 八博陵 子儀 以 馬 留守向潤客所殺,以思明代之。 拒光弼。 其 朔 後率 郡。 方蕃、 光 光弼擊之,敗思明於沙河上。又攻之,思明以騎卒奔嘉山,光弼擊之,思明大敗, 弼 + 光弼 光弼圍之,城幾拔。 入土門,思明隨後徼擊之,已而迴軍併行擊劉正臣,正臣易之,初不設備,遂 匹唯共得兩束草, 漢二萬人自土門而至常山,軍威遂振,南拔趙郡,思明退保博陵。 列兵於城南, 相持累月。 至 屬潼關失守,肅宗理兵于朔方,使中官邢廷恩追朔方、河 一剉蒿薦以飼之。 又以 征戰在外, 光弼草盡,使精卒以車數乘於旁縣取草,輒被 令向潤客代其任。 初,祿山以賈循爲范陽留後,謀歸順, 四月,朔方節度郭 五月十

死。 淸 聞, 祿 攻景城,擒李暐, 日 Щ 河, 賊 所獲, 顔眞 河北悉陷。 思 糧盡 縱擊之, 明 卿 將 一城陷,擒太守王懷忠以獻祿山。 思明獲其男從則,使諭承恩, 使 卒頗精銳,皆平盧戰士,南拔常山、趙郡。 和琳以一萬二千人、馬百匹以救之,至河間二十餘里,北風勁烈,鼓聲不相 擒和琳以至城下。 尹子奇以五萬衆渡河至靑州, **暐投河而死。** 遂使康沒野波攻平原,**眞卿覺之,兵馬旣盡,渡河** 思明旣至,合勢,賊 承恩遂降,思明與之把臂飲酒。 將軍莊嗣賢圍烏承恩於信都,承恩母、 欲便向江、淮。 軍益盛。李奐爲賊所擒,送東京。 又攻河間,爲尹子奇所圍, 會迴紇二千騎 饒陽陷,李系投火 奄至范陽,范 妻先 而 已四十餘 南。 為安 攻

軍

保

北

一一,正臣妻子及軍資二千乘盡沒。

明

其逆謀,思明轉驕,不用慶緒之命。安慶緒爲王師所敗,投鄴郡。其下蕃、漢兵三萬人,初 陽閉門二日, 日,皆不能拔而歸。自祿山陷兩京,常以駱駝運兩京御府珍寶於范陽,不知紀極。由是恣 擒之,敵以爲神,呼爲「地藏菩薩」。思明留十月,會安祿山死,慶緒令歸范陽,希德留百餘 兵馬十萬, 圍李光弼於太原。光弼使爲地道,至賊陣前。驍賊方戲弄城中人,地道中人出 然後向太原,子奇行千里以救之。二年正月三,思明以蔡希德合范陽、上黨

山兵權若此,誰敢不服。如大夫比者,逼於兇威耳,固亦無罪。今聞孝感皇帝聰明勇智,有 遂令衙官竇子昂奉表,以所管兵衆八萬人及以僞河東節度高秀嚴來降。 肅宗大悅,封歸義 糧,恣歸之,欲留者分隸諸營。遂拘承慶,斬守忠、李立節之首。李光弼使衙官敬俛招之, 等以五千騎至范陽,思明悉衆介胄以逆之,衆且數萬,去之一里,使謂之曰:「相公及王遠 少康、周宣之略。大夫發使輸誠,必開懷見納,此轉禍爲福之上策也。」思明曰:「善。」承慶 曰:「大夫崇重,人不敢言,仁智請一言而死。」思明曰:「試言之。」對曰:「大夫久事祿山,祿 不知所從,思明擊殺三千人,然後降之。 至,將士等不勝喜躍。此皆邊兵怯懦,頗懼相公之來〔三〕,莫敢進也。請弛弓以安之。」從 慶緒 思明遂以承慶、守忠入內廳,飮樂之。別令諸將於其所分收其甲仗。其諸郡兵皆給 使阿史那承慶、安守忠徵兵於思明,且欲圖之。判官耿仁智,忠謀之士,謂思明

王、范陽長史、御史大夫、河北節度使,朝義已下幷爲列卿,秀嚴雲中太守,以其男如岳等七

人爲大官。使內侍李思敬、將軍烏承恩宣慰使,令討殘賊。

地、十萬衆之兵降國家,赤心不負陛下,何至殺臣!」因搒殺承恩父子,囚李思敬,遣使表其 |承恩稱:「死罪,此太尉光弼之謀也。」思明集軍將官吏百姓,西向大哭曰:「臣以十三州之 令韓其所寢之牀,伏二人于其下。承恩有小男,先留范陽,思明令省其父。夜後,私於其子 節度,思明常事知義,亦有開獎之恩。以此李光弼冀其無疑,因謀殺之。承恩至范陽,數漏 有頃,承恩與思敬從上京來,宣恩命畢,將歸私第。思明留承恩且於館中,明當有所議。已 其情,夜取婦人衣衣之〔8〕,詣諸將家,以翻動之意諭之。諸將以白思明,甚懼,無以爲驗。 可付之。」又得簿書數百紙,皆載先所從反軍將名。思明語之曰:「我何負於汝而至是耶?」 衣囊,得朝廷所與阿史那承慶鐵券及光弼與承恩之牒,云:「承慶事了,卽付鐵券;不了,不 曰:「吾受命除此逆,明便授吾節度矣。」牀下二人叫呼而出,以告思明。思明令執之,搜其 朝廷又令中使慰諭云:「國家與光弼無此事,乃承恩所爲,殺之善也。」 明年,改乾元元年。四月,肅宗使鳥承恩爲副使,侯伺其過而殺之。初,承恩父知義爲

復天下,此輩當慰勞之。今尚見殺,況我本從歐山反乎!」諸將皆云:「鳥承恩之前事,情狀 又有使從京至,執三司議罪人狀。思明曰:「陳希烈已下,皆重臣,上皇棄之幸蜀,旣收

可知, 月,不如早死,請速加斧鉞。」思明大怒,亂捶殺之,腦流于地 我不負汝。」仁智大呼曰:「人生固有一死,須存忠節。今大夫納邪說,爲反逆之計,縱延旬 命斬之。仁智事思明頗久,意欲活之,却令召入,謂之曰:「我任使汝向三十年,今日之事, 封入函,耿仁智盡削去之。寫表者密告思明,思明大怒,執二人於庭曰:「汝等何得負我! 弼,爲大夫誅之,大夫乃安;不然,爲患未已。」思明曰:「公等言是。」乃令耿仁智、張不矜修 表,「請誅光弼以謝河北。 弼 份在, 憂不細也。 若不從臣請,臣則自領兵往太原誅光弼」。不矜初以表示思明,及 大夫何不取諸將狀以誅光弼,以謝河北百姓。 主上若不惜光

振。 月,僭稱大號,以周贄爲相,以范陽爲燕京。九月,寇汴州,節度使許叔冀合於思明,思明益 周贄爲行軍司馬。 三萬人,平地流血數日,卽乾元二年正月一日也。思明於魏州北設壇,僭稱爲大聖燕王,以 二月,蕭華以魏州歸順,韶遣崔光遠替之。 又陷洛陽,與太尉光弼相拒。 十月,郭子儀領九節度圍相州,安慶緒偷道求救於思明,思明懼軍威之盛,不敢進。十 三月,引衆救相州,官軍敗而引退。 思明恣行兇暴,下無聊矣。 思明擊而拔其城,光遠脫身南渡。思明於魏州 思明召慶緒等殺之,併有其衆。 殺 四

光丽 及諸節度僕固懷恩、衞伯玉等:「可速出兵以討殘賊。」光弼等然之,乃出師兩道齊進。 上元二年,潛遣人反說官軍曰:「洛中將士,皆幽、朔人,咸思歸。」魚朝恩以爲然,告

棄甲奔散。 **大楡林,賊委物僞遁,將士等不復設備,皆入城虜掠。** 魚朝恩、衛伯玉退保陝州, 光弼、懷恩棄河陽城,退居聞喜。 賊伏兵在北邙山下, 因 步兵散死者數千 大下, 士卒咸

人,軍資器械盡爲賊所有,河陽、懷州盡陷於賊

乾。」言畢如廁。 大懼。 然汝殺我太疾, 所在,未及對,殺數人,因指在廁。思明覺變,踰牆出,至馬槽,鞴馬騎之。悅等至,令慊人周 季常命曹將軍至。 子俊射,中其臂,落馬,曰:「是何事?」悅等告以懷王。 左右,以其殘忍,皆恨之。及此,問其故,曰:「吾向夢見水中沙上羣鹿渡水而至,鹿死 事,可乎?」朝義迴面不應。 季常等言:「主上欲害王,悅與王死無日矣。」因言「廢興之事,古來有之,欲喚取曹將軍舉大 下兵,違我處分。」令隨身數十人立馬看泥,斯須而畢。又曰:「待收陝州,斬却此賊。」朝義 貯軍糧 思明至陝州,爲官軍所拒於姜子坂,戰不利,退歸永寧。 思明居驛,朝義在店中,思明令腹心曹將軍總中軍兵嚴衞,朝義將駱悅抖許叔 朝義築城畢,未泥,思明至,詬之。對曰:「緣兵士疲乏,暫歇耳。」又怒曰:「汝惜部 伶人相謂曰:「鹿者,祿也;水者,命也。胡祿命俱盡矣。」駱悅 何不 悦等告之,不敢拒。其夜,思明夢而驚悟,據牀惆悵。 待我收長安?終事不成矣。」因急呼懷王者三,曰:「莫殺我 悦曰:「若不應,悅等卽歸李家,王亦不全矣。」朝義然之,令許 思明曰:「我朝來語錯, 築三角城,約一日內畢(哥)以 每好伶人,寢食置 今有此事。 入,問思明 」郑駡曹 、 冀男 水

列

傳第

百五五

十 上

史

思明

往告之。實聞,驚欲仰倒。朝義領兵迴,實等來迎,因殺實。思明至柳泉驛,縊殺之。朝義 將軍曰:「這胡誤我,這胡誤我!」悅遂令心腹擒思明赴柳泉驛,曰:「事已成矣。」朝義曰: 「莫驚聖人否?莫損聖人否?」悅曰:「無有。」時周贄、許叔冀統後軍在福昌,朝義令許季常

便僭僞位。

送款來降,梟首至闕下。又以僞官以城降者恆州刺史、成德軍節度張忠志爲禮部尙書,餘 之,戰於城中,數日,死者數千人,始斬之。時洛陽四面數百里,人相食,州縣爲墟。諸節度 汴州偽將張獻誠拒之,乃渡河北投幽州。 二年正月,賊偽范陽節度李懷仙於莫州生擒之, 賊敗績,走渡河,斬首萬六千,生擒四千六百,降三萬二千人,器械不可勝數。朝義走投汴州, 玉自河陽入,副元帥李光弼自陳留入,雍王留陝州。二十九日,與朝義戰于邙山之下,逆 度、迴紇兵馬赴陝。僕固懷恩與迴紇左殺爲先鋒,魚朝恩、郭英乂爲後殿,自澠池入;李抱 使皆祿山舊將,與思明等夷,朝義徵召不至。寶應元年十月,遣元帥雍王領河東朔方諸節 如故;趙州刺史盧淑、定州程元勝、徐州劉如伶、相州節度薛嵩、幽州李懷仙、鄭州田承嗣 朝義,思明華子也。寬厚,人附之。使人往范陽,殺僞太子朝英等。僞留守張通儒覺

並加封爵,領舊職

校勘記

(二) 袁知泰 「秦」字各本原作「奉」,據本書卷一二八顧真卿傅、新書卷一五三顧真卿傅、通鑑卷二

一七改。

(三) 二年正月 御覽卷一一二「二年」上有「至德」二字。

(三) 頗懼相公之來 「來」字御覽卷一一二、通鑑卷二二〇作「衆」。

(四) 夜取婦人衣衣之 「衣之」二字各本原無,據御覽卷一一二補。

(註) 約一日內畢 「日」字各本原作「月」,據御覽卷一一二、通鑑卷二二二改。

舊唐書卷二百下

列傳第一百五十下

朱泚 黄巢 秦宗權

管兵將。 父懷珪,天寶初,事范陽節度使裴寬爲衙前將〔〕,授折衝將軍。及安祿山、史思明叛,累爲 朱泚,幽州昌平人。曾祖利,贊善大夫,贈禮部尚書。祖思明,太子冼馬,贈太子太師, 寶應中,李懷仙歸順,奏爲薊州刺史、平盧軍留後、柳城軍使。大曆元年卒,累贈

不堪命。大曆七年秋,希彩爲其下所殺,倉卒之際,未有所從。泚營在城北,弟滔,主衙內 將,改經略副使。 朱希彩既殺李懷仙,自爲節度,以泚宗姓,甚委信之。 希彩爲政苛酷,人 好施,每征戰所得賞物,輒分與麾下將士,以是爲衆所推,故得濟其兇謀。 左僕射。祖、父之贈,皆以泚故也。 泚以父資從軍,幼壯偉,腰帶十圍,騎射武藝亦不出人。外若寬和,中頗殘忍。 初隸李懷仙爲部 然輕財

五三八五

列

傳第一百五十下

朱泚

州盧龍節度等使。八年三月,遷幽州盧龍節度等使〔三、幽州長史、兼御史大夫。其年,泚 無從,因共推泚,泚遂權知留後,遣使奉表京師。十月,拜檢校左散騎常侍、兼御史中丞、幽 兵,亦得衆心。 滔變詐多端,潛使百餘人於衆中大言曰:「節度使非城北朱副使莫可。」衆旣

秋兵,郭子儀統之;決勝軍楊猷兵,李抱玉統之;淮西鳳翔兵,馬璘統之;汴宋、淄青兵, 此又上表,請留京師,從之。因授其弟滔兼御史大夫、幽州節度留後。 箭以寵之。十二年,加檢校司空,代李抱玉爲隴右節度使,權知河西、澤潞行營兵馬事 俾泚統焉。十一年八月,加拜同平章事(三)。尋令出鎭奉天行營,復賜金銀繒綵 甚厚,又以器物十床、馬四十匹、絹二萬匹、衣一千七百襲賜其將士,宴犒之盛,近時未有。 覲,韶修甲第以待之。九月,泚至京師,代宗御內殿引見,賜御馬兩匹、戰馬十匹、金銀錦綵 懷仙、朱希彩與連境三節度,名雖向順,未嘗朝謁。至是泚率先上表,請自領步騎三千人入 上表令弟滔率兵二千五百人赴京西防秋,代宗嘉之,手詔褒美。 九年,就加檢校戶部尙書,賜實封百戶。幽州及河北諸鎮,自天寶末便爲逆亂之地,李 仍以河陽永平軍防 并內庫弓

膜遙領涇原節度(B)。 加泚四鎮 **德宗嗣位,加太子太師、鳳翔尹,實封至三百戶。** 建中元年,涇州將劉文喜阻兵爲亂, 北庭行軍、涇原節度使,與諸軍 二年,加泚太尉。 一計之。 朱滔將反叛,陰使人與泚計議,以帛書納蠟丸中, 涇州平, 加泚中書令, 還鎭 鳳翔,而以舒王

勉之曰:「千里不 置髮髻間 千戶,與一子正員官,其幽州盧龍節度、太尉、中書令並 河東 同謀,非卿之過。」三年四月,以張鎰代泚爲鳳翔隴右節度留後,留泚京師, 節度馬燧搜獲之,以聞,幷送帛書及所遣使。泚惶懼,頓首乞歸罪有司。 如故。

臣馳 泚,且 寇無 奪 華殿, 餘騎 加實封 實 見泚,爲 自 咸以官閒積憤,樂於禍 人移時,言多悖逆。 源休 一謂衆望 **人失兵柄**, 助 帥,幸泚政寬,乃相與謀曰:「朱太尉久囚空宅,若迎而爲主,事必濟矣。」姚令言乃率百 迎泚於晉昌里第,泚乘馬摊從北向,燭炬 刀口 一虞叛卒之震驚法駕,乃潛爲賊符, 但稱太尉。 泚, 象笏, 年十月,涇原兵叛,鑾駕幸奉天。叛卒等以泚嘗統涇州,知其失權廢居,怏怏思亂,羣 至 陳逆 三所集, 泚 素 順 挺 故推心委之。 之理,而 僭竊之心,自此而定。 多力、纔破 而 朝官有謁泚者,悉勸奉迎鑾駕,旣不合泚意,皆逡巡而退。 擊泚,仍大呼曰:「反虜萬段! 又盛 亂。 海賓於靴中取匕首,爲其所覺,遂不得前。 陳成敗,稱述符命,勸其僭僞,泚甚悅之。又李忠臣、張光晟繼至, 其面,逆徒譟集,秀實、海賓遂併見害。 鳳翔涇原大將張廷芝、段誠諫以潰卒三千餘自襄城而至。 **遂發銳師三千**, 乃以源休爲京兆尹、判度支,李忠臣爲皇城使。 追所發兵。 言奉迎乘輿,實陰有逆謀。 足羅, 」泚舉臂衞首,秀實格拉之,恟恟然。 至六日,兵及駱驛而迴。 觀者萬計, ,入居含元殿。 秀實知不可以義動,遂 秀實與劉海賓謀誅 因與海賓同入 源休至,遂屏 明日,移處白

芝、杜如江爲節度使,仍以其兄子遂爲太子,遙封弟滔爲冀王、太尉、尚書令,尋又號皇太 揆、崔幼貞爲給事中,崔莫爲御史中丞,張光晟、仇敬忠、敬釭、張寶、何望之、段誠諫、張庭 侍郎,樊系爲禮部侍郎、禮儀使,許季常爲京兆尹,洪經綸爲太常少卿,彭偃爲中書舍人,裴 僞署姚令言爲侍中,李忠臣爲司空、兼侍中,源休爲中書侍郎、平章事、判度支,蔣鎭爲吏部 伍,行列不過十餘人。下僞詔曰:「幽囚之中,神器自至,豈殷薄德所能經營。」彭偃之詞也。 人導泚自白華入宣政殿,僭卽僞位,自稱大秦皇帝,號應天元年,愚智莫不憤心。 侍衞皆卒 明日,聲言以親王權主社稷,士庶競往觀之。八日,源休、姚令言、李忠臣、張光晟等八

平為諫議大夫兼平章事。泚軍合於城下,渾瑊、韓遊瓌禦之,泚衆大敗,死者萬計。泚收軍於 全與泚衆戰於漠谷,官軍不利,自是泚盆驕大。王師乘城而戰,人百其勇,賊多敗衄。或出 野戰,官軍又獲利焉。川乃大驅百姓塡塹,夜攻城,城中設奇以應之,賊乃退縮。 奉天東三里下營,大修攻具。明日,泚又分兵營於乾陵下瞰,城內大震。十一月三日,杜希 元帥,張光晟爲副。以李忠臣爲京兆尹、皇城留守,居中書省。尋以蔣鎭爲門下侍郞,李子 法堅有巧思,爲泚造雲梯。 十五日辰時,梯臨城東北隅,城內震駭。 十日,泚自領兵侵逼奉天,竊威儀輦輅,闐溢道途,蟻聚之衆,軍勢頗盛。以姚令言爲 渾城使侯仲莊設大坑, 西明寺僧

攻, 泚衆敗績。 李懷光以五萬人來援, 自河北至, 泚衆惶駭, 因而大潰, 長圍遂解焉。 爲地道陷之。又縱火焚其梯,東風起,吹我軍,衆頗危。 鼓齊震,風吹俱熾,須臾雲梯與兇黨同為灰燼。城中三門悉出兵,王師又捷。 俄而 風迴,吹賊軍,滅益薪潑油,萬 其夜兵復出 衆庶

此。 貨瓌寶以實之。識者曰:「易稱『潛龍勿用』,此敗徵也。」無幾,百姓剽奪其珍寶,泚不能禁 天迴,乃悉令去之,曰:「攻戰吾自有計。」前此每二五日,即使人偽自城外來,周走號令曰: 以懷光三日不至,城則危矣。 而亦令依常年舉選,初有數十人陳狀,旬日亦皆屛退。 「奉天已破。」百姓聞之,莫不飮泣,道路闃寂。 三十日夜,泚走至京城。 時姚令言於城中造戰格拋樓,每坊團結,人心大異。 時有入臺省吏人,不過十數輩,與官六七人, 泚自號其宅日潛龍宮,悉移內庫珍 泚自奉

和。 及懷光決計背叛,逼 密,以錢穀金帛互相饋遺。 慚怒憤恥,遂領衆 **鑾駕幸梁、洋,自此衣冠之潛匿者,出受僞官十七八焉(云)。** 明年正月一日,泚改僞國號日漢,稱天皇元年。二月,李懷光旣圖叛逆,遭使與泚通 遁 歸 乘輿遷幸,泚乃下僞詔書,待懷光以臣禮,仍徵兵馬。 河中。 泚與書,事之如兄,約云:「削平關中,當割據山河,永爲鄰國。」 懷光初與泚往復通 懷光既爲所賣, 好甚

尋並 朱公,與共成大事。」希鑒以爲然。 州,纔百餘騎。 張庭芝、源休、李子平、朱遂以數千人西走,其餘黨或奔竄,或來降。 芝等寇武功,渾瑊以衆及吐蕃論莽羅大敗歸朝,殺逆黨萬餘人於武亭川。 與泚壻僞金吾將軍馬悅潛走党項部落,數月得達幽州 屯,復與泚心腹朱惟孝共射洲。泚走,墜故窖中。 授己尙書、平章事,泚不從。 鑒 上擲泚所送旌節於外,續又投火焚之。泚遂過數里,息於逆旅。 光泰門,逆徒拒官軍,王師累捷。 敬忠寇藍田,倘可孤擊之,大破泚衆,擒敬忠斬之。 董希芝共斬 |日:「公比日殺馮 斬 三月, 獲。 李晟、駱元光、尚可孤之衆,悉於城東累敗泚衆。 宋歸朝之敗武功,降於李懷 泚,使宋膺傳首以獻。 田希鑒閉門登陴,泚令謂鑒曰:「我與爾節度,何故背恩?」希鑒乃使人自城 河淸背叛,今雖歸順, 梁庭芬旣求宰相不得,不復往涇州,從泚至寧州彭原縣西城 一一十八日,官軍入苑,收復京師,逆黨大潰。泚與姚令言、 泚死時年四十三。姚令言投涇州,源休、李子平走鳳翔, 庭芬乃追及泚言之,泚大悦,使庭芬却往 光,送興元斬之。 國家必不能久容, 公他日不免受禍。 泚左右韓曼、薛綸、高幽嵒、武震、朱進卿、 李晟、駱元光、尚可孤遂悉師齊進、晟屯 唯不獲朱遂,傳爲野人所殺,或云 四月,泚 泚將梁庭芬入涇州 **泚衆緣路潰散,乃奔涇** 使韓旻、宋歸朝、張庭 五月,泚又使仇 涇州。 何如 開 説 庭芬請 門納 田 希

泚之僭逆,宦豎朱重曜頗親密用事,泚每呼之爲兄。

時賊中以臘月大雨,僞星官謂此

曰:「當以宗中年長者釀其災變。」|泚乃毒殺重曜,而以王禮葬焉。 姚令言自有傳。 及京師平,亦出其屍而

芝乃令尚君長、蔡温球、楚彦威相次詣闕請罪,且求恩命。時宋威害復光之功,並擒送闕, 月,陷江陵。十月,又遣將徐唐莒陷洪州(4)。時仙芝表請符節,不允,以神策統軍使宋威 爲招討。 敕於狗脊嶺斬之。賊怒,悉精銳擊官軍,威軍大敗,復光收其餘衆以統之。朝廷以王鐸代 爲荆南節度招討使,中使楊復光爲監軍。復光遣判官吳彥宏諭以朝廷釋罪,別加官爵,仙 使(云),以本軍討仙芝。 仙芝懼,引衆歷陳、許、襄、鄧,無少長皆虜之,衆號三十萬。 努眼,翻却|曹州天下反。」及仙芝盜起,時議畏之。 詔左金吾衞上將軍齊克讓爲兗州節度 人王仙芝、倘君長聚盜,起於濮陽,攻剽城邑,陷曹、濮及鄆州。先有謠言云:「金色蝦蟆爭 **黃巢,曹州冤句人,本以販鹽爲事。** 五年八月,收復荆州(云),斬仙芝首獻於闕下。 乾符中,仍歲凶荒,人飢爲盜,河南尤甚。 初, 里

讓。 月餘, 先是,君長弟讓以兄奉使見誅,率部衆入嵖岈山。 列 傳 衆至數萬。 第 百 五 十 陷汝州,虜刺史王鐐,又掠關東,官軍加討,屢爲所敗,其衆十餘萬。 下 黄 巢 黄巢、黄揆昆仲八人,率盗數千依

尙 讓 或巢馳檄四方,章奏論列,皆指目朝政之弊,蓋士不逞者之辭也。 讒勝,君子道消,賢豪忌憤,退之草澤,旣一 僖宗以幼主 乃與羣 一盜推巢爲王,號衝天大將軍,仍署官屬,藩鎭不能制。 一臨朝,號令出於臣下,南衙北司,迭相矛盾,以至 朝有變,天下離心。 巢之起也,人士從而附之。 一九流濁亂,時多朋黨,小人 巢徒黨旣盛,與仙芝爲形 時天下 承平日久,人不知

援。

及仙芝敗,東攻亳州不下,乃襲破沂州據之,仙芝餘黨悉附焉

虢,逼 之。 湘,遂據交、廣。 策、博野等軍十萬守潼關。 鎭戍,望 圖大利。 南海之地,永爲窠穴,坐邀朝命。是歲自春及夏,其衆大疫,死者十三四。衆勸請北歸,以 樞密使楊復恭奏,欲請授同正員將軍〔去〕,盧攜駁其議,請授率府率,如其不受,請以高駢討 乃渡淮,僞降于駢。 及巢見詔,大詬執政,又自表乞安南都護、廣州節度,亦不允。然巢以士衆烏合,欲據 時王鐸雖銜招討之權,緩于攻取。 潼 關,陷華州, 風 巢不得已,廣明元年,北踰五嶺,犯湖、湘、江、浙,進逼廣陵,高駢閉門自固,所過 降賊。 託越州觀察使崔璆奏乞天平軍節度,朝議不允。又乞除官,時宰臣鄭畋與 九月,渡淮。 留將喬鈐守之 [10]。 駢遣將張璘率兵受降于天長鎮,巢擒璘殺之, 時禁軍皆長安富族,世籍兩軍,豐給厚賜,高車大馬,以事權豪, + -月十七日,陷洛陽,留守劉允章率分司官迎之。繼攻陝、 時高駢鎭淮南,表請招討賊, 河中節度使李都詐進表于賊。 因虜其衆。 許之, 朝廷以田令孜率神 議加都統。巢 **尋南陷湖、**

田令孜、王若儔收合禁軍扈從。四日,賊至昭應,金吾大將軍張直方率在京兩班迎賊獨上。 京師,燔掠西市。十二月三日,僖宗夜自開遠門出,趨駱谷,諸王官屬相次奔命,觀軍容使 既官禁,賊無得而踰也。尚讓、林言率前鋒由禁谷而入,夾攻潼關,官軍大潰,博野都徑還 谷,可通行人,平時捉稅,禁人出入,謂之禁谷。及賊至,官軍但守潼關,不防禁谷,以爲谷 及病坊窮人,以爲戰士,操刀載戟,不知皦銳(11)。 自少迄長,不知戰陣。初聞科集,父子聚哭,憚於出征。各於兩市出值萬計,傭雇負販屠沽 五日,賊陷京師。 復任宦官爲將帥,驅以守關。關之左有

劉塘爲軍庫使,朱温、張言、彭攢、季逵爲諸衞大將軍、四面游奕使。又選驍勇形體魁梧者 尙讓、趙章爲四相,孟楷、蓋洪爲左右軍中尉,費傳古爲樞密使,王璠爲京兆尹,許建、朱實、 以文字言之,唐已無天分矣。『唐』去『丑』『口』而安『黃』,天意令黃在唐下,乃黃家日月也。 日,賊巢僭位,國號大齊,年稱金統,仍御樓宣赦,且陳符命曰:「唐帝知朕起義,改元廣明, 讓慰曉市人曰:「黃王爲生靈,不似李家不恤汝輩,但各安家。」巢賊衆競投物遺人。十三 五百人,日功臣。 土德生金,予以金王,宜改年爲金統。」賊搜訪舊宰相不獲,以前浙東觀察使崔璆、楊希古、 時巢衆累年爲盜,行伍不勝其富,遇窮民於路,爭行施遺。旣入春明門,坊市聚觀,尙 令其甥林言爲軍使,比之控鶴

鎖。四月,涇原行軍唐弘夫之師屯渭北,河中王重榮之師屯沙苑,易定王處存之師屯渭橋, 賊人悚駭。 鄭畋帳下小校竇政者,驍勇無敵,每夜率敢死之士百人,直入京師,放火燔諸門,斬級而還, 鄭延拓拔思恭之師屯武功,鳳翔鄭畋之師屯盩厔。 六月,邠寧朱玫之師屯興平,忠武之師 三千屯武功。是歲諸侯勤王之師,四面俱會。十二月,宰相王鐸率刜、襄之師自行在至。 中和元年二月,尚讓寇鳳翔,鄭畋出師禦之,大敗賊於龍尾坡,畋乃馳檄告喩天下藩

賊號咷而謂曰 [in]:「予卽天子女,不宜復存,可與相公俱死。」是日幷遇害。 於其第。除曰:「吾唐室大臣,不可佐黃家草昧,加之老疾。」 賊怒,令誅之。 廣德公主并 族誅,沆、遼數百人皆遇害。自是賊始酷虐,族滅居人。遣使傳命召故相駙馬都尉于琮 官軍皆執山砦百姓,醫於賊爲食,人獲數十萬。朝士皆往來同、華,或以賣餅爲業,因奔於 時京畿百姓皆砦於山谷,累年廢耕耘,賊坐空城,賦輸無入,穀食騰踊,米斗三十千。 朝貴怙直方之豪,多依之。旣而或告賊云:「直方謀反,納亡命。」賊攻其第,直方 宰相崔沆、豆盧瑑扈從不及公司,匿之別墅,所由搜索嚴急,乃微行入永寧里張直方

寇襲,官軍不利。賊怒坊市百姓迎王師,乃下令洗城,丈夫丁壯,殺戮殆盡,流血成渠。九月, 一年,王處存合忠武之師,敗賊將尙讓,乘勝入京師,賊遁去。處存不爲備,是夜復爲賊

敗黃揆 克用 八日, 渭北,令薛志勤、康君立每夜突入京師, 定、忠武之師,戰於梁田坡, 賊 將 同州 由光泰門入, 克用合忠武騎將龐從遇賊於渭南,決戰三捷,大敗賊軍。 於於 沙苑, 刺 史朱温降重榮。 進營乾坑。 收京師。 二月, 巢賊出藍田、七盤路,東走關東。 大敗賊軍,俘斬數萬,乘勝攻華州, + _ 月,李克用率代北之師,自夏陽渡河,屯沙苑。三年正月, 賊將林言、趙章、尙讓率衆十萬援華州 燔積聚, 俘級而旋。 黄揆棄華州,官軍 天下兵馬都監押楊復光露布 十日夜,賊巢散走。 塹栅以環之。 克用合河中、易 ·收城。 克用騎軍 詰旦, 儿 月

獻捷於行在,陳破賊事狀曰:

災深, 鶴以 事之秋,縱其長惡。 威 萬姓,盜汙 靈,)成鋒刃,殺耕牛以恣燔炮,魑魅晝行,虺蜴 頃 馴 殄積年之兇醜 者妖 梟逆 兩京,衣冠 興霧市,盜 大,物無 賊首黃巢, 銜 不害,惡靡不爲, 嘯叢 塗炭之悲,郡邑起丘墟之嘆。 祠,而岳牧藩侯,備盜不謹。 因得充盈窟穴, 蔓延萑蒲, 豺 狼貽朝市之憂, 夜噬 (() 萬方共怒, 謂大同之運,常可容姦; 瘡痏及腹心之痛。 自南海失守,湖外喪師,養虎 驅 我蒸黎,徇其兇逆。 十道齊攻,仗九 **遂至毒流** 廟之 展 謂 無 鉏

衝 河中節度使王重榮神資壯烈,天付機謀,誓立功名,志安家國。 收收 百姓十萬餘家,降賊黨三萬餘衆。 法當持重, 功遂晚成, 久稽原野之刑,未 至於屯田待敵,率

傳

快雷霆之怒。自收同、華,逼近京師,夕烽高照於國門、遊騎俯臨於屬岸。 既知四隅断

絕,百計奔衝,如窮鳥觸籠,似飛蛾赴燭。

在寢餐,不忘寇孽。 賊無非手刃,入陣率以身先,可謂雄才,得名飛將。 自統本軍南下, 與臣同力前驅, 雖 雁門節度使李克用神傳將略,天付忠貞,機謀與武藝皆優,臣節共本心相稱。 殺

從卯至申,羣兇大潰。 將動瓦,喑鳴而氣欲吞沙,寬列戈矛,密張羅網。於是麾軍背擊,分騎橫衝,日明而劍躍 等七十都繼進。 兇寇。又遣河中將劉讓、王瓌、冀君武、孫珙,忠武將喬從遇,鄭滑將韓從威,荆南將申 存、朝邑鎮將康師貞、忠武黃頭軍使龐從等三十都,隨李克用自光泰門先入京師,力摧 地,騰凌則 飛輪,風急而旗開走電。 公孫佐,橫衝軍使楊守亮,躡雲都將高周彝,忠順都將胡眞,絳州監軍毛宣伯、聶弘裕 屠悰,滄州將賈滔,易定將張仲慶,壽州將張行方,天德將顧彥朗,左神策弩手甄君楚、 今月八日,遣衙隊前鋒楊守宗、河中騎將白志遷、橫野軍使滿存、躡雲都將丁行 積 血成塵,不煩卽墨之牛,若駕昆陽之象。 賊尙爲堅陣,來抗官軍。鴈門李克用率勵聽雄,整齊金革,叫譟而聲 自望春宮前蹙殺,至昇陽殿下攻圍,戈不濫揮,矢無虛發。其財 使賊如浪,便可塞流;使賊如山,亦須折角。 楊守宗等齊驅直入,合勢夾攻, 蹂踐則横尸入

時奔走,南入商山,徒延漏刃之生,佇作飲頭之器。

自收平京闕,二面皆立大功;若破敵摧兇,李克用實居其首。 其餘將佐,同效驅

兼臣所部領萬餘人,數歲櫛風沐雨。 既茲平盪,並錄以聞

楷,悲惜之。乃悉衆攻陳州,營於城北五里,爲宮闕之制,曰八仙營。 餓倚牆壁間,賊俘人而食,日殺數千。 孟、洛、鄭、汴、曹、濮、徐、兗數十州,畢罹其毒。 賊圍陳郡三百日 GB,關東仍歲無耕稼,人 臣於賊。遂攻陳、許,營於溵水。 食,其流毒若是。 馳。 五月,巢賊先鋒將孟楷攻蔡州,節度使秦宗權以兵逆戰,爲賊所敗。 陳州刺史趙犨迎戰,敗賊前鋒,生擒孟楷,斬之。 賊有舂磨砦,為巨碓數百,生納人於曰碎之,合骨而 於是自唐、鄧、許、汝、 攻城急,宗權乃稱 黄巢素寵

州 賊分寇汴州,李克用自鄭州 壞賊壘,賊自離散,復聚於尉氏,逼中牟。 西華,拔其壁。巢賊大恐,收軍營於故陽里,官軍進攻之。五月,大雨震雷,平地水深三尺, 討,賊無所保。 趙犨求援於太原。四年二月,李克用率山西諸軍,由蒲、陜濟河,會關東諸侯,赴援陳 三月,諸侯之師復集。四月,官軍敗賊於太康,俘斬萬計,拔其四壁。又敗賊將黃鄴於 其將李讜、 引軍襲擊,大敗之,獲賊將李用、楊景。殘衆保胙縣、冤句,官軍 楊能、霍存公、葛從周、張歸厚、張歸霸各率部下降于大梁,尚 翌日,營汴水北。是日,復大雨震電,溝塍漲流。

列

僔 第

百

五 + 下

黄

桑

護率部下萬人歸時溥。 濟陰而還。賊散於克、鄆界。黃巢入泰山,徐帥時溥遣將張友與尚讓之衆掩捕之。 俗,巢將林言斬巢及二弟鄴、揆等七人首,丼妻子皆送徐州。 賊自相猜間,相殺於營中(lb),所殘者千人,中夜遁去,克用追擊至 是月賊平。 至狼虎

光同議勤王,出師破賊,以蔡牧授之,仍置節度之號。 閱集蔡州之兵,欲赴難。俄聞府主殂,周岌未至,巢賊充斥,日寇郡城,宗權乃督勵士衆,登 城拒守。洎岌至,即令典郡事。天子幸蜀,姑務翦寇,上蔡有勁兵萬人,宗權即與監軍楊復 其帥薛能。 秦宗權者,許州人,爲郡牙將。廣明元年十月,巢賊渡淮而北。十一月,忠武軍亂,逐 是月,朝廷授別校周岌爲許帥。 初軍城未變,宗權因調發至蔡州,開府軍亂,乃

安,張眰陷汝、鄭,盧塘攻汴州。 極靑、齊,南出江淮,北至衞滑, 號,補署官吏。 四出,則鹽屍而從。 中和三年,巢賊走關東,宗權逆戰不利,因與合從爲盜。巢賊旣誅,宗權復熾,僭稱帝 遣其將秦彥亂江淮,秦賢亂江南,秦誥陷襄陽,孫儒陷孟、洛、陜、號至於長 關東郡邑,多被攻陷。 魚爛鳥散,人烟斷絕,荆榛蔽野。 賊首皆慓銳慘毒,所至屠殘人物,燔燒郡邑。西至關內,東 唯趙犨兄弟守陳州, 朱温保汴州,城門之外,爲 賊旣乏食,啖人爲儲,軍士

賊疆場。 | 汴帥與克、| 鄆合勢, 屢敗賊軍, 兇勢日削。

喜樓受俘,京兆尹孫揆以組練磔之公,徇於兩市。宗權檻中引頸謂揆曰:「尙書明鑒,宗權 乎?」宗權曰:「僕若不死,公何以興?天以僕霸公也。」略無懼色。乃檻送京師。 昭宗御延 之曰:「下官屢以天子命達於公,如前年中翻然改圖,與下官同力勤王,則豈有今日之事 豈反者耶!但輸忠不効耳。」衆大笑。與妻趙氏俱斬於獨柳之下。 龍紀元年二月,其愛將申叢執宗權,撾折其足,送於汴。朱温出師迎勞,接之以禮,謂

夷險之不一。三百算祀,二十帝王。雖時有竊邑叛君之臣,乘危徼倖之輩,莫不才興兵革, 即就誅夷。其間沸騰,大盜三發,安祿山、朱泚、黃巢是也。 史臣曰:我唐之受命也,置器於安,千年惟永,百蠻嚮化,萬國來王。但否泰之無恆,故

遂稱向闕之兵,以期非望之福,此所以爲亂也。 寵用,總知馬牧,特委兵權。愛天子之獨尊,與國忠之相忌,故不能以義制事,以禮制心, 來,且無問於天時,宜決之於人事。| 禄山母爲巫者,身是牙郎,偶緣微立邊功,遂至大加 夫謀**危社稷,將害君親,**轘裂瀦宮,未塞其罪,故不俟於多談也。 然盜之所起,必有其 朱泚家本漁陽,性惟兇狡,耳習聞於篡奪,

宗能知人疾苦,惠彼困窮,不然則從鄭畋之謀,赦羣偷之罪,如此則黃巢不必能犯順,變御 茲亦沴氣之餘也。 未必須省方。蓋差之毫釐,失之千里,蛇螫不能斷腕,蟻穴所以壞隄。後之帝王,足爲殷鑒。 叛,不然則取公輔之諫,早令朱泚就行,如此則未必有涇原之亂兵,未必有率天之危急。 王、尙之蹤,志在奪攘,謀非遠大。 心本乏於忠貞。 塗炭,萬乘未必越於岷、峨。

德宗能含垢匿瑕,不佳兵尙勇,不然則取

李承之言,不委

希烈伐 必若玄宗採九齡之語,行三令之威,不然使豫山名位不高,委任得所,則羣黎未必陷於 **綾幽帥之嘗因亂得,謂神器之可以徼求。** 史朝義、秦宗權 暨弟爲亂階,身留京邑,小不如意,別懷異圖。 乘彼亂離,肆行暴虐,虔劉我郡邑,僭竊我衣裳,終雖滅亡,爲害斯甚, 一旦長驅江夷,徑入關中,見五輅之蒙塵,謂寶命之在 黄巢關茸微人, **崔蒲賤類**, 但樂荒雞之鳴,唯幸和變之 因饑饉之歲,躡 僖

贊曰:天地否閉,反逆亂常。 祿山犯闕,朱泚稱皇。賊巢陵突,羣豎披攘。徵其所以,

校勘記

存乎慢藏。

(1) 爲衙前將 「將」字各本原作「對」,據御覽卷一一三改。

- (三) 八年三月遷幽州盧龍節度等使 以上十三字各本原無,據御覽卷一一三補。
- (三) 加拜同平章事 「事」字各本原無,據御覽卷一一三補。
- 舒王謨 名謨。」據改。 「謨」字各本原作「讓」,御覽卷一一三作「謨」。本書卷一五○德宗諸子傳:「舒王誼,本
- (五) 出受偽官十七八焉 「八」字各本原作「人」,據御覽卷一一三改。
- (台) 詔左金吾衞上將軍 「韶」字各本原無,據獅覽卷一一六補。
- (七) 又遣將徐唐莒 「唐」字各本原作「君」,據御覽卷一一六、新書卷二二五下黃巢傳、通鑑卷二五

三考異引舊傳改。

- (*) 收復荆州 「荆」字各本原作「亳」,據御覽卷一一六、通鑑卷二五三考異引舊傳改。
- (九) 欲請授同正員將軍「將軍」,各本原作「軍將」,據通鑑卷二五三考異引舊傳改。
- 留將喬鈴守之「喬」字各本原作「奮」,據御覽卷一一六、通鑑卷二五四改。
- an 不知繳銳 「繳」字<a>合鈔卷二六〇下<a>黃巢傳作「皦」。
- 豆盧瑑 「豫」字各本原作「瓚」,據本書卷一七七豆盧豫傳、新書卷一八三劉鄴傳、通鑑卷二五

四改。下同。

晉 廣德公主幷賊 傳 第一百五十下 「幷」字聞本、殿本、懼盈齋本、廣本同,局本作「抱」,,合鈔卷二六〇下黃巢傳作 校 勘 記

「拒」。

(18) 虺蜴夜噬 「夜」字各本原作「反」,據本書卷一九下僖宗紀、冊府卷四三四改。

(I.E. 賊圍陳郡三百日 「三」字各本原無,據御覽卷一一六、通鑑卷二五五 一補。

いる楊能霍存 「能」字「存」字各本原無,據新書卷二二五下黃巢傳補。

Cio 以組練磔之 宝 相殺於營中 「中」字各本原作「州」,御覽卷一一六作「中」;按黃巢未至營州,據改。 计七史商権卷九二:「以組練磔之,當作縛之,字稍相似而誤。」

明重刻舊唐書聞序

馬,以迨班、范諸家。八書十志,經緯天人;八志十典,紘維政事。藏山刊石,繁紹聖經; 誇誕而已也。 倘書壁存,典訓不斁; 魯史麟絕, 紀宋失徵。 繼而有作,其惟司馬氏及小司 相爲表裏,疑信並傳,闕文不飾,以紀事實,以昭世代,故六經道明,萬世宗仰,非徒文藝之 書以紀事,謏聞爲聵;事以著代,間逸則遺。是故史氏之書,與天地相爲始終,六經

歷漢躋隋,炳發靈憲。是故王敎之要,國典之源,代有徵考,若覩蓍蔡。

以悉文武之臧否。宗室族屬,互以時敍;外戚、宦官,各以類別。良吏、酷吏,鑒戒具昭; 順,分傳蠻狄以立大防。卷凡二百一十有四,統名之曰唐書。 修十一志,始禮儀以終刑法,而巨細畢舉。列傳一千一百八十有奇,內以紀后妃之淑慝,外 远義、孝友,褒論悉當。 儒學、文苑,表以著達; 方妓、隱逸, 兼以察微。 詳傳列汝以彰婦忠義、孝友,褒論悉當。 儒學、文苑,表以著達; 方妓、隱逸, 兼以察微。 詳傳列汝以彰婦 史臣劉昫氏者,爰集館寮,博稽載典。纂修二十一本紀,首高祖以迄哀帝,而汝哲具昭。旁 一代之良史,秦、隋以下,罕有其儷,固後世之刑鑒具在也。 李唐嗣興,萬目畢舉,其經畫之精詳,維持之愼密,雖未上躡周軌,亦足並驟漢噩。 有宋迭興,分職書局,載輯唐鑑 識博學宏,才優義正,眞有唐

禹,繼纂唐書於昌朝,王、宋諸賢,相繼彙輯,復成一代之新書,遂亡劉氏之舊帙。

數百年之闞典,於是乎始有可稽矣。 喜無涯。 氏,長洲賀子隨得紀志於守溪公,遺籍俱出宋時模板。 以探往籍,更歷三載,竟莫有成。末復弭節姑蘇,窮搜力索,吳令朱子遂得列傳於光祿張 川張公,嘗奉旨校勘,總爲二十一史,刊證謬訛,粲然明備。 文,遐續百王之訓典,追配諸史,允備全書。 嘉靖乙未,卒刻於嘉靖戊戌。 **桷;爲山霞高,不終踰乎一墻。」憫哉斯言,益用惶忧。乃旁謀學屬,博訪諸司,間禮儒賢, 積集再期,酷志刊復,苦無善本,莫可繼志。** 詮謬司文學,徧歷輔畿,爰校六經,兼讎諸史,始知漢、晉以迄宋、元,皆有監本,司成甬 乃督同蘇庠,嚴爲校刻,司訓沈子,獨肩斯任,効勤四載,書幸成編。 匱直千金,刻 石江歐陽公聞而助以厚鎰,午山馮子、西郭陳子以迨郡邑諸長貳,威力輔以終事。 珠璣璀璨,亥豕盡刊;玉薤精嚴,塵葉罔翳。煥新一代之舊 物之成毁,信各有數,是書之成,夫豈偶哉。 因布多方,以惠多士。餘姚聞人詮序。 竊惟古人有云:「層臺雲構,所缺過乎榱 旬月之間,二美壁合,古訓有獲,私 惟劉氏唐書,鬱絕不傳,無所考 肇工於

清懼盈齋本舊唐書阮序

少,論者惜其未盡善焉。 本所據之書,止就殘篇斷簡,薈萃而成,初非全部,故魯魚亥豕之文,夏五郭公之句,正復不 卷後載有校勘姓氏,舊唐書之流傳於明代者,以此爲最古。而卷帙尙有闕佚,復假應天陳 代會要中但言書付史館,而未述刊版之事。宋嘉祐五年,頒新唐書於天下,而舊書遂不甚 撫按,與郡邑各官捐俸倡率,凡歷四年而後告成,其夏聚與刊布之難,悉詳原序。 沂、長洲王穀祥所藏本,彼此補葺,始爲完書。刻未及半,而詮以奉諱去官,繼其任者請諸 加尋訪,得紀志於吳縣王延喆家,得列傳於長洲張汴家。其書乃南宋紹興初年越州所刻, 有無固無從考證。明嘉靖乙未,餘姚聞人詮督學南畿,念舊書刻本漸少,懼其就湮,於是徧 郡齋讀書志及直齋書錄解題雖皆載其書,而不言始刊之歲月,是北宋以前之舊槧,其 有唐三百年正史,所關最鉅,後唐長興中韶修唐書,至後晉開運二年,方纂成奏上。五 特當時聞

訂, 各附考證於每卷之後。及四十七年編定四庫全書,特置此書於正史,而庋藏於三閣。 我朝稽古右文,度越前代,乾隆四年,敕武英殿校刻此書,於聞本脫誤之甚者,逐條釐 懼 五四〇五

妄改。 事。 修之書,人心不齊,議論多而成功少,每致卒業無期,故但能略舉大端,開其門徑而已。後 漏良多」,閣本之分校爲邵二雲學士,其集中所載提要云,「參核攷定,尙有待耳」。誠以官 之類,可以互證多訂此書者,亦廣爲尋校,加以斷制。其體裁義例,悉違殿本、閣本之成法, 列,并登載其考證;而沈氏新舊合鈔所辨析者,亦附見焉。若夫北宋初年,太平御覽、册府 陳卓人立,排列各本,討論羣籍,得校勘記共若干卷。凡殿本、閣本之與聞本異者,一一臚 新無舊,故特補其所未備也。復延甘泉羅茗香世琳、儀徵劉孟瞻文洪及其子伯山毓崧、 然自諾,獨力任之。延江都沈與九齡、殷時若煥、凌東笙躡,儀徵黃聖臺春熙, 泉岑紹周提舉建功,嗜學好書,尤喜鐫刻古籍,其友江都梅蘊生植之, 而推廣引申,以竟其緒。蓋殿本之總校爲沈歸愚尙書,其自作考證跋語云,「蒐羅未備,挂 不可枚舉,皆採而集之。他如通典、通鑑、唐會要、文苑英華以及十七史商権、廿二史效異 <u>沅</u>龜等書,皆成於歐、宋未修以前,其引唐史,確係劉書,所據實最初之本,足以補正聞本者 二十四史之內,坊肆間罕有單行者,寒素之家,購求匪易;而聞版久亡,其書尤爲難覓。 甘 全書字句,悉以殿本爲主,其間有刊刻小譌,爲人所共知者,即隨筆改正,外此則不敢 至於行款書式,則仿照汲古閣史書,蓋毛氏所刻十七史,久已風行海內, 又較殿本而加詳。 惟是閣本但繕寫而未發刻, 讀者旣艱於傳鈔 勸其重刊此書,遂慨 分任校字之 ';殿本列於 而唐書有 句容

人若不由一反三,因源及委,其何以成前賢未遂之志哉。今岑氏捐資旣勇,任事亦堅,能集

衆長,而成鉅業。

之福也。毛氏有此名有此福,而明於事者能效之,則今岑氏是也。揚州有力能刻古籍者甚 樂得序之。道光癸卯閏月乙未,予告體仁閣大學士晉太子太保揚州阮元序。 刊於道光壬寅九月,告成於癸卯七月,計未及一稘,而粲然大備。 衰年見此,洵爲快事,故 多,而願者究少,則以此事亦須有讀書之性情嗜好,與辦事之才識福分,談何易哉。 昔元童時,讀文選汲古閣本,每慨然慕毛氏之爲人,毛氏之名,今亦永垂藝苑,此毛氏 是書始

